

近代名家集彙刊

藝風堂文漫存



文史哲出版社 印行



藝風堂文漫存



近代名家集彙刊

昌彼得教授主編

藝風堂文漫存（全一冊）

撰者：繆

句讀者：昌

出版者：文

發行人：彭

發行所：文

荃

彼

哲

史

哲

正

出

版

版

版

社

雄

社

得

孫

定價新台幣三六〇元

中華民國六十二年二月初版

內政部核准登記證為內版臺業字一八五六號

臺北市羅斯福路一段72巷一弄四號之一
郵政劃撥儲金帳戶一六九九二五八
電話：三五一〇六九二五八

1202

究必印翻・有所權版

近代名家集彙刊簡介

甘泉鄉人稿二十四卷，餘稿二卷，年譜一卷，附四水子遺著一卷，邵農偶吟稿一卷，清錢泰吉撰。泰吉字輔宜，號警石，又號深廬，浙江嘉興人。少苦學，有高名，與從兄儀吉衍石，時盛稱嘉興二名。以廩貢爲海寧州訓導近三十年，造就甚衆。好聚書，精賞鑑，遇善本異籍非力所必不能得者，悉購藏或假錄。善讐校，丹鉛不離手，於四庫名籍點勘殆遍。所著曝書離記三卷，詳古刻源流，及收藏傳寫始末，盛行於世。咸豐末海寧遭太平軍亂，時其子應溥襄曾文正墓，迎養於安慶，同治二年卒，年七十三。著有海昌備志，清芬世守錄，海昌學職未人考，及甘泉鄉人稿等。

甘泉鄉人稿二十四卷，凡文二十卷、詩四卷。除曝書雜記及論學之文外，率多金石版本題跋，爲治金石及版本目錄要籍。咸豐四年初刻於海昌，版燬於兵燹。同治十一年再刻於南京，中復遭兵。光緒十一年據舊版補訂，增刻詩文餘稿二卷，並以泰吉長兄友泗，長子炳森之詩文各一卷，附刻於後。書首冠曾國藩撰墓表，王拯撰家傳，卷末附子應溥所撰年譜，視舊本略備。茲即據光緒本影印。

藝風堂文漫存十二卷，繆荃孫撰。荃孫字炎之，一字筱珊，號藝風，江蘇江陰人。光緒二年恩科

進士，改庶吉士，授編修，歷國史館纂修，主撰儒林、文苑、循吏、孝友、隱逸五傳，改提調。張之襄督鄂，召之重修湖北通志，旋主江寧鍾山書院。及書院改高等學堂，充監督，酌定課程，兼重中西。尋辭去，專主江南圖書館，杭州丁氏藏書得收之公藏，其力居多。宣統中京師圖書館設立，任正監督。辛亥革命後，卜居上海，杜門不出。民國三年趙爾巽主國史館，聘爲總纂。八年卒，年七十六。荃孫潛研經史，兼擅詞章，爾雅醇厚，茹古含今，爲同時流輩所推服。於金石版本目錄之學，最爲專門，收藏亦豐。生平所編著甚富，多傳於世。

荃孫詩文集曾經四次編刊，初刻於光緒二十六年，曰藝風堂文集，凡八卷。再刻於宣統二年，曰藝風堂續集，亦八卷。三刻於民國十年繆氏卒後，曰藝風堂文漫存。四刻於十七年，曰詩存四卷附碧香詞一卷。漫存凡辛壬稟三卷、癸甲稟四卷、乙丁稟五卷，總十二卷，所收起宣統三年迄民國六年凡七年間之詩文。每稟第一卷爲詩，二卷以下爲文。文部除羣書版本題跋及考據而外，多碑傳之作，率表章忠節，其紀年仿陶靖節例署甲子。蓋愜懷故國之思，故予忠節特再三致意。藝風堂文集續集及詩存存世較夥，漫存則稀見，茲據東瀛藏本影印，並輯夏孫桐撰行狀冠於卷首，以供治版本目錄及近代史學者之考研。

奇觚廬文集三卷，外集一卷，葉昌熾撰。昌熾字鞠常，晚自號緣督廬主人，江蘇長洲人。光緒十

五年進士，改庶吉士，授編修，充會典館幫總纂、國史館提調，遷國子司業，升侍講、督甘肅學政。卅二年朝廷開禮學館，延充顧問官。江蘇創立存古學堂，聘爲史學總教習。民國六年卒，年六十九。昌熾博通經史，尤長於金石目錄校勘之學，熟諳藏書掌故。嘗爲蔣鳳藻校鐵華館叢書，爲潘祖蔭校功順堂叢書，精埒顧千里。所著藏書紀事詩、語石、綠督廬日記抄及文集俱傳於世。

昌熾文章爾雅深厚，氣息直逼漢魏，所著奇觚頤文集凡三卷，外集一卷。上中二卷爲金石圖書題跋，皆考訂論學之文，下卷爲墓誌、雜傳、祭文等，外集率壽序應酬之文，皆近代之史料。原刻於民國十年，茲據以影印。昌熾卒後，友人曹元弼爲撰墓誌銘，述其生平甚詳，今自碑傳集補輯出冠於卷首。

舊京詩存八卷，文存八卷，孫雄撰。雄原名同康，號師鄭，一號鄭齋，別號樸盒，晚號儔翁，江蘇常熟人。卒業江陰南菁書院，出定海黃以周之門，治經史義理考據之學，兼及詞章，有文名。光緒十八年赴京師，入翁同龢幕府襄理筆札，登二十年甲午恩科進士，入詞館。出佐北洋學務，光緒間改官郵傳部，旋執教京師大學堂文科大學，爲監督。辛亥後灰心時事，思垂空言以自見，遂致力於詩文，有詩人之名。嘗撰讀經救國論六卷，區類爲六，曰政治、倫理、理財、教育、兵事、外交，條舉經文，分別部居。經文之下，節採漢宋諸儒及近世經生之說，並以己意疏通證明之，傳誦一時。民國廿



進士，改庶吉士，授編修，歷國史館纂修，主撰儒林、文苑、循吏、孝友、隱逸五傳，改提調。張之襄督鄂，召之重修湖北通志，旋主江寧鍾山書院。及書院改高等學堂，充監督，酌定課程，兼重中西。尋辭去，專主江南圖書館，杭州丁氏藏書得收之公藏，其力居多。宣統中京師圖書館設立，任正監督。辛亥革命後，卜居上海，杜門不出。民國三年趙爾巽主國史館，聘爲總纂。八年卒，年七十六。荃孫潛研經史，兼擅詞章，爾雅醇厚，茹古含今，爲同時流輩所推服。於金石版本目錄之學，最爲專門，收藏亦豐。生平所編著甚富，多傳於世。

荃孫詩文集曾經四次編刊，初刻於光緒二十六年，曰藝風堂文集，凡八卷。再刻於宣統二年，曰藝風堂續集，亦八卷。三刻於民國十年繆氏卒後，曰藝風堂文漫存。四刻於十七年，曰詩存四卷附碧香詞一卷。漫存凡辛壬稟三卷、癸甲稟四卷、乙丑稟五卷，總十二卷，所收起宣統三年迄民國六年凡七年間之詩文。每稟第一卷爲詩，二卷以下爲文。文部除羣書版本題跋及考據而外，多碑傳之作，率表章忠節，其紀年仿陶靖節例署甲子。蓋愜懷故國之思，故予忠節特再三致意。藝風堂文集續集及詩存存世較夥，漫存則稀見，茲據東瀛藏本影印，並輯夏孫桐撰行狀冠於卷首，以供治版本目錄及近代史學者之考研。

奇觚廬文集三卷，外集一卷，葉昌熾撰。昌熾字鞠常，晚自號綠督廬主人，江蘇長洲人。光緒十

繆蓺風先生行狀

夏孫桐

先生諱荃孫字炎之一字筱珊晚號蓺風江陰繆氏先世自宋南渡時宏毅公官統制駐兵毘陵遂家焉歷十一世至諱仁者於明中葉始居江陰申港鎮又九傳諱燧康熙中官浙江定海縣知縣有惠政歿祀名宦先生六世祖也曾祖諱秉奎邑庠生祖諱庭槐嘉慶乙丑進士官至甘肅平涼府知府考諱煥章道光丁酉順天舉人官貴州候補道先生生而穎異十一歲畢五經十二歲遭母瞿太恭人喪哀毀如成人事繼母薛太恭人能盡孝觀察公連試禮闈不得志從張忠武公國樞軍旣而入蜀省兄伯康公西陽州任所兵亂阻隔久不相聞咸豐庚申粵寇

陷江陰先生奉母渡江避亂居淮安肄業麗正書院爲漕帥吳勤惠公所識拔從院長丁儉卿先生受經學小學久之觀察公已得官佐黔撫田公

與恕

幕遣人迎眷中途聞田公去黔觀察

公亦牽註罷官復游蜀遂至成都時先生年二十有一從陽湖湯秋史先生肇究文史始爲攷訂之學會四川舉行丁卯正科並補壬戌恩科寄籍華陽應試獲舉改歸原籍先後入將軍崇文勤公總督吳勤惠公川東道姚彥士方伯幕徧歷川東北諸郡搜揚石刻始爲金石之學張文襄公視蜀學執贊門下爲撰書目答問始爲目錄之學蓋先生未通籍之先一時耆碩咸以著作之才相推重矣光緒丙子恩科成進士改庶吉士開館大課以重修庶常館賦命題擢第一次年散館一等授職編修在館職殫心著述暇卽日涉海王村書肆搜訪異本典衣購取知

交通假鈔校攷訂日益博通張文襄總纂順天府志招之相助
明志簡略二百餘年未有續修乃與文襄發凡起例以宋臨安
兩志爲法加恢擴焉旣而文襄出任晉撫遂繼爲總纂歷七年
而告成時惟鉅製已卯分校順天鄉試得士最盛福山王文敏
公銘榮以經策補薦獲售眾尤稱之歷充本衙門撰文教習庶

吉士國史館纂修總纂京察一等吳縣潘文勤公爲國史總裁
疏請編輯儒林文苑循吏孝友隱逸五傳賡續阮文達公所未
竟先奏派爲分纂尋偕南海譚叔裕先生同爲總纂後譚公外
任遂獨任其事文勤以憂去掌院徐蔭軒相國繼爲總裁初亦
甚相推挹旣而相國示以紀大奎易說命編入儒林傳先生謂
易有經學之易有術數之易朱子注參同契四庫列之道家而
不入經部大奎未可補入儒林相國亦首肯後有相忌者譖言

先生恃才獨斷遂相齟齬戊子丁繼母憂居廬數月整理五傳告成繕稿呈館始奉匱歸里主講南菁書院分經學詞章與定海黃元同先生分任之服闋起復京察覆帶引見記名以道府用未幾復奉觀察公諱主講山東濰源書院張文襄招主湖北經心書院未赴歸里營葬服闋充國史館提調甲午大考翰詹原列三等一名已拆卷露名徐張兩相國翁協揆奉命覆閱以題字筆誤改置三等一百二十四名先生以徐相國史館宿嫌有意求疵遂浩然有歸志矣張文襄聞而招之重修湖北通志逾年文襄移督兩江聘主江寧鍾山書院自丙申至辛丑主講凡六年復遙領常州龍城書院課士之暇一意刻書日事校勘叢書數集陸續告成金陵爲東南都會故家藏度時時散出蘇滬密邇佔客奔轅所收舊籍金石書畫乃益富庚子之變海內

震擾江南幸稍安及和議成朝廷銳意變法張文襄集東南名流於武昌以資討論先生應招往遂領江楚編譯書局在江寧舉其事改鍾山書院爲高等學堂充監督兼領中小學堂親赴日本考察學務歸乃酌定課程編輯課本一切草創中西之學兼重訪聘教員皆取淹通篤實之士講求教授管理之法實事求是力戒襲取皮毛陋習第一屆畢業諸生頗有明達通才後膺政治教育之選者屢吏援故事疏陳績學碩儒士林矜式詔加四品卿銜尋辭學堂監督專辦江南圖書館事時江浙藏書家常熟瞿氏歸安陸氏錢塘丁氏號爲鼎足陸氏書爲日本購去而丁氏亦中落時論頗懼蹈陸氏覆轍流落外邦急赴浙與議以七萬金全購善本書室所藏益之捐購之本至今海內各省圖書館美富以江南爲冠戊申張文襄管學部疏薦特旨徵

召以圖書館事未竟請緩行宣統紀元學部奏充京師圖書館正監督次年至京召對養心殿詔以學部參議候補時圖書館猶未建暫借城北積水潭廣化寺爲儲書之所既任事先分類清理書籍內閣大庫檢出元明舊帙其中宋本猶爲元師平宋時由臨安祕閣所收一鱗片甲有自來藏書家所未觀者集刻爲宋元本留眞譜牒文牌子序跋述源流者均著之加考一篇又編本館善本書目八卷各省志書目四卷初江蘇議修通志延爲總纂當事屢更迄無端緒至是始重定條例分授協纂諸人尅期編輯意俟京師圖書館規模畧具書目編成卽乞長假專辦志事無何湖北兵變東南諸省應之詔下遜位海內雲擾先生亦辭職歸矣自是卜居滬上慨歎滄桑杜門不出惟以書籍遺日整理舊著四方知舊大都避亂來滬訪書問字踵接於

門國變後文獻凋零咸懼國粹湮沒購書刻書之風轉盛吳興
劉翰怡張石銘兩君並哀集叢書咸向就正武進盛氏自建圖
書館雖無祕冊通行精本甚備亦請編書目寓滬遺老結詩社
先生年最高稱祭酒焉甲寅清史館開趙次珊尙書聘爲總纂
先生身爲舊史生平網羅文獻有遺山石園之志欣然應招先
爲條舉大綱貽書商榷及至館與同人集議開館之始多所贊
畫因不能久居京師趙尙書許攜書自隨以國史儒林文苑循
吏孝友隱逸五傳初稿原出手纂後經他人增改仍願引爲己
任閱兩年除循吏一傳讓歸他手餘四傳皆脫稿又成土司傳
明遺臣傳則國史所未具而刪輯者也又擬全書凡例一卷又
編明史列傳一編發明其每卷編次義法筆錄寄館以備印
證

段落擇人分任久之乃定議自任康熙一朝而時局日紛牽於生計遂分日力於所任史傳僅脫稿十之六七每自引以爲憾江蘇通志重議開局馮夢華中丞主之以金石一門非專家莫辦先生命子僧保預其事自發家藏榻本編錄考訂一手成之江陰續修縣志先生爲定大綱延里中耆舊通才任分纂而自總其成焉先生三十通籍早負時望以性剛不能諧俗棄官時甫逾五十取竹垞語以七品官歸田刻小印用識微尙後勉應召一出本擬卽賦遂初尋遭世變終隱海濱溯二十年來名山壇坫著述自娛自謂不以富貴易其樂也已未春感疾尋愈猶鉛槧不輟江陰志及通志金石皆於是秋告成十一月初一日卒於上海寄廬年七十有六先生恪守乾嘉諸老學派治經以漢學爲歸有清一代經說搜羅甚勤王葵園先生續刻經解多

所取資早膺史職於乙部致力最深拾遺訂誤悉本錢氏考異
王氏商榷家法於當代掌故徵求討論心得甚多爲文私淑全
氏鮎埼亭內外編以翔實爲主不尙空言凡考古述今論治論
學生平蘊蓄皆於文集中見焉駢體少喜小倉山房後乃取法
北江出入驛軒亦歸紀實而戒浮靡詩多指事類情主雅贍不
矜格調晚好輯詞而不多作酷嗜金石先後得劉燕庭韓小亭
馬硯孫瑛蘭坡崇雨舸樊文卿沈韵初諸家所藏楊本宦游所
至又得打碑人李雲從聶明光等並善搜訪於畿輔山右山左
大江南北及皖中石刻椎楊幾徧所編收藏目錄共得一萬有
八百餘種凡僞造摹刻無時地可考者皆不錄輒與瓦亦不預
後續得復千餘種藏本之富爲前此金石家所未有又補正孫
趙兩家訪碑錄爲金石分地錄初擬補續金石萃編先就遼金

元輯錄以非獨力能成輟而未作考證未有專書散見文集筆記及順天湖北江蘇金石志中目錄之學貫串古今尤慕士禮居黃氏早年助潘文勤公搜輯黃氏題跋編刻行世續得者江建霞及鄧秋湄分爲刻印後復有得經章式之吳印丞兩君薈萃諸本各將所得增入合爲一編晚乃索稿刊成海內藏書瞿楊丁陸諸家皆至契互通借閱資以鈔校自編藏書記欲然謂限於力僅可與陽湖孫氏五松園相頡頏續記及再續記較初編數且過之所校刻古書詳溯源委剖析異同具載於序跋論者謂與堯圃書跋允稱同調祕籍孤稿以力薄不能多刊每貽同志好事者如張文襄王葵園劉聚卿劉翰怡張石銘諸人所刻叢編每有贊助盛愚齋刻常州先哲遺書則全出先生藏本編校亦一手所成原擬分爲三集寫定目錄因辛亥之變就已

刻者結束尙餘二十種存俟同郡後來者賡續之筆記積數十冊皆闕掌故晚年志在理董畧創類例擬刪去重複瑣屑及習見者未及編成藏待來者其著述已刻者藝風堂文集八卷續集八卷辛壬稿三卷乙丁稿五卷金石目十八卷讀書記四卷藏書記八卷續藏書記八卷遼文存六卷續國朝碑傳集八十六卷常州詞錄三十一卷孔北海魏文靖韓致堯李忠毅年譜各一卷未刻者詩存四卷詞一卷尺牘二卷金石分地錄二十四卷再續藏書記不分卷碑傳集補遺十四卷秦淮廣紀十二卷代端陶齋撰壬寅消夏錄若干卷所編刻叢書雲自在龕叢書五集共十九種對雨樓叢書五卷藕香零拾三十八種煙畫東堂小品十二種自輯古書及國朝人小集家集皆在其中對雨樓刻成贈友餘版並藏於家孫桐同鄉里申之以婚姻在詞

館爲後進熟聞緒論知先生有經世才生平遇奇仕宦不達以
著述終老晚預修史亦未能行其志不得繼美石園世所同惜
身後未十年藏書已散則尤深慨歎者也曩曾據自編年譜兼
證著述代其家草行述茲復爲要刪略具學行梗概俾後之傳
儒林文苑者有所採擇焉辛未季秋夏孫桐謹狀

辛壬膏

辛酉冬月刊

藝風堂文漫存目

辛壬稿

卷一 詩

金陵雜感 和夏午詒元韻卽送之官京師並附贈詩

客杭雜詩 經秦亭山至溪飲庵 交蘆庵 秋雪

庵 金陵懷古 苦熱行 入都 題陳檢討洗桐圖

西涯 題梅邨小影二首並附和作 除夕四律

蚊 夏日偕寶瑞丞金拱北游上方山雜詩八首 書

唐志後 題張祖廉娟鏡樓圖 答甘遜詠殘紙 訪

慈仁寺 校蜀石經繫以四絕 讀史六首 題竹垞

圖 壬子重陽寄甘遜 消寒第一集周君夢坡劉君

語石招集徐園觀松雪所製風入松琴 消寒第二集

雪後劉君翰怡招集堅瓠齋用東坡聚星堂韻並禁體

消寒第四集詠臘八粥 消寒第五集題覃溪舊廬

東坡象 除夕消寒第六集和東坡饋歲別歲守歲三

詩原韻

卷二 碑銘傳序記

內閣學士兼禮部侍郎銜馮公墓志銘 贈尙書光祿

大夫安徽太和縣知縣鄒公神道碑 于香艸墓志銘

故榮祿大夫沈府君墓志銘 陳母周太夫人墓志

銘 章碩卿傳 丁修甫中書傳 重修信義志序

平湖葛氏書目序 愛日吟廬書畫錄序 書畫續錄

序 重刊木厓文集序 意園文略序 靜香書屋詩
鈔序 蔡浣霞證嚮齋詩序 陶廬續憶補詠序 周
夢坡靈峰志序 皖詞紀勝序

卷三 跋

孟子注疏四卷跋 四書纂疏十卷跋 五代史記跋
至元嘉禾志跋 唐貞觀條舉氏族事件卷跋 容
齋隨筆續筆跋 夷堅志再跋 游宦紀聞跋 冷齋
夜話跋 續夷堅志跋 古文集成前集跋 翠微南
征錄跋 徐公文集跋 藏春集跋 虞道園學古錄
跋 道園遺稿跋 石田集跋 剡源文鈔跋 圭齋
集跋 滋溪文稿跋 青陽集跋 姑蘇雜詠跋 元

音跋 有學集跋 陳皇士太僕啟禎兩朝遺詩錄跋
校本六唐人集跋 蘆川詞跋 明本拜月亭記跋
翁覃谿行樂十二圖跋

藝風堂文漫存卷一

江陰繆荃孫

辛丑藁

詩

金陵雜感

城上高樓又夕陽。極天秋思正茫茫。穉郎老去金陵怨。燕子
飛來玉殿荒。幾輩名流稱柱石。千秋棋局感滄桑。鍾山終古
青青在。不管人間霸業亡。

和夏午貽元韻卽送之官京師

聖道榛蕪徑迷昉。誰歟樹幟標軒爽。海底珊瑚十二重。欲采
精鏐糅作網。夏君矯矯人中龍。久官詞苑圖書掌。投我新詩
珠玉光。鐘鼓轉令爰居饗。走也生平酷嗜書。夢中猶作瑯環

想敢儕劉向充校讎差比陳農勤采訪漢碑

石唐卷久流傳

宋槧元鈔供鑒賞廣招演匠善裝治亦有寫官工造倣自從

島國求遺書拚擲紫標并黃榜詎宋珍籍無一存可惜明珠

棄草莽八千卷樓亦傾側扶持惟有神君仗載歸江左惠士

林功與曾胡相下上好古新貽石室編

羅叔蘊新寄沙州石室遺文殘年

權作書城長欲從鄭許追聖道說到乾嘉每神往歸去猶虞

玉宇寒景行不啻高山仰羨君先返海王村開卷能令眼界

廣

桂陽夏壽田編修贈詩

江南祕書今任昉劉班虞荀接英爽天下舊聞將散佚一代

龍門獨羅網尚書昔啟石室藏道家蓬萊公所掌文淵武英

古天祿祇與螭魚供一饗太乙青藜不得杖龍威禹書勞夢
想河閒得書過漢室江淮拾遺勤括訪淮南鴻寶號中祕汲
縣竹書求上賞遠溯北宋情雕鐫近者東夷能寫倣連廚大
置若⑤山紫檢金泥各標榜從來造字天雨泣豈止五厄愁
羸莽攫取或與蛟龍爭扶持賴可神明仗龍蟠十里氣森肅
竹箭松心皆直上惜無太學三千人孰經暫作諸生長天子
右文臣好學建元之初神一往存古豈知本不亡文武弛張
道俯仰且當雅拜漢公卿未辦短衣隨李廣

客杭雜詩

樹色山光積翠濃出雲樓閣數重重江湖左右相襟帶身在
吳山第一峰

瑯嬛仙館肇經室太傅遺風在眼前昨日定香亭畔過嫩筠
新水有餘妍

青衣洞口石蒙茸拂拭唐題草不縫絕似嘉州方響洞一泓
石髓滴丁冬

錢唐門外嫩晴天涼翠山光照眼鮮一路鳥呼泥滑滑連朝
風雨太聯綿

一溪屈曲繞魚磯新水三篙綠正肥買得小舟輕似葉兩頭
打槳去如飛

經秦亭山至溪飲庵

天陰無定容山轉得異境升高似躡梯俯窺真窺井浮青高
削屏積翠橫成嶺日落嵐氣濃雨足溪聲猛巨竹夾道生萬

綠不見影高處得小樓幽懷心目領不誦招隱篇無忘仁者
靜秦亭趨法華螺髻明妝靚

交蘆庵

渡水得茅庵厥名曰交蘆美樅爲棟梁白石爲階除寂寞講
經臺縱橫香積廚得悟清淨理眞成虛廓居樊榭主猶存香
光書已無卜居何縹緲二松各成圖

程松門
錢松壺

新羅尤著名煙

雲點染麤高風企前賢遐想徒區區

秋雪庵

庵以秋雪名蘆花風飄蕭今當二月時春雪業已消芳洲漸
迷漫縱目皆迢遙新蘆未長成參差水沒腰層層如相束短
短眞難描繫纜逢枯槎渡人尋短橋老僧如野鷗力作憩團

焦濠梁趣獨深鼓枻如相招

金陵懷古

渡江龍種歎飄零奇貨真成擁戴形大好河山新世界是何

天子小朝廷黎園漸變三軍相

阮大鍼兵侍素蟬視
師人謂黎園變相

槐國難

邀九廟靈王氣於今搖落盡故宮輦路草仍青

南巡法曲守遺型擊鼓吹簫永夜聽豈少長秋畱故劍可憐

買索傍前星荒朝賸有煙花錄請室重緇羅織經草草一年

容易過笛聲哀怨起荒汀

秋風鼓角廣陵城丞相居然拜表行枉有良謀控河濟何曾

飛檄過幽并赤眉難恃高無賴白眼偏逢阮步兵事到萬難

拚一死梅花嶺上涕縱橫

長板橋荒臘夕曛迴光寺古接晴雲舊游尙覓烏衣巷院本
難尋白練裙畫舫何人聽夜雨荒郊有鬼唱秋墳滄桑兩度
須臾過莫向前朝話舊聞

苦熱行

雨聲市月愁淋浪忽然天畔陽鳥翔炎官當空火傘張赫赫
大地難遁藏科頭赤足身徜徉白汗猶滴珍珠漿融風撲人
如沸湯炙手可畏席與牀趙盾獨坐中書堂牛毛法令推商
鞅來周侯索相頡頏酷吏之酷殊難當炎威迫我心徬徨肌
膚薰灼面目紅欲贖聖散無清涼並少琅玕青竹房鑱金裂
石書冊詳我欲似之逃何方礮車雲黑推阿香微雨不敵西
風狂但望年豐庶事康我雖觸熱殊無妨

入都

廿年歸里臥茅茨又奉 徵書入禁墀行李已無東道主句
罷英靈尤媿北山移生涯蟬蠹終無定得失雞蟲苦自知一
樣趨朝頻歎息也應不似少年時

挂冠昔日浩然歸自覺心期與世違天寶時妝人莫笑貞元
法曲聽應稀滄溟銜石同精衛太史占星失少微敢比陳農
司采訪晁陳尤馬蔡前徽

海鷗去住兩無心純盜虛聲每自箴不分推排成老物每於
邂逅遇知音晚晴幽草人爭慰華屋山丘感更深時張文襄
公師薨逝
對酒茫茫生百感那堪楚些與秦吟

題陳檢討洗桐圖爲冒鈍宦題

填詞圖與散花圖老輩題評卷軸麤涼翠一庭清似水洗桐
忽又仿佛迂

露頂掀髯坐石校雙僮丫髻髮鬅髻紫雲別去楊枝老清夜
何人伴一鐙

文人盛事慕詞科蠻語翻爲秀鐵呵如此魁能好才調不教
簪筆侍鑾坡

水繪名園今尙存琳琅寶墨重清門可憐遺翰無尋處我亦

東林後代孫

先文貞公遺集刻於常州先哲遺書曾輯拾遺一卷沈子封學使藏手札一通願以衍石先生

雁存禾中朋舊詩札手卷易之尙未允諾

西涯

涓涓細瀨勝塵沙路轉城陰水兩叉蝦菜亭空荒渚卸葵光

橋古御街斜長空黠黠天如墨老樹蒙茸雪作花

是日木冰今古

詩人多聚此玉延亭外卽西涯

題梅邨小影在叢蘭水石之間二首

帝子瀟湘去已遙祇畱恨葉與愁苗先生獨向蒲團坐惜日
悲風賦大招

墨瀟淋漓卞玉京詩心悱惻鹿樵生倩誰添作娉婷影撮合
琴河感舊情

仁和吳昌綬和作

桑海年華一夢過主恩歸許老煙波丹鉛鄭重傳家橐掩
卷零星涕淚多

先生幻想結僧伽亦有鬢妝在五華一曲圓圓應懺悔美人

終竟屬吾家

除夕四律

裏得青銅月一丸
避人無語立檐端
但求吉語來年應
不怕西風特地寒
到處香花稱利市
幾家樽酒話團圓
樂明朝顏色應殊眾
拂拭羅巾故故看

鏡聽

忽訝門前立雁行
百端舊債爲年忙
築臺何日同周赧
焚券無人學孟嘗
羅掘未能空宛宛
訴錙銖必較太強梁
寬人一著眞陰德
明歲從容取次償

索債

藝苑爭稱黃一廬
祭書盛事至今傳
琅嬛能到眞爲福
豚望全驅不慕仙
未必搜羅眞好事
卽令遇合亦前緣
源流聚散原泡影
慎弗輕歸海客船

祭書

銀燭雙輝照綺筵。鉅妝柏酒迓新年。松盆燄燼將殘夜。爆竹
聲喧欲曙天。已去光陰空戀爾。未來歲月更茫然。老夫一醉
無他想。紙帳梅花獨自眠。

守歲

蚊

一逢利口便生災。倏爾飛飛撲面來。鼓翅吟哦名士態。快心
譏刺小人才。暗中窺伺眞陰物理。外譏評亦禍胎。一醉黑甜
鄉裏去。任他成市又成雷。

夏日偕寶瑞丞金拱北游上方山雜詩八首

四面如城擁循溪。且入山山花開爛熳山。鳥聽縣蠻小雨止。
還作浮雲往復還。天梯兼石棧無路可躋攀。

疾風驅甚雨。驀地逐人來。鬱鬱天沈墨。涔涔地洗埃。亂山飛

怒瀑大壑響奔雷徑轉逢蘭若從容禮佛臺

大瑤香火地祠宇尙巍巍

兜率寺明太監馮保修有碑

室邃眾音寂山空

萬慮微天花消劫火佛日戀慈暉

僧談庚子兵事

香國殷勤護先鋤

種類非

牡丹臺中有一雜樹金拱北手拔之

石梯三百級梯盡卽茆庵踴壁身攀樹窺窗影落潭聲聞停
梵唄呼吸盡煙嵐七二枯寮在何人十日探

大好荆關手麻皮斧劈皴橫看青巖隄直上碧嶙峋偶作橫
斜機真同重累人不煩疏鑿力濃淡總天真

古樹緣成海前山復後山參天多磊落拔地少彎環落葉荒
途裏空腔斷壁閒婆娑生意好點綴碧屏顏

石穴大於屋傳聞住列仙土花無隙地石乳不論年濟勝慚

無具探奇別有天龍威如可遇我欲乞陳編

草樹肆縱橫潺潺聽有聲在中原未濁觸石忽相爭青嶂蒙
茸合紅橋略約橫夜深如靜聽都作玉琤琤

書唐志後

妻爲夫撰書

和淚搗辭竟體華卽看字跡亦簪花

書石不勒名必自書也

埽眉才子

誰堪並黔諡徐文曹大家

金玉不寶忠信代名理眞爲絕妙辭韻語能離脂粉氣敬姜
以外孰如之

大書深刻首金輪趙錄推尋語未眞新出此銘爲後繼再游
石壁訪房嶙

題張祖廉娟鏡樓圖

特築高樓^①阿嬌攜來寶鏡月澂霄十三郎著湖州薛良冶
名家閱兩朝

出匣光芒特地寒玉人何處倚闌干談箋精緻張鑑雋均作
吳興土物看

月上香修總擅名奚樓臨水亦崢嶸阿誰攝取眉峰影青弁
山高太秀生

答甘遜詠殘紙

揚文覆醬瓿趙札拭酒杯何如編類要郵筒信手裁狀紙印
作書宋畫糊成鞵今人百碎圖古人錦灰堆寸長有必錄何
物是棄材

訪慈仁寺

驅車徑入慈仁寺不見亭亭舊日松此是昔賢觴詠地
燕麥認前蹤

校蜀石經繫以四絕

少日從容注禮書

鄭君受業扶風已爲三禮學

老年寫定在精廬集思廣

益人難及采到烏程草木疏

鄭君歿於建安五年距孫吳立國二十有六年元恪之書或成

於早歲鄭君猶及見之耶

襄二春秋首尾全發凡起例想當年不知母氏家財造文選
開雕孰後先

補缺田侯善校訛蜀唐諱字漸消磨廿篇北宋公羊傳我比
河閒見較多

殘拓猶存十九行穀梁字體最飛揚紙邊廿四分明認石數

由來記更詳

穀梁紙末有廿四二字疑是記石數大約每紙有之翦裝時割棄耳前人未經言及

讀史六首

重見昇平五十年
櫓槍驚地徧垓垠
信傳上谷馳銀鵲
風急臺城墮紙鳶
攘臂莠民團白甲
傷心妖讖改黃天
眼前多少蒼生淚
化作長河灌百川

肢削民脂飽列營
誰知轉眼卽翻城
達官但識騎豬竄
若輩猶聞走狗烹

同黨自相殘殺

已結王環飛棹隊
漸通周寶後樓兵
棘門灞上原兒戲
都作狺狺反噬聲

紛紛債帥盡登壇
廣輦金錢結眾歡
齊虜得官憑口舌
庸奴報國少心肝
大言不覺千夫辟
債事方知一死難
不降歐刀伸
祖制誰能隻手挽
狂瀾

朝野騷呼慶息烽唐虞禪讓文重逢代言已付劉京叔勸進
偏多阮嗣宗莽莽河山空逐鹿紛紛冠蓋競從龍謂言甘受
商於紿忘卻君恩十葉醺

宣撫西南付重臣可憐徧地盡黃巾已開犴狴寬凶黨更倚
豺狼作護身玉壘錦江都減色瑤籤寶笈亦成塵不降不走
甘投死大節觥觥只一人

一軍夜半脫巾呼駭象奔鯨徧四隅縱寇豈能寬趙范多財
畢竟累齊奴燭天烽火驚宮闕列隊弓刀塞道途浩劫再逢
剛一紀令人肆口說遷都

題竹垞圖

舍南舍北盡牙籤萬竹陰陰綠到檐欲望九峰山色好小樓

一角幾時添

後人慕古屢增修故址流傳二百秋劉井柯亭俱蔓草何人

道古訪瀛洲

瀛洲述古錄未刻禁本在程棊同年處屢屬錄副本應也

簪筆曾經侍玉鑾承恩畢竟少孤寒著書翻是還家樂我亦

歸田七品官

甲午歸來刻以七品官歸田小印慕先生也

先生綺歲我頽齡瞥眼滄桑一剎經滿地干戈歸不得可憐

野史并無亭

余熟悉國朝三百年掌故史館實錄大

据依只以我筆記當壬辰雜編耳野史亭元遺山事

壬子重陽寄甘遜

去年重九豫離筵爲我征途策萬全但覺深情非率爾可憐
後會總茫然滿城風雨來杯底一夢滄桑過枕邊今日海濱

增寂寞遙瞻薊北寄雲箋

消寒第一集周君夢坡劉君語石招集徐園觀松雪所製風

入松琴

三尺古琴蛇腹裂中有雅音震寥泝琴面大書風入松琴池
小款趙松雪松雪家住苕溪湄秀眉紅頰天人姿水晶宮外
紅茵舊想見安絃操縵時皋亭山下軍烽急白雁飛來宗社
泣此時彈出變徵聲鉛淚銅槃雙袖溼佳耦如仙管道昇雍
前光後皆飛騰此時彈出太平引蓮花莊冷湖波激琴原一
文悟絕詣集中有琴原一篇六絃七絃追古製焦桐種自許旌陽集中
有鮮于伯幾贈琴云名手招來姜伯惠亦見集中七百餘載歸周
是許旌陽手植詩君羨君好樂兼工文松聲池館秋絃老摩挲古物梅花紋是

日消寒眾賓集五家指法誇同習

是日能琴者五人

傷心彷彿宋元

閒聽風聽水均鳴咽

消寒第二集雪後劉君翰怡招集堅瓠齋用東坡聚星堂韻
並禁體

海風吹盡江頭葉入冬無雨至後雪座中笠屐皆超然檻底
江山倍奇絕但覺中庭霜檜明只愁後圃風篁折天邊煙樹
盡微茫水外村蹊半明滅酩酊成歡杯屢傾又尖鬪韻箋頻
掣畏寒不覺肩宇聳遠望尤虞眼波纈天公曾誤吳元濟蔡
州舊事成談屑兵戈四起坤軸翻桑海一昔颶輪瞥坡公吟
興繼永叔詩話餘情續世說可憐卅萬防邊兵朔方陳脫馬
蹶鐵

消寒第四集詠臘八粥

消寒九交三灌佛臘逢八炊煙生比屋盛會傳古剎歲豐禾
乃登田腴苗勿掇采薪金試束剝粒玉頻刮流泉凍白凝宿
火熾紅察回甘市錫澆薦新園果刷瓊膏研鉢香珠屑流匙
滑丈室揚芬芳大廚增喚嚼雙弓水乳融十地癡聾拔獻糜
忙牧女黏牡猜大猾饒招馴鴿翔偷防飢鼠黠糗餌同簸筵
冰齏互齟齬禪心悟鐙傳果腹羞羹頡晝課聽木魚仁風化
回鶻禮拜寺瓶沙正布筵香積記納枯和麥近麤糲鄉人有麥屑麤
粥亦煮粥燕桃互嘲哂加餐娛來賓謝惠播華札風物近東皇供養
極西汎伊蒲果欲證祇樹芽漸茁巡檐索梅花酒罷風枝戛
消寒第五集題覃溪舊臧東坡象

竄迹南荒又暮年玉堂人物地行僊任他犬吠兒童笑笠屐
風神總灑然

正值熙朝全盛時寶蘇歲獻壽蘇詩西樓名帖今何處水碧

山青杜宇悲

翁得天際烏雲帖寶蘇室之名由此西樓帖十卷歸托活絡忠敏公公殉節於蜀今不知所在

矣

除夕消寒第六集和東坡饋歲別歲守歲三詩次原韻

佳節思弟弟會食謝僚佐分甘爲成禮達意非好貨紅皺味

倍腴黃團實獨大

韓孟城南聯句紅皺黃團漁隱叢話謂甘棗瓜蓰近人謂紅皺爲辣椒皆禦冬之旨

也著撥甕玉蛆浮登盤金鯽臥割鮮叩獵戶茹素參高座小倦

理藥鑪解渴尋茶磨言愁始欲愁得過姑且過萬般空妄想

只有詩唱和饋歲

一去歎不復常論速與遲問歲歲欲行歎如放豚追飄蓬
蓬然南海北海涯卽此停留際猶是燕樂時北廚誇燔炙南
食飫甘肥相將歌驪駒慎弗罹酒悲達變羅含序更新裴秀
辭願與歲俱改不知筋力衰

別族

逝若過隙駒捷若緣壁蛇戈無魯陽揮道少董公遮別矣更
不回吾將奈歲何傷心欲慟哭羣小轉笑譁杜門强支持惟
虞馬策過坐待更漏轉不覺星河斜一歲又一歲萬事空蹉
跎少壯成衰老轉將耆壽誇

守歲

藝風堂文別存卷一

藝風堂文漫存卷二

江陰繆荃孫

辛壬藁

文

內閣學士兼禮部侍郎銜馮公墓志銘

天子卽位之元年舉行

恩科聯棠馮公以一甲第三人及第。公夙工書。一時以爲得人。次年散館。同人咸留京肄業。公邀同年曹中丞鴻勛、吳侍郎樹梅、倪太守恩齡、黃編修彝年、王讀學錫蕃、陸文慎寶忠、馮觀察金鑑、檢討崧生及荃孫十人爲詩賦課。月兩集。散館試均及格。嗣後考差課大考課。自丙子至丁亥前後十二年。已卯又同分順天鄉試房。交誼可謂至密矣。公在侍讀任。逢

大考。洊升侍講學士。遂躋閣學。在同年爲最顯。不一年陪祀天壇。感寒暴卒。嗚呼傷已。今年孫爾繩以事略求志公墓。以荃孫之交誼。何敢以不文辭。謹按事略。公諱文蔚。字修重。別字聯棠。浙江歸安人。曾祖昭祖淵。父榮甲。以公貴。贈光祿大夫。母皆。

贈一品夫人。公讀書聰穎。中遇寇難。流離瑣尾。未嘗廢學。光緒乙亥。丙子聯捷及第。授編修。歷升贊善。中允。洗馬。侍講。侍讀。侍講學士。少詹事。詹事。內閣學士。兼禮部侍郎。歷署都察院右副都御史。宗人府府丞。歷充。

日講起居注官。

咸安宮總裁。

文淵閣校理、本衙門撰文教習庶吉士、己卯科順天同考官、
壬午科河南學政、甲午科江南正考官、公天性孝友、遇事能
斷、特以文學侍從之臣、未見有所設施、然提督中州學政、倖
竇悉杜、名流悉拔、稍稍流露於一二、及將大用、公又不祿、屈
指丙子同年調鼎、肅領封圻者、殊不乏人、然皆在公後、亦可
見公之才氣發越矣、公卒於光緒二十三年十一月二十八
日、年五十有六、以二十九年歸葬於歸安縣之道場山南麓、
娶沈氏、生子瑞耆、續夏氏、生子瑞書、官江西知縣、後公
十四年歿於江西、早夭、孫二人、爾繩煒、今年壬子、去丙
子三十有七年、同年存者寥寥矣、荃孫迺補爲墓銘、銘曰、
祥麟一角、威鳳五色、揚於王庭、光我

上國既豐其遇，又嗇其年，可知者人難測者天。昨歲京華，君門重過，舊雨不逢，淒然淚墮，嗟余後死，已值滄桑。願地下之差樂，願把臂而翱翔。

贈尙書光祿大夫安徽太和縣知縣鄒公神道碑

宣統二年十月，荃孫由學部調至京師外務部，鄒尙書以其尊人

贈光祿大夫安徽太和縣知縣雋之鄒公事略見旃，商立隧道之文。荃孫忝附戚末，其何敢辭。按事略公姓鄒氏，諱鍾俊，字雋之，號師梅，一號補拙，江蘇吳縣人。始祖實唐曲江令，家晉陵。二十六世祖浩以諫立后兩遭貶謫，追贈寶文閣學士，諡曰忠。世稱道鄉先生。十七世祖宏達由常遷蘇之樂橋，遂

定居蘇州。曾祖兆棠

贈奉政大夫。母

贈宜人。祖炳初。本生祖炳蔚。父祖堂。安徽建平梅渚巡檢。均

贈奉政大夫。

累贈光祿大夫。母均

贈宜人

累贈一品夫人。梅渚公有治行。生子二。公爲長。孝友敦敏。出於自然。博覽羣書。尤好經世之學。隨侍梅渚官所。偶擬公牘。下筆精確。道光之末。災祲頻仍。風俗凋窳。梅渚公廣儲先哲。精理名言。命公編輯。究儒先之格言。明感應之至理。體察身心。切於日用。其有意所欲言。而諸書未載者。並令自抒所見。

撰擬審定期年書成命曰人生必讀書公自謂學道愛人本於庭訓是書之力爲多嗚呼可謂教必有方德培其本者矣屢試不售遭觀閔凶遂屏帖括究心吏事家鄉遭亂扶持出險同治乙丑皖撫喬勤恪公檄致幕府佐定漕折綜核軍需是公出山之始旋保知縣升銜花翎

奏補太平縣辛未履任公自筮仕譽望孟晉以勤結上以誠待下所至民說所去民思補太平調太和權懷甯早陽渦陽蕪湖各縣六安直州兩權和州釐稅兢兢業業數十年如一日而垂老告歸清貧如舊脂膏不潤人爲公惜然而後嗣昌熾侍奉聿隆尙書獲科第踐要樞公猶及見之受一品封孫曾林立天之報施理不爽也近世州縣幹材均盡心於折獄

平盜以顯其能。公獨勤卹民隱，培植元氣，立不拔之基。其見固有異於常人，而收效尤遠。其興禮教也，在太平舉行鄉飲酒禮，並著鄉飲簡明說，定闔邑祠規，荆仙源書院，廣購書籍，啟迪秀士。在懷甯考定文廟樂器，在六安舉賓興禮，在阜陽重建節孝祠，呂邱氏殉節，爲文祭之。在太和刻先聖賢儒事蹟，重建細陽書院，皆關繫人心風俗，以化其桀驁之氣，納之於禮樂之途。故其感人尤深，其興水利也，在懷甯修廣泰圩，隄防鞏固，波濤不驚。杭稻萬頃，乃亦有秋。在阜陽治西湖，淤者濬之，塞者通之。購浙桑植湖塢，以興蠶織之利。在蕪湖力保江圩，在渦陽值鄭工，河決溢及渦南，乃開茨河，以工代賑。民困稍蘇，水利亦廣，其治獄也，在太平王霖雨家劫案，務獲

眞盜胡登渡等。謝江發命案。證明始末。兩案誣累。悉以寬釋。鹽勇緝私。鳴槍驚越嶺者。落水死五人。拘勇究詢。大府檄下。詰以袒庇。公執辨不撓。事得解。而以公臆。領鹽繳價。以杜後患。在渦陽。王周氏命案。詰驗得實。慎以清株累。嚴以懲姑息。小民獲甦。上官亦信之。其平盜也。在太和。立平徐思銳之亂。解釋漢回械鬪。在蕪湖。與郭軍門寶昌協和。守兩梁山。軍民不擾。然治獄獲盜。他人恃爲見長者。公亦未後於人。而存心不繫於此。嘗謂經正民興。衣食足乃知禮義。故所至以興養立教爲首務。雖職輕任淺。或窘不得施。或設施未竟。卽去。而公則先勞無倦。曾未敢一日自逸。皖北風氣剛勁。治尙武健。公發姦摘伏。人不敢欺。而矜卹民命。無辜者立釋之。卽以此

忤上官意弗顧也。皖南風氣柔弱。治尙平和。公一意拊循。休養生息。俾民自利。其利致功於數十年之前。收效於數十年之後。民豈無心。至今思公不寔。蓋公以人生必讀書爲之根本。上以企道鄉先生之傳。豈不偉哉。公餘之暇。并愛游覽。阜陽西湖。修宋晏文清。歐陽文忠。蘇文忠。呂正獻。四賢祠。宋太平令孫覺。剏修眾樂亭。明令劉元凱重建。公爲修之。卽以祀孫劉二公。亭面山臨水。太平勝地。時往憑眺。與父老共話桑麻。鄉民采新茶烹山泉以進。輒爲之引一甌焉。以實任太平太和均兩任。自號旣且軒主人。以示不忘兩邑之意。兩邑人感之。亦勝於他人。壬辰公乞歸鄉里。就養京邸。以元配金夫人不祿南歸。丙申十月二十二日卒於家。年六十有七。安徽

士紳呈請宣付

史館奉

旨俞允並祀栗主於眾樂亭與孫劉同龕公而有知想魂魄猶應戀此也配江陰金氏子五嘉來丙戌進士禮部主事遞遷至外務部尙書會辦大臣嘉立補用知縣署廣東海山淡水場大使嘉玉附貢生嘉永國學生嘉義江西安義樂平知縣湖北候補知府孫十二曾孫四丙申十二月二十二日葬於長洲縣二都十六圖圖山村之高塾山與金夫人合祔禮也荃孫昔年耳熟穀行曾接警欵敢掇大略勒於貞石銘曰聖經治平先修身擇言制行醇乎醇精思醇粹通鬼神聖言富庶歸諸教制治本根在學校栽之培之無速效公也終身

守厥言。皖南皖北治行敦。求忠必於孝子門。圖山之陽藏體魄。子孫隆隆沐遺澤。後有弔者視貞石。

于香艸墓志銘

白唐貞觀尊崇南學。而兩漢之家法以乖。

國朝乾嘉名流。始治專門。力追兩漢。至咸同時少衰。迄今漸滅殆盡矣。南匯于君香艸。猶能鉤沈拾燼。而卓然成大家。真豪傑之士哉。君名鬯。字醴尊。自號香艸。祖祐吉。廩貢生。候選教諭。父爾昌。邑增生。母馮太孺人。以節孝著。本生父爾耆。君幼慧。專力治經。不屑屑爲俗學。十六補諸生。登光緒丁酉拔貢。得直隸州州判。以本生母年高。絕仕進。黃菊屏先生爲署書室曰娛親。著書紀實也。舉經濟特科。亦不赴。馮太孺人苦

節三十年卒

旨建坊。君節尚衣食。得金五百。建坊墓道。而心始大慰。本生母卒。哀毀致病。縣延數年。遂以不起。宣統庚戌七月十二日卒。年五十有七。元配張氏。續室黃。再續朱子五。今存大同昱三孫。葬本邑天字圩。君墨守漢學。以形聲故訓展轉通假之例。徧讀周秦漢魏古書。刊正奪誤。稽合同異。成校書六十卷。續校二十三卷。戰國策注三十三卷。近時與俞氏平議。孫氏札謬。卓然爲三大師。非他人小小補苴能共語矣。荃孫久儀其人。又讀其書。因君友人之請。而願爲之銘。銘曰。

天下滔滔。羣言廢經。君從漢故。徑入孔庭。醒醒樸學。衛鄭伸許。四達八窗。通知今古。著書一尺。入木未半。世有通人。當無

河漢君友君子。能傳君書。恆幹雖掩。遺憾庶無。

故榮祿大夫沈府君墓志銘

君諱燮澤。字子煥。浙江歸安人。歸安沈氏均梁侍中領尚書令建昌侯裔。世居湖州。高祖瑞昌。祖詮。歷任廣東等縣候補知州。父桂榮。廣東候補通判。以賈起家。生子二。君其次也。沈潛好學。爲文簡潔。自喜如其爲人。早入邑庠。與兄樹鏞有二難之目。未幾兄病廢。君目擊而心傷之。遂亦成疾。時發時愈。纏綿二十年。卒於光緒己亥五月二十五日。年甫四十。庚戌葬於吳縣之堯峰山。夫人劉氏。同邑人。嫻書算。知大義。警且勸學。有古媛風。君病多年。婦代子職。侍衰翁。事病夫。內外家政。一身督理。生二子二女。一子一女殤。夫人卒於宣統元年。

七月十六日。年五十二歲。女采芝殉焉。子邑廩生以三品銜郎中分部學習。加三級請封。

贈君榮祿大夫。夫人一品夫人。而。又傷於毀。後夫人一月亦歿。嗣孫福祐嗣昌文潮。將以本年十一月改葬君於歸安馬池潭。劉夫人祔焉。君繼先業。相時接物。廉取厚蓄。益大厥家。又復睦嫻任卹。施予不貲。夫人於己酉歲集戚族。析產授之。曰。吾爲沈氏婦。雖處境豐裕。而二十年來無一日不在憂危恐懼之中。爾等勿忘吾之用心苦也。吾族繁衍。吾於長者恭順之。貧者賙卹之。卽偶有非禮相加。而情恕理遣。弗與計較。今恃祖宗蔭。稍有餘積。與同族鈞之。故卒之日。無不哭失聲。遺愛人人深也。嗣昌等因吾友以求銘。迺作銘曰。

深山幽澤。芝蘭獨芳。君處豐腴。不改其常。善守能施。善用能節。芣苢無靈。杞梓遽折。仁者必勇。莫如夫人。揮斥萬鎰。沐浴九姻。潤身不侈。守約不嗇。君子難之。矧在婦德。寂寂黃壤。蕭蕭白楊。幽竈久安。斯名不忘。

陳母周太夫人墓志銘

宣統庚戌六月。同邑陳氏壽母周太夫人歿於里第。年九十有一矣。子熾唐。以進士工部郎候選。道還家侍奉。前後二十餘年。孫男六人。曾孫三人。家道隆厚。閭里輯睦。太夫人孝養之隆。視聽之樂。行表劉傳。言垂班誡。夔乎尙矣。熾唐奉行述入。都求所以表揚其親。所謂孝子之心。有加無已者耶。荃孫忝附世末。聞見較確。其何敢辭。爰作銘曰。

潁川陳氏。江陰著姓。簪纓鼎盛。維太夫人。系出汝南。姆教素諳。觥觥茂族。饌金炊玉。適禮合俗。年二十四。迺嬪於陳。琴瑟和均。語其任卹。歲蠲鉅萬。倉修橋建。語其收藏。卷軸琳琅。佞宋貳唐。語其園林。花木綺麗。池臺虧蔽。語其臨摹。正叔折枝。太傅臨池。不恃貴顯。苦茶甘齋。必衷以禮。東南鼎沸。烽火搶攘。一葦而杭。枯菀雖殊。分惠如舊。親朋耆耆。劫定歸來。苟完田廬。樂且奚如。夫子及艾。驟捐館舍。哀號日夜。藐是諸孤。屬未亡人。俾廁縉紳。維時家門。科第鵲起。焉能自己。驚人一鳴。水部服官。出使閉關。萬里重洋。考察咨度。遠狎蛟鰐。還

朝覆

命。歸侍老親。日杜重闔。依隨親舍。冬溫夏清。扶持疾病。薄游

山左。保易章徽。聊佐萊衣。維太夫人。行年九秩。神明專壹。繞膝孫曾。兼及外姻。約三十人。驕奢是防。躬率以儉。樽節收斂。慈訓良言。奕奕清門。垂裕後昆。江城左右。兼全福壽。於今罕覩。恆幹弗居。全受全歸。難駐春暉。子也哀毀。遠道致敬。函表懿行。合祔古禮。鬱鬱佳城。巍巍令名。令名伊何。爰銘貞石。永伴松柏。

章碩卿傳

章君壽康。原名貞。字碩卿。浙江會稽人。父雅瀛。官四川布政司照磨。鄧井關縣丞。爲佐貳中最優之缺。席豐履厚。人皆羨之。是時蜀中游宦子弟。類皆鮮衣怒馬。絲竹盧雉。吟朋狎客。三五成羣。號爲豪舉。君爲單衣窘步。躑躅會府街後宰門書

肆中或購或閱。與余數數遇。以爲寒士也。咨詢門閥。則大驚。與談版本源流。貫串如流水。則又大異。余引君爲同志。君亦以余爲知己。十日必三四晤。余時以君稱說於朋儕。前眾皆目笑。以余以書餽君。而冀君之助也。余亦不與眾辨。辛未應川東道姚彥侍記室之招。彥侍出錢獻之。新斟注漢書地理志。徐星伯手寫各家考證於其書眉。以爲佳本。君請刻之。市歲畢。歸原書於姚氏。是爲君刻書之始。乙亥。余爲張文襄公撰書目。會間。時引君爲助。文襄知之。亦禮君爲座上客。向之笑君者。又無不奇君。君終落寞如故。川中書賈日集於門。雲南湖北販書來者。無不投君。各如其意而去。所收乃大富。又復廣捐金石。鑒別書畫。與錢徐山。錢鐵江。宣麓公。沈吟樵。諸

君交。意氣益發舒矣。丁丑君以知縣分發湖北。入都引見。余供職詞垣。同寓永興寺。君挾巨資。廣收書籍。至揚蘇。書賈聞風而來。捆百箱出都。到鄂。丁父艱。仍旋蜀。所刻亦漸富。乙酉再回鄂中。補嘉魚縣知縣。到任未久。適

欽差查辦湖南事件入城。君未遠接。大怒。回鄂言之裕制軍。遂以玩視民瘼。日以刻書爲事。降一級調用矣。君以三月到任。舉債辦奏銷。十月交卸。未及收漕。遂大困。舉所儲書賤價售之以完公虧。已而投文喪公於廣東。漸罄所藏。先金文後碑版。最後盡出藏書。刻板悉數售之。往來湖北江甯。卒鬱鬱不得志。而治生之術亦少差。光緒丙午。罹外證。歿於湖北。年止五十有七。並無子息。文襄聞其卒也。助之六百元。藉以殮

葬悲哉。君豪於酒。食量兼人。素習歐書。中年忽喜摹宋本。今存其手鈔敬鄉錄。友林乙集。小畜外集數種。每一展玩。如對故人。而音容不得見矣。略敘舊事。藉以傳君。並列所刻書於後。

式訓堂叢書初集

古易音訓二卷

宋咸熙輯

通經表二卷

洪亮吉

漢書西域傳補注二卷

徐松

晉書地理志新補正五卷

畢沅

乾道臨安志三卷

周際

弟子職集解一卷

洪亮吉

呂子校補一卷

蔡雲

竹汀日記鈔三卷

錢大昕

經籍跋文

附對策

陳鱣

拜經樓藏書題跋記五卷附錄一卷

吳壽陽

曝書雜記三卷

錢泰吉

溉亭述古錄二卷

錢塘

金石例補一卷

郭麐

志銘廣例二卷

梁玉繩

式訓堂叢書二集

毛詩重言一卷雙聲疊韻說一卷

王筠

戰國策釋地二卷

張琦

弟子職正音一卷

王筠

金石例十卷

元潘昂霄

墓銘舉例四卷

明王行

金石要例一卷

黃宗羲

南江札記四卷

邵晉涵

兩同書二卷

唐羅隱

讒書五卷

邕州小集一卷

宋陶與弼

式訓堂叢書三集

春秋夏正二卷

胡天游

家語疏證六卷

孫志祖

鍾山札記四卷龍城札記三卷

盧文弨

知聖道齋讀書跋二卷

彭元瑞

平津館鑒藏記三卷補遺一卷續編一卷

孫星衍

廉石居藏書記二卷

孫星衍

銅鑿斗齋隨筆八卷

沈濤

癖談六卷

蔡雲

疑年表一卷超辰表一卷

江日慎

後甲集二卷

章大來

晚學集八卷

桂馥

元魏滎陽鄭文公摩崖碑跋

諸可寶

單行本

國語正義二十一卷

董增齡

金史詳校十卷

施國祁

衢本郡齋讀書志二十卷

朱晃公武

史記志疑三十六卷

梁玉繩

過庭錄十六卷

朱用鳳

字林攷逸八卷

任大椿輯

錢保塘校補

癸巳類藪十五卷

俞正燮

仿宋本陶集十卷

晉陶潛

仿拜經樓陶詩集注四卷

宋湯漢

文字蒙求四卷

王筠

新斟注地理志集釋

徐松

絕妙好詞附詞選三卷 宋周密

水經注釋四十卷附錄二卷水經注箋刊誤十二卷 趙一清

水經釋地八卷 孔繼涵

水經注圖說殘藁四卷 董祐誠

今水經一卷 黃宗義

丁修甫中書傳

光緒三年荃孫應禮部試。於同年歸安錢匄仙振常座上議。君眉宇清曠。問學淹雅。遂相往還。迨戊戌到杭州。始登八千卷樓。欽家教之整齊。覩圖書之美富。然後知君之至行。不僅目爲學人也。今年八月忽奉君訃。感懷悽愴。隨值亂事。航海南歸。君之子左等以狀求爲傳。其何敢辭。按狀君名立誠。

字修甫。號慕清。又號辛老。先世自山陰遷杭州。遂爲錢塘著姓。曾祖國典。布政使理問銜。妣初續娶陳氏。祖英。道銜。候選同知。妣姚氏。封恭人。父中。候選主事。以恭搜。

四庫全書奉歸

文瀾閣。經巡撫入奏

賞四品頂戴。學者稱竹舟先生。妣凌氏。封恭人。昆弟二。君爲長。天性過人。卅角卽善承色笑。咸豐戊午。侍母養疴錢塘門外小槐窠。時年九歲。得疾。每飯必吐。母暇授書人詩。爲陶寫性情。計讀至數百篇。遂能韻語。隨口吟哦。曾詠西湖風花雪月四景。首爲業師姚小荷思壽所賞。庚申二月。粵逆陷杭州。避松江。又避青浦方家窠。又避南匯下沙場。十月泛海至甬。

辛酉正月至餘姚。土寇起。復返杭。誦讀如恆。雖至粵匪薄城。而仍不輟。十一月杭州再陷。全家四竄。君僞爲跛者。獲免。途遇徐媼。乞食以活。越三日。遇叔父松生先生於田家園。金龍四大王廟。挈之出險。次日抵江干。又遇賊。仍僞爲跛狀。賊用力曳之。君忍痛縮足。始縱之行。渡江由西興達蕭山。君旣以智免。而念父散失。憂愁成病。壬戌春始行團聚。遂渡曹娥江。經慈溪至奉浦。輿盜艇塞途。所歷甚險。及抵上海。已五月六日矣。又渡江至通州。繼至如皋。寓冒氏屋。延俞先生少蘅光組授讀。先生以介壽杯三字命對。君以宜春帖應之。又以落花生花落始生命對。復以開盒笑盒開如笑應之。少蘅嘉其敏捷。同治甲子杭城復始回杭。習舉子業。卽有聲譽。魏稼

孫嵯乃嘉之。以女字焉。同治丁卯補錢塘縣學生員肄業。詎經東城紫陽崇文各書院院長薛慰農時雨、高伯平均儒、章采南、盩俞曲園樾馬春陽傳照諸先生均賞之。光緒乙亥恩科以第二人中式。是冬父命由山東陸道入都。訓之以先德。經營燕魯。鴻雪猶存。俾知先世勲業之艱。君亦藉以慰壯游之志。隨地訪求。悉紀以詩。次年二月抵京。入試不遇。畱京就學。日與袁爽秋、昶錢筵仙諸老剖析疑義。暇則入廠肆訪求。

四庫著錄之書爲補鈔

文瀾閣全書計。丁丑復不遇。君喟然曰。不售命也。曷南歸爲養親計。有餘力則爲詩以自遣耶。庚辰遂無意北上。竹舟先

生訓之曰。事親以顯揚爲重。先伯祖諤卿太史十一次赴春闈而始售。當時海道未通。行旅之苦。費用之艱。十倍今日。卒成進士。入翰苑。爲宗族光。汝上承餘蔭。幸博一第。遽甘自棄。何以對祖宗。更何以對汝叔。難中提攜之勞乎。君謹受教。誓以終身不忘。自庚辰至丙戌。三次公車均報罷。丁亥之冬。竹舟先生中風遽逝。君痛不欲生。松生先生責以大義。強起治喪。附身附棺。罔弗如禮。謹遵遺命。助豫振。千雨中丞衛公奏請建樂善好施坊。辛卯堂弟和甫立中捷於鄉。君欣然挈之入都。乙未闈後就職中書。嗣知松生先生病。決計南歸。由是不復作出山志矣。前後公車九上。君慨然曰。得失有命。何敢強求。而不敢稍懈者。遵親訓也。既而又深悔之曰。吾推子平

術無進士分。丁丑以後。薄舉業而不爲。亦以不專心致志與數相爭。遂因循而自誤也。嗣是而後。惟佐松生先生經理普濟育嬰清節各堂事。眾以事相質。由君代剖。有疑則參酌。妥善而出之。又遵前規。橫一笏於几。日紀其事。夜則研求商榷。次第舉行。二十餘年如一日。時變用繁。日慮不給。每出私財以相補助。視己產蔑如也。逮松生先生歿後。當軸者欲令接管。君力請舉賢者自代。及樊介軒恭煦、高白叔雲麟任事。君詳陳利弊。隱爲維持。籌墊數逾十萬。終始不言爲人所難。善舉之中。尤重水利。東河之建築隄壩。南湖之開濬邊港。北湖之修葺塘路。西湖之清理淤沙。君悉心籌畫。以謀久遠。又自以節烈之後。於節孝尤注意。兩浙采訪。節孝局缺。劫前舊錄。

姓氏。君得於京師冷攤。藉以補全。此中若有神助。松生先生校勘武林掌故叢編。杭郡先輩遺書善本書室書志。君以餘力襄校助理。友人以影鈔經籍請。無不應。并爲延人校補成帙。畀之。沾可學者。至爲廣大。如汪氏之振綺堂叢書。盛氏之常州先哲遺書。咸取材焉。以視沾沾自守。閉不示人。其氣量之廣狹。爲何如也。君素精律呂。杭學修復禮樂。延嘉興錢蔚也。炳奎。平湖戈雲莊。爲鵬兩先生訂正。君爲之辨清濁。考高下。兩先生亦服其精通。去年增設武舞。又復考訂舞譜。身爲教導。春秋襄祭。靡不躬親。至於彌留之際。適值丁祭之時。殷殷詢祭時情狀。蓋神明所專注者在也。至於敬宗睦族之事。婚嫁殮葬之費。求無不應。胞弟道甫。堂弟揆甫。宦游兩粵。君

於瀕行。告以治民之道。慈愛爲本。并云兩廣爲煙瘴之地。兩
弟孱弱。尤宜加意攝衛。及先後歸道山。回憶前言。俱徵先識。
而友愛之情。亦於此可見矣。自遭家難。君摒擋所藏。悉還公
債。而不畱絲毫以備一己之需。固杭人所共諒。至以書籍全
歸江南圖書館。價雖少貶。而書無散逸。易一地耳。書固可按
目而稽。在江南猶在丁氏也。君籌之熟。計之決。識者尤知其
苦心矣。素豪於飲。因咯血疏杯勺。年來生計日窘。胸懷憤懣。
又復豪飲。以澆塊磊。而三伏赴甌。感受風溼。病根潛伏。猶自
支持。夏秋之間。患利下。因寢室外垣傾圯。驚悸遂劇。卒於八
月四日。得年六十二歲。原聘金氏。大理寺卿應麟女。殉粵逆
之難。娶魏氏。福建浦南場大使錫曾女。子六。上左杭郡附貢。

生。仁友郡庠生。三在附貢生。江蘇縣丞。孔有六太以布。女一
未字卒。孫男六。孫女五。十一月九日卜葬於西溪梅花泉之
原。君家有藏書目錄之學如瓶瀉水。而尤注意於詩。嘗隨松
生先生徧游名勝。搜討掌故。以詩紀之。吳筠軒兆麟。王琳齋
景彝諸尊長。結鐵花吟社。許邁孫增。李幼梅。輔燿諸先生。勸
清尊雅集。君均與焉。壬辰春闈後。君昆仲與朱道生本。顧養
吾。浩游西山。更唱迭和。得百餘首。曰西山紀游詩。在京則潘
伯循。兵部通馮夢華。太史煦。相贈答。在永嘉則與朱眉山。壽
保。鄭嘯雲。一夔相唱酬。所爲詩不下數萬首。今存者小槐窠
詩集。夢痕詞。潭水詞各一卷。武林雜事詩一卷。東河新權歌
二卷。江干雜詠二卷。武林市肆吟一卷。王風一卷。永嘉三百

詠一卷。永嘉金石百詠一卷。別爲外集。荃孫與君卅年至好。惜筆力孱弱。無以傳君。而言必從實。舉必從重。不背古人家法。如是而已。

論曰。錢塘丁氏。以孝友名海內。而同輩之中。君爲之長。植身行己。以作表率。諸弟亦無不振振莘莘以德行著。吾友陳伯嚴吏部曾言曰。舉世欲破三綱。吾欲加兄爲弟綱。以益之。以爲治家之法。觀於君知伯嚴之語。爲不虛。范書之獨行。浦江之義門。於今再見矣。

重修信義志序

昔孔子得百廿國寶書。以成春秋。前賢以爲卽方志也。周禮誦訓掌道。方志以詔觀事。志也者。志地志人志事志物。上之

自古迄今。下之由近及遠。無飾辭。無私造。則謂之良志。志書至宋而流傳始多。志例至宋而體格大備。宋之鎮志。獨存澈水與范石湖之吳郡談鑰之吳興相後先焉。新陽信義鎮距縣十八里。自梁天監六年置信義郡。又分婁置信義縣。大同初。又分信義置崑山縣。隋開聖九年。廢信義郡。改吳郡爲蘇州。而信義崑山兩縣俱廢。後復置崑山屬蘇州府。至今不改。國朝雍正三年。分崑山之西南一百七十四圖置新陽縣。而治西縣屬首鎮。以信義舊名冠之。其中土地肥沃。人物丰昌。顧阿瑛之文采。魏恭簡之理學。龔安節之孤忠。蔡忠襄之死節。業已地以人重。人以地靈。餘澤尙存。流風未艾。姚惜抱先生云。凡邑皆有篤學好古之士。攷紀其實。互相考訂。天下地

志何患不善。而郡志宜簡。邑志宜詳。至於鎮志。地方不過十餘里。學人名士朝夕相聚。治事之疏密。植品之嫩惡。聞見皆真。網羅益富。明夏士炎始創星溪志略。乾隆中陳謬士胡介旦張松年周韓舄同輯信義志六卷。道光中葉魏雪江與趙月卿同輯續志四卷。今又六十餘年矣。游經粵逆之亂。不加搜訪。每懼散逸。趙君仲宣墨守家學。富有藏書。仰承先人之志。重輯是編。成書二十一卷。元元本本。殫見洽聞。姚先生所謂篤學好古之士也。蘇之鎮志。最有名者。前則廬師劭之志石湖。近則陶春生之志周莊。是志告成。殆堪鼎足。荃孫亦居江陰西鄉。欲爲申浦志而不能。今序仲宣之書。未免有作色矣。宣統三年十一月江陰繆荃孫序。

平湖葛氏書目序

自更生七略出而有天府之書目。自孝緒七錄傳而有私家之書目。海內流傳。或鈔或刻。不下百十種。收藏之宏富。編錄之謹嚴。可考見焉。而書目亦分爲兩派。一則宋槧明鈔。分別行款。記刻書之年月。攷流傳之圖記。以鑒古爲高。以孤本自重。如愛日精廬藏書志。藝芸精舍宋元書目是也。一則涉獵四部。交通九流。蓄重本以供考訂。鈔新帙以備紀載。供通人之瀏覽。補祕府之缺遺。如高儒之百川書志。錢遵王之述古書目是也。平湖葛氏。文武世德。弁冕鄉閭。戶部君至性孝友。蓄志利濟。博訓子弟。讀有用書。孝廉君稟承先志。廣購書籍。詞蔚法部。勅建書樓。榜以守先。彙集累世之藏。約過十萬之

數與猶子詠我學部。逐日增益。同志雋校。常見者注明何本。罕見者詳述指意。用

四庫全書例分類編成廿卷。可謂富矣。可謂勤矣。嘉禾藏書家。倦圃竹垞首倡於前。而高氏江村。金氏星軺。胡氏蓬江。錢氏天樹。無不馳名海內。而有目以傳世者。朱金以外。不少概見。收藏固不易。編次亦不易也。昔孫承澤侍郎有喜借人書之譽。朱竹君學士亦與人借鈔以廣流傳。前哲流風。令人嚮往。咸同以來。京師鉅公以深藏爲旨。以獨得爲奇。不畱一目。不跋一言。問其名已在。若存若亡之間。述其事亦在疑是疑非之列。顧千里所謂似與古人有深仇宿怨者。今葛氏書目一出。上可紹先輩之遺風。近可勵今時之銅習。不誠善乎。黃

太沖與朱竹垞互相通假傳鈔。書日以富。詞蔚亦必約二三同志。用流通古書約之例。庶幾日有增益。而書目一續再續。祁夷度先生所謂五年一小修。十年一大修者。吾於葛氏竹林有厚望焉。故不辭而爲之序。

愛日吟廬書畫錄序

書畫題跋自宋以來夥矣。然於古人書畫真蹟。詳記其位置行墨長短闊狹題跋圖書。必推平湖高詹事江村消夏錄爲冠。孫退谷之記精矣。然不載本文及尺寸。式古堂彙考清河書畫舫備矣。然得之傳聞。及他書亦彙入。究難以爲塙據。故消夏錄特開此派。而後談書畫者。自宋至今始臻完善之境。後之吳越所見錄。辛丑消夏記。各家均從此例。葛君毓珊同

年。世居當湖。爲詹事之鄉後輩。濡染流風。景行嚮往。聚平生所得。編成十卷。其體例一準消夏錄。而著錄益愼。考訂益精。後出愈工。昔人論定。以視僅錄本文。不加論斷。多撐門面。轉致葛藤。不可同年而語。況詹事迄今二百餘年。當湖文采。不亞昔時。而書畫一編。至葛氏始有繼起者。第詹事以達官。又值盛世。在朝則冠蓋相接。在野則壇坫共推。物力旣豐。聞見自廣。毓珊同年。風塵奔走之餘。偏工物色。郎署清閒之日。自擅真傳。所訂日精。所積亦富。詹事爲其易。毓珊爲其難。又可知已。吾願詞蔚竹林。世守之。增益之。續編嗣出。再爲之序。可乎。王子四月江陰繆荃孫序。

愛日吟廬書畫續錄序

自昔立國。重世家。傳經崇家學。喬木之思。堂構之喻。豈不欲
繼繩繩傳之數百載而不敝哉。前明收藏推范氏天一閣。
七百年巋然獨存。海內固莫與比矣。書畫一事。似乎藝術小
道。第自宋以來。此類著述爲譜錄之大宗。然煙雲過眼。彈指
卽空。傳之數代。固少其人。寶藏之。增益之。傳述之。更無其人
矣。荃孫去冬來滬。平湖葛君詞蔚以其尊公所著書畫錄十
卷見眎。見其搜羅之富。體例之精。足駕江邨而上。後跋又歷
舉編輯之大恫。至爲精粹。決其必傳。因爲序之。詞蔚又言此
編先君手定。未敢增損。後之所得。及近日所收者。別爲一編。
附此以行。當求續序。荃孫諾之。今冬果以編定四卷來徵踐
言。其體例一遵前編。無所出入。足慰先人未竟之志。而徵賢

嗣世守之忱矣。昔張青父真蹟日錄有三編。郁逢慶有續記。然皆本人續之。未有子孫能續之者。蓋子弟於過庭之時耳濡目染。固較勝不學牆面之輩。而爲之父兄者。視其所好。多方引誘教導。獎勵使其精神恆注於斯。此中自有至樂。先使之知。再可言保。不但可保。且增益矣。阮文達爲天一閣書目作序。勉其子孫廣爲收儲。以成績編。范氏亦無一人能繼起者。斯編一出。不但爲書畫之光。兼爲兩浙收藏家增色乎。重刻木犀文集序。

近世之言散體文者。必曰桐城。師桐城者。必曰方望溪侍郎。一傳而劉。三傳而姚。凡讀書人無不知之。然方氏之友。文名相頡頏者。曰戴潛虛。而潛虛則師事潘蜀藻先生。先生有木

厓集四卷。荃孫受而讀之。然後知桐城之淵源有自也。先生
生長世族。少飲香名。前明諸生。遭逢世變。閉戶著書。不求聞
達。一舉博學鴻詞。兩舉遺逸。皆不就。其爲文也。尙體要而循
法度。浩乎如雲浮空。而莫可狀。凜乎如星寒芒。而不可干。其
說理之言。與其有得之言。學識篤於程張。而堅卓則子固峭
直。則介甫焉。何其懿歟。桐城自前明以來。田間編修之經術。
孩未中丞之文學。密之閣學之淹雅。皆能各自成家。先生承
師友之觀摩。加以身世之閱歷。精神一貫。氣象萬千。遂以開
潛虛之俊逸。而望溪以之集大成者也。著述散佚。遺文僅存。
裔孫壽培。持以付梓。而索序於荃孫。嗚呼。先生當陽九百六
之秋。樂天知命。投老巖阿。嗚咽餘聲。情傷家國。今也時移世

易重度滄桑。壽培以流離奔竄之身。謀所以永其傳者。欣世澤之縣長。知貽謀之永久。先生有知。庶無憾乎。先生又工於詩。潛虛序載於集。延平之合。尤所望於壽培矣。

意園文略序

光緒丙子。子荃孫應禮部試。由文治庵錫厚庵兩文得見意園。與談板本源流。蹊徑甚合。後先入詞館。稱同志焉。

國家同治中興。廓紘恢綱。中外一心。克殲大憝。海內歎然。羣望乂安。迺髮捻之禍大定。而

宮闈之釁已萌。倖竇漸開。

朝政漸紊。一二賢者大聲疾呼。振聾發聵。未嘗不稍有補苴。而依草附木者流。毛舉細故。攻訐陰私。亦雜出其間。

朝廷敬之重之。亦未嘗不厭之。意園以朱鬱（鬱）之博學。劉子政之傷時。又熟於

本朝故事。大至朝章國憲。小至一名一物。皆能詳其沿革。改革之本。而因以推見前後治亂之迹。苦心甚口。調護焉。匡救焉。言者諄諄。聽者藐藐。詩人所詠。古今同慨。戊子典試山東。至以立乎人之本朝。而道不行恥也。命題。其情亦可憫矣。自官祭酒。以振興國學爲己任。適同官爲翁常熟王長沙治彛。臣諸公相與同志。篝膏火。節冗費。廣課程。嚴規則。絃誦之聲。蒸蒸日上。人方以爲得行其志。而乃使車甫返。乞病開缺。後見與張文襄公書。蓋亦有不得已之情在耶。家居十年。啟門謝客。攷訂古籍。並三代秦漢彝器法書名畫。以自娛樂。暇則

出游。丁酉。踴雪飛狐。戊戌。浮渡徐水。怡情巖壑。貌託曠達。實由甲午之役。朝議乖舛。喪師失地。重幣求和。貽誚鄰國。變法議起。僉人乘之。樂禍幸災。幾釀大變。君以懿親。盱衡當世。內外臣僚。無可倚仗。羣小離間。陰陽捭闔。不測舉動。卽在目睫。時勢日亟。病亦日深。慷慨感傷。治不如法。信陵密國。同此隕身。嗚呼傷已。君淬奮於學。博聞強識。其攷訂經史及中外輿地。皆精覈過人。天下魁壘之士。至京師者。莫不望以爲歸。壬辰癸巳閒。荃孫起復。預君約消寒之會。與嘉興沈乙盦談掌故。折衷於君。終日不倦。同人目爲談故三友。甲午荃孫投劾出都。己亥又來購巴陵方氏書。還南之前日。話別於意園之鬱華閣。依依不捨。欲行且止。孰知此別。竟成永訣。迄今再至。

池館如故。斯人不作。蟲沙猿鶴。萬劫蒼茫。後死匪幸。徒增感喟。君所著撰八旗文經之外。不自收拾。子勤太守輯詩三卷。詞一卷。名之曰鬱華閣遺集。刻之武昌。又得遺文十一篇。章奏十篇。議一篇。名之曰意園文略。刻之金陵。荃孫爰舉昔日論交之雅故。及意園有志匡時之苦衷。聊以狀意園於萬一。至於文詞爾雅。浩氣磅礴。讀此集者自知之。無俟荃孫之覲縷也。宣統二年歲次庚戌冬十一月江陰繆荃孫序。

靜香書屋詩鈔序

三代經邦。必先世祿。孟子因有喬木世臣之喻。蓋以強宗夾輔。根柢盤互。枝葉蔥蘢。有確乎不拔之操。與國家盛衰相維繫。其先德立身行事。必有彝型百世之思。其後裔食德承家。

亦有繩武千秋之想。卽至代遠年湮。文獻廢墜。亦必尋繹於舊姻新特之家。爬梳於敗牘陳編之下。掇拾一二。如獲瓊寶。彙而存之。以爲觀感。則觀乎子孫之賢淑。卽可卜世澤之綿長矣。史氏自漢著名溧陽。至靜香先生。因就姻遷常州。代育名流。又爲吾常望。先生工書善屬文。試輒不利。而名滿大江南北。所結交多知名士。老輩如趙甌北。洪稚存。趙味辛。三先生交相推引。集中有與董東亭。庶常。管松厓。漕督。劉檀橋。庶子相倡和。皆常郡之名流也。翥羽集鱗。德星咸萃。又嘗西游三晉。南度五羊。行役所經。觸目成詠。無不稟經酌雅。悅性怡情。就其文采自彰。亦足爲後人取法。今心銘太守世守規矩。寶藏弗失。前曾印左侯與令祖士良觀察手書。今又擬刻此。

編。可謂賢已。夫王謝崔盧門第數百年而不變。嘉言懿範。史冊所傳。實有度越尋常者。其中略有變遷。不能不藉國運。教澤禮俗。制度以貞存於大化之中。若馬醫夏畦之子。其祖若父。生不爲人所知。死不爲人所諱。悠悠一世。草木同腐。無怪後起渺視前型。亦有著作流傳。墨痕猶溼。雜之破書敗紙。鬻之他姓。弁髦視之。殊不甚惜。藉父無後。木本水源之謂何。視夫心銘。賢不肖何如也。歲在壬子七月江陰繆荃孫序。

蔡浣霞證嚮齋詩序

桐鄉蔡君浣霞。嘉道閒詩名藉甚。昔年讀鄉先輩陸祁生。管孝逸。劉芙初。周伯恬。方彥聞諸集。均與君有倡和之作。詩話筆記常得短篇。而以未見全集爲憾。宣統辛亥。荃孫重到京。

師蔡璞如進士奉君舊藁見眎讀鶴君太守後序方知生前未及刊行兵燹再經清本屢失庚辰所刻亦輾轉而得之蓋天生異才不可一世撐腸拄腹之卷軸往古來今之情狀風雲花鳥之變態山城關河之閱歷無不託之於詩造物有知決無磨滅之理君治詩嚴四十前詩削不存閒有存者皆與京邸名賢角逐壇坫羣相推許者所存不過二十分之一而無一側調曼聲靡其閒此則真不可及矣荃孫所尤羨者時際昇平人物孔阜有身世飄零之感無宇宙搖落之悲詩境澹蕩夷猶獨有中唐風範上不睹天寶之胡塵下不逮廣明之逆裔有杜之風骨不必存杜之面目至晚唐嚆殺之音更無從繞其筆端則時爲之也今崇百藥齋萬綠草堂尚絅堂夫

椒山館萬善花室無不流傳於世。而以證嚮齋集殿之。如笙
磬之同音。如雲霞之儷色。決不以後出而少貶其聲華。況賢
子孫惠而畿輔家傳科目。璞如方且以刻工未盡精善。急思
重刊行世。表揚保護。則陸管諸公有未逮焉。故不辭而爲之
序。宣統三年七月江陰繆荃孫識於雲自在堪。

陶廬續憶補詠序

金粟香表兄撰陶廬雜憶續憶二百首。荃孫曾序之矣。甲辰
冬。粟香又成續憶補詠百首。郵寄金陵。荃孫受而讀之。不禁
有感焉。夫士大夫當弱冠之年。閱歷山河。俯仰今古。有不可
一世之概。而顧瞻鄉井。往往嫌其樸陋。覺里巷閒無可與語
者。迨夫游宦數十年。距家數千里。往往見土物而懷思。聞鄉

音而出涕。有不自知。其所以然者。迨乎垂老。言歸故鄉。數先人耕讀之區。經舊日釣游之所。再三慨慕。流連往復。遂覺平生足跡所至之處。雖多可駭可愕。轉不如鄉里之有真樂焉。蓋自少至壯。壯至老。人非一時。而情緒亦非一時矣。粟香此詩專於小中見大。靜中見理。看似容易。愈味愈深。每一雒諷。輒令人神往不置。至於述門風。敘里俗。憶故舊。紀勝游。其旨與前詩同。求之古人。竹垞鴛湖之歌。祁生懷人之什。方臻此等境界。不知幾許醞釀而成。非率爾操觚者所能道。隻字也。光緒乙巳表弟繆荃孫序。

周夢坡靈峰志序

出杭城湧金門九里。循湖隄而行。西溪之南。玉泉之北。徑曲

以達地僻而險。有山巽然曰靈峰。有寺巋然曰靈峰寺。是山
近接天竺。遠達富春。蓋發源於三天子都云。青芝鵠石禮釋
子之奧區。碧梧原邊撫名人之墓碣。穹窿截嶮戍削峴嶙。其
高四十有六丈。近瞰西子湖。遠眺錢塘江。四達八窗十步九
折。出循巖棧俯窺鵲巢。高攀薜蘿遠引猿嘯。林花著雨。綉錦
墮於鏡中。翠壁寒風。孤雲度於簷外。斯寺也。創自東晉。歷代
遞修。輪奐猶新。鐘呬不輟。聽泉訪少岳之築。眠雲賡東坡之
詩。諸天岑寂。常參白足之禪。丈室清閒。不入紅塵之擾。峰高
市遠。僧古客稀。詞人藉以養心。游女時來禮佛。湖上諸刹。此
爲最幽。門前有道光時將軍固慶種梅百株。庚辛兵劫。無能
倖免。烏程周君夢坡夙締佛緣。常稱豪舉。清修佛地。前世德

雲最愛此山。爲之修道築亭。補種梅花三百樹。盒曰補梅亭。曰來鶴。泉苑掬月。廊築抗風。暗香疏影。重尋石帚之詞。雪後水邊。不減林逋之趣。昔曾游者。詫爲頓復舊觀。中有人焉。真能別開生面。夢坡又爲之搜往牒。證舊聞。作圖以張之。徵題詠以益之。歷時數旬。成志四卷。曰山水。曰名勝。曰人物。曰藝文。條舉件繫。文綳詩清。宛宛靈峰。迨無遺憾。昔赤松山志。編於倪守約。武陵梵剎輯自吳之鯨。莫不名重千秋。書收四庫。西泠勝地。名流所萃。一山一寺。皆有專書。夢坡之輯。是編晴好雨奇。藉志湖山之美。香溫茶熟。重申翰墨之緣。固靈峰之佳勝移情。亦夢坡之風雅獨擅也。僕戊戌初夏。寓雲抱水邊樓十日。庚戌三春。補游西溪。獨遺靈峰。殊爲憾事。他日當坐

我妙高臺上。飲湖光。餐山滌。琴樽相招。謳詠互答。當倍知此志之佳也。王子臘月江陰繆荃孫序。

皖詞紀勝序

輿地詞章。古人截然兩家。有以輿地爲主。而紀沿革。述事實。兼及詩文者。如輿地紀勝。方輿勝覽等書是也。有以詞章爲主。而專收一邑之詠古跡及投贈詩文者。如天台嚴陵會稽掇英等集是也。若乃地限以皖之一省。文限以詞之一體。則程途較隘。搜輯難周。而猶能鈔錄成書。考訂入古。則其才高學瞻。有非他人所能及者。莫善於吾友徐子積餘之皖詞紀勝矣。皖省都邑。豐昌。關河重複。岷江貫其中權。濤霍峙其兩界。固神皋之隕宅。亦水國之名邦。招皖公之翠色。先入壽杯。

聽硤石之波聲穿來殘壘。八公蒼莽。人驅草木之兵。九子連
蟠。獨擅東南之秀。插巘岼之一柱。雲髻峩峩。瀉激澌之雙溪。
穀文疊。卅六峰黃山挺出。繪壁成圖。一千頃翠瀾卷回。醉
神奏曲。魚臺跡古。漫說莊周牛渚亭寒。人懷溫嶠。以及堂尋
姑孰泉酌。玻璃南則風花時節。口極凌歊。北則飛絮闌干。神
馳潁水。凡當前之景物。亘古常新。入佳客之吟哦。其神欲活
於以臨風琢句。對月抽思。情之厚足以當風謠境之真不啻
臨圖畫。斯詞以地傳亦地以詞重也。他若酒邊索笑座上生
春。縱玉斲與酥凝。歎風欺而雪壓。龍團寄與夢未隔。夫仙源
鴻信傳來。愁不離夫粉淚尊前。重敘忘前度之劉郎。琴裏傳
神謝老來之黃九。莫不勾留勝境。鼓舞豪情。本屬駢支非同

疵贅是刪分府編輯體例固已秩如文采亦復蔚若在輿地
家爲別調在詞章家爲正宗也積餘清思浣月采色韻花抱
引商刻羽之才擅迴雪流風之技頡頏吾輩文推雋才今以
此編屬爲小序君誠好事恍探奇於齊雲采石之名區僕未
能歌尤不忘夫範水模山之雅意是爲序

藝風堂文漫存卷三

江陰繆荃孫

辛壬藁

文

孟子注疏四卷跋

宋刊本。止存公孫丑上下四卷。每半葉八行。行大十六字。小
二十二字。白口。有刻工姓名。擴廓皆避諱。知其補宗時本。佳
處一豪不作一毫。塞于不作塞乎。吾聞之君子。不以天下儉
其親。無也字。而泰山惟恐兩處已同今本矣。字大悅目。紙光
玉潔。可寶之至。此本已無章指。可見宋本有無章指者。不盡
由於明本脫落也。

四書纂疏十卷跋

宋趙順孫纂延宋刊本。每半葉九行。行二十字。小字同。擠行則不拘。高七寸五分。寬四寸七分。白口單邊。口上只云某卷。不載書名。上有大小字數。下有工人姓名。亦有無者。諱字有避有不避。有希字。有擠字。刻成改之。猶是本人自訂之本。此書止有宋刻。元明未聞覆本。通志堂刻。顧伊人注云。汲古閣宋本。卽此書也。卷末毛氏家藏白文方印。精而且真。紙墨均佳。似無疑義。惜缺首冊。毛氏圖書當不止此。

宋本五代史記跋

代

宋歐陽文忠公五代史記七十四卷。南宋刻本。每半葉十二行。行二十二字。小字不等。高五寸六分。寬三寸六分。白口。下有刻工姓名止一字。提行空格維謹。避諱如敬玄。卽匡胤。恒

曙估栢均作不成字。有各本俱誤而此獨正者。如梁本紀第一。楊行密入楊州。楊不作揚。可見宋時無作揚者。晉本紀第一。以幽涿薊檀順瀛莫蔚朔雲應新嬌儒武寰州入于契丹。莫各本作漠。按莫州亦可作鄭。不當作漠。均爲上文瀛字而誤。梁家人傳。全昱視之顧太祖曰。朱三你作得否。此是當時語氣。劉知幾所謂眞事也。各本作爾。語氣太文。李金全傳。引弓射善射者。各本脫一射字。閩世家。王倓唐相溥之子。各本作淡。按淡字與溥均從水旁。父子異派以倓爲是。四夷附錄一。四樓足以娛老。各本作西樓。按上文言東西南北四樓。不當專言西樓。四夷附錄二。水曰瓠瓠河。各本作壺盧。字稍涉俗。四夷附錄三。又西渡陷河伐檉置水中乃渡。各本作冰中。

誤。有與各本異文而可備考證者。如唐本紀六。明宗父名電。各本均作霓。孟知祥使朱滉來。各本均作滉。唐家人傳。莊宗六弟存確。按郭璞江賦。巖砧磬確。注皆水激石嶮峻之貌。各本均作確。唐臣傳第十二。乃遣殿直都知馬氲。各本作范溫。王鎔傳。館於梅子園。各本作海子。四夷附錄三。莊宗遣司農卿鄭續采。各本作鄭績。有以他本作證而獨是者。周臣傳。治君之用。監本作治國之君。五代史纂誤亦同。是吳所見本尚不如此本之善。馮暉傳。舊將樂元福。各本作藥元福。殿本考證云。一本作樂。與此合。按歐陽修新史本云。五代史記。吳續纂誤。注文盛刻本均同。監本落去記字。遂與辭史無別。舊刻存於今者。止有宋十行十九字本。元宗文書院本。明南監

初印本。再次則注文盛本。此書尺寸獨小。字畫清挺。與丁氏八千卷樓小字晉書爲自來收藏家所未見之書。宜都楊君惺吾得自日本。輾轉歸予。謹爲影刊。以貽當世讀書同志。

至元嘉禾志跋

至元嘉禾志三十二卷。元徐碩撰。志修於至元甲申。爲元混一江南之五年。刻於至元戊子。徐先生爲郡博士。承檄纂修。敘次簡潔。每條加以攷證。爲他志所無。碑碣多至十一卷。題詠六卷。而不立官師一志。使前人宦績無傳。而碩里貫亦未能詳。志中但紀其咸亨四年陳文龍榜甲科。及修學修宣公書院二事而已。而郡幕單慶路推翟汝弼刊板之劉傑亦無所考。未免遺憾。此書止有傳鈔。中多殘缺。荃孫先得上海徐

紫珊舊鈔本。李升來年文校以罍里瞿氏藏本。雖有佳字。殘缺正同。上海市中復過錄海甯管芷湘庭芬校本。芷湘据桐鄉馮孟亭浩嘉興沈雙湖叔埏張叔未廷濟戴松門光曾秀水查益齋全錢味根聚仁六家本彙校。并据趙府志松府志崇德海鹽志補綴。雖訛字甚多。而實有裨益。如嘉興路毛家橋下。本接烏盆橋。今据戴本以環聚堂之五十六行移正。顯濟廟記脫一葉。據章本補之。朱行先志劉深志据澈水續志補之。橋道記缺一葉。從李昌齡樂善錄補之。州學大鼎考据戴本補之。均有來歷。可以據依。郡人乙盦沈君爰付之梓。以餉邑人。荃孫校訖略述其指。宋澈水志八卷附刊於後。此志多收碑碣。昔賢所稱頌。然存於今。不過呂祖謙宣公書院記。

黃夢高觀頤堂記。顧亭林感夢伽藍記。不及十種。金石之壽不如楮堅。幸而搜輯閎富。後人得考見前人事迹焉。結一廬藏有宋張元成志五卷。未知存否。如能求得更爲完善矣。乙盦其有意乎。

唐貞觀條舉氏族事件卷跋

右唐貞觀八年條舉氏族事件一卷。前半斷爛。後半奏云八十五郡。今止六十八郡。失去十七郡。奏云三百八十八姓。是爲甲族。今止存并州晉陽郡起至末共二百五十七姓。失去一百四十一姓。其中尙有缺遺者。如太原十一姓。止存閭鮮于令狐尉遲四姓。濮州河內郡九姓。止存宋司馬苟向浩。遼于束尋八姓。潞州河南郡七姓。止存賀蘭。士穆祝五姓。譙

國郡八姓。止存戴夏侯桓嵇曹婁龐七姓。州郡字有訛缺者。
岱當作代。太原郡。州上缺字當作并州。路州。路當作潞。河澗
郡。澗當作閒。雖鹿郡。雖當作鉅。河南郡。潞州。潞當作洛。南陽
十姓。南陽下落郡字。無州名。南陽當作鄧州。鄧州宜重。下有
州。張樂趙滕井何同鄧姬十姓。鄧是州名。而鄧是姓。州亦是
姓。司馬貞三皇記云。州子姜姓之後。而鄧亦南陽著姓也。④
農郡。郢州。唐無郢州。疑當爲郭。郭與號通。卽號州也。滎陽郡
四姓。滎當作滎。東來郡三姓。來當作萊。州上缺字當是萊字。
誰國郡八姓。當作譙國郡。亳州。亳當作毫。齊陽郡三姓。齊當
作濟。陽當作陰。汝南郡七姓。州上缺字。當脫豫字。漢陽郡六
姓。漢州。漢當作漢。濟比郡一姓。比當作北。洛州。洛當作淄。淄

在濟北。平陽一姓。兗州平陽下落郡字。兗州不應有平陽郡。
疑是濟陽之誤。成陽郡二姓。州上缺字。當作沂州。下逕郡四
姓。泗州逕當作邳。東菀四姓。菀當作莞。廣陽郡三姓。揚州陽
當作陵。長城郡一姓。胡州胡當作湖。吳郡四姓。豫州豫當作
蘇。吳興郡七姓。胡州胡當作湖。餘唐郡三姓。杭州唐當作杭。
舟陽郡三姓。舟當作丹。武陵郡下州上字脫。當作朗州。長沙
郡四姓。潭州譚當作潭。有姓氏缺訛者。并州令狐氏。狐當作
狐。潞州樊氏當作樊。冀州歐陽氏當作歐陽。邢州魏氏當作
魏。號州黃氏或作晉。廣韻云。唐叔虞之後以晉爲氏。鄧州滕
氏當作滕。姬當作姬。亳州桓氏。桓當作桓。豫州表氏。表當作
袁。濮州表氏。表見姓苑。濟州禾氏當作桑。兗州功氏。博古圖

周有功仲之榮是周有功氏。郡字當作邵。廣韻云。邵公夷之。後樂安高氏當作商。姓譜攷云。商容之後。徐州引氏見姓苑。受氏姓解。魏書有受酉氏。或單舉一字與。泗州固氏當作國。齊有國氏。鄭亦有國氏。越州鍾離當作鍾離。杭州戚氏。戚當作戚。婺州婺當作婺。荀氏當作列氏。周有列氏。姚氏當作姚。栢州瀨氏當作賴。武陵俱氏。俱當作拱。辨證撫州臨川多此姓。仵氏。路史楚公族有仵氏。後云營門雜戶。慕容商賈之屬。慕容卽豆盧。爲歸正人之通稱。亦可云雜戶。近存元和姓纂。尙多相合。惜非完書。至寶字記所舉姓氏。已大相逕庭矣。末紀大蕃歲次丙辰後三月庚午朔十六日乙酉。曾國唐氏。芑芑悟真記。丙辰爲唐文宗開成元年。中國閏五月。蕃閏三月。

歷法不同。河隴瓜沙。自肅代陷蕃。至此已六十七年。尙取大唐氏族勘定書之。遺民不忘故國之思。匪易驟變。而字迹潦草。脫落錯訛。觸處皆是。唐人禮教漸滅。殊盡土地爲人所奪。陵夷遂至如此。可不懼哉。

容齋隨筆續筆跋

右容齋隨筆續筆三十二卷。宋嘉定刊本。每半葉十行。行二十一字。高七寸二分。寬五寸五分。白口。口上有刻工姓名。每題下四格。卷後書名空兩行。印本極早。日本鞠山文庫所藏。荊州田監督伏侯載以歸。以馬刻校之。止十三卷中落一行。續筆目錄落一目。及總目後凡二百四十九則一條。續筆卷十四尹文子條。蓋晉宋時細人所作。細不誤納。卷十六計然

意林條如伊尹不以一衣與人亦不取一衣於人不誤介今
意林作介今以孟子改之此爲至善其餘好處亦不甚多此
本向以沁水李瀚本會通館活字本爲最善馬本自序云向
得沁水李公不全本又得友人殘本彙而刻之乃其校訂並
不甚謬可知前輩讀書之博用力之勤矣學部圖書館止存
二冊一隨筆四卷一四筆五卷行款同而有太德乙亥補板
中貞元貞觀貞定貞惠並作正桓公作威公魏徵作魏證殷
武作商武顓頊作顓帝慎戒作謹戒完顏亮作元顏亮至匡
朗勛樹_玄讓殷徵則缺筆慎貞桓缺中二畫又與他宋本不
同抬寫如先朝諱號提行上字有提行有不提行二筆銅雀
瓦硯先公亦提行例均不一隨筆續筆序後接文不空四筆

則空。後目錄後文均另起。惜止存兩筆。圖書館有四筆五卷。瞿氏有續筆十六卷。存於天壤間者如斯而已。

夷堅志再跋

宋洪文敏公夷堅志。甲至癸二百卷。每字二十卷。支甲至支癸一百卷。三甲至三癸一百卷。四甲四乙二十卷。每字十卷。共四百二十卷。宋藝文志收夷堅志六十卷。小注用乙丙兩志。又夷堅志八十卷。小注丁戊己庚志。既不全載四百二十卷。只收一百四十卷。丁戊己庚四志八十卷。與每字二十卷合。乙丙兩志不能及六十卷。或四十之誤。今只存甲集至丁集八十卷。

四庫所收之五十卷。卽坊本之二十卷。敝藏明鈔本之十卷。

已具前跋。再攷倪闇公燦補宋史藝文志。別署夷堅支志七
十卷。小注存甲乙丙丁戊庚癸七志。三志三十卷。注己辛壬
三志。似卽据此流傳之本。陸刻原書八十卷。約十二三葉爲
一卷。巾箱本約九十餘葉爲一冊。以爲兩卷則太多。如以爲
十卷則又太少。殊不可解。國史經籍志收王質夷堅別志二
十四卷。金元好問之續夷堅志二卷。澄江思善堂所刊湖海
新聞夷堅續志前後集。皆與洪書無涉也。

游宦紀聞跋

游宦紀聞十卷。藍格鈔本。前世南自序。後紹定李發先跋。與
鮑刻盧抱經校本合。然有絕勝盧校處。如卷一圖經本草條
菱角曰芰。此本作菱角曰芡實。似當作菱角曰芰。烏頭曰芡

實。一脫其下。一脫其上。翡翠屑條。偶見一醫僧元達。此本作
醫生。卷三犀出永昌條。黔螺特牯。黔謂無紋。螺謂螺旋。特紋
細。牯紋大而勻。或每一粒紋尖上更有一眼者佳也。鈔本特
字下牯字下。或字下均加一謂字。語氣較足。卷三請紫姑仙
條。扣功名大略。此本作扣以功名大略。卷四福之永福山條。
西則腌藹亦乏大觀。此本乏作云。卷五辨博書畫古器條。以
黃蠟塗勻。儼如枕角。此本作魴角。左太沖三都賦序條。抑左
氏攷方志草木之未精耶。此本作未精審也。卷六秦會之當
軸。此招權之常態。此本作相權之常態。高麗國條。所塵名品
別且染濡。此本作別具染濡。卷八黃公銖條。正雨後梨花幽
豔。白悔恩恩過了寒食。此本作自悔。卷九望予戟決藩籬。此

本作望矛戟。餘如胡虜改強敵。狄字改敵。此是通例。盧校云。各刻俱誤。而此本不誤者。宕昌不作岩昌。劉蕤不作劉壽。越恭公鈞不作鈞。可見此本之佳。至訛誤處甚多。是舊鈔通病。兩通字亦俱未拈出也。

冷齋夜話跋

冷齋夜話十卷。元刊本。半葉九行。行十七字。高四寸八分。廣三寸二分。白口雙邊。目錄後有跋牌子兩行。至正癸未春暮。新刊三衢石林葉敦印。黃蕤圃跋云。所見本以此爲最古。惜是坊刻。故多訛舛。荃孫先得舊鈔本。其中有空白字。此本破體訛字觸目皆是。并以龔字分作龍共二字。然空白字均補足。亦一快事。又書目刻本與鈔本不合。前目又與書中目不

合然提要云。或先沓過甚。或拙鄙不文。並舉郡亭廟及韋應物寄全椒道人詩。則與此本同。書中記淵材語並無劉字。是此目爲後人所加。鈔本目較雅。亦爲後人所改無疑矣。禁蛇開井。方僅存末一行。鈔本無之。并去其目。而宋所收亦此本。今從墨客揮犀補足禁蛇開井一段。可謂完善矣。

續夷堅志跋

景孫初得巾箱本二卷。繼得陽泉山莊本四卷。張月齋序云。原出余秋室手書本。余本刻於大梁。心竊慕之。後覓得余本。字畫之雅。刊印之精。頗寶愛之。壬子二月。沈君乙盦以舊鈔見。眎分前後二集。不分四卷。則其書在前可知。目錄後有岷叟跋。後集目錄後有石民瞻跋。末有金史文藝傳王東起

跋宋无跋。吳道輔詩。孫道明跋。亦不似余本之雜。次後集宣
靖越播之兆。完不。缺女真黃日本國冠服焦燧業報孔孟之後
五條。鈔本亦缺。而項王廟下有廣甯寺鐘石椿大火永安錢
三條。則各本所無也。訛字如張童入冥一條。撤館輓。撤不誤
撒。鬼市一條。閉口不敢視。開口又見。見上無不字。閭大憑婦
語一條。渠有布有絹。不落第。二有字。神人方一條。斫青蒿一
握。蒿不作松。內庫藏龍一條。見舌作蒲。背形。背不作稽。麻姑
乞樹一條。嘗於海濱得百丈魚。得不作浮。抱陽二龍一條。朱
崇儀使。宋不誤來。揩牙方一條。得此方於麟府折守。府不誤
撫。神救甄帥軍一條。又到全人頭山。皆人不誤入。臨淄道院
一條。高緯。緯不誤偉。海嶼婦一條。王內翰元仲黃華之父也。

之父不誤老人。至可疑之字。則以宋摹識之。京娘墓一條。僕有指京娘墓窩楊者。點楊字。高監償債一條。求相紹繼。點紹繼二字。陵川人所仙一條。劉元方卿。點方卿二字。疑作劉元卿方。又如巽齊之識一條。以門名色瑞。似有誤字。溺死鬼一條。祕水焦符材說。祕水疑作泌水。或作沁。獵犬一條。興州下空二格。刻本作羣犬。不如空格存疑。王處存墓一條。青龍蝸蝸疑當作爲。非人山。中環抱處皆云窩。碣字誤。一行墓石記一條。白管湖州刺史遷濟州。管州金屬河東路。今靜樂縣。蚩尤城條亦有管州湖字衍。據余序讀易樓藏本二卷。因宋王二跋強分四卷。殊嫌武斷矣。前集一百有三條。後集一百有六條。不全者一條。有目無文者四條。實存二百有五條。較他本多三條。亦可稱

善本矣。江陰繆荃孫跋。

廣甯寺鐘

廣甯寺有巨鐘。一日撞之不鳴。其聲乃在城南橋下。行人聞之。無不駭懼。有告寺僧具饒鉢就橋下迎。鐘復鳴。宗室仲章說

石樁大火

泰和八年冬。京師大悲閣前幡竿石樁縫間連夕火出。四十餘日乃止。明年大火延燒萬餘家。閣亦被焚。衛王有旨救虔世南所書千手眼大悲閣題榜。火氣熾盛。人離百步外不敢近云。

永安錢

海陵天德初。卜宅於燕。建號中都。易析津府爲大興。始營造。

時得古錢地中。亦曰永安一千。朝議以爲瑞。乃取長安例。地名永安。改東平中都縣曰汝。永安曰芝田。中都永安坊曰長甯。然亦不知永安一千。何代所用錢也。

頤堂文集跋

頤堂文集。影宋寫本。每半葉十行。行十八字。高六寸。寬四寸五分。單邊白口。板心記頤堂集幾。後有乾道壬辰六月王撫幹宅謹記一行。書刻圓湛。爲宋本之上驥。頤字晦叔。一字頤堂。遂甯人。隱居不仕。著述今存碧雞漫志及糖霜譜二種。柯維騏宋史藝文志載頤堂集五十七卷。今存一卷爲賦。卷二三。四爲古詩。卷五爲近體。然敏求記亦止五卷。大約所存止此。文全佚。補錄近口堂記。碧雞漫志序二篇。夷。

一惠宗

師盤石修載晦叔作碑記七八百字入頤堂集中久佚矣詞
存廿一闕半塘侍御欲刻未成曾登天一閣見藍格明鈔本
亦與之合

翠微南征錄跋

昔年爲劉蕙石參議校刻翠微南征錄所据

文瀾閣傳鈔本上皇帝書卷首五言古卷一七言古卷二五
言律卷三七言律卷四至卷七七言絕卷八卷九五排律卷
十雜記卷十一又池州近年活字本兩本參校而刻之去年
見郎趙客黑口本未收得壬子正月傳君沅叔以鮑綠飲鈔
勞平甫校本見眎亦十一卷卷一上皇帝書二卷以下爲古
今體詩古詩先七古後五古律詩亦然終之以絕句平甫跋

甚推重。荃孫細爲校讐。勞跋所示趙刻析上書爲首卷。而於
皇帝上加(宗)二字。則似後人追述之辭矣。原本於當時宵
小姓氏。頗有空缺。宋時刊行尙有避忌。因而諱之。而郎以明
嘉靖閒王崇志本改竄填補。又大加刪削。竟至失其本真。編
詩爲十卷。古律俱以五言冠七言。此似可也。然原本七古中
傷春一首。柴氏一首。通體五字。末結以七字。前人多有此體。
郎以入之五古。遂刪去末句四字以合其格。重失作者本意。
是則不免截鶴之譏焉。且於題下注往往刪繁就簡。時又入
攙他書以亂之。愛古者似不應爾也。所論甚正。然劉刻以
閣本爲主。編刻與勞本異。詩注與勞本多同。並非多從郎刻。
至上書刪節之故。郎在國初世多忌諱。大約郎氏刪改。

四庫因之。勞從後村千家詩補八首。今亦補錄於後。

春暮

後村千家詩一

此詩見卷九五律中。此僅上半當刪。

冬暖

後村千家詩二補

天不雨霜雪。朝曦與暮霞。江梅呈臘蕊。嚴桂又冬花。

傷春

後村千家詩一補

盡把春工付祝融。東皇歸去太華宮。稜稜山色聳蒼玉。湛湛波光浸碧銅。楊柳入天鳩要雨。海棠落地蝶嫌風。好將杖履西園看。萬紫千紅一夜空。

右載傷春之下。是否華作。未可知也。姑附於此。下又有二首係華詩。

春暮

後村千家詩一補

買春無計託花神。費盡榆錢不計緡。風絮飛成三徑雪。雨犁
翻動一園春。

三月湖天春晝長。東風飄暖草浮光。櫻桃熟後游人倦。柳絮
飛時燕子忙。

麥髯豆莢雨生肥。閒綠園林粉蝶飛。賸買好花安四壁。不教
人道是春歸。

重九

後村千家詩四

此詩見卷六七律中此祇割其半當

鷗

後村千家詩十九補

隨潮鷗鳥往來頻。百十爲羣立水濱。多怪朝來無一箇。高飛
想是避漁人。

徐公文集跋

宋徐公文集三十卷。徐鉉撰。宋刊本。每半葉十行。行十九字。高七寸二分。寬五寸八分。白口單邊。口下有刻工姓名。字徑四分。宋刊宋印。藏經箋作面。宋羅紋紙作護葉。字畫清朗。古香醞醕。誠天壤間驚人祕笈也。首行徐公文集卷第一。次行東海徐鉉。每卷有目連屬篇。目前有天禧元年十一月三司戶部判官朝散大夫行尚書都官員外郎上護軍胡克順進書表。及宋眞宗答敕。○淳化四年祕書郎陳彭年序。末有大中祥符九年太常丞集賢校理晏殊後序。及紹興十九年右朝議大夫知明州徐琛跋。附錄一卷。則行狀及李昉所作墓志。李至等所作輓詞祭文也。陸存齋所得鈔本。原出於此。惟陸跋作東海徐鉉撰。衍一撰字。荃孫藏金亦陶鈔本。亦出於此。

跋云。徐騎省文集。近世鮮有刻者。此本係虞山錢宗伯於崇禎間從史館印摹。南宋本字頗大。予縮以小字鈔存之。集中稱今上御名者。高宗名構也。太祖諱亶。太祖之父仁祖諱弘殷。眞宗諱恆。仁宗諱貞。英宗諱曙。故其字皆闕一筆。太宗諱炅。神宗諱頊。欽宗諱桓。如敬鏡。竟貞。徵勛。署完。諸字亦闕一筆者。蓋諱嫌也。今悉仍之。但原鈔非出通人。故舛譌甚多。惜無善本校對。錄竟爲之悵然。迂齋金侃識。惟此書刊自紹興。而行狀一卷。字體迥別。疑孝宗朝補刊。締構所構均作太上御名。戒慎。慎字作御名。全書不如此。金跋尙未詳也。各家書目著錄尙無刻本。此本自元入明文淵閣。此書在閣時祇裝十冊。每冊首一方印。又首尾二長方印。今悉遭割棄。而分

爲十二冊裝潢。以小紙條襯於面上。最不適用。繫國初風氣。必是歸傳是樓時。以掩其盜閣書之迹。行狀後有應奉危素讀一過七字墨蹟。再入定邸。庚子散出歸寶希濂太守。今歸吾友董授經。手跋一通以志眼福。

第一卷闕詩九首。當不止一葉。各本皆同。

藏春集跋

元劉文貞藏春集。明處州府馬廷彥得商文定公類藁校正。歲在天順辛巳。馬偉後序。首行藏春集卷弟一。次行中書參知政事魯國文定公左山商挺孟卿類藁。三行中順大夫浙江處州府知府瀛海馬偉廷彥校正。四行七言律詩。是第一刻也。文中擡寫空格。是依商藁之舊。非緝元板。予藏微波榭。

鈔本。出自後人重刻。首行劉太傅藏春集。已與此刻不侔。官銜兩行亦去之。僅畱後序。字句亦閒有不同。是重刻時得模黏之字從而誤填者。又止有七律七絕兩體。詞一卷。而鳳林書院詞選兩首未采入。名臣事略載野齋李公序亦無之。是亦未全之本。此刻又缺七葉

虞道園學古錄跋

虞道園學古錄五十卷。考後至元庚辰道園年六十九。臨川李本伯宗黃鍾仲律來訪先生於山中。編文二百餘篇。明年李黃乃與先生幼子翁歸。編成學古錄卷一至二十。曰在朝藁。二十一至二十六曰應制錄。二十七至四十四曰歸田藁。四十五至五十曰方外藁。至正元年閩憲僉幹克莊刻於福

建。每半葉十三行。行二十三字。黑口。版心或刊道園學古錄
幾。或刊學古幾。學多作辛。錄多作彖。有至正元年門人李本
跋。至正丙戌道園年七十五。江西肅政廉訪使錙伯溫編道
園類藁亦五十卷。刊於江西撫州建安劉氏覆刻每半葉九行。行二十字。黑
口大字。與西湖書院本之文類相仿。歐陽玄序文手書上版。
並有牒撫州府文。撫州府總管詹天麟附識。明景泰七年鄭
達知崑山縣。過太倉之興福寺。得建本於寺僧陳公。與主簿
南海黃仕達捐貲刻於東禪寺。四閱月而畢工。有鄭達序。成
化初年葉文莊公盛從道園四世孫吳江虞湜就手書鈎摹
序文并書札附入鄭刻學古錄之上。葉跋可憑。不知是類藁
序。非學古錄序。然則元至正刻無序。有李本跋。景泰本有鄭

達序。歐陽公序。重增目錄並詩文三十八首。分增各卷之後。在卷外空三行。月葉。張金吾謂鄭達增入者類是。嘉靖本將各文附入卷中。而目不增。序跋皆同。總之學古錄是小字。類藁是大字。截然兩書。陸存齋不知小字大字之別。有學古錄類藁之不同。而以劉伯溫改爲大字而重刊之。混兩爲一。其誤顯然。然葉文莊已誤。是類藁在明初且不易得矣。惜缺卷廿一至廿四。廿八至三十六。四十四至四十六。其十六卷。明文淵閣書目十一冊。今存八冊。愛日精廬有鈔本。其五十卷。荃孫自藏舊鈔八冊。序目雖全。文則專錄學古所缺。非完書矣。

四庫未收。錢辛楣補元藝文志無卷數。想亦未見書也。道園

遺藁有題劉伯溫行卷詩。又有宿周氏東齋聞饒以和李本夜話詩。

道園遺藁跋

元刊本。每半葉十行。行二十字。高五寸四分。寬四寸八分。小黑口。單邊。從孫堪輯於學古錄翰林珠玉外得詩七百餘首。編爲五卷。樂府一卷。共六卷。吳江金伯祥刻之。其子鏐手書。至正十四年五月堪跋。本有楊椿黃潛兩序。此脫。黃堯圃手摹黃潛序。補卷三內二詩。後加一跋。原委甚晰。

石田集跋

元刊本。每半葉十行。行二十一字。高七寸二分。寬四寸五分。黑口。雙邊。字多行體。訛錯亦多。淮東路學刊本。首有至元五

年淮東道肅政廉訪司事古揚州路總管府刊板牒。有王守誠、陳旅、蘇天爵序。後有附錄虞集桐鄉阡碑。許有壬撰神道碑。作石田山房記爲一卷。有松下清齋朱文長印。芷齋圖籍朱文方印。海鹽張載華手書。所謂涉園張氏也。載華字佩兼。留輯初白庵詩評。

刻源文鈔跋

刻源文鈔四卷。共六十八篇。梨洲先生之所選也。梨洲界門人范石窗刻之。板久不存。道光甲午鄞芝山盧鎬重刻之。所得慈谿鄭耐生鈔本。耐生自跋。馮登府跋。均不知康熙時有刻本。今觀此書。刻自海昌花山馬寒中。所謂道古樓馬氏是也。寒中本姓朱。後改馬。朱竹垞謂之家寒中。朱曰。觀謂之從

予可證葉鞠裳所謂桑海之際改易姓名有難言者。荃孫得朱竹垞手鈔徐常侍集有朱馬朱白文印並未諱言朱氏非因易代而然。此書較盧本多送鉛山王亦銑歸鄉序。送謝仲潛序兩篇。共七十篇。而板刻精審。畫段圈點頗顯精神。勝於盧刻多矣。耐生柳東不知此刻。足見流傳之少。而何義門所見分甲乙丙丁四卷者。祇六十五篇。其目絕不相同。更屬難得。剡源之文縈迂回旋。有滌盡潭清之致。大約宗歐陽文。而得其清腴。如蘇之峭厲。韓之雄直。則無有也。爰補二文及朱日觀仲安兩序藏之。並過錄圈點。時宣統庚戌二月。

圭齋集跋

歐陽圭齋文集十五卷。附錄一卷。自公子佑持所編二十四

卷之書散佚。五世孫俊質翁搜輯散亡。得成是編。而長子銘季子鏞付梓。成化庚寅彭時跋。安成劉鈺再跋。附錄張起巖撰碑文。危素撰行狀二篇。有天順五年彭時吳節兩跋。黃蕘圃跋云。先得此本。後得陶五柳本。鈔補揭傒斯序神道碑後。彭吳兩跋。劉鈺校刊跋。並極爲推重。荃孫此本與蕘圃本缺失同。漫漶亦同。卽同時所印之書。惟沈西鰲以揭序之歐陽先生集。名出處與圭齋全不相合。並非圭齋。詆爲銘鏞之誤收。王西莊先生云。圭齋年八十五。據宋潛溪序言公集百餘冊。毀於兵。是集不過辛卯至丁酉七年中所作。則是七十九歲至八十五歲作也。年已荒耄。所作無一可觀。況開卷第一篇天馬賦。卽系登進士試作。則知掇拾殘臆。隨其所入人之。

不盡七年中作。然圭齋久享大名。碑版序跋掇拾集外。可得四十餘篇。居全集四分之一。彙而刊之。以存圭齋之真。庶以望之楚南學者。

滋溪文藁跋

滋溪文藁二十六卷至三十卷。元刊本。每半葉十一行。行二十字。高六寸五分。寬四寸五分。黑口。雙邊。雙魚尾。字大幾及五分。體在歐趙之間。乃元刊之至精者。各家書目均傳鈔本。荃孫藏舊鈔本。盧抱經先生朱筆點校。已爲至善。取此校閱一過。訛脫尙多。并有誤疑之處。雖所存止五卷。亦可謂難得之本矣。

青陽集跋

青陽集九卷。附錄二卷。正統十年刊本。黑口。雙邊。前有高穀行書。前八卷。淮西門人郭奎子章編。洪武初。吳陵張君彥剛付刊。沅陵縣丞高誠訂正印行。後張仲剛毅復輯續編一卷。忠節附錄二卷。刻之。卽此本也。周香巖跋。青陽集黃蕘圃校過。以此正統本爲最善。別本皆不及。所有夾籤係別本補錄。聊備參攷。不可據以補入。嘉慶己未九月三日。漱六居士周錫瓚記。前有崦西草堂朱文方印。汪士鐘藏白文長印。後有南陽叔子苞印白文。二泉朱文。兩方印。則葉奕苞汪闓原也。荃孫向藏正德辛巳刊本。作五卷。詩文續得者均散入各卷之內。附刻止存元史青陽書院記兩篇。劉瑞序矣。

姑蘇雜詠跋

明高啟撰。洪武四年刻本。分書自序。每半葉十行。行二十字。高四寸五分。寬四寸。黑口。雙邊。首行題姑蘇雜詠。次行高啟季迪著。後學殷鏗校刊二行。補刻末一葉。亦補刻增入憩龍山二詩。小注憩龍卽鏗之新阡也。偶閱大石志。得此二首。故并錄之。大石在陽山。湧出山腰如蓮花。志明中葉人所撰。人撰考既見此志。似非明初人矣。然大全集以前單刻本。無不絕佳。況爲各名家遞藏。尤爲瓊寶無疑。藏印有馬印。思贊白文。小方印。紅藥山房攷藏私印。朱文。長方印。思贊朱文。小長方印。振宜珍藏滄葦朱文。兩方印。滄葦朱文。大方印。振宜白文。小印。汪繹別字東山。朱文。庚辰狀元白文。兩大方印。稽瑞樓白文。小長印。蓉鏡收藏白文。芙初女士姚晚真印。朱文。兩方。

印。晚芳女士朱文長印。清河朱文小方印。在處有神物護持。朱文方印。蓉鏡朱文小印。芙初女史朱文。姚印。晚真白文兩方印。佛桑仙館白文方印。香草山房藏本朱文長印。貽典白文。秋葺朱文兩方印。邑孫朱文方印。墨琴朱文小長印。飛雨樓白文大長方印。前有孫子瀟。後有席佩蘭小款。蔣伯生題款。黃琴六跋。

元音跋

元音明本半葉十一行。行二十一字。高五寸六分。寬四寸二分。黑口。單邊。前有洪武甲子烏斯道序。稱甯波孫厚理彙輯。又有曾用藏印。稱爲定海張達所刻。末題辛巳九月下澣。而空其年號兩字。辛巳爲建文三年。殆以靖難革除。刊削其

板。蓋猶明初本也。各家著錄皆鈔本。荃孫亦有舊鈔。刊本則初次寓目。每卷前空三行。有翰林院印。知爲翰林院散出。惜止存半部。後有禮部姚鼐跋。

有學集跋

牧齋尙書初學集一百十卷。瞿忠宣公爲刊於崇禎癸未。入國朝所撰未刻藁。手編五十卷。本初學集舊例名曰有學集。在從孫遵王處流傳於後。無錫鄒流綺。漪刻於康熙甲辰。是第一刻也。鄒又刻吳梅村綬寇紀略。借名吳伯成興祚序。伯成控諸有司。至燬其版。此集遂同燬矣。趙刻敏求記假傳王露序亦經官燬康熙乙丑梁溪金匱山房重刻此集。增入題跋雜文爲卷五十一。各卷亦有增入。是第二刻也。今得初刻原本。而目與

文不合。文之篇葉又不合。小號有云一至五者。有云六至十四者。抽換改易。悉數難終。略可補綴。亦未能照目敘入。而以二刻之增入者。彙次於後。隨又得莫君楚生所藏舊鈔本。亦五十卷。而投筆集一百八首。編入第十二卷。刻時撤去。僅存後秋興八首。重刻又撤去。字句改者甚多。及次序大不相同。有錢氏大昕白文方印。而無跋。當時禁書未敢著筆也。

陳皇士太僕啟禎兩朝遺詩錄跋

啟禎兩朝遺詩八卷。長洲陳濟生撰。濟生字皇士。號定叔。陳文莊公仁錫之子。以蔭歷官至太僕寺丞。娶顧寶璠官蔭生同應之女。備人先生之姊壻也。以天啟乙丑丙寅之際。羅逆奄禍以死者爲一類。崇禎時殉國難者爲一類。乙丙以還起

義死肥遯終者爲一類。人各有詩。詩繫以傳。是中州集河汾諸老遺詩一派。格式亦與中州集同。始於癸巳。爲順治十二年。成於乙未。爲順治十四年。皇士表章忠義。網羅遺佚。雖具苦心。實干法網。身故之後。尙以此書爲人所訐。致甯人先生投山東獄。自辨。僅而得免。邇時姜元衡出首之書一百二十餘葉。沈天甫出首之書三百一十六葉。今武昌陳仕可參事所藏八卷。共四百三十二葉。有有詩無傳者。有有傳無詩者。又存畱之傳。大半明史有傳之人。恐抽燬業已不少。惟是二百餘年尙有最足之本流傳在世。固爲人所不料。諸先生詩無集甚多。片語隻字。得之不易。在天英爽。固亦式憑。然非仕可之勤於搜訪。亦不能及見耳。

皇士有再生紀略

康熙五年萊州卽墨縣故兵部黃公家僕黃寬之孫黃瓚之子。本名黃元衡。順治己丑進士。授內翰林。揭告其主原任錦衣衛都指揮使黃培。見任浦江縣黃坦。見任鳳陽府推官黃貞麟等二十四人逆詩一案。出首書二冊。計一百二十餘葉。六月奉旨發督撫親審。七年正月三十日撫院審時有云。忠節錄卽啟禎集一書。陳濟生所作。係崑山顧爾人到黃家搜輯發刻者。咨行原籍逮證。

康熙六年沈天甫夏麟奇呂本葉大合夥僞造此書。假已故陳濟生之名。而羅江南北之名士巨室於其中。以爲挾害之具。又僞造閣輔吳姓一序。以騙詐其子見任中書吳元棻銀二千兩。因未給。將此書出首。計三百一十六葉。

按兩書卽是一書。沈天甫出首三百餘人。今止一百一十六人。且多死於明朝。黃宗昌傳已無有。或沈天甫多所屏入。斥爲僞造。或督撫不欲興大獄。株連多人。先自燬去。亦未可知。是時去浙江明史案不過四年。沈天甫踵吳之榮之故智。督撫正法沈天甫四人。案遂消滅。小人害正。反以自害。而斯文之元氣。藉以存留。國家陰受其福。今安得此有擔當之督撫哉。

校本六唐人集跋

聯珠集一卷。馮補之据乾道本校。

半葉九行
行十六字

何義門覆核。李

賀歌詩。陸敕先据陳解元刻本校。

半葉九行
行十六字

長江集。敕先据南宋本校。

臺閣集。毛斧季据南宋本校。

半葉九行
行十六字

唐英集。敕先据述古

堂鈔本校。唐風集三卷。斧季据北宋本校。

牛葉十三行
行二十一

敕先

覆校。今乾道本聯珠集。由虞山歸荃孫。與校本絲毫脗合。誤

字亦同。足見前輩校讐之精。而他本之佳。亦可知矣。毛刻四

唐人詩。在毛刻爲最精。而改換行款。喜易古字。異本標一作

于下。邇時參合各本。擇善而從。後來盧抱經孫淵如墨守此

派。敕先則据一宋本。筆筆描似。卽訛字亦從之。縮宋本於今

日。所謂下真蹟一等者。後來黃蕘圃汪闃源墨守此派。兩派

一屬校讐。一屬賞鑑。均士林之導師也。各本均初印。荃孫亦

取毛本照臨一過。印本稍後。唐風半已刊改。虎賁中郎典型

尙在。讀書者自能領會之。唐風署玄。默攝提格。

康熙
元年唐英署

癸巳。

順治
十年

李賀長江均署癸卯。

康熙
二年

臺閣署甲辰。

康熙
三年

皆在

甲申之後諸君只書甲子。不書年號。蓋以遺民自命也。至義門覆校聯珠。則大書康熙辛卯矣。東海揚塵。滄桑又見。不自知涕之何從也。壬子正月九日。

蘆川詞跋

明鈔蘆川詞二卷。黃堯圃舊藏。每半葉七行。行十三字。字大如錢。前有何義門跋。堯圃先得鈔本。後得宋本。撤去補寫之葉。而影宋本以補。加跋至八段。並識兩詩。亦可云愛之至矣。宋藝文志作二卷。書錄解題作一卷。宋時本自兩行。此與宋本由黃歸畧里瞿氏。由瞿氏歸豐順丁氏。今歸吾友張菊生。假我錄副校訖。讀何跋言心友得此冊於錢遵王家。因檢讀書敏求記。舊鈔足本詞曲類末條云。張元幹蘆川詞二卷。宛

庵先生手書。詞中多呼不字爲府字。與府同押。蓋閩音也。趙

本條阮本題存長半字

此
手書詞中多味否字爲府與舞下缺

然則此書

爲吳文定公手書。其板心無功甫字者。爲後人所補。字跡迥不合。篋圃未檢敏求記。一經拈出。愈爲是書增重。宋本仍在。瞿氏此書亦從瞿氏流出。書後有恬裕齋印。朱文方印。卽鐵琴銅劍樓舊名也。王子九秋江陰繆荃孫跋。

首闕賀新郎過苕溪尙許垂綸。否風浩蕩欲飛舉。上闕末二字醉中舞。卽敏求記所謂閩音也。宋人彙本口上往往標其字如江西詩派饒節操集署倚松三公類藁之署南塘梅亭皆口上特標兩字。又何疑乎功甫。

明本拜月亭記跋

拜月亭記。元施君美撰。何元朗謂勝於琵琶。王弇州不以爲然。然琵琶襲舊太多。與西廂同病。且其曲無一句可入絃索。拜月則字字穩帖。與彈搗膠黏。蓋南曲全本可上絃索者。惟此耳。至於走雨錯認拜月諸折。俱問富往來。不用賓白。固爲高手。卽且兒髻雲堆小曲。在少不知愁。摹擬閨秀嬌憨情態。活脫逼真。琵琶咽糠描真亦佳。終不及也。沈德符云。向曾與王房仲談此曲。渠亦謂乃翁持論未確。且云不特別調之佳。卽如聶古陀滿爭遷都。俱是兩人胸臆見解。絕無奏疏套子。亦非今人所解。予深服其言。若西廂才華富贍。非詞大本。未有能繼之者。終是肉勝於骨。所以讓月亭一頭地。月亭後小半已爲俗工刪改。非復舊本矣。今細閱拜新月以後。無一詞可入

選者。便知此語非謬。至王靜庵以雙手擘開生死路二語。據小說爲明太祖撰句。證其非元人。太祖自僧爲盜。目不知書。此等事相襲甚多。皆非事實。不足爲證。至拜月改爲幽閨約。在明末。萬曆癸巳。吳中諸公子習武。爲江南朱撫軍所訐。謂諸公子且反。其贈答詩云。君實有心追季布。蓬門無計託朱家。以實謀反確證。時三相皆吳越人。恐上遂信爲真。急疏請行撫按會勘虛實。朱已去任。代之者爲解曰。拜月亭曲中陀滿興福投蔣世隆。蔣因有此句畱贈。非郝作者。因取坊間刻本證之。果然。諸公子獄始漸解。王房仲亦諸公子中一人也。今新舊刻本俱無此一聯。豈大獄興時。憎其連累。削去此二句耶。或云拜月初無是詩。特解紛者詭爲此說。以代聊城矢。

耳。邇時尚未改幽閨記。荃孫所得李卓吾批評本已作幽閨記。亦無季布朱家二語。足證解紛之說。開場沁園春是大字。第一折緱山月以下五闕未移。喜遷鶯杏花天小桃紅三闕亦無之。只前圖尙存一葉半。前半葉是走雨。全葉是杵衣光景。書中無此情景。書口又明書幽閨記卷上。又非他書雜訂。質之靜庵以爲何如。

翁覃谿行樂十二圖跋

大興翁覃谿先生行樂十二圖作一冊。一曰滕王閣。乾隆己卯典江西試。先生年廿五歲。有七律一詩。不載集中。一曰黃鶴樓。乾隆壬午典湖北試。先生年廿八。有千古題詩到崔李。國朝制義重熊劉。一聯。一曰閱江樓。望七星巖有七古詩見

集中。以上小影無鬚。一曰藥洲。乾隆辛卯九月先生典學廣東之八年。將交代時。年三十七。像始有鬚。有詩不載集中。一曰棲霞疊浪崖。乾隆己亥典試江南事。先生年四十五。一曰澄海樓。乾隆癸卯出關。年四十九。有詩見集中。一曰棲賢望五老峰。歲在丁未。先生典江西差之次年。年五十四。在棲賢寺望五老峰。眞廬山正面也。一曰蠡勺亭。歲在壬子。先生典山左學。年五十九。詩見集中。以上八圖均出使在外登覽之作。一曰直閣曝書記。官

文淵閣直閣事時。祕閣曝書等事。一曰奎堂閱卷記。癸卯秋闈典試順天事。一曰校勘諸錄。一曰攷訂金石。則先生常課也。先生處

藝風堂文別存卷三
國家全盛之時。膺文學侍從之職。輅車頻出。勝友如雲。著作等身。年登大耋。目窮山水之勝。心結翰墨之緣。百年之下。尙有餘慕。今也文集三十五卷。刊於閩中。詩七十卷。分刊於京師。福建。又重刊於粵東。卽片紙隻字。藝林奉爲環寶。昔曾得先生手藁四十餘冊。詩文未刻甚多。鈔出詩二十四卷。文約百篇。錄存一目。今易主。非解事者。大約沈薶矣。昔見藥洲養子。以其圖近匠工。遂未購真。今觀此圖。與藥洲卷卽一手所繪。或先生門客所爲。非畫家也。宣統庚戌江陰後學繆荃孫記。

藝風堂文別存卷三

癸甲豪

藝風堂文漫存目

癸甲稿

卷一 詩

癸丑二月樊園探杏限東韻 題王文簡公與林吉人
手札 三月三日善化相國約同人樊園修禊今年距
永和蘭亭是二十七癸丑用工部麗人行韻 同人又
以莫春之月天朗氣清惠風和暢分韻得莫字 六月
十二日山谷生日會於泊園乙厂主之出觀宋刻編年
詩注用詩中七古原韻爲題因次李之純少監惠研韻
答謝同人壽詩 題高翰生金泉修書圖 九日雲
起樓登高 送梁心海之西陵 題邊袖石前輩詩

詞手稿 題明葉天寥先生遺象 題劉蔥石枕雷閣

圖 漁洋生日分韻得尚字 雜詠 題無功道人釜

籠歸耕圖 魴魚 題吳綱齋學士九鐘精舍圖 止

庵相公招飲小桃源主人出家藏印心石屋圖繪全器

款客卽席以陶字爲韻 消寒第六集精忠柏斷片歌

甲寅正月二十日朱念陶招同人祝唐白太傅生辰

續舉九老會 全孫 年七十有一預坐賦詩 題全謝山

先生象 赴松江 到家 到京示同人 示甘遜

和吳甘遜韻 吳甘遜原唱 題吳甘遜藏毛鈔石槩

爾雅 九月九日次陶集閒居韻 重游崇效寺觀紅

杏青松卷 消寒第七集題湯貞愍公夫婦子女畫冊

題顧亭林先生象 題董香光墨跡 詠史 北齊

小樂府 明季小樂府

卷二 碑 傳 序

光祿大夫雲貴總督吳公神道碑 陳燮卿觀察傳

贈光祿劉紫回水部家傳 劉母邱太夫人傳 徐叔

雅榮祿家傳 鞠錄齋稿序 錢鐵江大令清風室文

集序 元郭退思橡史雲山日記序 玉海堂叢書序

影宋巾箱本叢書序 適園叢書序 吳石潛鐵書

序 鹽法通志序 陶廬續憶序 古學彙刊序 徐

叔雅風月廬贍稿序 韞玉樓遺稿序 劉語石無長

物齊詞存序 家衡甫紉蘭盦文集序 繆氏蘭陵世

譜序錄

卷三 考書記跋

漢經師家法考 嘉祐七史考 平水板本考 與沈

子培書 華亭韓氏藏書記 周湘舲造金剛經塔記

蜀石經殘本跋 易林注跋 大戴禮記跋 樂書

跋 平水巾箱本爾雅跋 方言跋 桂氏說文義證

原刻跋 史記集解跋 史記跋 南齊書跋 輿地

紀勝跋 道德經跋 南華真經跋 淮南子節本跋

五代史平話跋

卷四 跋贊

陶淵明集跋 東坡先生和陶淵明詩跋 鮑氏集跋

李翰林集跋 杜陵詩史跋 柳柳州外集跋 鉅
鹿東觀集跋 王臨川集跋 魏鶴山大全集跋 黃
文獻公文集跋 伯生詩續編跋 東維子集跋 坡
門酬唱集跋 錢衍石定廬集跋 明文文肅公手札
跋 翁覃谿分撰提要稿本跋 書楊和甫遺墨後
白題象贊

藝風堂文漫存卷一

江陰繆荃孫

癸甲藁

詩

癸丑二月樊園探杏限東韻

江南二月披和風樊園花事春融融主人好花兼好客樓臺
虛敞閒庭空花光炤眼紅不定山杏絢爛疏籬東消息早知
新雨足色香恰好斜陽烘小正特書園有見道園細譜風入
松穿林蠟屐有餘興百步芳草青蒙茸座上名流皆舊雨恍
如身到長安中論齒不才忝居首飄蕭白髮眞衰翁黍離麥
秀歌慷慨畫禪書蠹談從容張鐙賭酒足豪放興酣一往拈
詩筒新詩明日駱驛至景文開府當同工他時結實應餉我

異種或出蓬萊宮

藝文類聚
有蓬萊杏

題王文簡公與林吉人手札

書律詩聲晉與唐苦吟一字費商量天生愛好成標格字字珍珠夜有光

千古騷壇負盛名虞山而下數新城李何一派原私淑清瘦

于鱗是後身

用吳修齡語

三月三日善化相國約同人樊園修禊今年距永和蘭亭是
二十七癸丑用工部麗人行韻

上巳雨晴天宇新元老開閣宴故人永和勝事記憶真分體
分韻取次勻廿七癸丑同陽春名流角逐鳳與麟海棠綢爛
紅縱脣官柳婀娜青搖身遊敖相習情轉親桃源咫尺能避

秦絨詩天雁偕河鱗卽此籌畫皆經綸會稽是時驚胡塵東

山高臥推國珍屈指草聖兼經神

隋志周易繫辭二卷謝萬撰

後之談者

尤津津流觴左右能幾巡狂醉或吐丞相茵我欲歸采蓉湖
蘋有水可釣車可巾曠達夙師劉伯倫埽除得失消喜嗔

同人又以莫春之月天朗氣清惠風和暢分韻得莫字

良辰逢上巳春光已云莫勝會數蘭亭中外咸傾慕今年又
癸丑屈指廿七度雅集固盛傳法書尤廣布是時晉南遷王
步已非故西垂宣武驕北伐深源誤聊借觴詠娛藉申曠達
趣吾儕方苦兵佳日猶僞句蠟屐惜無山鶯花方滿樹靖節
記桃源召平老瓜圃烹飪五侯合塵囊四美具迴憶咸豐初
江南墮妖霧已失金陵城復斷譙山戍

前癸丑二月十二江甯陷十八鎮江陷

壤奪倒篋殺戮及婦孺恩恩六十年兵革還再遇傷哉歷
窮途何日得安堵世事險絃絲浮生高葉露懷古情更深訂
盟景相附風憶永和清酒依金谷數

六月十二日山谷生日會於泊園乙厂主之出觀宋刻編年

詩注用詩中七古原韻爲題因次李之純少監惠研韻

江城六月涼如秋主人提壺勸不休瓣香雙井作雅集軒宇
靜穆林塘幽詩人中讒走瘴地未能導養追安期浮正零落

斯文在天壤萬古不廢真山正乙厂募古如募羶百千神怪
叢筆頭出入天心穿月脇瘦筋勁骨鐫窮愁膚詞埽盡眞理
出貫弗今古擢時流蘇齋自誇獲三注紬刻草草非深求散
原得詩君得文紹興乾道祖本供冥搜

乙厂先得宋刊三注
詩本又得黃太史前

集爲紹興鐫板
乾道補葉之本
年譜卅卷須復古庶幾一洗西江羞
孫鑿撰
十卷明嘉靖本尚存其真萬曆并爲十四卷翁刻本亦從之
四庫本又并爲三卷祠堂本又以嘉定己巳爲成○己巳須
重刻舊
籍正之

答謝同人壽詩

茫茫人海萃千愁
虛度年華七十秋
名姓祇能隨紙尾
行藏

轉恐問刀頭

久避海上
不得歸里

彥回高壽誠非福

席帽山人元
王逢自號山

在江陰

吞聲不解憂
多謝諸君勞
見愛枉將楞櫟費雕鏤

前詩已成復得五十字謂之自壽可謂之自挽亦可

七品歸田儼釣師
自知入世不相宜
可憐漏盡鐘鳴日
又值

天荒地老時
學步隨園徒自悔
抗心堯圃亦難追
一生艸艸

無成就空負霜眉與雪髭

題高翰生金泉修書圖

揮塵譚經憶昔年萬閒廣廈兩名泉泉聲如舊名流些話到

齊州便惘然

光緒辛巳東撫張勤果公聘予主講樂源兼修通志時孫佩南主金泉精舍與趙青衫法小山

時相過從勤果薨逝予亦因病回京今諸君均歸道山矣

轉瞬滄桑百變更閉門點勘擁書楹聊城楊精粹臨清徐富

赫赫東方三大名

齊東金石冠垓垓昔日儀徵勒鉅編百二十年君繼作可憐

與我了無緣

昔修通志金石一門擬辦續志志所無者體例一準前編志所有者僅存目錄並辨誤補考待

訪目

九日雲起樓登高

簾卷西風萬木凋危樓百尺入層霄側身天地空千古放眼

關河又一朝老去詩篇多漫與愁來樽酒總無聊重陽舊事
休尋索三五吟朋伴寂寥

浮雲西北是長安塵世緣知插腳難出入自由同狗竇升沈
不定詔猴冠故園松菊秋心老滿地干戈海色寒麥秀黍離
歌慷慨南中風物盡凭闌

送梁心海之

西陵

昔年風範郅都鷹閱歷名場擅九能皋羽詩歌悲故國亭林
涕淚灑諸陵窮邊驛堠朝飛雪古道關河夜蹋冰松柏歲寒
衰直節丰裁愈老愈峻嶒

題邊袖石前輩詩詞手藁

少年幕府中詞館我與先生蹤迹同宰相薦賢

天特簡遂收保障汴南功

先生爲文恪公薦舉得召對

一燈午夜雨如絲細讀空青絕妙詞白石玉田傳法乳聞聲

卅載懌相思

光緒乙亥編書目答問南皮師屬以空青詞入詞家今甫得讀全詞相隔四十餘年矣

手藁猶存一尺餘吳興體雜率更書清門零落休傷感掇拾

叢殘勝定廬

同治庚午晤令子竹潭於都門詩詞有家法竹潭歿李菊農重次之爲之刊行不如公集之手定也

殘藁李菊農重次之爲之刊行不如公集之手定也

題明葉天寥先生遺像

竺乾風範義熙民骨相峻嶒面目眞紀歲特書監國^卅入林

猶是宰官身夢中兒女仍如舊眼底河山忽斬新一樣嘯鵲

桑海恨可憐頻歲滯風塵

甲行日注用監國大統^卅

題劉蔥石枕雷閣圖

龍頭鳳臆綴花綾唐代流傳雅樂徵摩詰崑崙俱聞寂宮中
還有鄭中丞

孔

東塘

顧

天石

同時逞异才人間樂府出新裁一時搬演桃

花扇百載沈霾小忽雷

舊曲新鐫萬眾知居然寶器亦隨之小雷躍出大雷繼正是
劉郎得意時

入雲高閣滬江濱斜枕杪檀拭蜀塵紅袖添香勤愛護賞音
猶似舊宮人

漁洋生日分韻得尙字

我朝詩人數宗匠新城尙書孰與抗今日恰逢揆攬期二百

八十年相望公生崇禎歲甲戌北敵南寇無佳貺劫火一瞥
值盛時才名四播隨仙仗潛參王李去浮夸顯摩中晚徵宗
尙代興詩憶錢受之愛好名儕朱錫鬯橫山獨往得真傳確
士別裁發高唱後來作者矜性靈欲埽前型墮語障蘇齋集
內亦有詩苦辨蓮洋髓語妄分來一瓣熱心香飲不三蕉供
越釀公量最小何時得見禪悅圖是否全同坡老相復初題漁洋禪悅圖云象與坡公相似

雜詠

豫章外集探根源難得乾淳舊槩存朱敦儒李彬校勘名尙

在可憐零落舊清門黃堯圃跋豫章先生外集出自江陰楊文定公家有楊敦厚圖書

馬馳秋水誦蒙莊佳帙傳來篤壽堂有項氏印不料熙豐新學盛

居然郭象換王雱

何義門集江陰公車游廟市以五錢銀購莊子一部郭象序改署王雱真北宋本

赤岸東頭西舜城兩家藏弄最知名不圖困學留殘卷裨助

閻何校勘精

潛正困學紀聞跋在江陰得舊家鈔本殘卷以爲補其未備喜甚義門尺牘云借與大德本此

老草草一

閱卽還

一幅重屏合作圖虎孫考證未模糊宣和畫譜清河舫傳到

江陰夏一駒

李後主周文矩合作重屏圖論畫絕句宣和畫譜清河舫均載之江陰夏一駒所藏

題無功道人釜麓歸耕圖

治譜今初卸出家我夙諳煙霞雙足健禮教一肩擔勁節陶

元亮清風鄭所南半生攻著述大可補農談

憶昔壺觴聚臨流共舉杯昇書猶未睹警報忽頻來

辛亥八月廿二

日觴君十刹海之酒樓仲節季樵同坐假赴圖書館看宋元板書忽得警電遂別去桑海收殘淚昆池

話劫灰西山猶舊態展卷有餘哀

魴魚

河鯉河魴外登盤美莫加問名徵爾雅

爾雅鯉魴刀注今之魴魚也亦呼魴魚

產地證棲霞

北江詩話刀魚以江棲霞港爲第一

解凍隨潮信騰波愛日華

天晴則大上冷則少

腮紅膏欲滴鱗白玉無瑕刈草眞虛語

御覽望如魚側如刀

可以刈草含漿亦浪誇

鄭注鱗刀含漿之屬

貫宜尋柳葉清可配蘆芽水次

嬌難活明前候不差

清明後則刺硬味亦少差

上腴饒酒客俊味羨漁家

魚鱗有油非漁舟不能嘗

品與清流並筵無俗士譁飫心脂滑膩棘口刺

槎枒形似慙湖鱖

太湖中相似者曰湖鱖

分肥只渚蝦東坡詩句好流

水送桃花

題吳絅齋學士九鐘精舍圖

八磚精舍嘉禾張九鐘精舍吳錢堦清簟疏簾消永晝摩挲
吉金餐古香十鐘主人陳篋齋九鐘主人吳紉齋兩賢相距
數十載妮古意氣稱同儕我朝金石學未易屈指數西清
壽兩鉅編豈慕宣和稱博古翁阮徐葉諸城劉寶持款識同
琳瑯考訂名物釋文字傳形識篆無時休延陵一家最宏富
海南中丞稱領袖侃叔精審子苾多平齋恆軒相左右紉齋
淹雅真通儒翰林同志袁鄭朱編鐘半堵東魯出考訂真爲
經說郭煙塵倏起日月蝕鐘虞震驚天失色宮廷法物半飄
零會見銅駝臥荆棘墨寶流傳夜有光鄭盦卽鐘同攷藏魯
遷訖今數十載銅仙應感屢滄桑

止庵相公招飲小桃源主人出家藏印心石屋圖繪全器款

客卽席以陶字爲韻

天寒木落風蕭颯相公觴客浮春醪盤盂奪目同球刀重器
出自安化陶印心石室高岩堯

宣皇宮禁揮霜蒙石湖鶴山慶所遭臣也一例殊恩叨廿年

江左麾旌旄吳民久沐郇伯膏繪圖分詠羣仙朝荆關韓蔡

新樣燒

每器記一地與詩書以八分

官廚肅客常魚羔益陽督部聲望高

冰清玉潤皆人豪文孫保守猶堅牢令人賞玩心目勞郎家

善仿宣成窯

郎廷樞造稱郎窯

阮家鋤月梅花描

阮文達公側室劉恭人自畫梅花全

器鋤月山莊四分書

何如此器衰襲臯傳杯雅集儕官僚吁嗟乎滄桑

陵谷又一朝名臣事業悲風飄天家法物街市拋清門世澤
珍瑤瑤妖星熠熠吳楚郊瓦全相率山澤逃避秦何處源尋

桃賓筵宴樂餽醕糟長篇鉅製追風騷我亦舐墨投詩瓢

消寒第六集精忠柏斷片歌

潔如寒玉勁如鐵何年老幹風吹折拔地參天氣尙存中藏
烈士星星血柏臺飭紀齊萬民將軍手植柔條新一木猶思
支大廈風波獄起冤難伸此時此柏饒生意吸露擎雲蔭垂
地秦頭太重日無光喬木世臣先自棄將軍已死柏樹枯柏
亦如人正氣扶東洛松楸霜月冷西湖花柳春風蘇可憐樹
倒猢猻散慟哭冬青朝市換莓苔皴剝疑篆書留與文房作
珍玩棲霞嶺下王之祠風吹不轉森南枝一般草木分榮辱
游客猶譏分檜屍

甲寅正月二十日朱念陶招同人祝唐白太傅生辰續舉九

老會

荃孫

年七十有一預坐賦詩

樂天生自唐中葉不是開天全盛時壽到期頤思竹馬心非
朋黨羨泥龜名流佳日多茶隱

阮文達同生日年年有詩題云於某地茶隱

末世

狂徒託酒悲甘露變生恩怨盡消搖世外自吟詩

滬濱好客朱公叔良夜羣星聚一筵腰笛坐中吹李委牙琴
海上契成連敢云觴詠追前哲驟歷滄桑厭大年別有傷心
人不識怕吟長慶舊詩篇

題全謝山先生象

梨洲授四明史學冠當代先生尤卓犖識見越流輩微言兼
大義抗論必千載事蹟辨是非人材擬進退上可繼毛朱下
足開錢戴走也私淑殷遺書頗津津逮祠堂拜公象靜挹溫利

熊

祠在四明西關陸漁笙前輩約同游瞻遺象

梁君再示我又若聆罄欬句餘搜

土音端谿有遺愛我願摹萬本瞻仰同泰岱

赴松江

閉關東海角忽忽已三年揮手出門去風光隨處鮮秋心來
雁外涼意到鷗邊行止惟吾適胸懷倍灑然

西風吹木末轉瞬得秋多微雨消殘暑流光付逝波炎涼覩
世變醪酎發高歌恒悟盈虛理吾甘老薜蘿

山色青於染當門見一峰石梁花外艇野寺午前鐘鶴唳文
人恨鱸香隱士蹤雲閒原劇郡地力盡三農

時杭稻將登場

天水遺珍籍來從士禮居清門傳祖硯樸學守楹書錦暉留
身後牙籤出燼餘郁徐零替久世澤孰能如

韓溪卿先生遺書幾埒吾里瞿

氏文孫子穀世守之
且編書曰佳子弟也

到家

鍾山如識我不改舊時青城郭三年別兵戈兩度經壞牆留

舊迹

對門高壁
有鎗彈眼

戰血有餘腥不意蚩蚩俗都存桀筮形

而載昇平福無端社稷夷封疆歸債帥家室撞纖兒空抱中
興志都爲反噬資孤忠天不諒誤國恐難辭

蓬蒿高過額門巷認依稀亂世居難卜移家計已非書囊拋

冀壤畫篋長苔衣

實事

家國無窮恨臨風淚漫揮

六代繁華域傷心與昔殊松茆定林寺

半山寺古松
茆伐殆盡

水冷莫

愁湖發冢當塗令流民鄭俠圖江南稱勝地何計慰窮愚

到京示同人

視草西清舊蹟空浮漚身世歎途窮可憐鶴髮開元叟蹤迹
無端似牧翁

雲龍角逐少年場舊雨凋零史局荒一代興衰萬行淚後人

能否擬元

遺山楊鐵厓

示甘遯

一別三秋久重逢喚奈何暮年來日短新鬼故人多

謂蔣伯斧王升

鄭王孝禹諸君

難得鐵如意休言金叵羅重陽存舊約十日又先過

和吳甘遯韻

橫流滄海已三年依舊吟情到酒邊慨我胸懷多悵觸視君
顏色倍鮮妍窮途屢歷冰霜劫亂世偏多翰墨緣黃菊青樽
猶昨日酖顏相對更陶然

吳甘遯原唱

滿城風雨來杯底一夢滄桑過枕邊

用藝風舊句

三度重陽增寂

寞雨閒叢菊尙鮮妍亂離頓積無窮感文字能容再見緣紅
頰白髭還失笑詩情酒趣故依然

題吳甘遯藏毛鈔石藥爾雅

世重隱湖鈔蕘圃別成卷隱湖有心人佞宋能推衍選書必
佳帙掄工皆上選提行前後同點畫幾微辨中郎不可見虎
賁成冠冕所以賞鑑家寶之若瑚璉石藥道家言書自李唐
顯吳君得此本愛玩加睇眄文苑落僞荒酒邊成禁鬱珠璣
十二幅寸心聊自遣

九月九日次陶集閒居韻

重九古佳節驅車訪友生一醉苦無緣強以登高名冒雨同

東坡

坡和陶詩是日大雨

愛菊殊淵明擊筑有餘哀擁鼻難成聲少壯

曾幾時倏忽罹頽齡轉厭年命長坐視河山傾河山猶不固

何心計浮榮得失徇天意盛衰感物情今年困水旱翹首覘

西成

重游崇效寺觀紅杏青松卷

天花夜落誌公房虹月歸來挹古香

卷子失去數年楊蔭伯宗承贖歸仍畀寺僧高

義也百戰河山餘老衲

智公明故將松杏之戰脫而歸禪故畫以見意

千秋翰墨託空

王宜南掌故花仍在

龔定庵詩此是宜南掌故花

日下新聞志久荒

全孫昔年

隨筆日日下新聞甲午出都遂止

往事不須悲御李

昔年常與越市朝轉瞬纓先生同游

又滄桑

銷寒第七集題湯貞愍公夫婦子女畫冊

驢背將軍度斷橋吟詩作畫莫還朝一門忠義兼風雅點綴

江山又六朝

公有小印云六橋驢背故將軍及返金陵又鐫小印云六朝煙月騷人長

綠窗花雨舊藏春仙侶劉樊擬降真寫得一枝先寄遠梅花

香裏憶詩人

雙湖夫人止存詞兩首一寫梅寄九江一有句云綠窗花雨舊是藏春處

描真周昉擅風神袁浦名喧湯美人潑墨無端成幻戲媚豬

一一又橫陳

樂民以畫美人得名老年忽改而畫豬

好山無恙隔窗青祠宇依然薦醪醑取義成仁何所恨千秋

相伴有銀瓶

嘉名公第八女同殉於池

畫梅樓冊歸何處昔日七人今五人廿載韶光容易過調脂

吮墨亦傷神

公在靈北署中與雙湖夫人公子壽民右民樂民右民婦金芷香女綠春人繪一幅積成十四

幅并跋云小女祇入齡未能握管也此冊作於辛丑右民夫婦絲春均離膝下而嘉名字碧春者卽前跋之八齡幼女也

題顧亭林先生象

厄運遭陽九雄才冠大千天開新世界人是古英賢精衛思填海離騷欲問天鬚眉俱栩栩曳杖總淒然

高風陶靖節治術賈長沙餘事攻經學浮生感歲華謠聲出

金石生計指桑麻最愛關中勝能安卽是家

北江詩話云先生詩有金石氣

史局求遺老鋒車旦夕徵禮賢辭几杖誓死辦刀繩枉札貽

規範微言示勸懲一朝文獻在拒絕又何曾

先生雖不就徵常與史館諸公

函見集中

豈有徐東海張

大如陳眉公

尙不如

東海請先生回故鄉先生須每年五百金又門

生故舊須位置者數十人并言庾文最蕭瑟梁竈謝吹噓

致又

某人書有云將歸尼父
之樓恐近伯鸞之窻
漢學開新派吳鄉棄舊居無兒何所
恨傳世有遺書

題董香光墨跡

華亭尙書今鍾王墨花零落霏古香方冊縱橫高尺許兩疊
軒主曾收藏尙書揮毫紹南派圖開筆陣源流長行閒布分
舞燕折腕底變化神龍翔上追殘宋松雪趙下啟昭代天瓶
張三賢迭主敦槃會扶持元氣規晉唐忽焉小夫矜北學靡
崖造象搜琳琅擺脫規矩入險仄埽滌文采趨愴荒遂致人
心日囂薄卽觀書法能猜詳我持此冊三歎息方知至美皆
尋常奇珍在篋勤保護夢坡室內騰英光

詠史

龍子作事非尋常腸肥腦滿琅琊王殺一漢耳天子弟誰知
此漢非儉荒交手卽亂軍自潰王命懸於斛律光家家作主
尙不免保母猖獗宰相盲桃枝慣作如許事光亦血染涼風
堂大家甘作龜茲國此正此相同淪亡

嗚呼亂世人道窮以人爲糧口腹充惜哉高陽七十翁一死
乃與醯雞同沐猴而冠甫脫口韓生命盡鼎鑊中周苛紀信
兩烈士甘赴火燄成長虹太公登俎幸而免杯羹分我驚愚
蒙睢陽巡遠則曰忠大業昂瓚則曰凶盜跽脯肝猶不足逆
賊朱粲雙眼紅吁嗟乎世間怪事無不有敲骨吸髓言之醜
可憐鳳翔三歲圍城中人肉賤於狗

朱溫圍鳳翔三年城中
人肉價百二十狗肉價

百三

北齊小樂府

南齊廿四年北齊廿八年天語賀六渾汝其王三川

王三川

頭長齒如玉獨識隊主高如何見山陵天子猶緋袍

九龍母

露頭兼袒膊奔走山谷中高王猶未死天子自英雄

英雄天子

盡失大河南猶作龜茲國不怕陳師強只怕周師逼

龜茲國

腸肥兼腦滿吾愛瑯琊王不殺陸令萱龍子亦尋常

瑯琊王

高末復高末漸漸周師盛天子縱無愁佳人難續命

高末歌

仰天引雕弓一箭落雙翼我倚此二婦使足擊劇賊

二婦勇

勇哉蘭陵王入陣何太深不能取宇文家事空關心

入陣曲

造象欲求福鋤奸思報國悲哉崔離院佛力救不得

崔離院

不作衝天王願使安於德可憐兩目耳終是周師得

衝天王

朕朕狗腳朕三拳朕受之試看拳落處可是元家兒

元家拳

今年周打冰明年齊打冰河冰自年年國勢不可憑

打河水

人生處亂世禍福無所避高乾賀拔允死於嫌疑地

反覆死

此人如尙在何得至平陽百升飛上天血濺涼風堂

涼風堂

韓陵破四胡邨陰擲頭顱天白生英傑焉能作腐儒

臣叔麴

中流十萬兵居然溫太真朱瑒表已傳懷血爾何人

王琳恨

手持一壺酒遠勸李光州三百六十日亦有醒時不

一壺酒

產母夢風雷氣概何雄哉可憐寶行臺一去不復回

寶行臺

在上貴不驕君子防未萌慧童具卓識豈以辯給名

師羅對

魚鳥任留連好官思爛熟周公抱成王勸進一何速

官爛熟

清白貽子孫吾慕鄭公鄉石刻今猶在回首白雲堂

白雲堂

人生如寄耳行樂何愁爲崔張死直諫狗漢太無知

生如寄

河橋幕下歌神武手中酒鯁直亦何爲被人譬作狗

畜犬吠

侍書與侍讀先後俱封王可憐疥駝終老讀書堂

孔昭歎

欲答霸朝書須問崔孀母佞人偏好學直諫遂獲咎

崔孀母

不願作長史癡漢抗暴君如何閒數歲又盼嶽興雲

雲興嶽

三崔並二張不如一元康窮寇何弗追貽患空悲傷

邨山恨

我慕崔彥玄不擇清華地今若進兒曹與身亦何異

崔彥玄

粟殮并葵菜垂老終餓死名德何人知悲哉盧叔武

盧叔武

玉璽方頒詔眞珠竟造車清觴滿杯酌不久落黃花

黃花落

明季小樂府

迎福王

京師亡天下震南都猶在人心奮理合傳檄東南置諸鎮聯
盟雁行進不然半壁思偷安可追宋高與晉元奈何袖手咸
坐視北向未能發一矢不迎潞佛子轉迎福世子擁戴功成
拾青紫迎者誰馬士英拒者誰史本兵天心已定福王一諸
公紛紛亦何益

黔驢相

聞用牛明用馬兩畜生亂天下馬非馬實黔驢技止此耳忘
崎嶇驢弟能敵馬兄乎主謀何人阮鬍子聽其穿鼻受驅使
乞生畏死仍懼凶何不蹈刃沙場終慷慨獨有楊文驄馬士英迎
降又通書唐藩爲大軍所殺
楊龍友衢州戰歿

四鎮

左鎮敗賀鎮死健將只有黃闔子翻天鶴乃賊中來二劉庸
庸何足數不進恢復策乃專擁戴功義義五等封爵崇淮南
淮北長城同降者降死者死戰血模黏板渚雲逆骸狼籍都
城市帶礪流傳二百年至今尙說歸命田黃得功於板渚戰
死於都市散秩大臣錫光田雄子孫仍襲侯爵劉澤清迎降
鎮總兵文瑞劉良佐子孫兩廣總督德壽耿仲明子孫

石巢園

詠懷堂懷甯鄉石巢園傳子備避囂遠遁牛首陽巖花巖下

青豆房挑鐙譜曲彈絲簧餘技不亞臧首叔與湯若士一錯

何妨認十錯陟變熱惱爲清涼奈何諸君不我赦重題舊事

終參商一朝奮翮排天閭哲師素蟬重登場奈何國祚不久

長可憐伯詒走錢塘石巢園在金陵祖堂乃懷甯填曲之
所懷甯起戎政侍郎素蟬視師人謂

梨園變相 北兵逼金陵人問懷衛何所趨避懷衛曰我必不學但詔走錢塘識者謂古無是語殆曲本上得來然懷衛後正自浙入閩

作順案

魏奄誅定逆案圖賊亂作順案逆耶順耶今亦故先殺周鑑雷演祚兩人心迹未分明公必殺之罪何據仙霞關上鬼嘯風聲聲饒我呼介公石崖碎骨血濺紅歌聲猶繞氍毹帳中逆耶順耶將毋同 懷衛迎台大軍帥弁思得福建巡撫時在行帳唱曲以侑酒登仙霞關忽身蹉跌自語曰介公饒我遂墮山下糜焉

復社

手裏一香珠口裏一天如復社名士如是乎留都防亂檄國門廣業文東林子弟張吾軍猶惜楊家少一人社事盛傳奇

毀板宗師令社事寒文聲陸呈告之羹周彈幸而阮鬚再起

明社終紛紛譏刺由諸公否則大起同文獄五十三參吾道

窮山中不穩猿鶴夢青衿一例皆沙蟲手裏一串香珠口裏一聲天如便稱名士

國門廣業會在南都舉行阮鬚再起告辭諸孟日寄語山中諸君猿鶴夢穩決不起同文之獄也然大悲案內五十

三參之說便思一網打盡

悲童妃

病已求故劍弘光棄結髮伶仃九死兵閒來誰料君家到金

闕昔日猶存敵體恩今朝只願老長門縱令生活買顏子敢

望微軀偶至尊不下冊封詔乃置掖庭獄道途責貢稍恣睢

牢戶免身重穢辱廣選良家虛內主驚婚徧擾蘇杭土如花

玉貌冠三宮有人中夜淚如雨童妃事何敢偽認所言途中供給稍簡則推案大罵在獄

生子皆有
心誣蔑者

太子來

九門開九廟灰傳語主兒易衣躑躅行當街食人猛虎兼雄
虺江南千里何能來太子竟來舉朝震驚不敢到南都先達
杭州城云西之楚南之閩支離閃爍非人情太子真與僞先
驗東宮官端敬易文華出語何顛顛高成木虎無心肝徒然
紛擾喧朝端近則黃得功遠則左良玉出疏固滋寰宇疑露
檄尤非國家福國家不幸妖孽興不笑仇讐生骨肉太子何
江南即使是真亦不能
讓位況欲之楚之閩乎

梅花嶺

欲保江南半壁須防大河南北區區保淮已無識何況揚州

近胸臆閣部品望宜治國倉卒治軍無羽翼況乎羣小萃君
側梁苑先聞高傑亡皖江又聽帝南逼倉皇四顧天無色一
死報君亦何益梅花嶺上拜忠魂冷香零落游磷碧

九江哀

良玉附楚楚已殘破心豔江南富厚借題東下殺掠耳豈爲太子哉

獻賊不能平鬪賊不能拒熊羆百萬武昌城觀望徘徊兩無
據忽聞太子陷圍扉借題東下眞兵機那念仇敵思北伐但
聞豪富羨南畿君側誅奸晉陽甲上流聲勢英風壓吳頭楚
尾江東西千里盡遭龍漢劫烽煙狼籍九江城負國深於負
友生舊交只憶侯公子諍友先無喻大兄幕客空悲蘇與柳
忠言殊愧過天星

左後軍惠登相卽過天星也良玉死約東所部不殺掠全軍歸北且日視若輩所爲

我不如作賊矣

錦樹林

風枝婀娜吹幽香。畫蘭名筆留山塘。手寫法華先刺舌。血痕
縷縷難磨滅。早遇吳駿公。晚依鄭保御。落花飛絮兩無緣。情
悰不爲春風誤。龍山錦樹淡斜曛。泉水琤琮不忍聞。徐后祁
妃皆北去。尙留三尺道人墳。（明）光帝選后徐氏錢虞山進之
歸敬謹親王阮氏諸生阮晉女大鍼
宗人歸孔有德（明）光選定三宮也

桃花扇

云亭山人歌一曲。故臣遺老相向哭。黍離麥秀是耶非。半爲
美人半朝局。美人名重媚香樓。夫婿梁園第一流。勝地空傳
桃葉渡。豔歌常在木蘭舟。聘錢十萬揮闔黨。駟僧安能事田
仰。拚將熱血濺冰紉。幻出桃花紅澹蕩。舊院新亭涕淚頻。甘

從禪榻證前因杏花薦卷成佳話又作弘農夢裏人

扇藏商正宋氏

侯元標中鄉榜同考楊潮觀夢一女子囑留心桂花香卷

子後得一表又有杏花時桂花香句蓋是年春鄉秋會也侯

乃壯悔之孫一時喧傳李香君薦卷

藝風堂文漫存卷一

男僧保校字

藝風堂文漫存卷二

江陰繆荃孫

癸甲藁

碑傳序

光祿大夫雲貴總督吳公神道碑

自來國家純臣。當危難之時。力維大局。不懼眾口。初以弭定一方爲己任。繼以不竟其事爲隱憾。如雲貴總督錢塘吳公。於咸豐丁巳。當漢回構釁之時。爲雲南全省計。并爲天下大局計。糾劬鉅紳黃琮寶塢。撫勦兼施。以紓目前之急。雖省城大定。而徧地皆賊。兵驕餉竭。拮据兩年。形神交困。

上鑒其忠。許其引退。迨後十五年。天下敉甯。然後全滇肅清。蓋苦於時勢之難爲。非才智之不足。而公則引以爲咎。遺言

詔子孫弗爲碑志。純臣之心。後世當共諒之。歲在甲寅。清史開館。公之孫慶坻奉行狀來。授簡荃孫言曰。公有命不爲碑志。而事蹟罕傳於世。迄今已四十年。亦子孫之咎也。敢乞文以上史館。子其無辭。荃孫爰序而次之。按狀。公諱振械。字宜甫。號仲雲。晚號再翁。浙江錢塘人。曾祖■郡庠生。祖顥。乾隆己卯舉人。遂昌縣訓導。父昇。乾隆癸卯舉人。四川資州直隸州候補知府。三代皆以公貴。

贈光祿大夫。姓皆一品夫人。公幼慧。勤讀輒有神悟。癸酉順天鄉試舉人。甲戌進士。改庶吉士。授編修。戊寅大考二等。己卯充貴州鄉試副考官。

宣宗御極。召見於乾清宮。奏對稱

先充實錄館纂修。命充提調壬午京警

記名。旋授雲南大理府知府。請

訓日。

上諭以南服遐荒。當以重農貴穀爲首務。公頓首受

命。丁亥父憂。服闋授山東登州府知府。改沂州。戊子調濟南。

癸巳母憂。服闋授安徽鳳陽府知府。擢山東登萊青道。以事

降一級。己亥再授鳳陽府。庚子調安慶。辛丑擢貴州糧儲道。

癸卯擢按察使。戊申擢山西布政使。調四川。旋擢雲南巡撫。

兼署總督。乙卯調陝西巡撫。丙辰授四川總督。丁巳調雲貴。

時道路梗塞。駐曲靖一年。兵事吏事一手籌決。夜恆不寐。入

省遂病。屢瀕于危。不得已而後去。公之服官。蓋終始於滇者。

也。歸途由蜀經鄖陽。聞杭州陷。改道入秦。同治壬戌。

詔起耆臣。壽陽相國首荐之。

命赴山西。與巡撫籌辦河防。又奉

命會同督師勝公保。巡撫瑛公。辦理陝西軍務。旋引疾入
晉就養。丁卯回里。遂不出門庭。蕭然無異寒素。後二年庚午
十一月薨於家。得年七十有九。遺疏入奉。

旨。照總督例賜恤。葬於邑東欽賢鄉將軍山。公在秦撫時。山
陝鹽課攤歸地丁。課隨糧納。數倍於昔。秦民苦之。公疏言課
歸地丁。則駟僮得賣無課之鹽。窮民倍納無鹽之課。事大有
病於民。請改行河東招販先課後鹽之法。於國課民生兩有
裨益。奏入。允行。兩省編氓如釋重負。至今猶爭尸祝焉。在

大理嚴罵粟之禁。在黔立義學教孤寒子弟。設紡織局興布帛之利。在蜀續辦按糧津貼以佐軍糧。停止牙帖以安商賈。在滇加增銅廠鑄鑄以振砂丁。止南掌貢使以恤屬國。他人一節足以得名。在公尙不能悉數也。公蚤歲卽居清要。旣壯膺外任。喜年督師邊徼。比致仕猶馳傳車往來秦晉間。於齊於皖於蜀於滇黔先後皆再至。民生之利害。僚吏之賢否。舉皆殫心竭力以求一是。章疏所陳。無片語虛僞。故能以忠誠

結

主知。雖言路交劾不爲動搖。事後咸知所見者大。浮議自息。候官林文忠公早以明敏果練可當大任。許公至是方知林言之不謬。公工於詩。尤嫻習國朝掌故。所著花宜館詩十六

卷詞二卷。養吉齋叢錄餘錄二十六卷。黔語二卷。均已刊行。配姚夫人早卒。繼配王夫人亦先公卒。附公墓子二。長春燕。從二品山西道員。次春燧。女子三。孫男七。長文。塋。工部員外郎。次恩。塚。候選知州。三榮。塋。四卽慶坻。丙戌科進士。改庶吉士。授編修。湖南提學使。五善。塋。六道坦。七寶堅。舉人。曾孫士鑑。壬辰科進士及第。授編修。官侍講。次士錢。全孫素服公詩詞掌故之學。又納交於慶坻士鑑。爰爲銘曰。

湖上看山。城東結社。公爲名士。吟秋消夏。鑿坡簪筆。上苑賞花。公爲詞臣。著作滿家。箚霧瘴煙。礮雲刀雨。公爲疆臣。奠安土宇。周旋戚黨。引導材僞。公爲耆碩。丰裁高峻。處事接物。一以純誠。諸葛謹慎。士行恢宏。數典杜鄭。程詩屈宋。息影

鄉閭告終家衡。林泉岡道。佳城穹窿。雲飛華表。日冷喬松。迨今卅年。孫曾繼起。勒銘無媿。敬告悖史。

陳燮卿觀察傳

君諱熾唐。字少和。號燮卿。又號倉青。同邑人。曾祖宏度。乾隆癸丑進士。候選知縣。妣張氏。祖沿。候選按察。妣華氏。父式金。浙江候補同知。三品封典。富收藏。工書畫。同時名流咸稱寄舫先生。妣沙氏。周氏。君幼聰穎。遭亂出亡。未嘗廢學。寄舫先生極愛之。君家本以豪富名。報效軍需。接濟窮乏。後經粵匪之亂。屋宇燬損。壤地污萊。幾有日下之勢。寄舫先生於同治丁卯暴卒。君時年止十六。入奉慈闈。出禦外侮。經營補救。漸以就緒。又復下帷讀書。攻苦不輟。服闋應試入邑庠。癸酉

南闢薦而未售。光緒乙亥北闕中式。丁丑以內閣中書到署。連得本衙門撰文。

國史館詳校

誥敕房行走。丙戌進士。籤分工部營繕司主事。派則例館纂修。丁亥考取出洋游歷人員。派往英法兩國及屬邑阿爾吉五印度等處。著有游編數冊。已丑差回。值周太夫人年屆七旬。又蹉跌傷足。先行乞假歸省。冒險遄征。身亦染恙。遂以養親爲心。無復進取之志。于是專人赴部陳情銷差。光緒辛丑張安圃督部撫山左。招往幕府。旋歷建德周玉山制軍。光州胡鼎臣中丞。泗州楊文敬公。涇縣吳贊臣中丞。先後八年均委總辦文案兼洋務局。改官以道員候選。二品銜花翎。胡中

丞擬密保。君辭之。楊文敬擬奏簡學使。君又辭之。蓋以母氏年高。雖承特達之知。然猶不忘奉養之志。乞歸旋里。遂終不出。宣統初元覃恩。君由二品銜候選道加一級。請三代從一品封典。正值太夫人稱九十之觴。

國恩家慶萃於一時。世族之榮。通邑豔之。庚戌太夫人棄養。君盡哀盡禮。既抱風木之悲。後值滄桑之變。憂愁摧折。目擊心傷。而病亦不可爲矣。以壬子十月二十一日卒於家。年六十有一。君任事嚴整。主講禮延西郊兩書院。時朝政維新。初改試時務策論。君論古證今。以不背聖經王道之宗旨。及門如吳增甲。祝廷華。沙亮功。繆炳組。陳錫珉。章錫奎。諸人均獲雋。卽以西郊一隅。亦捷陳經吳棫二人。至山東辦課吏館。分刑

律洋務河工諸門館課文字親加改削一如書院頌聲日起寄舫先生朋適園隱存家祠之意君十餘年來補廊培屋移樹溶池漸漸恢復舊觀並自集句爲聯曰處陰休影處靜息跡爲烏植林爲魚鑿潭胸次曠達已可想見壬子二月安奉祖先神位於廳事承先志也自寄舫先生以畫名君童卽兼習繪事師事吳冠英丈所學日進在家養病十餘年專以山水自遣筆意遠師石谷近倣鹿牀同時如曲阜孔燕庭上公合肥李新吾太史常州惲次遠侍郎丹徒丁叔衡太守無錫秦岐臣金匱華若溪兩明經常熟潘占南廣文皆與君爲畫友太傅翁相國專緘乞君繪還碑圖其爲名流推服如此君配沙氏繼配何氏子名境保知州遇缺選用名發庠生花翎

二品銜湖北補用道。名琇。同知銜分省補用知縣。名珂。五品銜分省補用知縣。女三。長適張文鳳。次適王樹績。三未字。孫三。以浦名瑄出。以源名琇出。以渭名發出。女六。

繆荃孫曰。光緒丙戌會試。吾邑通籍者三人。則君與吳鬯初。侍御及吾弟柚岑戶部也。覆試均一等。殿試均二甲前列。朝考君與柚岑二等。遂以主事分部。志日中眉不無怏怏。次年考游歷各國人員。君與柚岑同入選。君游英法。柚岑游俄。已丑前後回國。柚岑由陸道走恰克圖。君游印度至粵。往返十餘萬里。途分水陸。時歷冬夏。度密越阻。炎風朔雪。又復詳其要害。志其風俗。日則游探。夜則考證。與優游使館雍容樽俎者。勞逸不可同日語。柚岑數年卽死。君病亦未脫體。豈偶然

卷之三
二
哉。三人中止。侍御入居言路。出掌文衡。爲最得意。然而身後蕭條。有人所難言者。袖岑今遺一孤孫。瑩瑩不能自活。惟君優游壽考。子孫熾昌。不亦得天獨厚歟。

贈光祿劉紫回水部家傳

君諱安瀾。字紫回。姓劉氏。先世由上虞遷烏程之南潯。遂爲烏程人。曾祖元吉。祖煥章。尙義好施與。鄉里稱善人。父諱鏞。候選員外郎。

贈光祿大夫。四子。君其長也。幼時避亂海上。年十四旋里。奮志讀書。卓然思與古人抗衡。越二歲。赴童子試。受知於丁大宗師。補博士弟子員。自是益自刻厲。於書無所不讀。廢寢忘食。一意著述。猶以兩親在堂。勉力於科舉文字。以期獲雋而

娛親心。光緒己卯。例就郎中籤。分工部虞衡司行走。君意氣軒爽。負不可一世之概。而虛衷求益。樂與當代名士游。若嘉定徐相國及其姪季和侍郎。嘉興許文肅公。同鄉馮修。會稽陶子珍。秀水朱詠裳。兩太史。仁和許石卿太守。研推問學。幾無虛日。所詣遂日進也。君嘗謂國朝學術。遠邁前古。卽詩家者流。有謂不及前明者。然國初至雍乾。風氣未漓。不乏成家之作。卽三家詩出以後。亦有不隨流俗。卓然獨立。可抗古人。不有以最錄之抉擇之。時有文采磨滅之憂。而虞山之吾炙漁洋之感舊。其年之篋衍。僅錄師友著撰。沈歸愚之別裁。王德夫之詩傳略。爲博大均止於乾嘉時。未爲完備。若熙朝雅頌。江蘇詩徵。樵李詩繫之類。更囿於一隅矣。於

是博徵羣籍。託始順治。下訖同光。手輯國朝詩萃一書。於諸家略加芟擇。而尤於高人逸士。墮晦無聞者。以網羅爲職。志。眠鈔所寫。歷有年載。期以成有清一代之詩史。其間考訂精審。小傳表音作者。仕履兼及逸事。與郭于宮之全金詩。顧俠君之元詩選。可與並論。已復應京兆秋試。又不售。乙酉再試南闈。與弟澄如同廂。杭垣未及入闈。驟患白疹。數日歿於旅廬。年甫二十有九。臨沒深以詩萃屬草盈篋。爲一生心力所聚。未及寫定。屬諸弟俾完厥志。同時學人無不惜之。君無子。以弟之長子承幹爲子。年甫四齡。君生時所最愛者。承幹既長。紹君書香。有聲庠序間。亦善交當世名流。歲庚戌捐助湖北水災振款。由護理鄂督楊制軍奏建樂善好施坊。又值

今上踐阼。薄海內外俱蒙渥澤。承幹爲君請一品封典。

詔贈榮祿大夫。君詩古文辭又厄於火。僅存詩萃一書。手錄清本。校補板行。庶完君未完之志。而名山不朽之業亦在於斯。庶足慰君於九原已。荃孫耳熟君之懿行。觀承幹之勤學好客。可以見貽謀之善而世澤之咸長矣。

論曰。立德立功立言。此之謂三不朽。君篤學尙志。旣嗇其遇。又不永年。可謂窮矣。然而澤及災黎。福貽後嗣。等身著作。有子完之。於三不朽之中卓然有以自見。嗚呼。所以償君之素志。而知爲善者不必徼後福。而令名要足以無窮也。庶有聞風興起者歟。

劉母邱太夫人傳

邱太夫人烏程南潯人。劉君紫回之配也。父仙槎。擅計然之術。來往滬濱。咸豐庚申。粵逆由廣德逕撲湖州。南潯無城無兵。鎮人四竄。母莊宜人以媿獨留。竈冷室空。一嫗侍側。而太夫人始生。母子無恙。寇亦未至。仙槎歸自外。索懷中呱呱者而諦視之曰。是兒豐碩。殆有福人也。鍾愛尤篤。齒漸長。舉止端靜。不苟言笑。入塾讀書。聰慧勤敏。無異男子。故知大義識大體。早基於此。是時同治初元。寇氛甫靖。海內清晏。各國商人咸萃滬濱。洋人貿易者無不利市三倍。仙槎因此起家。紫回與太夫人年相若。兩家世好。遂締姻焉。同治辛未。紫回年十六。入烏程邑庠。光緒乙亥。太夫人來歸。晨夕侍奉。得堂上歡。族姻內外。無不接之以誠。故遐邇無閒言。紫回勤于讀書。

致功於經史百家。講傳世之學。太夫人抽簪勸學。黽勉同心。紫回入爲工部虞衡司郎中。南北鄉試均未售。抑鬱而沒。太夫人捨地呼天。欲以身殉。堂上憫其少孀。又無子息。命以弟之子承幹爲嗣。且詔曰。而有子矣。撫育之。足繼吾兒未竟之志。如欲輕生。此負牀之童。又誰爲之鞠育。不得已。涕泣受命。自是撫承幹以恩出人。顧復不恃乳媼。而時時悲悼。紫回君績學不壽也。承幹就塾歸。則進而詰問曰。今日識字幾何。讀書幾何。有進境則色喜。承幹漸長。則又詔之曰。汝父績學砥行。未能顯達。吾望汝成人。紹汝父之家學。不盡求顯揚也。迨承幹入泮授室。始有喜色。戊申生孫。太夫人始稍慰。命以湯餅資振粵東水災。爲孫造福。又捐助湖北水災。

詔以樂善好施旌之。太夫人性至仁慈。有求者罔勿應。飢者飽之食。寒者煖之衣。病者予之藥。死者給之槨。凡所濟施。不可殫述。其最注意者。則以振災爲急務。嘗諭承幹曰。吾家籍先人餘蔭。席豐履厚。苟遇善舉。當視爲分所應爲。若欲以之請獎。則是有求名之心。已失爲善之真。非予志也。承幹以優行附貢生分部郎中四品卿銜。並爲太夫人請一品封典。詔封夫人同鄉京官具呈禮部以節孝。

旌。蓋年已四十有九。守節之期亦二十有四年矣。是年十一月二十四日以疾卒。知與不知。相與流涕。蓋德之入人深矣。子一承幹。孫三人。惟太夫人稟性懿淑。言動有禮。既節且孝。用克以其潛德升聞於

朝以光顯其門閭。而恩勤教育。覃及三世。其有功於劉氏者尤大。承幹述太夫人行事其備。荃孫撮舉其大者書之。

徐叔雅榮祿家傳

自來績學之士。達則兼善天下。窮則獨善其身。而規模之正。訓誡之切。遠則可以爲經世之大猷。近亦可以爲保家之良法。如徐君叔雅者。洵大過乎常人矣。君諱煥謨。字緣滄。又號叔雅。浙江桐鄉人。世居青鎮。先世善治生。富而好禮。有聲浙西。君幼隨伯兄茗香。比部次兄聽松司馬。從同里盧小菊先生讀。先生植躬訓士。具存先正典型。昆弟三人均受先生之益。而君尤爲矯矯。所居素有竹石池亭之勝。蒔花草以悅心目。蓄禽魚以養天倪。而且設色寫生。朗吟成藁。志節夔然。超

越流輩。愛藏書。插架數萬卷。多善本。坐書城中。日事校讎。不
他顧。家庭雍睦。鄉黨協和。常割鉅資助成善舉。坐言起行。無
不足爲後人矜式。而家人均化之。君受知丹徒丁廉甫學使。
拔列邑庠。兩應秋試未雋。抑鬱而卒。年僅二十有九。老母在
堂。遺孤均幼。此其隱憾也。夫人鄭氏。湖州雙林人。家本素封。
讀書明理。來歸時。重慶在堂。恪勤婦職。及叔雅得疾。躬親湯
藥。及卒。痛不欲生。特以一子四女幼弱無依。乃勉爲其難。愉
色婉容。以侍慈闈。嚴氣正性。以育諸幼。嘗訓其子鈞曰。吾日
夜冀汝長成。庶以慰汝父於地下也。及鈞入塾。指遺書而訓
之曰。汝父以此留貽後人。丹黃所識。手澤存焉。其善讀之。洎
鈞受知■學使。亦拔列邑庠。又勗之曰。汝父不及見汝之成。

立。今幸成立矣。親親睦族。仰承先志。他非所望也。先後十二年始畢婚嫁。而夫人精力亦交瘁矣。遇振濟及恤養育嬰諸善舉。輒命助之。又諭之曰。吾家襲先人餘蔭。家境尙裕。遇善事而不爲。烏乎可耶。且人之爲善。本義所當盡。稍有一毫求報之心。已失爲善之道。特天報施善人。理自可憑耳。卽如先世創立留嬰善堂。已歷五十餘載。果能繼承弗替。亦足竟先主人爲善弗倦之一端。鈞後整理堂規。增建堂舍五楹。卽承夫人命也。凡叔雅未竟之志。夫人均仰承之。有擴充而無廢弛。刑于之感。始于家庭。亦可慰夙學而彌隱憾矣。歲己酉。夫人以微恙卒。年六十。子一。鈞字曉霞。以工部郎中加級爲君。請從一品封典。

封榮祿大夫。妻夫人。浙中官吏又以鄭夫人青年苦節力行。善舉請旌於

朝奉。

旨俞允。四圻長適朱辛冕。中書科中書。次適張鈞衡。甲午舉人。陸軍部郎中。次適邢壘。庠生。分部員外郎。次適高如沅。庠生。陸軍部主事。孫二人。例得附書。

舊史氏曰。自唐代以科舉取士。迄今一千六百餘年。沈薶於中。不但不能成專門之業。且因抑鬱而促其壽者。世多有之。叔雅亦其一也。鄭夫人能守其平日之言。曉霞能完其當爲之事。并爲搜羅吟藁。刊而傳世。俾績學之士不至泯沒無聞。嗚呼。賢明仁知如鄭夫人。足登中壘之傳。而無媿色。然亦叔

雅貽謀之善。而續學之報也。

輟錄齋稿序

道光三年。武進李申耆先生主暨陽講席。琢磨煦育。羣士莘莘。維時承君守丹。宋君冕之。徐君康甫。六君德只。莫不龍蟠鳳翽。一舉千里。而表丈夏君永曦尤以邁文麗藻魁能冠倫。荷花樂神之詞。李先生紀之年譜。而買宅焚券一賦贈炙士林。根柢既厚。華采益振。文之必傳。又可知矣。荃孫於同治甲戌自蜀歸里。進謁表丈。適丈病瘡未之能晤。光緒丁丑再至。於病榻前一面。不數日。丈捐館舍矣。歲癸丑。令子彥保明經輯丈所著文三卷。詩一卷。見視。蓋捃摭叢殘。所存止此。荃孫慕其名於數十年之前。讀其文於數十年之後。其氣勁以直。

其辭樸而茂。平夷洞達。絕去町畦。學人之文。迴殊凡近。蓋吾邑僻居江介。人多純竺。自李先生主講於茲。而士始知求學。自表丈振譽於繼。而人始知作文。惜乎以丈之才。輒張不遇。無以興起後學。而所傳又止乎此也。集內擬士衡文賦。備述古今文字源流正變。說理具足。文亦遒鍊。足以挽頽式靡。不僅以規撫爲工。至論江邑事宜。藉知潛心劬學之儒。必抱救世康民之略。欲補救其偏弊。非迂遠於事情。近時植桑養蠶。紡紗織布。通邑暢行。聚食之風。稍稍衰止。惟荒山隙地。種植未聞。蓋江民稍逢荒歉。則曰搶山宅柳。墓松亦歸翦伐。官不過問。里豪亦無敢禁止者。雖有褒獎之令。誰肯擲黃金於虛牝哉。社穀近已不聞。究是根本之計。倡而爲之。地方庶有牙

乎。表文存文不多。幸有賢子殷勤保守。今爲刊播。而康甫德只諸君隻字不存。尤可歎也。癸丑七月同邑後學繆荃孫謹序。

錢鐵江大令清風室文集序

同治甲戌。盱眙吳勤惠公師招荃孫司記室。一日師臨余齋。笑而言曰。今晨得一快事。因言辟鏡塘中丞。爾稱舊友。錢君鐵江。博雅士。來蜀候補。善視之。今日新到省者三人。余見一骨重神寒。書味可掬。臆度之。其鐵江耶。詢之果然。差喜余眼之不謬也。汝宜交之。庶多受益。余出署卽往訪。和風雋語。能移我情。遂訂交焉。光緒乙亥。勅尊經書院。延君與錢徐山丈及荃孫三人。閱官師課。三五日必一聚。不但學問多所觀摩。

卽性情無不接洽。蜀中益友。君其舉首。余官京師。見昇書必告。獲佳士必告。雖隔八千里猶咫尺也。後君赴大足任。余返江南。游魯粵。始稍稍契闊焉。今年仲枚以清風室詩文五冊見眎。其性情之敦厚。襟懷之灑落。問學之淹雅。考据之明析。無不流露其間。文似永叔。詩近中唐。不尙矜奇弔詭。而議論自足動人。則根柢之深厚也。不必樹黨沽名。而襟期亦足服眾。則德量之純粹也。君在蜀卅年。三次分校。傳經弟子不乏英雋。至今稱頌不置。使蜀士常奉君爲依歸。何至邪說暴行。流毒於天下耶。荃孫再三淵翫如親罄欵。而卷中名字大半故人。策問數題亦皆同儕。憶昔督署閱文皆在東園。老樹芬蒨。綠陰如幄。叢蘭籠竹。微風送馨。校閱餘閑。清談煮茗。

此情此景。宛然心目。君與錢丈均歸道山。荃孫獨存。年亦七十。悼芳塵之不再。慨世變之日非。猶得於亂離顛仆之餘。讀君全集。殊爲不幸中之幸也。

元郭退思椽史雲山日記序

自來一鄉一邑之中。先輩之嘉言懿行。足稱鄉先生者。代不數人。或以事業。或以著撰。或以翰墨。代愈遠。見愈難。不過存十一於千百。而流風餘韻。猶使人景仰於丰采之間。觀感於意言之表。曠百世而如相接焉。然流傳既難。散佚尤易。豈不賴後賢掇拾之。補苴之。傳播之。得以閱千百載而永存哉。丹徒郭天錫先生手書日記一冊。安邑宋芝山跋云。自至大元年戊申八月廿七日。訖二年己酉十月三日。并閏月。閱月十

六。逐日詳書天氣之陰晴寒暑。人事之往來酬答。所尤詳者。飲酒必書。求書畫必書。觀書畫必書。游寺觀必書。稱謂之間。褒譏厲焉。感歎之際。義理昭焉。細觀一過。如見其人之性情心事。而與之周旋談笑於十有六月之久也。芝山此跋。真能傳日記之精神。而誌其勝概。鮑刻客杭日記非全文也。陳君善餘得之杭州。重以鄉先生之翰墨付梓。以永其傳。天錫美鬚髯。人稱郭髯。書仿趙松雪。畫師高房山。名大顯於元中葉。而其子啟所編之快雪齋集。包希魯所序者。業已久佚。卽此日記一冊。人重亦其墨迹輾轉傳鈔。不如墨板得以廣布。先生生於前至元。歿於後至元。朝貴尊崇。文名洋溢。而睹西番之塔。時深易代之悲。讀玉殿之詩。不免故宮之恨。未經桑海。

猶慨荆駝何耶。善餘並爲考其年略。搜其詩文以附益之。藉以示後之學者。深仰止之思焉。近時錢唐丁氏有武林掌故之編。常州盛氏有先哲遺書之輯。善餘搜尋鄉土紀載。業已刊行數種。使一鄉一邑均有人能爲庶績。俾見遺書大出。一掃前人鏹蔽之習。眞所謂守先以待後者。其在斯乎。癸丑正月試鐙日。江陰繆荃孫序於海上之書連屋。

玉海堂叢書序

自五代雕板盛行。天水一朝。有監本。有公庫本。有坊本。元有各學本。明有經廠本。有南北監本。而家錢所造。則以毛氏汲古本爲最多。然所藏雖有宋元精本。未曾影摹流傳。且校勘不精。人尤以爲憾事。乾嘉盛時。黃氏士禮居叢書十八種出。

經部有周禮儀禮三經音義。史部有國語國策輿地廣記。子部有洪氏集驗方傷寒總病論等書。摹刻維肖。校勘尤精。編宋元于今日。海內奉爲瓊寶。至今論價已與眞宋元相埒。同光朝遵義黎氏奉使日本。就海東選匠刻古逸叢書二十六種。經有爾雅穀梁周易程氏傳。子有荀子莊子注疏。中國逸書有玉燭寶典珊瑚玉集姓解韻鏡等書。卷帙富于士禮居。以美濃紙香墨印之。分外增色。顧經多宋學。史亦無正史。又以日本人所撰羣芳。并有集字補之者。殊爲蕪累。貴池劉子薦石。生自蘭錡。長厯亨衢。性嗜古。富收臧。尤喜板行罕見書籍。而影宋元諸刻。經部則有元元貞本論語正義十卷。元至正本大戴禮記十三卷。史部則有宋小字本五代史記七十五

卷。宋百衲本史記一百三十卷。子部則有宋大字本家語十卷。金大定本銅人鍼灸經十卷。宋寶祐本五鑑會元二十卷。集部則有元至正本陶淵明集十卷。宋乾道本杜陵詩史三十卷。宋咸淳本李翰林集三十卷。宋紹熙本坡門酬唱集十二卷。元至正本草堂雅集十三卷。或篋內舊藏。或書肆新得。或友人投贈。或同志段鈔。均從原刻影摹。不用繙刻。及影寫本。則選擇尤精也。一字之疑。必繙羣書以證之。又不肯輕改原書。少則載入跋語。多則另編札記。則校讎尤慎也。以視蕘圃。蕘齋兩家。似駕而上之。不但可以鼎足。他刻聚學齋叢書百卅餘種。元明國朝傳奇卅種。貴池先哲遺書。種。幾與汲古肩隨。而精則過之。均足爲一代之宗匠已。子館于金陵者。

二十年。君刻諸書。大半余所檢集。嘗預校讎。余與君同嗜好。同甘苦。以爲知之深者。莫余若也。爰不辭而爲之序。癸丑十月。江陰繆荃孫識於海上寓廬之聯珠樓。

劉楚園影宋巾箱本叢書序

昔讀南史至齊衡陽王傳。云王手自寫五經。部爲一卷。置于巾箱中。賀玠曰。家有墳索。何須蠅頭細書。答曰。檢閱既易。且手寫不忘。諸王聞而爭效。爲巾箱五經。巾箱蓋隨身小箱。非廣箱方箱比也。是巾箱本之所自始。宋戴埴鼠璞曰。書坊刊印小冊。謂巾箱本。起於南齊。今世盛行。無所不備。是宋時巾箱本大行於世。天祿琳瑯收南華真經十卷。云版高不及半尺。而字畫加倍纖朗。紙質墨光亦極瑩緻。乾隆御題大內宋

錢南華經傳自永樂閒人蠅頭細書紙香墨古誠寶蹟也。古
人有巾箱五經便於行役登臨觀覽斯亦其類歟。此巾箱本
之最佳者。然皆在南宋時至。集刻叢書古香齋十種最著名。
然未有集影宋元刻者。楚園五兄於經刻周禮左傳於史刻
晉書詳節隋書詳節於子刻淮南子於集刻西漢文鑑東漢
文鑑清真詞附以琵琶荆釵兩記其十種傳袖珍之祕笈爲
墨海之雅觀誠今古所罕見者。楚園主人意思深長。荃孫謂
其舉動有迴不猶人之慨。卽此小板亦可見其一斑矣。按漢
傳帝見王母巾箱中有一卷小書盛以古錦囊然內傳
系六朝人偽造仍在齊衡陽王之後不能舉以爲證

適園叢書序

叢書之名所自始韓昌黎詩云門以兩版叢書其閒卽叢積

之義。而唐陸天隨自名其詩文曰笠澤叢書。猶是一家之言。而以不倫不次。亦卽叢積之義也。至唐宋人始合各家書而摘要刻之。曰馬總意林。曰曾慥類說。曰紺珠集。曰說郛。曰說海。皆任意刪減也。後又取各家書以類相從。而別署美名曰儒學警悟。曰百川學海。曰夷門廣牘。曰藏說小萃。曰津逮祕書。曰學津討原。則首尾完整也。前明程榮刻漢魏六朝著作。始以叢書名之。由是諸家疊起。曰唐宋叢書。曰格致叢書。最後以齋堂名。直曰某氏叢書而已。單簡零帙最易消磨。有力者彙聚而傳刻之。昔人曾以拾叢冢之白骨。收路棄之嬰兒爲比。則叢書之爲功大矣。適園主人以名孝廉。生長吳興山水之區。熟聞鄉先輩魚計亭。眠琴山館。芳椒堂之風。手聚

舊刻名鈔。卷以數萬計。擇罕見而可傳者。付諸削氏。以永其傳。以嘉惠於斯世。又以荃孫麤知目錄之學。命以監造。時及兩載。先成此十有六種。分爲四集。先以問世。嗟乎。自新學日行。舊學日落。焚坑之禍。厲於無形。而世之守舊學讀古籍者。曾有幾人。況石印鉛字羣趨若鶩。剗刷之匠。往往改業。石銘負填海之心。抱障川之力。招金陵書局之舊人。而與之更始。据本必善。選工必精。原書跋語。雖無關宏旨者。不敢輕削。其閒流移授受之原委。與夫反覆訂證之苦心。皆爲表微。綴之簡末。王船山行人所謂國統絕。而道統不與之俱絕者。其在斯乎。其在斯乎。至盧抱經先生曾云。眞僞不分。雅俗莫辨。或刪削而非完善。或脫誤而鮮校讎。四者之弊。校讎最難精審。

荃孫心力目力已遜少時。然有漏落而無臆改。則差可自信。若前三項之弊。則似不至此。當與石銘共勉之。歲在閏逢攝提格十二月立春前一日。江陰繆荃孫序於海上之聯珠樓。

吳石潛鐵書序

昔庖犧氏畫卦。實文字之權輿。倉頡造書契。又六書之權輿。逮周保氏教國子而六書始彰。秦祖龍燔經書而八體以著。若摹印其一也。新莽居攝。大司空甄豐等更定六書。曰繆篆。專以摹印繆者何。綢繆之意。卽徐鍇所謂摹印之屈曲縝密也。爾雅印謂之璽。尊卑同辭。助於商周。秦盛於漢。始以璽屬之君。而印屬之臣。濫於六朝。而淪於唐宋。官印有鑄有鑿。古氣渾淪。雖代有作者。其人姓名莫得而考。入元代則趙松雪

始得盛名。吾邇子行、吳孟思師弟考訂篆文。研求刀法。於是
以刻印名家者代不乏人。明至正嘉之閒。吳郡文博士壽承
崛起。樹幟壇坫。而許高陽、王玉唯諸君先後周旋。遂爾名傾
天下。何長卿賴首師之。蘇爾宣出力抗之。而各極其精能。遂
爾聲名鼎足。乃若璩元璵、陳居一、李長蘅、徐仲和、歸文休、暨
三吳諸名士所習三橋派也。吳午叔、吳孟貞、羅伯倫、劉衛卿、
梁千秋、陳文叔、沈子雲、胡正言、曰從、譚君常、邵潛夫、及徽閩
諸俊所習雪漁派也。程遠彥、明何不違、姚叔儀、顧奇雲、程孝
直、與蘇松嘉禾諸彥所習泗水派也。又若詹淑正、楊漢卿、黃
表聖、汪仲徽、江明初、甘甫、皆自別立營壘。稱霸稱雄。明代諸
君。不外於此。國朝有閩派、有徽派、有蘇派、閩派許有介爲

冠。有陶石公、楊叔夜、吳平子、林蕤諸人。徽派程穆倩爲冠。有程孟長、汪尹子、宏度、程雲來諸人。蘇派顧云美爲冠。有顧元方、欽序、三邨、令和、顧梁汾諸人。雍乾盛時。丁敬身出爲浙派。黃小松、奚鐵生、蔣山堂從之。鄧石如模漢碑額爲鄧派。而吳山子、吳讓之、吳聖俞從之。趙撝叔從鄧入。又少變爲趙派。題款最精。而徐三庚、傅子式從之。自源及流。藉知派別。吾道於以不孤。印譜始著錄於宋徽宗、王順伯、王子弁。洎乎元明。則有趙文敏、吾子行、楊宗道、葉景脩、錢舜舉、吳孟思、顧汝脩諸譜錄。皆集集古人之印章。或原印。或摹本。規矩猶存。典型不廢。此一派也。或集前人之名作。或萃交游之精神。此一派也。或舉生平之所鑄。編成譜錄。倩名人序而行之。此一派也。吳

子石潛收藏繁富。鑒別精審。集同人割西泠印社於裏湖之濱。闢地爲圃。築室藏書。坐飫古香。仰飡山淥。爲湖上增一名勝。并編此書。問序于余。首卷舉各朝之印式。次并論篆印人之書。二卷舉歷代印譜存佚。三卷刻印嘉話。四卷以煉印色終焉。搜羅廣而枝派明。爲印譜別開生面。吾佩其學優而心細也。是爲序。歲在闕逢攝提格建酉之月。江陰繆荃孫序於滬濱屈廬之聯珠樓。

鹽法通志序

自古談鹽筴者萌芽於周。擴充於漢。管仲誇山海之雄。桓寬著鹽鐵之論。莫不因天地之產。以充國家之需。藉商賈之贏。以補百姓之乏。法亦若是而已。厥初散歛之方。準乎盈縮豐。

約之節。隨乎登耗。以法制利。不以利撓法。國紓其用。商操其
 奇。民資乎食。未始不善也。今天下廿二行省。出鹽之省十有
 一。而解州鹽風水所結。謂夏鹽刮地。淮浙鹽熬波。川滇鹽汲
 井。閩粵鹽積鹵。淮南鹽煎。淮北鹽曬。浙東鹽有煎有曬。天時
 地利人和各有不同。職官場產轉運徵權器用亦各有不同。
 而有專書者。以兩淮兩浙爲最備。四川新修鹽法志爲最佳。
 從未有薈萃各省之書。勒爲一編。備人考索者。吳興周君夢
 坡問學淹雅。著作宏通。以其餘力於鹽務之中。探討多年。乃
 合各省志鹽法之書。抉擇薈萃。分爲十類。曰疆域。曰職官。曰
 法令。曰場產。曰引目。曰徵權。曰轉運。曰緝私。曰藝文。曰雜記。
 有專書者取專書。無則取之通志。而直隸安徽江西河南山

西雲南吉林均有新通志。餘則取之鹽案及議略及近時報
告書。可謂無一字無來歷。考較其盈絀之數。詳悉其利害之
原。孰得孰失。燦若列眉矣。自漢唐以迄今日。始則通利。久之
則梗塞見焉。始則羨餘。久之則逋欠生焉。大抵立法之初。必
從簡易。簡則弊生於法之外。後人從而加密焉。弊又生於法
之中。遂不得不易法以祛弊端。至因弊而變法。惟有去其太
甚。而官與民與商相安。其大要操於司計者之一心。用得其
人。則立法之善。遂舉行而無弊。用非其人。則立法雖善。豈能
擴充而補救哉。不求之人而專求之法。則各省之制度議論
大致詳備。而必權夫天時地利人和以折衷之。有行之此省
則利。行之他省則不利者。有行之此時則利。行之異時則不

利者。其參差不一律。有能勒之出一律者。有斷不能勒之出一律者。昔人百計籌畫。亦屬處於無可如何之勢。上之人能薈萃而貫通之。各就其土之所宜。習之所便。而不至偏於一己之見。矜其一時之效。則國與商與民相安於無事。而利益亦蒸蒸日上。豈非著書者之大願歟。歲在闕逢。攝提格。宿月江陰。繆荃孫序。

陶廬續憶序

表兄金粟香先生。生同鄉里。幼不相識。至光緒己卯年初晤於京師。各出著撰相眎。遂成莫逆之交。雖道里睽隔而音問無月不通也。君於壬午年刻粟香隨筆初編。囑余序於京師。庚子年君刻陶廬雜憶。余又序之。庚戌年君陶廬五憶成。余

又序之。壬子年君陶廬六憶成。又命余爲序。自壬午序君書。迄今壬子轉瞬三十一年矣。此三十年中。國家因兵敗而圖強。因圖強而變政。因變政而召亂。因召亂而亡國。雲翻雨覆。海竭桑枯。至於如此。君也始而領巖蒼梧。繼而莅任赤谿。繼而歸耕梓里。繼而移室郡城。由壯入老。棄官歸隱。至於如此。余也始而供職玉堂。繼而奉祠金陵。繼而守史藏宰。繼而避難海隅。去國離家。偷生逃死。至於如此。使在太平之世。事隔三十年。盛衰之感。死生之哀。已令人不能一日安。而況逢元二之年。處陽九之厄。在三十餘年之後。迴思三十餘年之前。有不淚如泉湧。腸若轂回也乎。然而君則詳陳風俗。搜羅文獻。誠後進之庫陋。緬前哲之貽型。無異前數編之所作。是則

靖節之詩。碧山之詞。不必託諸悲憤。而陳古以刺今。外言而內意。能使人自得于中也。余於庚子刻文集八卷。庚戌刻文續八卷。今猶子九疇請兩年一刻。以免散佚。余又從之。刻辛壬藁三卷。文字結習至老不衰。則與君同此情也。昔年王太守聘修郡志。君與余同局。而事阻不成。張制軍奏辦省志。余又延君同辦。而國變又不成。則風俗之盛衰。文獻之蕭落。轉籍君詩以傳。而余不能紀載。其賢不肖爲何如也。遂書以爲陶廬六憶序。歲在甲寅正月上九表弟繆荃孫序。

古學彙刊序

自秦變三代之學制。而力學與求名遂判。而爲二。唐宋以考試搜羅人才。至今循之。經義也。詞賦也。策論也。懸之爲的。於

學人心目之閒。而聽人之自擇。有學焉而名以就。有學焉而名不就。無毫無幼。無寒無暑。悉出於一途。而惟名之是求。得之易而不自以爲微幸。得之難而亦不自悔其乖違。名愈高而去學愈遠。不特在上位者以是爲招納。卽專師之函丈亦未嘗不以是爲鼓吹也。而乃於同流合汙之時。爲舉世不爲之學。銳銀旭厯。閉門造車。尊養沈冥。空山獨嘯。亦有輶傳出使。不廢搜討。刑名在案。重理絃歌。仕優則學。又其次也。國家無求學之實政。而草野有好學之鉅儒。或攻絕業。或擅多能。苟著述之常新。卽流傳而不廢。而不問斯世之所趨向何如也。或一見而輒喜。或久讀而後知。卽志趣之各殊。亦深耆而不厭。亦不問斯世之所好尚何如也。昔之科舉。今之學校。皆

爲求名之具。驅天下才智之士入於其中。兩者相較。有以異乎。學無今古。亦無中西。必其天資與人力。良師益友。合數十年之精力。而後成專家之著述。今搜輯各本以餉天下力學之儒。庶爲壞流之一助焉。

一曰經學。明季羣奉王學。楊園起而宗朱。互相譏詆。均託空言。不若顏李折衷六藝。躬行實踐。爲名世之英。得用世之道。東吳惠氏三代傳經。武進臧氏閉戶笈撰。新安沈潛廣陵高。明家學師承。日新月異。極盛于乾隆。益精於嘉慶。遺經端緒。皆有條貫。有清之學。跨越千載。兩漢以下。殆無倫比。後起求勝。尚宗西漢。微言大義。持論愈高。避實蹈空。變端斯伏。公羊異說潰敗天常。今取劭真傳屏邪說者著於篇。

一曰史學。尙書春秋。孔子定之爲經。史遷取之爲史。卽紀傳編年兩家所由始也。唐劉知幾判六家之體裁。勘三長之定論。古今史學不出於此。會稽章氏之通義。獨揭夫大端。錢塘龔氏之鈎沈。藉窺夫微旨。考異商榷。語語徵實。非同管見之僅託空言。亦異發明之專論書法。史學之昌。亦異往代。然而史官失職。載筆無人。遂至列傳僅存履歷。實錄只鈔諭旨。言行不著。始末不完。昭示後人。何以傳信。今於考古取補校精詳。徵今取紀載翔實者著於篇。

一曰輿地。古之地志。志方域。志山川。志風俗。志民數。志物產而已。其人物傳固各自爲書也。自宋以降。兩體合并。沿及後來。志體日濫。列傳等於家譜。藝文溢於總集。如有志復古者。

則羣起而咻之。大抵明初尙守舊轍。嘉靖以後。自鄧無幾。至於邊防海島。昔也得於傳聞。今也均從目驗。交通日便。譯語日精。則勝於前人也。今取考訂詳而紀載簡者著於篇。

一曰掌故。軍國大事。治亂攸關。祖宗家法。沿革備載。誠立國者之所資。亦秉筆者之盛業也。近百年來。考古則優於歷代。徵今則不如前明。推原其故。滿員知之而不能紀載。漢員則不使知之。卽知之而亦不敢紀載。文獻無徵。轉流爲郢書燕說。亦勢所必然也。年經月緯。吾取湘源之陳編。擇精語詳。吾慕養吉之叢錄。今於官書之外。零篇逸典。徵實不浮者著於篇。

一曰目錄。自劉班志藝文。而後人得考天府之儲存。自晁陳

傳書目。而學者藉見私家之著述。海內流傳。或鈔或刻。不下百十種。然亦分爲兩派。一則宋槧明鈔。分別行款。記刻書之年月。考前賢之圖記。此賞鑑家也。一則包括四部。交通九流。蓄重本以備校讐。鈔新帙以備瀏覽。此收藏家也。今擇罕見者新出者有解題者著於篇。

一曰金石。四庫提要以梁元帝集碑刻之文爲碑英一百二十卷。爲金石文字之祖。實則漢志春秋家載奏事二十篇。卽刻石名山文也。曾南豐金石錄未成。而文集錄跋甚多。卽錄中零篇之流傳於今者。至歐趙遂工考訂。洪氏始錄全文。今則尺寸篆隸無不詳備。昔賢高論。後出愈精。蜀碑前後漢石考漢記南漢貞石記一朝之制作。幸存。龍脊四川雲陽石魚四川涪州兩地之菁

華斯萃。今取精瑤不磨者著於篇。

一曰雜記。夫不賢識小。文武之道猶存。雜書成編。儒墨之途合一。名人僅存碑傳。藉補史成。小說出于虞初。不肯正軌。凡此各類傳世最多。或取其祕。非世閒易見之書。或取其完。異坊閒刪節之品。大則爲金匱石室之取材。小則供尊前鐙下之談柄。類此者皆著於篇。

一曰詩文。別集總集浩如煙海。今茲采錄。專以搜逸爲宗旨。周書發于古冢。心史鉤之井中。逢茲不撻之朝。急以廣播爲願。况復文淵舊閣。剔土出宋元之編。雷音古寺。爬沙顯魏周之卷。地不愛寶。文卽在茲。他如文評。則取其卓見。輯逸則喜其補亡。凡類此者。皆著於篇。

徐叔雅風月廬股稿序

杉青堰北。夕陽橘柚之鄉。構李城東。細雨菰蒲之澤。自來勝地。多育名流。則有靈蘭賣藥。跼著珊瑚之枝。山秀讀書。熟記琉璃之說。金陀坊下。皈心鉏菜之翁。梅會里邊。仰止金風之長。雅音偶乎槃敦。華藻盛乎襟裾。固已景春眷夏。戶戶絃詩。抱璞握珠。人人編集矣。然而豔冶靡宕。不登於大晟。儉楚賁賁。有乖於小雅。忒此兩失。始可言詩。徐君晚滄。少席華臚。壯飲香名。目董綬以儒梟。稱大年爲文虎。嘔心自喜。考校下夫。萬籤燁掌。亦甘呬晤達於五夜。時與伯兄茗香比部。仲兄聽松司馬。同受業於盧小菊先生。承子幹之眞傳。識偉節之最。怒遂乃飛走文翰。吐噏芳華。伯歌季舞。圭塘款乃之編。前于

後。喟聯珠倡和之集。匪惟才雄。實由學博。加以生自修飭。動無瑕疵。衛叔寶之神清。荀慈明之外朗。不攘六鑒。寡欲五基。雅好蓀花。遂嫺寫貌。步趨徐黃。精詣遠摹。北宋調治鉛黛。頓悟亦下南沙。尤嗜縑緗。廣爲蓄儲。七略四部。校讐遠紹乎揚。劉四當八求。目錄不殊于陳晁。方謂汾湖之笥。七札能穿。渥洼之材。十駕不倦。而乃墜雨春零。飛蓬秋轉。蕢策終擯。趙賦徒工。寸腸轂迴。百憤雨集。秋蓬未死。先空卷旆之心。勁鐵將消。更熾洪鑪之炭。才之不凡。由此年之不永。亦由此矣。未幾蘭韶芷秀。風雨倏其摧殘。夏綠春紅。霜雹於焉凋碎。君歿時年甫二十有九。潘安仁秋興之賦。尙少其三。李長吉作記之年。僅過其二。年未壯歲。人已千秋。說者謂君旣畱其遇。又厄

其年疑造物之不仁。悼斯人之終極。然而邱遲殘錦。不隨恆
幹俱湮。延壽片詞。欲與靈光並峙。箕裘克紹。幸得佳兒。冰玉
同清。更欣快婿。脩短同盡。光采靡窮。以視飾金紫於走肉。頌
櫟以長年。或不以彼易此。歲在癸丑七月。江陰繆荃孫序。

韞玉樓遺藁序

癸丑八月。荃孫爲平湖徐叔雅先生文集作序。張君石銘又
出。際德配韞玉樓詩。蓋卽叔雅先生次女也。過庭詩禮。雅宜
金屋之裝。澈菀縑紉。本是玉臺之裔。蓋其莊妹合度。嬰媿有
容。前身明月。別具慧心。夙世璇星。早工織錦。迨乎笄總。於歸
清河。鵲翼同行。蛩氈儷影。申紙和秦嘉之韻。繙書賭清照之
茶。家有適園。共稱勝境。疏泉作沼。疊石爲山。跨溪閣之一櫺。

豁風亭之百尺。夕陽花陽。紅蒸綺麗之雲。曉露竹塘。翠刻琅玕之玉。每當春聲。睨曉。四壁花濃。秋影玲瓏。半簾月墮。疏窗小雪。一枝先插江梅。虛館涼鐙。四照最宜籬菊。羌巡檐而索句。亦擊鉢以朗吟。時作雅游。籍開胸臆。近則高卞蒼蒼。清霄瀾瀾。水雲鄉裏。還追趙管之蹤。煙霞陽前。人羨劉樊之侶。遠則香雪之海十里。明聖之湖兩重。閩閩城外。嘗水國之陰晴。蘇小墳前。矚湖天之盪漾。虎邱禮塔。劍氣宵騰。龍井鬥茶。山眉曉拭。無不寫之彩筆。收入錦囊。至於罍酒承歡。鳴璫贊內。善薰姒姆。澤被輿僮。送上計而益離情。課佳兒以消永日。闔教嬪則。久而益彰。詎以清羸。恆慮怡鑒。突來二豎。頓返三山。遙天之笙鶴如聞。樂府之妃豨孰和。張君子荆改服奉倩。傷

神。飈輪閱夫三秋。桑海倏焉一度。於是檢瑀匱之故物。搜盡
篋之殘篇。掇拾零星。付之梓匠。獨惜林風詠絮。豈能該謝女
之才。春雪醺兒。未足盡盧妻之學。然須彌納於一芥。拳石具
夫九華。卽茲吉光。亦堪永世。前明葉紹袁天寥文集。以小鸞
詩詞附之。近時李虎觀蓬萊山館集。以生香諸作附之。間亦
別行。今與風月樓藁同時並梓。亦可分可合者也。是爲敘。

劉語石無長物齋詞存序

同州劉語石先生叔寶多愁。長卿善病。織天孫之餘錦。爲樂
府之指迷。短調長謠。耳之熟矣。光緒乙未。內兄夏閏枝與君
結驅隱詞社。初識面於金閨。維時君負廡皋春。余亦艤舟唐
塢。聞名十載。結契三生。詞社第二集。配懷子馥芷蕤禮堂同

集於頤園。余以沈君塘臨黃小松訪碑讀畫圖乞題。擊鉢催
 成。攏絃和訖。齊雲魯雲之並集。今雨舊雨之聯歡。賭唱旗亭。
 聽黃河之遠上。分豪蘭畹。媿白雪之未諳。適有詞錄之徵。大
 得他山之助。商量文獻。徵前輩之名篇。往復郵筒。傳近人之
 軼句。此一時也。洎予移家鍾阜。君亦安硯吳興。弁何疊翠。恰
 兩點以浮眉。蒼雪流青。更雙流之漱齒。以爲久居仙境。庶可
 大暢吟情矣。忽焉赤燁降怒。朱鳥流光。象無齒而身焚。魚在
 池而殃及。叩金箸饌。蔡不同太乙之然。酉穴叢殘。書已爲六
 丁所攝。莫存幸草。摧盡勞薪。非絳雲之厚藏。天胡此酷。竟青
 氈之不贍。人更何堪。空收椰子之賀書。難合齊侯之餘燼。此
 一時也。旣而移家黃浦。眞艸艸之勞人。對鏡青絲。漸星星之

非我。白楊齋寂。未開稱意之花。黃葉村寒。詎長忘憂之草。又復遠游甬上。近訪曲阿。樹窮枝鳥之棲。途益磨驢之迹。寒江鐙小。雙槳鳴潮。遠道裝輕。一鞭搖雨。名阜勝川。以說志。吟朋快友。以怡情。綺語未刪。和瘦天之秦九。香心欲活。餐飲水之柳詞。此一時也。若乃壞雲自落。海水羣飛。虎豹當關。狼羆徧野。蒼鷺出地。逢元二之災年。白雁成謠。罹陽九之厄運。滬上一隅。衣冠萃焉。君雖久客。心實傷盡。相逢舊侶。擊筑銜悲。回首故鄉。棲塵莫問。慷慨月泉之社。絃是哀絲。淒涼麥秀之歌。聲成變徵。寄草窗之隱恨。淚灑滄桑。譜花外之閒情。韻流金石。此一時也。語石曾刻留雲借月齋詞八卷續一卷。今刪舊作。復益新篇六卷。編成示余索序。嗟嗟。同客天涯。偕臻老境。

夕陽江上。似燕無家。春雨樓頭。憎鴉攪夢。金縷衣之低唱。眉語難逢。鐵綽板之高歌。牙期罕覩。況乎杞懷子馥。久歸道山。子純小坡。遠離茂苑。聚散存亡之感。纏綿悱惻之情。靈心獨運。君猶尋炳燭之餘光。繼和未能。我殊媿操觚之率爾。甲寅人日江陰繆荃孫序。

家衡甫初蘭盦文集序

婁東爲文人淵藪。生平所最推重者。曰小謨觴館彭甘亭先生。集高一尺。才真八斗。服膺既久。私叔維殷。有爲之輯全集。并注釋而刊行者。則吾宗衡甫同年也。衡甫少飲香名。長窺文囿。清衷淵映。逸興颯發。五經異義。說摧揚子之郭。四海論交。客滿孔融之座。濟冲奕奕。士龍駸駸。我思古人以衡大雅。

岑孫白丁丑訂交。迄今將四十年。系同出于蘭陵。名復聯夫。慈謙叩門則倒屣。歸里則傳書。不以遠而疏。不以老而諉。商榷文字。倚撫古今。徵學相長。非一日矣。頃寄紉蘭盦全集六冊。皆止見夫一鱗。今幸窺夫全豹。揆其源流。探其指趣。根柢經籍。貫通體用。其爲文也。思深見卓。理密詞達。讀之可以分析同異。剖決是非。其爲詩也。立意深純。摘辭微眇。讀之可以扶持名教。感興性情。語必徵實。不襲桐城之窠臼。藻不妄摛。夙鄙隨園之鄭衛。乾嘉正宗。於今復見。然世人但見衡甫之才。亦知衡甫之遇乎。想其焯掌自勤。中眉無勇。栖家衡而自逸。乞冷官而未能。少罹元二之災。晚遭陽九之劫。入宮不見。淒淒炊臼之占。主器何人。慘慘喪明之痛。文人之厄。一至於

此。然而有田負郭。有孫傳書。祖遺之老屋可棲。大耋之年華已屆。以視甘亭先生之在家原是客。有髮亦如僧者。大不侔矣。矧吾宗自晉以來千數百年。仕宦旣多不達。著作亦少流傳。君與荃孫志趣旣同。體格亦合。抱刻書之奢願。著奇零之小品。幸於暇日陸續傳之。嗟乎。天兮蒼蒼。地兮荒荒。烏飛兔走。莫知其鄉。問大鈞兮莫應。空悵結而旁皇。吾爲子歌以檄子之鬱歌曰。吉日兮辰良。蘭有秀兮菊有芳。俾提鷗兮挈鷺。聊相與兮翱翔。遺世人而獨立。是爲卻老之良方。惜同志之二三。半歸眞於北邙。謂此懷建霞諸君歎老壽亦何爲兮。迺獨覲夫滄桑。任大化之推移。庶一視夫彭殤。聊嘯歌以盡餘年兮。何爲顛顛而悲傷。君聆茲狂率之語兮。應微听而晉一觴。歌旣

畢。卽書此以爲文集序。

繆氏蘭陵世譜序錄

繆氏尋源託根東魯繆公之後。以諡爲氏。蘭陵之外。東武瑯琊三望同稱。不越魯境。曰秦曰宋。各有異詞。林寶鄧名世互相勦襲。武威指斥。義正詞嚴。漢代儒林。繆生傳詩。設醴去楚。見機而作。熙伯炳炳。名重曹魏。父孝孫忠。厄遭赤族。郡署東海。亦繫魯疆。扈蹕渡江。北徼南盛。遷居江陰。六百餘年。墓存祠燬。譜牒散亂。中遭海寇。東南荼毒。嘉靖迄今。始有據依。清初拒命。鄉僻稍輕。粵逆之亂。死者大半。荃孫幼年。目擊淮朴閭巷。同互。書聲四起。子弟出見。執禮彬彬。不逢佳節。毋許入市。游蕩嬉戲。懸爲厲禁。布衣蔬食。祭則茹葷。歲計百千。全家

溫飽。夜績篝鐙。晨紗跣露。婦女之勤。罕蓄婢僕。老輩面語。已遜乾嘉。江邑西郊。羣推望族。上元恢復。歲又五十。房屋頽廢。遠不前若。絃誦之聲。殆將聞寂。搢紳之族。降而阜隸。叔向斯語。觸目生感。荃孫庚申出走。徧謁名流。雖少學術。龐知編纂。董而理之。時哉勿失。知我罪我。敬族後賢。謹輯蘭陵繆氏申港支制誥圖表志傳錄。凡十四篇。其辭曰。

蘭陵世家。地居鄉曲。亦有髦秀。連獲科目。騏驥顧視。雲龍角遂。覃恩。贈官。教忠。頒祿。

天語煌煌。牙籤玉軸。輯

制誥弟一。

先世遺象。宛轉留形。雖無老成。尙有典型。子孫千億。沐浴餘

聲旁行斜上。自闕畦町。一目瞭然。偃僂遺銘。輯象圖弟二。
裴李分房。韋平計世。昆弟連翩。子孫附綴。來昆雲仍。歷久不
替。大書歲年。旁及伉儷。弗煩弗簡。以此舉例。輯世表弟三。
昭代科名。文武並重。培植植幹。以資國用。干城扞邊。蓬瀛獻
頌。青青子衿。一鐙吟誦。揚眉獲雋。志目命中。企盛慮衰。激發
吾眾。輯選舉表弟四。

鸞孤鵲寡。中夜銜哀。漆室未啟。霜鐙已灰。九死莫贖。百折不
回。崔巍崔巍。懷清之臺。輯節孝表弟五。

宗族台祠。制殊古禮。宗法雖失。猶是一體。肅穆虛堂。時陳酒
醴。高冢巍巍。零露泥泥。長松偃蓋。衰草如薺。謁祠展墓。子姓
踏濟。輯祠墓志弟六。

定海一志。全謝山毀朱述之褒。效輦布廬。兩代詩豪。稽弦游俄。身
歷不毛。經經緯史。譽法俊髦。書佚名存。猶屏濫叨。輯藝文志
第七。

一邑賢豪。史傳幾人。首崇勳績。冠能魁倫。次及耆舊。學粹品
醇。家傳別傳。璘璘彬彬。爰及內助。彤管敷陳。易戒說輶。詩詠
采蘋。賢明貞順。刻竹書筠。輯人物傳弟八。

謝草江花。沈詩任筆。我昔童叟。時睹寶帙。龍漢劫墮。蟬編風
逸。斷簡殘編。百不存一。及茲搜羅。猶可傳述。輯舊德集弟九。
從師受益。取友必端。家法漢儒。科目唐官。淵源可溯。紀載非
難。洎遭兵燹。文獻凋殘。挂一漏萬。有缺有完。絕少攀附。自媿
單寒。輯師友淵源錄弟十。

桐陰舊話。柳溪紀聞。香錄往事。保守清芬。孝弟忠信。餘力及文。鄰里鄉黨。人云亦云。本無紀載。又罹賊氛。聊當圭臬。毋等煙雲。輯鄉里紀聞第十一。

東海片壤。泥塗接天。公來活我。撫綏廿年。良氓須保。弊政須蠲。保甲弭盜。菁莪毓賢。託命惟公。天胡不延。春秋享祀。衣冠留阡。欲觀惠政。視此一編。輯定海遺愛錄弟十二。

漢表純儒。魏志茂族。父子兄弟。聲華相逐。播清效忠。百口傾覆。以後散居。譜牒莫續。金石詩文。一見輒錄。碎玉零珠。殘膏賸馥。法戒均存。匪矜書籠。輯攷古錄弟十三。

詩書史漢。序錄在後。昔賢名譜。家法斯守。著其宗旨。觀其可否。例分門類。文成奇耦。後世尙文。均取冠首。改法前人。西妍

東醜生今返古敢任其咎輯序錄弟十四

藝風堂文漫存卷二

藝風堂文漫存卷三

江陰繆荃孫

癸甲藁

考書記跋

漢經師家法考

漢人最重師法。經師授受。口耳相承。十四博士之設。各自成家。又稱家法。謂守其一家之法。卽師法也。續百官志。博士十四人。易四。施、孟、梁邱、京氏。尚書三。歐陽、大小夏侯氏。詩三。魯、齊、韓氏。禮二。大小戴氏。春秋三。公羊、嚴、顏氏。掌教弟子。國有疑事。掌承問對。此條最明析。漢官儀曰。博士秦官也。武帝初置五經博士。後增至十四人。太常差選有聰明威重一人爲祭酒。其舉狀曰。生事愛敬。喪沒如禮。通易尚書孝經論語。兼

綜載籍。窮微闡奧。隱居樂道。不求聞達。身無金痍痼疾。世六屬不與妖惡交通。王侯賞賜。行應四科。經任博士。下言某官某甲保舉。其鄭重如此。後漢魯恭傳。恭弟丕上疏曰。臣聞說經者。傳先師之言。非從己出。法異者各令自說師法。博觀其義。儒林傳。孟喜受易於田王孫。田王孫受易於丁將軍寬。喜之改師法。乃爲梁邱賀輩所誣耳。其實不改也。而漢人說經。重師法。則於此可見。下文胡毋生之弟之東平嬴公。則表其不失師法是也。外戚傳。定陶丁姬。易祖師丁將軍之玄孫。師古曰。祖始也。儒林傳。丁寬。易家之始師。自夫子傳至寬。寬爲大師。故以爲始師。又張禹傳。蕭望之奏禹經學精習有師法。又李尋傳。治尙書與鄭寬中同師。寬中等守師法。五行志。朱博

爲丞相受策。有大聲如鐘鳴。上問李尋。尋對引師法。後書卓茂傳。元帝時學於長安。事博士江生。習詩禮。究極師法。又吳良傳。東平王蒼上疏薦良曰。齊國吳良治尙書學。通師法。經任博士。漢人重師法如此。後書儒林傳。光武中興。愛好經術。未及下車。而先訪儒雅。采求闕文。補綴漏逸。於是立五經博士。各以家法教授。光武好經甚於前漢武帝。明章尤加隆焉。故東京經術盛於西都。而其守家法益嚴。質帝紀。本初元年夏四月庚辰。令郡國舉明經年五十以上七十以下詣太學。自大將軍至六百石皆遣子受業。歲滿課試。以高弟五人補郎中。次五人太子舍人。又千石六百石四府掾屬三署郎四姓小侯先能通經者。各令隨家法。又魯恭傳。拜魯詩博士。由

是家法學者日盛。又宦者蔡倫傳。元和四年。帝以經傳之文多不正定。乃選通儒謁者劉珍。及博士良史詣東觀。各讐校家法。又鄭康成傳。論曰。王父豫章君傳授生徒。專以鄭氏家法。此蔚宗謂其祖父豫章太守甯李賢注云。言甯教授。專崇鄭學。蓋前漢多言師法。而後漢多言家法。不改師法。則能修家法矣。然兩漢尊師法。而俗學卽出乎其間。劉歆移書讓太常博士有云。綴學之士。苟因陋就寡。分文析字。煩言碎辭。信口說而背傳記。是末師而非往古。豈不哀哉。徐防永元十四年上疏亦云。伏見太學試博士弟子。皆以意說。不修家法。孔子稱述而不作。又曰。吾猶及史之闕文。疾史有所不知。而不肯闕也。今不依章句。妄生穿鑿。以遵師爲非義。意說爲得理。

誠非詔書實選本意。觀此則知俗學之妄。古今同慨。自唐中葉以後。凡說經者皆以意說。無師法。夫以意說而廢師法。此夫子所謂不知而作也。

嘉祐七史考

郡齋讀書志云。嘉祐中以宋齊梁陳魏齊周舛謬亡缺。始命館職校讐。曾鞏等以祕閣所藏多誤。不足憑以是正。請詔天下藏書之家。悉上異本。久之始集。治平中鞏校定南齊梁陳三書上之。劉恕等上後魏書。王安國上周書。政和中始皆畢。頒之學官。民間傳者尙少。未幾遭靖康丙午之亂。中原淪陷。此書幾亡。紹興十四年。并憲孟爲四川漕。始檄諸州學官。求當日所頒本。時四川五十餘州皆不被兵。書頗有在者。然往

往亡缺不全。收合補綴。獨少後魏十許卷。最後得宇文季蒙家本。偶有所少者。於是七史遂全。因命眉山刊行。觀晁氏說。則知校北齊書未有主名。而南齊書後元印有崇文院敕下杭州開板公文。時在治平二年。至政和始頒行。官工七史至五十年方畢。亦云遲矣。政和至紹興十四年止三十年。頒行學官之本。往往亡缺不全。合五十餘州學。尙少魏書十許卷。可見官書聽其散失。與今日無異。眉山所刊卽是杭州官板翻刻。至今猶可想見規模。西莊以爲頒行者尙是寫本。未見崇文院敕文故也。校史諸臣各題名於卷尾。曰綬曰華曰恂曰寶臣曰穆曰藻曰洙曰覺曰彥若曰鞏曰攽曰恕曰燾曰祖禹曰安國曰希綬者宋綬。校巢元方諸病源候論之翰林

學士尙書左司郎中宋綬也。恂者楊恂。四川人。入元祐黨籍。宋史附家愿傳。寶臣丁寶臣也。穆者鄭穆。宋史三百四十七卷有傳。藻者祕閣校理錢明逸之從子。宋史三百十七卷附傳。洙者知太常禮院兼史館檢討孫洙。宋史三百二十一卷有傳。覺者祕書少監孫覺。宋史三百四十四卷有傳。彥若趙彥若也。鞏者集賢校理曾鞏。宋史三百十九卷有傳。攽者館閣校勘。亦在宋史三百十九卷。恕者祕書丞。在宋史四百四十四卷文苑傳。燾者安燾。宋史三百二十八卷有傳。祖禹者范鎮之從孫著作郎兼侍講。宋史三百三十七卷有傳。安國崇文院校書王安國。宋史三百二十七卷有傳。希者祕書少監林希。宋史三百四十三卷有傳。

平水板本攷

平水。金地理志平陽府有書籍平水鎮名。元太宗八年用耶律楚材言。立經籍所於平陽。當是因金之舊。研北雜誌云。舊籍鏤板多經毛麾收達校。毛文見金文最今傳世者論語注疏十卷本。木記大元元貞丙申刊。又云平陽府梁宅刊。巾箱本爾雅大德己亥平水劉氏進德齋刊。新刊禮部韻略大德丙午平水中和軒王宅印。政和證類本草平陽張存惠刊。有泰和甲子晦明軒記。大德丙午平水許宅印。銅人腧穴鍼灸圖經。序時大定丙午歲平水閑邪叢叟述。有書軒陳氏印行六字。圖解校正地理新書十五卷。明昌壬子張謙刊。增廣類林十五卷。大定己酉李子文鏤板刊行。道德寶章一卷。金正大戊子

平水中和軒王宅重刊。李賀歌詩編。碣石趙衍刊本。丹淵集四十卷。木記金泰和丙辰晦。明軒張宅記。滄水集元統甲戌平陽中和軒王宅刊行。滄水集明人跋中州樂府末有至大庚戌夏月平水進德齋刊本。木記。河汾諸老詩集後有皇慶癸丑六月吉日尊賢堂高昂霄告白。均見本書瑤瑤子三命消息賦。元本春秋集傳纂例。明堂灸經。皆云平陽府刊明繙本。是中和軒王氏三種。晦明軒張氏二種。進德齋劉氏二種。與麻沙余勤有堂劉日新堂並駕齊驅。而流傳於世者絕少。元末北方兵禍特甚。南方則張士誠陳友定尙能保護。而明太祖崛起。亦比北方早獲甯宇也。

與沈子培書

黃山谷內集洪災所編。外集十四卷李彤所編。內外集均彤所校刻。別集二十卷詞一卷簡尺二卷年譜三十卷黃文纂異一卷。均孫愷編。年譜專爲考證詩文集而作。趙氏讀書附志云。別集二十卷黃文纂異一卷年譜三十卷。並愷所編。明嘉靖丁亥南昌刻本。猶依舊次。佚去纂異。而加入伐檀集。共九十七卷。萬曆陳以志改編爲十四卷。四庫本則三卷。又不知何時所改。愷爲山谷諸孫。年譜末云。歲在屠維協洽。無年號。今祠堂本忽加咸淳五年四字。蓋以咸淳五年正當己巳也。然序云。今太史歿已百年。山谷歿於崇寧乙酉。至開禧正值百年。然則屠維協洽迺嘉定二年己巳。非咸淳之己巳。況伐檀集跋。嘉定二年秋九月。望諸孫朝散郎直顯謨閣西浙

路轉運判官榮謹書。皆同時刻成也。萬曆陳以志改年譜爲十四卷。今翁刻卽依陳本。聚珍本並無年譜。百宋一廬賦所載之六卷。有洛陽李彤校兩行。後集亦有之。後印緡刻則無之矣。山谷尺牘與遺文皆曾孫銖所編。尺牘與三注本皆弘治張元禎所刻遺文。宋刻在瞿家。汪據舊鈔本。行款不合。而陳伯年所刻是日本覆刻本。非真宋有詩無文。未盡愜人望。兄所藏爲紹熙刊本。能付之梓。嘉惠後學。迺盛舉也。

華亭韓氏藏書記

華亭韓對虞先生。道光甲辰鄉試。闈中得君文。試官舌擣而不能下。平湖徐稼生侍郎特賞之。真之前列。中批有云。作者難識者亦復不易等語。拆封見君名。一時以爲得人。侍郎亦

自喜所賞之不謬。蓋君文得力於周秦諸子。又從姚春木先生游。由桐城以溯昌黎。古質簡奧。無一習見語。蓋聞見廣而蘊蓄深也。當乾嘉盛時。蘇州黃蕘圃士禮居藏書甲天下。晚年於⑤妙觀前開滂喜園書鋪。生前已分與友人。歿後書盡出。先生與常熟之瞿。金山之錢。上海之徐。郁。同時收書。玉軸牙籤。名鈔舊刻。所積約十餘萬卷。校讐考訂。手不停披。又精於疇人家學。與南匯張嘯山。金山顧尙之。傳刻幾何原本。西人亦以爲勝於歐洲舊刻。得書卽識緣起於書衣。咸豐丁巳戊午之間。猶時至金閭收書。迨庚申粵逆陷松江。君之藏書板片古器書畫與所居俱燬。君遂鬱鬱以歿。令子伯陽亂後回里。編次君文二卷。屬嘯山爲序。嘯山稱其能讀父書。足以

繼君之志。當年攜以逃亡者。尚不下數萬卷。皆舊刻名鈔也。今伯陽之子子穀。年甫弱冠。性復愛書。盡發所藏。屬其師吳縣曹君揆。一爲編書目。世人方知韓氏多藏。可謂賢子孫矣。今守山閣春暉堂散佚已久。宜稼堂之精者。爲豐順丁中丞豪奪以去。今丁氏書飄流市肆。蟲傷水溼。觸目傷心。次者全歸吳興而宋樓。又爲海客細載入東。只鐵琴銅劍樓。歸然獨存。爲吳中第一大家。而瞿良士兢兢保守。不爲勢屈。幸而得存。韓氏之書。今已名馳海內。恐覬覦者逐漸生心。子穀遠引良士爲法。再以餘力擴充之。與吾里東西並峙。是深有望於子穀矣。歲在閏逢攝提格中秋後一日江陰繆荃孫記。

周湘舲造金剛經塔記

佛家以造塔爲功德。不僅鋪金徧地。寶鐸吟霄。侈談十三級。九級七級之鉅麗也。元魏有須彌塔。唐有多寶塔。宋有辟支塔。閩有堅牢塔。南漢有千佛塔。吳越有千官塔。高只數丈。堅固不壞。種種功德。亦曰無量。金剛經者。後秦鳩摩羅什首譯之。其有六譯。而唐人勒石。均用北魏菩提留支譯本。爲佛家無上之書。石刻傳世。以泰山石經峪大字爲最。惜其文字不全。唐上元二年。龍門王知敬書垂拱三年。中山法果寺碑。較爲完善。書法亦工。房山雷音洞三刻。皆鉅碑。六和塔內。亦有宋人寫金剛經。刻石之最古者。吳興周君湘舫博雅工詩。旁通內學。爲追薦母董夫人。手書金剛經全部。倩錢塘女士丁恆繪佛像及感應圖寫經圖。並識其緣起。石刻橫方共四十

石。歲在閏逢攝提格。建塔於西湖理安寺前山門之下。鶴澗亭之上。五面九級。高四丈三尺。周三丈八尺。累塼成之。正面題曰董夫人塔。識所本也。嗚呼。自宰階波改而爲經幢。經幢改而爲七如來幢。日趨簡易。世風類然。湘舲獨能手書全經。力追古昔。以佑母太夫人生天成佛。在人意中。夫孝子事親無方。而存沒總歸一致。存則思所以悅親之心。不惜多方鉤致。沒則思所以資親之福。何妨三教等觀。況乎造塔寫經。歷代均有靈驗。非容容求媚者可比。其精誠所至。數十年不少懈。孜孜訖訖。以底於成。儒者所謂貞靜專一。佛家所謂勇猛精進。如是而已。經之後綴以多心經。二經宗旨相同。前人往往附刻。不足異。歲在閏逢攝提格。午月江陰繆荃孫記。

蜀石經殘本跋

蜀石經周禮卷九卷十兩卷。一缺首。一缺尾。缺均無多。左傳卷十六襄二全卷。穀梁卷十六十九行。光緒丙子在楊幼雲處見之。屬爲校異。因循未果。後歸張叔憲。李亦元。今歸吾友劉健之。海內孤本也。蜀石留于世者。有毛詩周南召南邶風。左傳昭二十年六百餘言。陳頌南臧周禮考工記六千餘言。公羊五千餘言。今之三冊。字數最多。宣統辛亥與健之同匿海濱。借歸以唐石經校經字。岳本校注字。疏其異同於石。兩通字及加減虛字之無關宏旨者。悉不著錄。得周禮十九紙。左傳六紙。穀梁一紙。五十日方畢。去丙子三十六年。荃孫年亦六十有九矣。心眼俱退。未能多方疏證。抱媿良多。惟殘冬。

亂世。藉讀書爲消遣。昔錢辛楣先生得見毛詩左傳以爲衰
年眼福。荃孫今亦云然。前人云蜀刻出於大和。與唐石經同
源。惟經注全刻。止廣政本有之。俾後人獲見雕版前舊式。豈
非幸事。諸跋以邵武楊窰臣爲最。考訂源流甚詳。石於宋末
與文翁石室同燬。元明金石家無言之者。所傳合州賓館有
禮記數石。曾訪碑於合州得唐錦里新編云。貴州任大令載
歸數十片。訛以傳訛。不足據也。今陳氏毛詩摹本流傳已少。
夫長興開版本之學。貞明啟策帖之風。朱友貞刻貞明帖在
保大前是真帖祖轉在大亂之時。以存先聖之道。重勒廣傳。嘉惠後學。是所望
於健之。宣統辛亥十二月。

左傳淵世。昏愍弃柔。均缺筆。他廟諱則不避。世之治也。

一避一不避可證。周禮世字民字均不避。棄仍作弃。謀仍作誅。是習尙使然。不足爲避諱之證。

知祥。祿字作祿。同不避知字。知祥祖諱察。察字缺筆。左傳作察。周禮作察。毛詩作突。父諱歐。史名道。蜀檮杌則云名嘯。今本道字獻字皆不缺筆。

壬子正月。陳頌南臧周禮考工記公羊桓公二冊。亦爲健之收得。荃孫又假以續考。得周禮六紙。公羊二紙。次校記之後。各跋以青陽吳子肅。履敬子迪式訓兩跋爲最。略舉異同之字。不爲空言。是漢學家法。周禮避蜀諱。公羊避宋諱。力駁前人避唐諱之說。所見與荃孫同。經字與唐石經無甚出入。至各注則異同甚多。有阮氏校勘記以爲當據某書改某字。而

此注本不誤者。有校勘記所未及者。獲益良多。至書字譌脫。周禮獨多於他經。其孫朋吉之疏歟。又如鄭注引及陸機草木_氏。猶可附會。引及郭璞注_氏。則誤顯然矣。吳跋以爲仍其舊文。不敢損益。未免意存迴護。不如直指其過。俾知瑕不掩瑜。程克齋議春秋以甲午爲申午。以癸卯爲癸卯。全謝山云。其書既多。自不能無舛錯。要之有足資考證者。斯爲持平之論。宋晁公武有石經考異。張東有石經注文考異五十卷。有目無書。無從考核矣。荃孫再跋。

易林注跋

易林注十六卷。宋刊本。每半葉八行。行十五字。高五寸二分。廣四寸五分。白口。雙邊。中縫魚尾。卷數葉數人名。或白文。或

陰文不一。書十六卷與隋志卷數合。每卷四卦。注不著撰人名氏。而注並不及半。卽有注者。皆引常見之書。餘皆云無注。或云未詳。林辭多重複。注亦重複。坎之豫注。崑崙之墟在西北方。去嵩高五萬里地之中。其高萬一千里。出賦題。則仍是坊賈所爲。每卦之辭顛倒錯亂。遠不如士禮居刻。避諱既不謹嚴。止匡恒貞缺筆。壯之睽缺。林辭亦同。惟足訂黃本之誤。黃本首行焦氏易林卷第幾。次行乾之第一。此本首行易林卷第三。次行畫卦於上。乾下小畜。三行小畜本卦林辭。四行之乾以下無之字。無小注。一云某當作某。皆作大字。與黃本異。小畜之需。故室舊廬稍弊。且除。除黃作徐。之噬嗑。方喙廣口。仁智聖厚。釋解倒懸。唐國大安。喙黃作啄。大黃作太。之剝。

乘馬金車。駕游大都。乘黃作木之咸。源出陵足。行於山趾。不爲暴害。民得安處。處黃作居之家人。無有屯難。屯黃作重之夬。福祚之家。喜至憂除。如風兼雨。出車人魚。又云如魚逢水。長樂受喜。黃脫又云以下十字之艮。祠祀曠開。黃作闊曠之既濟。襄夷服除。以安王家。黃作夷狄之未濟。三足孤鳥。靈鳴督郵。黃作卸。履本卦林辭。雖難得全。且驚不危。黃作雖得得全之損。行不能前。足蹶不便。蹶黃作矮。泰之巽。不爲家饒。心其函憂。憂黃作通。否之咸。花落實槁。落黃作薄。之解。伊尹智士去桀耕野。智士黃作致仕之未濟。道頓跌跣。跌黃作跌。卷四同人之大過。與樂爲倡。倡黃作昌。之明夷。太王執政。太黃作大之旅。鳳凰在左。麒麟處右。處黃作在。大有之咸。牝雞

雄晨主作亂根。雄黃作司。謙之頤。厖降庭堅。厖黃作龍。之異。華入貴鄉。到老安榮。華黃作莘。之豐。拜跪請免。不得梟腐。得黃作德。豫之震。吾有驂騮畜之。以時東家翁孺來請我駒。駒黃作車。卷七无妄之頤。傲於嘉國。傲黃作邀。之恒。憂思約帶下。一本云。牛驥同堂。郭氏以亡國破爲墟。君走奔逃。皆大字。大畜之益。南箕無舌。飢多沙糖。糖當作糠。黃脫四字。頤之乾。思初悼古。悼黃作道。之恆。毛生豪背。豪黃作毫。之益。懸狙素殮。殮黃作殮。卷八坎之節。水怒湧躍。湧黃作踊。離之蹇。東山臯落勇捍。不服金玦。玩好衣爲身賊。下有一朝隕落四字。黃脫之姤。宋子哭歌。宋黃作宗。咸之隨。破我葦廬。廬黃作蘆。之臨。祝施王孫。施當作鮓。黃作駝。之遯。過時不歸。苦悲雄雌。雌。

黃作惟。之夫。跛踣不行。踣黃作倚。恒之訟。毋出房闥。乃無疾
病。毋黃作母。之蠱。狐不得南。豹無以北。狐黃作孤。之復。阿衡
服箱太一載行。一黃作乙。之咸。瘠蠹小瘦。蠹黃作蠹。之艮。背
憎爲仇。憎黃作增。卷九遯之旅。金城鐵郭。郭黃作廓。之巽。江
有陁汜。有黃作水。之小過。逢駁猛虎爲所吞殤。一本作又害
不傷。黃脫七字。大壯之无妄。張氏揖酒。揖黃作楫。之困。道溫
爲坑輪陷躓。彊輪黃作轉。晉之坎。飛兔腰褭。褭黃作裊。之解。
刻木象形。木黃作水。明夷之大壯。高明大彤。黃作驕。胡犬形。
之中孚。虛與有得。得黃作德。卷十家人林辭。天命赤烏。與兵
傲期。兵黃作君。之需。生有聖德。生黃作主。之萃。出入无妄。入
黃作門。睽之恒。孟已乙丑哀呼尼父。下云乙當作己。言孔聖

卒於四月己丑。黃作孟已乙丑誤。亦脫乙當作己四字之尤。
折若蔽日。黃作閉目。蹇林辭喪我元夫。元黃作无。之大有。生
時不利。天命災至。天黃作天。解之履。翁云于南姬言還北。姬
黃作姬之謙。三光高明雨減其光。減黃作滅之損。下援上煩
蠹蠱爲患。歲飢元年。一云■既不一。況有飢年。黃脫一云十
字之遭。王銳鐵頤倉庫空虛。市賈無盈。與我爲仇。一云時不
我與。我之利爲。一云倉庫滴空。人誰與同。黃脫一云下二十
字之萃。竊名盜位居。非其家霜隕。不實爲陰所賊。一云三年
室失盜賊。自生霜隕。非時菽麥不成。黃脫一云下十八字之
升。賊仁傷德。天怒不福。斬刈宗社。失其本域。博要云日中爲
市。各抱所有。交易資貨。採珠懷寶。以悅歡喜。黃脫博要以下

二十三字之革。麟游鳳舞。歲樂民喜。又云鳳舞麟游。賢聖作
傳。歲既豐稔。人何以憂。黃脫又云以下十八字之鼎。行行窘
步次宿方舍。居安不懼。姬姜何憂。一云行幸。國翫觀俗風。
君安曰勞。姬姜何憂。黃脫一云以下十八字。易林卷十三。革
之蒙。殊類異路。殊黃作疏之需。太王爲父。季歷孝友。黃作王
季之蠱。鷹鷂欲食。鷂黃作鷂之坎。華言風語亂相誑。誑黃
作狂之升。杖鳩負裝。杖黃作仗之巽。免聚東郭。郭黃作廓。鼎
之大有。高易我宇。易黃作易之觀。雞釜夜鳴。釜黃作釜之豐。
白馬駟駟。駟黃作駟之兌。成王多寵。商臣惶恐。商臣黃作商
人。震之晉。牙孽生齒。一作牙孽生達。黃脫一作六字之歸妹。
我右身安居。不危殆。居黃作吉。艮之小畜。廣祐施惠。施黃作

德惠之晉。陰生麀鹿。鼠舞鬼谷。靈龜陸處。一云靈鼠陸處。鬼
哭鼠舞。雨甌草生。仁智敗國。桀亂無緒。黃脫二十七字之豐。
稍弊穿空。家莫爲宗。移下爲身。作凶一句在此。更作一云奴
婢逃走。子西父東。與黃本異。卷第十四漸之需。追我濟西敵
人破陣。我當作戎。黃脫下四字之大有。乘輿八百尊。我恒德。
恒。黃作桓。之中孚。牝牛鳴。牛。黃作馬。之未濟。陰醜陽爭。醜。
黃作配。歸妹之屯。至德安樂。一云潛伏。黃脫一云四字之蒙。
獻豸大縱以樂成功。縱。黃作猓。之豫。轅轉東西。轅。黃作轉。之
頤。來復我城。傷我肌膚。黃作吾城。豐之需。二龍北行。二。黃作
三。之隨。開廓緒業。廓。黃作郭。之臨。增加我頭。綴挂羽翼。綴。黃
作緇。之咸。腐臭所在。青蠅集聚。蠅。黃作繩。之遯。甘忍利瘡。瘡。

黃作害。旅之漸。蜺蛇四牡。牡黃作壯。按周道委遲。四牡駢駢。蜺蛇卽委遲。四牡爲是。此書各家書目未見著錄。止敏求記云。在牧翁處見注本。絳雲一炬。已歸天上。及黃本跋。所謂一旦再出全注並傳者。是遵王猶見注本。蕘圃不過想像。今得校其半。亦云幸事矣。

大戴禮記跋

大戴禮記十三卷。元刻本。每半葉十行。行二十字。高六寸八分。廣五寸。黑綾口。單邊。上有大小字數。下有某人刊。雙魚尾。紙墨均佳。首有元挖去至正二字甲午鄭元祐序。後有朱淳熙乙未韓元吉跋。據鄭序知爲海岱劉庭幹刊置嘉興郡庠本。攷大戴禮記十三卷。漢戴德撰。德爲信都王太傅。見儒林傳。

書十三卷八十五篇。亡四十七篇。存三十八篇。是書通行者有雅雨堂本。有戴東原校大典本。有孔輿軒補注本。有王實齋聘珍解詁本。有汪綢青炤注本。有汪容甫正誤本。舊刻宋有淳熙韓元吉本。元有至正劉庭幹本。宋本不得見。以元至正本爲最。卽此本也。庭幹名貞。爲嘉興路總管。政平訟理。刊刻多書。今流傳於世者。有韓詩外傳。呂氏春秋。及文則。皆爲舉世所重。孔注序錄云。至正十三年海岱劉貞庭所刻。分上下卷。無注。按貞是名。庭幹是字。孔君誤連。此本分四冊。首冊首作大戴禮記卷一之三。後有每卷篇目。下同。次冊大戴禮記第四之六。三冊大戴禮記卷七之九。四冊大戴禮記卷十之十三。不分上下卷。并有盧辨注。未知與軒所見爲何本也。

首有晉府書畫之印。後有敬德堂圖書記。兩朱文大方印。目錄有永理之印。白文。皇十一子朱文。詒晉齋印朱文。三小方印。此書先藏晉府。後歸成王府也。原書由蝴蝶裝改冊。故書口時有破損。

樂書跋

樂書二百卷。附正誤一卷。宋陳旸撰。宋刊本。每半葉十三行。行二十一字。高六寸六分。廣五寸二分。白口。上有字數。前有慶元庚申楊萬里序。後有慶元己未陳岐跋。林宇冲跋。正誤一卷。樓鑰撰。字尤方勁。嘉泰二年大防自跋。又有陳芾跋。不全。與錢警石讀書雜記同。按樂書與禮書均刻於南宋。歸於南監。元明遞修。以修板之多寡定書品之高下。有至治刊本。

至正刊本。皆此一書。至治有虞集序。至正本改慶元爲至正。改陳岐爲林光大。尤爲可哂。此本字畫清爽。亦無一葉補刊。而宋樓志以爲宋刊元印。而林字冲跋缺字。此本全有之。則印在前矣。首葉有建安楊氏傳家圖書朱文長印。五硯樓朱文大方印。末葉有五硯樓袁氏攷藏金石圖書朱文方印。蓋明正統中大學士楊榮藏書。五硯樓則吳縣袁廷禱藏書處也。

平水巾箱本爾雅跋

巾箱本爾雅三卷。元平水刊本。每半葉八行。行十五字。高四寸半。寬三寸六分。黑綫單邊。中縫上魚尾上大小字數。上魚尾下爾雅上中下三字。下魚尾葉數下有一畫。題郭璞注。首

載郭序。後有音釋。與宋本同。序後又有牌子云。一物不知。儒
者所恥。聞患乎寡而不患乎多也。爾雅之書。漢初嘗立博士
矣。其所載精麤鉅細畢備。是以博物君子有取焉。今得郭景
純集注善本。精加訂正。殆無毫髮訛舛。用授諸梓。與四方學
者共之。大德己亥平水曹氏進德齋謹志。阮文達南昌本未
見此書。取校一過。經字釋詁底。底不作廢。雪窗天順本同。宜靜
書院作廢注疏所出。從使也。不作使從也。各本同。阮刻誤倒。釋宮。解不
作解。釋親。謂女子。上有男子二字。各本同。阮刻誤脫。釋天。太
平太蒙。不作大釋。草傳攢目。不作橫。蘇不作蔭。阮刻誤注字。
釋詁。怒如調飢。阮誤饑。天畏棐忱。阮作威。釋言。肅雍和鳴。阮
作雍。謂燒燎。阮脫謂字。今荆楚人皆云還音杳。阮脫。相干腐。

阮作于。菱亂也。阮校云。不應入釋言。此本已有之。釋訓瘍瘡。下阮有也字。口柔之人。阮脫人字。釋宮今人稱家。義出於此。阮本下有展倚二字。宦夷。阮本下有窈要二字。按此二字與宦夷作對。當有大路謂之奔下。此皆人行步趨走之處。因以名云。阮脫。賈誼曰。寶康瓠。阮脫寶字。釋器連底捫之。阮作桐。釋天凍音東西之束。阮凍上有○。似不應有。呼牽牛星爲擔鼓。擔者荷也。阮作檐。釋邱鐵頂者。阮作纖。釋水瀝纔有貌。阮本下脫○。見現否。是釋文。衣謂禪。阮作禪。從釋地已下十三字作大字。阮本是小字。釋草謂簫管之屬。阮脫謂字。江東呼爲葦。音斬。阮脫音斬二字。大莖小葉華紫黃色。阮華作葉。菴華色異。名亦不同。音沛。阮菱音沛。是釋文。周禮曰。惹菹。阮作

簋。江東呼芡音忤。阮脫音忤二字。江東呼爲烏蔞。音邱。阮脫音邱二字。今江東呼華爲琴。音敷。阮脫音敷二字。釋蟲齊人呼蟻蟻蚌。阮作蟻蟻蚌。均誤。吳元恭本同。天順本作齊人呼爲蛾蚌。是阮誤爲蟻。此本改蟻作蛾。然上蟻字仍爲字誤。釋魚小銳而長齒。阮作鮓。丹甲青文。阮作青玄。釋鳥雅烏也。阮作鴉。鹼屬人曰橋。阮作橋。此與阮本不同者。其經文不同於唐石經者。如釋宮屋上薄。薄不作簿。宋刻廣韻三十五笑苑屋上薄也亦從艸釋天何鼓。不作河鼓。與郭氏擔荷之訓合。蓋古擔荷之荷實作何也。釋水縣出。不作懸出。釋文縣音元是古本作縣之證又釋畜駉牝驪牡。不同雪窗本。作駉牝驪牝。武進臧氏謂鄭高密孫叔然本作驪牡郭本作驪牝釋草其萌蘢。注音繾綣。不同雪窗本。訛作邱阮。釋經皆以元恭本雪

窗本爲單經之善。而此本更出其上。世所存元本。闕板居多。至平水本。據各家目錄不及十部。則北本重於南本。不得以墨色稍次譏之矣。首有稽璫樓白文長印。瞿氏鑒藏金石記。白文長方印。恬裕齋藏朱文方印。蓋常熟故家物。先陳後瞿。庚申亂後爲嶺南丁中丞所得。今又從嶺南仍回江南矣。

方言跋

方言十三卷。宋刊本。每半葉八行。行十七字。高六寸八分。廣四寸三分。板心上有字數。下有八名。白口雙邊。後有慶元庚申李孟傳朱質跋兩段。書中避諱至惇字。卽慶元時刻本。季滄葦書目云。揚子方言六卷四本。牧翁跋。卽此書。錢跋卽在朱跋之後。書禁嚴時撤去一葉。影寫六字訂入首葉。有顧仁

效藏書朱文長印。橫經閣攷藏圖籍印朱文大長方印。季振
宜藏書小長印。序後有揚州季氏朱文長印。滄葦朱文小長
印。振宜之印朱文小方印。均墨印。首葉有仁效二字朱文方
印。後有顧元慶覽賞印朱文方印。華亭朱氏白文大方印。按
顧仁效長洲人。結廬陽山之下。王文恪爲撰陽山草堂記。顧
元慶字大有。亦家陽山大石下。學者稱之曰大石先生。華亭
朱氏卽朱大韶。字文石。華亭人。嘉靖二十六年進士。由庶吉
士授檢討。遷南司業。橫經閣卽其藏書處。

桂氏說文義證原刻跋

乾嘉盛時。說文之學大行。南段北桂最稱弁冕。段氏自刊其
書。久行於世。桂書止有藁本流傳。亦未校正。字幾及二百萬。

刊板正復不易。諸城李方赤方伯得其藁。延許印林許珊林王萊友諸小學家校訂。苦其繁雜。欲刪節之。萊友以爲不可。道光己酉。聊城楊至堂河帥駐清江。平定張石洲爲山右楊墨林刻連筠移叢書。願以此書刻入。初。浼汪孟慈校讐。後交印林獨校。卽在清江集工開雕。印林爲立校例三。一曰補例。一曰刪例。一曰改例。又撰汪孟慈校語條辨。復增校例七條。印林因父病不能遠離。再移局於贛榆之清口鎮。距印林家止百里。俾之照料。咸豐辛亥始蒞事。未印多書。而墨林石洲前後歿。未能移板入都。板卽度印林家。辛酉八月。捻逆竄日照。印林家破。室廬書籍均燬於寇。桂板亦燼焉。逮南皮張文襄公刻於鄂局。海內始得見桂氏之書。文襄公序言楊氏書

板質於厥肆。不知桂書並不在內。臨清徐君悟生又言。板燬於拳匪之亂。皆傳聞之辭。不如印林與高伯平書爲可據。文襄公見此刻於何小宋制府許內。缺一葉。至求日照丁小山寫本足之。京師圖書館亦只藏有大字寫本。今幸得楊刻初印本。而鈔印林校例於攀占小廬。文校語條辨於滂喜齋。合訂於前。俾知此書刻不易。校亦不易。而原刻之爲難遇也。

史記集解跋

史記集解一百三十卷。宋刻本。每半葉十一行。行二十二字。大小字同。高四寸六分。廣三寸八分。白口單邊。口上一魚尾。下署史記幾下號數。目錄作大字。史記目錄後有牌子三行。邵武東鄉朱中奉宅刊行校勘。卽無訛舛。紹興庚申八月朔。

日字瘦勁靜穆。天水佳刻。各書目均未見。惟集解八十卷原第。已不可得見耳。

史記跋

史記殘本。宋刻三注本。每半葉十行。行二十一字。大小字同。高六寸。廣五寸。小耳。白口。上有大小字數。亦有在下者。口作史卷幾。雙魚尾。集解索隱三注俱全。各書目未見。書估止攜一冊。不知書後有年月牌子否也。有人謂似元本。爲彭寅翁刊者。此據愛日精廬藏書志。張月霄未記行數字數。而經籍訪古志有之。云是十行十六字至十七八字不等。後有至元戊子安成彭寅翁新刊。與此二十一字不同。則非彭本明矣。此宋刻別本三注。似亦刪簡。向疑南監刻史記共有四種。

而注均不全。大約就宋人單簡之本照刊。非明人自刪也。
南齊書跋

南齊書五十九卷。眉山重修七史九行十八字本。摹印極早。字畫方整者宋刻。靈動者元刻。而無明修。爲七史中僅見之書。後有治平三年崇文院送杭州開板行。是北宋刻於杭。南宋刻於蜀。杭蜀兩處爲天水良工所萃。故板刻流傳最久。前有禮部官書朱文大印。儀顧堂跋云。第三十九卷缺第五葉。以十四葉改刻五字補之。此本則無補葉。卷四十王士隆上空一格。若夫九種之事。下空二格。則同也。陸本有嘉靖修板。不如此本遠矣。

崇文院

嘉祐六年八月十一日

敕節文宋書齊書梁書陳書後魏書北齊書後周書。見今國子監竝未有印本。宜令三館祕閣見編校書籍官員精加校勘。同與管勾使臣選擇楷書如法書寫板樣。依唐書例逐旋封送杭州開板。

治平二年六月 日

輿地紀勝跋

輿地紀勝二百卷。宋王象之儀父撰。儀父東陽人。宋史無傳。書錄解題載其爲慶元中。考爲慶元丙辰。鄒應龍榜進士。曾知江甯縣。張秋水集詳其仕履爲江西分甯。非建康府之江甯。其父名師亶。劉伯山因影宋本紀勝袁州官吏下載王師亶二字。

皆缺筆。且注曰。郡志云。袁州月椿歲額八萬八千餘。紹興末年先君子爲宜春簿。嘗作文志月椿之苦。今減二萬五千餘貫。自先君子啟之。則其父名師賈。中紹興二十四年進士。終廣東提點刑獄。殆卽其人。今攷吳師道敬鄉錄。師賈子七人。爲謙之。恭之。益之。觀之。有之。漢之。節之。而無象之。七子皆以卦名。象之獨非。爲後改無疑。今據呂忠公祖儉唐卿墓志。有之後改爲象之。與紀勝所云仲兄行父。則益之也。叔兄中父。則觀之也。行數亦無不合。南海伍氏江都岑氏前後刻之。岑氏並爲校勘。而儀父世系訖不能明。今爲表之如右。

金華王氏

師賈

字唐卿

謙之

字古文

觀之

字古文

有之

字古文

漢之

字古文

節之

字古文

一年進士

十四年進士

宜存衡南劍

州教授刊施

山詩書等九

江建養開堂

於謙溪祠訓

終廣東提刑

有文集及資

治通鑑集表

八十卷

各本皆作師

古惟景宋寫

本作直缺筆

作百後人誤

作古字應升

夏侯宜舒覽

均作曾道迴

作題均缺筆

獨此處作有

亦可見宋人

避諱止作不

暴之

益之
字行父
熙進

上終大理司
直撰西漢年
紀

觀之
字中父
德化字

夔州轉運判
官撰同地圖
十六卷

育之
改象之

渙之

節之

伴

師心

重和元年進士

終顯謨閣直學士

師德

師愈

紹興十八年進士

瀚字伯海東萊人

柏魯齋先生

上提刑龜山門人

相

城

紹孫

愆

危素撰傳

必

侃

字剛仲號定齋

閑 閑 閑 閑

洽字伯禮東

雲龍

師升

字伯禮

終通功郎

道德經跋

老子道德經古本集注二卷。宋刊本。每半葉十行。行十七字。高六寸四分。廣五寸四分。白口單邊。上有字數。下注人名一字。首行老子道德經古本集注上。次行前王隆萬壽宮掌教南岳壽觀長講果山范應元集注直解。行湛然堂無隱齋谷神子范應元後序。書中引晦菴序參同契。是范在朱子之後。集各家注并有音辨。均以陰文冠之。今道藏目不載是書。

宋諱亦不甚避。然字畫紙墨爲朱板宋印無疑。

南華真經跋

南華真經十卷。郭象注。宋刊本。每半葉九行。行大十五字。小三十字。高七寸。廣四寸六分。白口單邊。魚口下以莊一至莊十紀卷數。下紀葉數。刻工人名一二字不等。此胡蝶裝改。冊口上大半破損。無跡可尋。無序跋。末葉後有安仁趙諫議宅刊行一樣。字兩行。安仁宋史有傳。國子監刻五經正義。以安仁善楷書。遂奏留之。性嗜書。所得祿賜多出以購善本。北堂書鈔三館所無。真宗命內侍取其家本以傳。喜其好古。手詔褒美。此本各書未見著錄。而字畫方整。楮墨精潔。是北宋體格。疑卽安仁手書。所刻與內(弘)字(之)字避。餘不避。而獨避

慎字。或爲南宋繙刻歟。未見全帙。不足定準。郭注全。音釋則直音。非陸氏釋文矣。歲在闕逢攝提格江陰繆荃孫跋。

淮南子節本跋

代

淮南子二十一卷。宋刊節本。每半葉十行。行十八字。小字同。
高。黑口單邊。板心標準一二字。首行
新刊淮南鴻烈解卷第一。次行太尉祭酒臣許慎記上。卷末
有茶陵後學譚叔端纂校一行。目錄後有兩方印。一模黏一
耜。譚氏一鼎式書鄉二字。淮南止見小字影鈔宋本。此本
字畫精雅。紙墨均舊。然各書目均未著錄。似是道家所刊。而
譚叔端亦無可考。節去本文約十之四。注每卷刻許慎名。然
既不全采許注。亦不全采高注。略存數條而已。至其佳處。今

以莊本校之。如原道訓而大與宇宙之總。未脫與字。欲肉之心亡於中。肉不作害。俗上氣力。上不作尙。不謀而成。謀不作爲。結激楚之遺音。音不作風。倂真訓藿蘆炷煌。藿不作荏。炷不作炫。秉皓白而不涅。涅不作黑。墜形訓昭之以日月。昭不作照。時則訓遠鄉皆至。鄉不作方。以索姦人。索不作塞。覽冥訓推蹶三王之法度。度不作藉。仁人處位而不言。人不作君。保其性命於天而不夭於人。性不作修。天上有於字。皆枉生而無其本者也。枉不作狂。精神訓精神者天之有也。未脫者字上術訓韎韐鐵鎧。韎不作鞅。無功而妄賞。妄不作厚。其計事可用。事不作乃。雖遇煩難之事。未脫遇字。繆稱訓無蔽財。蔽不作廢。夜行者瞑目而前。未脫者字。齊俗訓令三月嬰兒。

令不作今。不中規。中不作得。成不力者。力不作強。而仁不能解也。仁不作人。道應訓其度安至。至不作在。奚適而無道也。而不作其。明日又復往。未脫日字。兵略訓整。鸞舉麟。整不作整。說山川魂曰無有。魄曰何無有。何得而聞也。未脫魄曰何無有五字。善且不可爲。不可不作由弗。六畜生多耳目者不祥。祥不作詳。說林訓無餌之鉤。鉤不作釣。十牖畢開。畢不作之。詮言訓便在己者得宜。宜不作而。隨時三年。時去我走。先時三年。時在我後。不作時去我先。去時三年。自信其能。能不作情。人閒訓病溫而強之食。溫不作溼。推道理而不行。理不作體。延露陽曲。曲不作局。修務訓此教訓之所俞也。俞不作諭。項橐年七歲。未脫年字。服劍者期於銛利。銛不作。轡子。

之相似者。變不作變。秦族訓雨露所潤。潤不作濡。要略經山林之形。林不作陵。乃始物物引類。上物字不作攬。則通其所。以無爲。通不作同。與王懷祖先生讀書雜志所引。大半相合。其佳可知。莊本固未足憑。譚君仲修許益齋欲刊影宋本爲校勘記。從無見過此本者。故雖節本亦摹播之。取其罕見也。歲在闕逢攝提格小陽月貴池劉世珩跋。

五代史平話跋

新編五代史平話。宋刻本。每半葉十五行。行二十五字。高五寸七分。廣三寸七分。黑口單邊。首行新編某史平話。大字占雙行。次行詩曰。上魚尾下首葉作。次葉某史幾。下魚尾下字數。攷平話始於宋時。夢華錄有講史李慥。楊中立。張十一。

徐明、趙九亨、賈九諸人。小說有王顏喜、蓋中寶、劉名廣諸人。夢梁錄有小說講經史一條。云說話者謂之舌辯。雖有四家數。各有門庭。如煙粉靈怪傳奇公案。有譚淡子、翁三郎、王保義、陳良甫、東兒余二郎等。談論古今。如水之流。講史書者。謂講說通鑑、漢唐歷代書、史文傳興廢攻戰之事。有戴書生、周進士、張小娘子、宋小娘子、邱機山、徐宣教等。又有王六大夫。元係御前供話。諸史俱通。於咸淳年間敷演福華編及中興名將傳。聽者紛紛。蓋講得字真不俗。記問源淵甚廣。黃黎洲記潛生堂書已散之後。所存傳奇平話尚百十種。前人記大典所載平話甚多。今世所傳宋人書止有宣和遺事一種。明人書止有蘆城平話一種。餘皆罕見。此五代史平話宋刊本。

爲曹君揆一所藏。董授經比部刻之。俞理初書。蘆城平話後。言平話體蓋多臆造。此書於實事上十居其七八。書在宣和遺事前。而臆造較少。則固宜存此一體。

宋刻避諱。監本官本最爲慎重。家刻坊刻多不拘。近人專求避諱以辨宋刻。往往貽誤。曹跋所云貞觀作正觀。魏徵作魏證。皆撰書人爲之。非刻工所知也。

藝風堂文漫存卷三

藝風堂文漫存卷四

江陰繆荃孫

癸甲槧

跋
贊

陶淵明集跋

箋注陶淵明集十卷。題廬陵後學李公煥集錄。元刊本。每半葉九行。行十六字。高五寸。寬三寸八分。前有昭明太子序及總論一卷。詩六卷。文二卷。羣輔錄二卷。詩文句下略有箋釋。閒采東坡山谷趙泉山韓子蒼湯東澗張縝胡仔之論附於下。前人以湯注本爲最佳。此本爲最備。而以爲元繙紹興本。然避諱至廊字。又采及劉後村胡漁隱之說。已在南宋之末。似非從紹興本翻雕。至字畫之雋潔。影寫之工整。自是佳書。

又爲歷代藏書家所珍重。故并手跋圖書摹印之。陶集刻本最多。止嘉靖戊申傳印臺刊於江州。從此本出。首有華雲序。後有王庭榦跋。今本模黏字以傳本補之。以孫承祖也。

東坡先生和陶淵明詩跋

東坡先生和陶淵明詩四卷。宋刻本。每半葉十行。行十六字。高六寸八分。寬五寸。白口單邊。魚尾下標和陶幾。上字數。下刻工姓名止標一字。有庚子重刊、乙卯重刊、陰陽文不等。考東坡先生初集、後集、內制、外制、應詔、奏議及此和陶。皆有宋刻。亦謂之七集。至明程始輯逸詩逸文。並和陶編入爲十二卷。謂之續集。合此六種。仍爲七集。而非其舊。此宋本宋印。行款與東坡子由集均同。自是蜀中刻本。首陶次和詩。子

由和者亦載入。編次題目均與明刻不同。校明嘉靖刻李光煥本陶詩爲改正訛字十餘。成化七集本不載陶詩及子由和詩。所以不及一卷。和庚戌歲九月中於西田獲早稻失小引。乙巳歲三月爲建威參軍使經錢溪失題。訛字不止十餘。此本之誤。東方一士一篇。卷二卷三複雜詩十一首。無弟十二首。明嘉靖本云。宋本東坡和陶詩無此篇。與此正合。明本有集歸去來辭詩十首。此無。訛字亦復不少。見下。

卷一

和飲酒詩 欣然誤頌 玉管開天庭開誤聞

和歸園雜居 江鷗漸馴集集誤隻

陶詠荆軻 提劍出燕京提誤從 逶迤過千城千誤子

和怨詩楚調 憂魏自不下空格嘉靖本作眠

卷二

陶讀山海經 化去不復悔梅誤梅 小注一作鳴鵲鵲誤鵲

陶遊斜川 魴鯉躍鱗於將夕鱗誤鮮

陶和郭主簿 清涼華秋節涼誤凍

陶和劉柴桑 未忍言索居未誤米

和劉柴桑 而有造請役役誤後

卷三

陶時運 悠悠清沂第二悠字誤想

和時運 小序丁丑二月十四日丑誤由 木固無脛瓦

豈有足豈有誤固無

和擬古

庭空鳥雀噪鳥誤馬

盧生與若士生誤坐

飛泉瀉萬仞瀉誤寫

遺我吉貝布貝誤具

翁媼國于茲于誤子

陶雜詩

丈夫志四海文誤文

和雜詩

微風動眾竅動誤渡

終老懷未央未誤末

可與君平道可誤何

物色恐相值值誤值

子由和

垂老徒比景比誤此

陶還舊居

誤舊還居

和還舊居

往來赴造物往誤行

陶贈羊長史

無貲患貧賤貲誤貲

陶經錢溪

終懷在歸舟舟誤州

和游城北廢園 玄鶴舞長翻(玄)誤女

和郊行步月作 始覺 陵平 誤生

陶經曲阿 婉變憩通衢變誤轡

陶乞食 主人解子意解作諧意誤音 周餘幾崩壞壞

誤懷

卷四

陶懷古田舍 雖未量歲功未誤末

和懷古田舍 躬農圃之勞勞誤榮

和勸農 乃和淵明淵誤潤 袒跣何媿袒誤祖

和再送張中 相從大塊中塊誤媿

陶荅龐參軍 三復來貺貺誤脫 數而成親舊落舊字

輒依周孔往復之義孔誤禮

陶西田獲稻 交無異患千千誤千

和西田獲稻 何適不閒關不誤下

陶下潤田舍獲稻 脫稻字 寄聲與我諧寄誤奇

和戴主簿 飲酒腹尙冲酒誤水 草去土自隤草誤莫

自誤土

陶桃花源記 問今是何世今誤令

和桃花源記 居民三十餘家三誤一 溪中多枸杞枸

誤拘

和歸去來兮 時爵躍而輒栢栢誤柏 子由和下同

鮑氏集跋

鮑氏集十卷。照宋寫本。原書明正德朱應登刻。毛斧季以宋本校。宋本半葉十行。行十六字。間有十七字十五字者。宋本往往有目空五字。題空四字。前有齊散騎侍郎虞炎奉叔撰序。序後卷一目。目後接本文。斧季鉤勒行款。筆畫不拘正俗。無不改定宋本面目。一望即見。序上有識語云。宋本每幅廿行。每行十六字。小字不等。卷一舞鶴賦巾拂兩停九劍雙止上識語云。欽宗諱桓。故宋本書九字諱去一點。犯嫌名也。然字形狹長仍作丸形。而去一點。與九字不同。宋諱殷則百貞樹恒。筐謔皆爲字不成。愍世則襲唐諱也。宋本卷九缺末葉。按隋志梁六卷。隋十卷。似後人增益。已非虞奉叔所序之本。惟開卷署鮑氏集。不曰鮑參軍集。詩賦亦間有自序自注。與他集

從類書采輯者不同。可稱善本。每卷有虞山毛扆手校朱文長印。西河季子之印。朱文小方印。席玉炤讀書記白文長印。愛日精廬張氏藏書記朱文方印。已見張氏藏書志。書後有丙辰七夕後三日僧吳趨友人宋本比較一過展一行。

李翰林集跋

代

李翰林集三十卷。唐李白撰。宋刻本。每葉二十行。行二十字。高五寸七分。廣四寸四分。白口單邊。每卷目錄連屬正文。後附新唐書本傳。又有紹熙元年七月開封趙汝愚題云。右李太白題司空山瀑布詩。得之東里周子中。附于卷末。又咸亨己巳三月天台戴覺民希尹跋云。是集多趙同舍崇鑑養大所校正。又有江萬里序。係手書上板。晏知止本歌吟。在六七

兩卷此則在第十七卷。餘亦前後參差。丁陸兩家書目均有此本。而江序均佚去。亦可貴也。近時李翰林集止重繆刻蜀本。此則當塗本。予重摹之以增皖南故事云。

杜陵詩史跋

王狀元集百家注編年杜陵詩史三十二卷。唐杜甫著。宋魯書編年并注。王十朋集注。宋刻本。每半葉十三行。行二十四字。高六寸二分。廣四寸一分。白口單邊。口上有字數。魚尾下作杜詩。亦作寺一。杜詩又作六十家杜詩。一種種不同。首行作王狀元集百家注編年杜陵詩史一卷。次行前劍南節度參謀宣議郎檢校尚書工部員外郎賜緋魚袋杜甫子美撰。三行嘉興魯書編年並注。四行永嘉王十朋龜齡集注。與天

祿琳瑯所載黃氏補千家注杜工部詩史截然兩書。彼則黃希黃鶴補注。此則魯訥王十朋注。彼三十六卷。此則三十二卷也。其於詩之有關時事者。皆於題上注明。故謂之詩史。所引前人注。皆各標名而作白文以別之。千家注百家注口上又云六十家注。皆坊本故態。書有眞實朱文胡盧印。華夏白文方印。文石太史所藏圖書朱文長方印。季振宜藏書印朱文小長方印。緯蕭草堂藏書記朱文長印。商邱宋犖考藏善本朱文長方印。按李氏書目。王龜齡注杜詩三十二卷卽此書。無錫華氏。華亭朱氏。商邱宋氏。崑山徐氏遞藏也。

柳柳州外集跋

柳柳州外集一卷。唐柳宗元撰。宋刻本。每半葉九行。行十八

字。高六寸。寬五寸。白口單邊。兩魚尾。上魚尾下標外集二字。下魚尾下先葉數。次字數。大字居中。下刻工人名一字。按唐宋志載柳集並三十卷。晁氏讀書志亦三十卷。外集一卷。趙希弁附志作四十五卷。外集二卷。陳氏書錄解題所載凡三種。並四十五卷。外集二卷。分卷不同。要以三十卷者爲最古。陳氏解題謂劉禹錫作序。言編次其文爲三十二通。退之志若祭文附第一通之末。今世行皆四十五卷。又不附志文。非當時本也。是宋時所刊柳集已非劉氏之舊。四庫題要謂。或後人追改劉序以合見行之卷。按劉集載柳文序。實作三十二通。則四十五。確爲後人追改無疑。各本柳集所載劉序皆作四十五通今獲此宋槧外集一卷。詩文凡四十三首。各本已闕入正集。

者三十二。入外集才八首。又溢出送元暲師詩、上宰相啟、上
裴桂州狀三首。則諸本正外集皆不載。卷末有乾道改元吳
興葉程刊書跋。蓋程官永州刻之郡庠者。是刻爲曹棟亭氏
舊藏。檢千山曹氏藏書目。此種注云三十二卷。乃合此外集
暨附錄計之。益足證永州本正集爲三十卷無疑。以是外集
例之。其正集必有大異于諸本者。惜哉不得見矣。

鉅鹿東觀集跋

代

鉅鹿東觀集十卷。宋魏野撰。宋刻本。每半葉十行。行二十字。
高六寸。廣四寸五分。白口單邊。魚尾上記字數。下刻工姓名。
中縫鉅鹿東觀集卷第幾。在上魚尾下。字數在下魚尾上。野
本隱士。歿贈祕書著作郎。其子閑編其集。援漢書班固引著

作局爲東觀故事。故名曰鉅鹿東觀集。有薛田序。此本闕四五六三卷。系鈔補本。爲朱子僭曹潔躬物。後歸陸其清。顧抱冲家。今歸於余。爲溯其源流如此。黃蕘圃止藏影寫本。今新陽趙氏峭帆樓刻本。據十萬卷樓星鳳堂寫本付刊。均與此書一作本合。而卷七八九十四卷分卷不同。訛字一葉內不下十餘處之多。卷五送閨師之長安謝紫衣一首有題無詩。而劉^姓大著忽惠雅章喜懼輒增二詠。聊以贈酬送薛階迎觀察院。又次前韻兼乞崔三首。則此鈔所無也。提要云。據天聖元年薛田所作集序。野先有草堂集行在人間。宋史亦稱野草堂集十卷。則十卷者。野舊本也。序又稱其子閑以新舊詩三百篇混而編之。集爲七卷。因取贈典命之曰鉅鹿東觀。

集。則東觀集者。閑所重編七卷之本也。此本凡詩三百五十
九首。題曰東觀集。而乃作十卷。未喻其故。豈序文誤十爲七
歟。今此本辭序則云。余與交三十年。天禧己未化去。令息閑
綽有父風。出君所著新舊詩四百篇。除零落外。以其國風教
化諷刺歌頌比興緣情者混而編之。共成十卷。因取贈典命
之曰鉅鹿東觀集。是明明新舊合編。連草堂集在內。則與提
要大相牴牾。不見此本。不覩東觀集之真面目矣。宋藝文志
及書錄解題均云草堂集二卷。鉅鹿東觀集十卷。一舊稿。一
後訂。而並無草堂集十卷之說。宋史傳不足據讀知聖道齋跋尾云。
收得七卷本。似從此刻本鈔出。而以所闕之四五六卷爲補
遺。仍是十卷。核據詳洽。至金兆芝跋趙刻云。及見宋大字草

堂集十卷本。則強不知以爲知。不值一哂矣。歲在旃蒙單閼
貴池劉世珩跋。

王臨川集跋

臨川王先生文集一百卷。宋刻本。每半葉十二行。行二十字。
高六寸六分。廣五寸五分。白口單邊。間有黑綫口。卽補板。前
有紹興辛未王珪謹題。書中桓字作淵聖御名。構字作御名。
慎敦廓不闕筆。雖有後來修板。而原書尙是紹興舊刻可知。
臨川集政和中開局編書。而門下侍郎薛昂肇明實主其事。
與明繙曆大有本皆出於紹興時。卷第皆同。略有出入。日本
內府殘本十行十七字。亦刻於紹興。據島田彥忱止見七十
卷。而得佚文四十七篇。又不知何本也。島田跋云。昔明華中

父眞賞齋有宋百六十卷王臨川集見豐人翁眞賞齋賦。而何義門旣言其不可見。則其爲希觀之笈又可知也。而說者謂荆公之集。以紹興辛未其曾孫王珪所傳刻者爲最完。其作百六十卷者。徒分析其卷帙耳。荃孫藏有明繡簷大有本。沈乙厂新購明繡元吳澄序之小字本。又有萬曆刊本。合校之。必有可觀。再附以日內府宋本之佚文。與陸存齋之所輯此集。庶無遺憾矣。

魏鶴山大全集跋

魏鶴山大全集一百九卷。宋魏了翁撰。宋刻本。每半葉十一行。行二十一字。高七寸三分。廣五寸五分。白口單邊。首行重校。鶴山先生大全文集卷幾。或云卷之幾。或止數目。無卷之

字。板口詩、牋表、奏議、狀劄、督府奏陳等各類。作詩幾牋奏幾。補刻作大全集幾。葉數每卷自爲起訖。只周禮折衷一百四十五兩卷通計。缺十八十九、廿五、廿六、廿七、廿八、四十三、四十四、四十五、四十六、五十、五十一、五十二、五十三、七十五、七十六、七十七、一百零七、一百零八、共十九卷。爲海內孤本。黃蕘圃所藏錢辛楣所跋卽此本也。有^淳祐己酉吳淵序。吳潛後序。開慶改元游侶序。明嘉靖三年無錫安國活字印本。次行署錫山安國重刊一後。行後有安國跋。知無錫縣暢華後序。又有嘉靖三十年邛州高翀本。卷一有邛州知州吳鳳郡後學王葵校正。學正李一陽訓導周南編次四行。四庫據高本著錄。而外間所流傳者止有安國本。安國本卽出於此本。如

卷一缺首葉游古白鶴山和薛祕書紱聞鴉韻和虞永興剛
簡滄江鶴再誕雛三題。安本卽從二葉雅州胥園起。所脫十
九卷并目亦不存。後印入全書。想又從他本補足。此書二十
八二十九并卷七十二卷魏府君純甫墓志銘不完。九十卷
策問十二葉。系一百二卷之脫葉。原本亦有空格。有印本模
黏字爲後人誤改宋本。卽從其誤。是安本出於此本之的證。
至一百零八卷止六題。今書安忠定行狀後跋。李夢庚韶卿
上梁綸漕使書。在安本六十五。何友諒墓志銘在八十七。只
張令君煥道夫墓銘一文。己未唱第後謝恩詩。己未擬進聞
喜宴賜進士詩二詩而已。宵作霄儻作黨。遷作迂。餘作余。萬
作万。維作惟。同治甲戌吳勤惠公督蜀。出傳鈔安本命刊。因

訛誤太多。止錄其清朗者。刊文鈔四十卷。嗣聞宋本歸吾友孫問青。欲校未得。今由劉君翰怡借到。與王息塵兄對校。而志其緣起。癸丑五月十一日。

鶴山集舊有姑蘇溫溪兩刻。皆百卷。此本搜輯逸篇。並周禮折衷師友雅言。併刻之。故有大全集之名。渠陽集得之教授張鞏。周禮折衷得之提幹何璟。校此刻者清幕朱景行。漢嘉楊起寅及璟三人。見後跋。

黃文獻公文集跋

黃文獻文集四十三卷。元黃潛撰。潛字晉卿。婺州義烏人。延祐二年進士。授寧海丞。入爲應奉翰林文字。出爲浙江儒學提舉。致仕。後起爲侍講學士。修國史。久之南還。凡七年而卒。

年八十一。謚曰文獻。今考公集二十三卷。刻於先生歿後五年。此則刊於三山學宮。實成於先生未歿之前二年。前有至正十五年宣城貢師泰序。云先生文集總四十三卷。其初橐三卷。則未第時作。危素所編。續橐四十卷。則皆登第後作。門人王生宋生所編次也。今年已七十有九。康強善飲啖。援筆馳騁如壯歲。云云。首行題曰金華黃先生文集第幾。下題初橐。幾續橐幾。次行題臨川危素編。鄱陽劉耳校正。間有題門人編次者。次行有題日損齋續橐者。卷一至卷三爲初橐。卷四至卷十三爲續橐。每葉二十四行。每行二十四字。版心有字數。語涉元帝皆提行。元刊元印本。初橐一二詩。三賦。騷。答。問。雜著。贊碑。記序。題跋。書。祭文。傳。行述。續橐一至三詩。四詔。

制表牋箴銘贊。五碑文記。六至十二記。十三至十五序。十六序說。啟公文。十七策題勸農文。上梁文。十八十九題跋。二十視文詞疏祭文行狀。二十一至二十四神道碑。二十六二十七墓碑。二十八至三十六墓志銘。三十七墓碣墓記。三十八三十九塔銘道行碑。四十世譜傳。初稟續稟總爲四十三卷。而先生歿後五年。家藏日損。齋橐二十三卷。縣大夫胡君惟信恐其湮沒。亟取鋟梓以傳。宋景濂序之。正統戊午補完板片印行。杜桓序於後。胡公刻板未睹此足本。他書目亦罕及。元本藏酇宋樓。始表出之。今已歸東瀛。錢塘丁氏景鈔副本。在江南圖書館。段以鈔錄。荃孫先得明嘉靖十卷本。又得張英川鈔藏二十三卷本。已稱難得。今宗子岱觀察出新得殘

本二十卷。元版元印。相校一過。補字不少。十九卷覺隱文集序補至四行。可見陸本尙不如此本。惜其未全耳。愛日精廬僅得二十三卷。今歸鐵琴銅劍樓。則卷一至十三、二十二至三十一。止存二十三卷。合之尙缺二十一卷。三十二至四十三共一十三卷。

伯生詩續編跋

伯生詩續編三卷。首行題伯生詩續編。其每卷端又題伯生詩後卷幾。至元後庚辰劉氏日新堂刻本。建安坊本也。每半葉十行。行二十五字。高五寸二分。寬三寸四分。黑口單邊。行書超逸。板心詩幾。詩或作寺。元人常態。上卷爲四五七言古詩二十五首。中卷爲七言八句四十五首。下卷七言絕句五

十三首。五言八句十三首。五言絕句十三首。共一百四十七首。大半學古錄類稿所載。後增葉氏四愛堂詩卷。與邵亭所見同。

是集乃學士晚年所作比

常作尤爲得意敬刻梓

與騷壇共之。皆至元後

庚辰劉氏日新堂謹識

牌子在
目錄後

東維子集跋

東維子集三十一卷。元楊維禎撰。明洪武刻本。每半葉十二行。行二十四字。高六寸七分。寬四寸五分。黑口雙邊。兩魚尾。按元鐵崖著作有鐵崖文集五卷。元刊本。鐵崖漫稿五卷。明

洪武十四年謝九疇序本。至東維子集各家書目著錄皆鈔本。惟愛日精廬藏書志有刻本。無序跋。又有鈔本。跋不全而無年月。荃孫藏舊鈔本。跋與愛日志同。末有萬曆十七年乙丑既望一行。又華亭孫承序云。洪武初元石湖吳君欲廣其傳。問序於予。云亦無年月。此書刻工紙墨的是明初。不得至萬曆也。疑此書與愛日本同出洪武吳刻。鈔本出於萬曆。所以行款不同歟。荃孫於甲寅元旦以刻本校鈔本。至元夜而畢。文二十八卷。詩二卷。附錄一卷。記之外。又有志與記無以辨。文中有頌元者。有頌明者。有頌淮張者。亦無以辨。春水船記兩收。一在卷十六。一在卷十七。小桃源記。一爲顧仲瑛作。一爲陳衡父作。起段不同。餘則全同。則編次者之疏也。句

奇者注句字。字奇者注音釋。韻奇者注叶字。與他書不同。脫文訛字。觸目皆是。甚至不可句讀。毛隱集上人序缺末一行。用坊本之最劣者。東維子集罕見刻本。今得刻本如此。令人氣短。至坊鈔本訛脫更甚。然亦有改正者。非出一本可知。脫去三葉。據刻本補足。謄脫字句改正。稍稍可觀矣。

坡門酬唱集跋

坡門酬唱二十三卷。宋邵浩編。宋刊本。每半葉九行。行十六字。高六寸六分。廣四寸七分。白口單邊。上有字數。下有人名。左有小耳。注坡公子由等名。紙之堅緻。墨之朗潤。字畫之清挺。爲宋本甲觀。按浩字叔義。金華人。隆興癸未得第。時蘇學最盛。因取兩蘇公兄唱弟和。及門下六君子平日屬和兩公。

之詩。聽而錄之。前十六卷爲坡詩。而子由及諸人和之詩者。次子山詩四卷。次黃山谷、秦少游、晁无咎、張文潛、陳無已等三卷。亦錄坡公及諸人和作。惟李方叔闕焉。想搜訪不及也。其不在八人之數而別有繼和者。亦皆附入。爲雙行小字以別之。前有浩自序。署紹熙庚戌四月一日。張叔椿序署紹熙元年五月二十四日。四庫所收江蘇巡撫采進舊鈔本。訛紹熙爲紹興。致館臣費一百六十餘言。攷爲紹熙。孰知宋本固不誤也。後有濮陽李廷相雙檜堂書畫私印。朱文大長方印。李文敏公故物。有李蒲汀家藏書目二卷。楹書隅錄元刊王狀元集注東坡詩書後李印。與此同文。他書所見止押濮陽李廷相書畫記。濮陽李氏書畫之印耳。

錢衍石定廬集跋

同治庚午。荃孫在成都與嘉興錢圖山年丈同事官書局。年丈爲衍石給練之次子。聞見該洽。語言雋永。因荃孫麤知向學。悉心教導。獲益不淺。始得見衍石記事彙及刻楮集。荃孫喜讀記事彙。手鈔數十篇。而詩之佳。則未之知也。一日讀崇百藥齋集。又見之。因語荃孫曰。祁生大令與給諫公庚申同年也。前侍行赴粵東。道貴溪留五日。給諫公喜讀陸之文。陸亦喜讀公之詩。均自以爲不及云。因再讀刻楮集。漸知其勝處。泊入都卽購得記事彙及刻楮集。旅逸小彙藏之久矣。光緒甲辰在金陵。錢氏後人持遺彙出售。得其三國及晉會要殘彙。韞甌集各種。而獨無詩。去冬橘農廉訪持定廬集四冊。

囑爲付梓。荃孫因得反復讀之。取境獨高。造意極深。而出之以清新。諧之以音節。絕無巉削深刻之狀。而自遠於流俗。他人之詩。初讀以爲新奇。再閱便覺其淺薄。定廬之詩。愈玩愈妙。能使人默會於字句之外。張詩舲偶憶編云。衍石之詩。不作習見語。意主澹遠。洵知言哉。歲在閏逢攝提格江陰繆荃孫識。

明文文肅公手札跋

有明文文肅公志行剛毅。學問淵雅。不埒羣小。推爲東林職志。其書法亦自成一家。此爲孝廉時。與同年劉練江父子書十六通。具見交誼殷拳。存歿一致。有古風焉。練江名永澄。字靜之。寶應人。萬曆辛丑進士。官國子監學正。乞歸省親。起兵

部職方司主事。未上卒。明史有傳。練江早達早歿。不與閭禍。東林列傳點將錄無其名。止東林尙論錄載其詩文。其集則鼓山諸公哀輯刻之。其人已可概見。文肅手書論時事論學術論立品深合切磋之旨。以清介二字相助。至云清而不隘。勁而不偏。卽清介二字之注腳。又言澹利澹官澹名。而澹名最難。又言竺鵠山水之勝。令人神往。此老胸中浩浩落落。無一毫滯相。提要動以門戶譏東林。何可一概而論。練江集八卷。載答文肅三書。內云清介二字。今人之究竟。實古人之發軔。又云春光百媚。天池虎邱之間。樂境正自無窮。莫放著進士二字與眉額作苦。一則推文肅之作用。一則箴文肅之胸懷。可謂同志之士矣。三復斯卷。令人景仰。歲在閏逢攝提格。

江陰後學繆荃孫跋。

翁覃谿分撰提要彙本跋

乾隆三十七年奉 旨搜采海內遺書。以充內府。並采及永樂大典。編纂成書。派軍機大臣爲總裁。派詞臣爲提調。總纂分纂校閱等官。凡內府儲藏之書。臣民經進之書。大典輯出之書。分類校勘。各撰提要。候總裁鑒定。書有收有不收。跋有改有不改。諸人私槩亦有載有不載焉。大興翁覃谿閣學。於四十四年入館爲纂修。閱時久遠。幾及十載。所撰草槁。流傳粵東。今歸劉君翰怡。共計簿目都一千餘種。每條皆有提要。於一書之中。復羅列卷數及卷中子目。與夫何時刻本。收藏印記。前人題跋。并甄錄無遺。閣學墨蹟。世所珍重。今翰怡獲

此鉅編。其實愛爲何如。邵二雲。余秋室在文集。姚惜抱。只編書錄。有收有不收。有全改。有略收。幾無有一篇不改者。閣學此橐亦然。不必疑也。昔年曾得閣學詩文手橐一百二十冊。詩未刻者鈔編二十四卷。猶存篋中。文未刻者錄目。而未能鈔出。遂爲人賺去。至今思之。不無悵悵。其書猶在京師。翰怡或能謀作延津之合。更爲盛事矣。

書楊和甫遺墨後

嗚呼。此余亡友楊君和甫遺墨也。同治年間同客成都。君居玉沙街。余居玉龍街。相距二三里。與友人章碩卿、吳幼農時相過從。辨板本。談考據。無十日不聚。聚則談竟日。余與碩卿嗜飲。飲則談愈旺。丙子余通籍。丁丑君與幼農同捷。碩卿官

湖北來引見。又相聚於都門。戊寅旋成都。君治毛詩。刻訓纂堂叢書。每與商榷。冬閒。余入都供職。遂相闊疏。君不樂居水部。改知縣。選陝西山陽。調長安。卓有政聲。宣統辛亥。君令渭南。變起殉難。嗚呼盜起一隅。多方響應。如狂飆之亂卷。如野燎之四起。甫及四月。遂移國祚。稽諸史冊。亡國未有如此之易者。而當時握兵守土諸大員。有望風而匿者。有開門而揖者。至與城存亡。誓死不去。如君之抗節致命。海內曾有幾人。蓋自戊戌變政。新黨首倡破壞三綱。十餘年來。邪說漸漬人心。忠臣義士之氣。因此少衰。迴憶髮捻之亂。闔門就義。視死如歸。每邑至千百人。何前後之不侔耶。得君一死。而吾黨之氣節爲之一振。卽此篆書數種。猶想見揮毫落紙。正氣凜然。

時也。今碩卿早歿於湖北。幼農近亦歿於江西。荃孫偷生海上。有餘媿焉。不特重君大節。而交游之淪替。亦不覺涕泗之橫流也。歲在閏逢攝提格。江陰繆荃孫識。

自題象贊

少年遭難離鄉曲。中年服官糜廩祿。老年革命逃海角。裝無陸賈之金。懷抱卞和之玉。天祿讀未見之書。明夷無待訪之錄。歎世事兮茫茫。逐風塵兮碌碌。是耶。非耶。有覲面目。

藝風堂文漫存卷四

乙丁豪

藝風堂文漫存卷一

江陰繆荃孫

乙丁藥

詩

逸社弟一集呈止相

風塵滿目歎時艱
小集平泉啟笑顏
舊友相逢均白首
天涯何處買青山
地當女兒柴桑外
詩在敦交大雅閒
寄語京華冠蓋客
可能蹤迹比鷗閒

逸社弟二集花朝分韵得白字

海東一隅地措大多於
鯽金沙定遠翁
長筵招揖客是日正
花朝春風吹廣陌
籬落閒花枝裁紅
兼暈碧對酒忽長嘯
四顧天地窄歲時不
我與疾若駒過隙垂
釣希桐江行吟同楚

澤聊寄田園興，羸存山野迹。金石闕長箋，宮商敲短拍。紅友
勸銜杯，滄洲時岸幘。走也蝨其閒，徜徉聊自適。戚戚亦何爲，
幽懷光其白。

逸社弟三集題舊藏恆楊合作髮持老人巾箱圖

暫離閩海住，秦淮如畫山。光淨似拈攜，得梅妻兼鶴子風流。

領袖

圖中引首陸聽松署此四字

玉琴齋髮持集名

紅綴籬花碧井梧，定山詩句漫描摹。西亭肖象南田畫名跡。

流傳三絕圖

定山詩西亭肖象南田布景時人推爲三絕

江南愁殺庾蘭成，鉛槧巾箱打棹輕。同作遺民君較勝，漸從

離亂入升平。

旗亭畫舫總魂消，莫問東風舊板橋。我欲續修金粉史，瓣香

前輩未云遙

全孫近撰秦淮廣紀十二卷紀數自明洪武至宣統兩朝事

淞社廿三集愚園卽事

海濱熱惱場而少清涼境幽人工結構虛堂攝萬影牆頭柳
一桁闌外竹千挺危樓倚松杉曲水浮藻荇勝地劇蕭閒佳
客多酩酊寰海擾風塵一隅自清靜身無俗事囿悟從澄觀
領我亦隨眾緣故事憶香茗

題花宜館輯詩圖

錢塘山水天下奇清才自古鍾於茲花宜主人紹祖德拾遺
補缺收新詩公昔持節西南陲豐功偉烈書之碑賡續搜詩
年尙壯模山範水抽清思羅浮山館飛蝶繭閒雲小住之江
湄南屏八社壇坫重西冷十子名譽馳以詩存人金作礪以

人存詩石引磁會稽掇英留舊式甬上耆舊貽良規清尊雅
集曾徵題前輩流傳絕妙辭高山嚮往辦香奉風流儒雅誠
吾師我昔曾輯毘陵詞其中甘苦能具知大家百篇殊不盡
逸士一語猶難追往往冥搜無所遇忽於意外幸得之蠹牋
蟬紙字難辨摩崖又欲煩甌椎此圖兩次落胠篋招亡建鼓
臨莊遶球還合浦原非易百年世澤歸孫枝吟朋零落又易
代理宜再續誰云癡 聖清文學二百載君家一手常護持
讀罷此圖三歎息猶是開天全盛時

新秋

天高木落又新秋乞巧先登七夕樓水國冷紅添蓼岸煙汀
飛白認蘆洲稻粱已飽隨陽雁窗戶先驚喘月牛差喜寒威

猶未到蟲聲四壁助人愁

靈鵲

靈鵲無端渡女牛可憐怨耦遂成仇玉簫佳話祈天許錦瑟
華年歎水流懺悔自宜憑佛力癡孽猶幸隔神洲阿瞞心事
誰能達試與臨邛道士謀

擬李流芳白門七夕五律

世事多張角佳期渡女牛秋心生令節旅思尙扁舟客路幾
時盡涼宵無限愁鍾山如舊識積翠上簾鉤

小石尙書拈兩當軒異鄉偏聚故人多一語作轆轤體五篇
謹和

異鄉偏聚故人多海角偷生五載過握手舊游驚歲月傷心

避地改巖阿聊從詩卷尋
麟閣莫學癡兒夢蟻窠
雀鼠難蟲都不管藥鑪經
卷伴維摩

蓮戶誰云雀可羅異鄉偏
聚故人多穿林逸響蘇門
嘯擊筑餘音易水歌豈是
求名邀月旦非關賡雅奏
雲和無榮無辱自消遣何
事傍觀苦詆訶

百年事業總蹉跎造物其如
頑鈍何老境漸傷來日少
異鄉偏聚故人多偶逢令
節尋歡伯

七夕

聊借吟朋遣睡魔

歸田

予年五十
卽去官

無所恨平生心事注煙簑

風雨飄搖一剎那牀牀屋漏
亂痕拖拽搜尋盡篋心先碎
檢點書囊髮更皤同輩時呼
將伯助異鄉偏聚故人多莫
嗟茅屋先傷損蒿目蒼生歎
札瘥

眼前不改舊山河往事淒涼付逝波
軸覆樞翻騰鐵騎天荒地老泣銅駝
還家深恐難全璧閱世渾疑欲爛柯
龍漢劫中餘一樂異鄉偏聚故人多

蘋花

路轉橫塘蹙翠漪紅紅白白半斜欹
微霽雨後清如沐小朵風前瘦不支
蠡浦漁莊隨意畫斜陽新月等閒詩
白蘋洲上秋深淺只有吳興柳惲知

初冬

干戈滿地不知愁轉瞬初冬接晚秋
螃蟹菊花三徑酒蛤蜊菰菜五湖舟
不高厓岸仍容與聊任天機少怨尤
伏處海隅餘歲月梧溪北郭紹前修

寄陳伯年

城東新訪太邱廬，廣廈連雲壓碧渠。劫火江山題詠少，暮年

朋舊往還疏。但從護世求精膳，罕見航頭出異書。

招致淮水濱小飲庖

人極良其地卽大航頭

我亦有家歸未得，頻年海角混樵漁。

五鳳塢歌

五鳳紀年古有三，漢宣皇帝侯官侯。實氏草竊不足據，樂壽羣鳥空啁啾。此塢篆勢古且樸，制度遺自長安劉。病已受命有天意，蟲螯樹葉如雕鏤。是時改元已及五，符瑞沓至迎天庥。鵲雀來從丞相府，微信奇怪張敞糾。君臣竟口喜諛悅，曷不政事明堂修。泮池刻石德裔頌，林華鐙識歐陽收。與此同歲得三品，吉金樂石真琳瑯。五年塢煩伯元訂，三年塢羨剛

主搜漢家紀歲四寒暑古物日出誰與儔文房雅玩等球壁
不至輕棄瓦礫投墨香馥郁騰十丈助爾添修五鳳樓

成語

重建千墩顧亭林祠

少年避禍去鄉關魂魄應隨旅櫬還著作今爲昭代冠祠堂
仍在水雲閒關心農牧生涯足隱恨君親涕淚潛伍廟鴻山
三鼎峙清風千古振塵寰

詠西湖靈峰四景

天上一月水底一月掬水月在清鑑毛髮煮之瀹茗沁香解
渴中夜靜聽泠泠汨汨

掬月泉

七十二級其高刺天鶴兮鶴兮與我周旋天風浩浩有亭翼
然黃冠羽衣結夢中緣

來鶴亭

益益春陽濛濛香霧徑轉峰回梅花萬樹疏影暗香驪然道
故山靈有知吾行吾素

補梅盒

清磬一聲飄落雲端閉門誦經空山夜寒貝葉西來天花滿
壇媵之宋刻唐梵叢殘

皮經室

銷寒第四集觀適園主人所藏經進東坡文集事略

坡公詩集何人注道是嘉泰施與顧商邱鐫刻留典型青門
臆補偏遺誤文集前後皆琳琅作箋者誰鹽官郎誰從書林
得殘本有滄葦季愛日張我友田君曾奉使身歷扶桑訪圖
史季張得半君得全六十卷書完首尾三年海外辦事難獨
餘此事快莫比攜歸中國歡士林不惜剗劖千黃金一朝劫
火起江鄂有如玉碎明珠沈適園主人抱特識秘笈偏從意

外得字畫清挺避諱嚴天水槧印真古墨晦之主簿官迪功
辦香橫浦遵宗風清波別志存事迹精研經學稱宏通典核
簡要有法則任淵李壁將毋同奏議舊注今三刻郎注宣公奏議揚局
十萬卷樓此書應亦存形式但願搜求缺復完豐城劍合
進齋三刻之袁氏書燬翁氏書真孤本增顏色詩注孤本先歸翁氏書真孤本事略今又來潯中插
天萬仞兩秦華不數陶齋七集常稱雄

題朱古微校詞圖

汲古毛偕石研秦半塘搜輯更翻新誰知茗水蘊村老別出
心裁傲古人

元鈔宋刻古今殊一字搜求比一珠校史讐經功力等詞家
亦有戴錢盧

校籤屢下度丹黃同志仍須往復商五夜一鐙頻改削不知
斜月上西牆

壽陳雨生八十

先生真是地行仙高躅能追龔半千建業山川諳掌故全椒

詩筆荷心傳

六朝人多以詩筆對舉

未聘簪紱猶名世罕服參苓享大

年僧孺不來嚴武死才人白髮有誰憐

揆天才筆最縱橫七子詩壇舊有聲大可年高誇特健古愚

目眚又重明棣華競爽推同氣葛帔無憂慰友生

伯虞同年歿後時恤

其遺

一語頌君應快意著書盈尺早刊行

昔日逢君角逐場幽蘭先已識孤芳酒龍詩虎偕秦顧玉友
金昆其蒯張舊雨半成生死別殘年只駭暑璘忙吟朋觴詠

歸來晚猶憶紅橋舊草堂

我亦平生類斷蓬
亂離奔走總相同
傷心老病風塵裏
轉瞬滄桑涕淚中
逆數變端三轉轂
怕談舊事兩衰翁
舉杯遙祝期頤壽
但願年年酒不空

題翰怡朱刻兩漢書

鸞洲書院一經堂兩美聯翩降上方
天錫卯金存古福青藜

吹火照琳瑯

前漢白鸞洲書院本後漢一經堂本其行款同也

蕭該音義附三劉殘帙曾經一再求
今日拜經應遜我全書

首尾快其搜

蕭該音義附入三劉校語內瞿木夫止得殘本兩卷補拜經輯本十餘條

篤壽流傳到藝芸
天留樂土保斯文
西江別有之同本
自是

湘南策異勳

粵逆之亂幸歸郭芸仙中丞始逃劫火李木齋劉之同本亦得于袁漱六家均湘人保護之功

是時書歸于袁書畫歸于黃荷汀皆湘人
也不但武功彪炳卽文學亦賴保存矣

唐經字派尙端方寶墨生稜黑漆光南渡好刊開國本絳雲

何事太誇張

此兩本皆嘉定時翻鑄化本据海源閣跋錢虞山所藏兩漢書亦南宋翻雕如諸經單疏莊子

昔人推爲北宋無不南渡重刻不害其爲佳也

茶仙惡本漫譏評儀顧書中考核精一事未能相洗刷誤將

司馬當宣城

何義門誤爲惡本儀顧竭力揚之本書實佳惟以司馬志署范曄則不能掩其失

三月三日同人修禊愚罔用杜集麗人行韵是日交清明節

江南三月花市新暈紅裁碧招游人如社慎交會率眞舊雨

今雨酬接勻修禊巧值清明春北苧南陸集鳳麟張儀之舌

君卿脣談天炙轂七尺身名流多與筆研親鉤心角力齊楚

秦手擘紅脯批翠鱗杯盤籌畫皆經綸名園雨後無纖塵婦

隸孫篆推國珍茶香清供陸羽神恍逢梅子齒頰津宴罷散
步檐數巡芳草織罽花成茵得句媿無柳惺蘋中酒思漉淵
明巾不能高唱偕伶倫且自陶然消喜嗔

贈洪鷺汀仍用杜集麗人行韵

石泉櫬火新復新洪厓拍肩風風人文采炳若情性眞名園
花木雨露勻江南天氣又暮春詩名標閣同麒麟鼓宮叶徵
新調辱黃堂曾現宰官身我本同里情倍親忽然睽隔越與
秦

荃久厲城都人
華陽籍後改歸

自慙跋浪猶常鱗摩訶池上空垂綸茫茫

海內多風塵何人識我席上珍我將稽首蠶叢神兵戈早息
臺頤津送君歸蜀方再巡蜀山如屏草如茵春江淼淼吹白
蘋芒鞋竹杖華陽巾跌宕不亞劉伯倫一切消盡貪癡嗔

書敬業堂詩集後

少年鞍馬賦從軍黔楚閒關息戰氛萬里江山供點筆一家
兄弟慨離羣傷心烏盡弓先棄太息岡炎玉亦焚爲寫萊陽
嬌女怨累他考訂日紛紛

華燭清尊夜宴闌新聲爭重董庭蘭世多惹苴同珠謗身似
芭蕉耐竹彈范蠡變名因避世禰衡膺薦遂彈冠天才庾鮑

新詩卷本與王

涵洋

朱竹垞

一例看

釣徒只合住煙波簪筆西清振玉珂從獵帝誇風度好廣
詩人說雅音多馮狐假虎殊難測打鳴驚鷺可奈何急退中
流了無迹江湖還我舊漁蓑

買春消夏笑言溫里巷扶鳩齒德尊忽地文星耀貫索可憐

卦象北游魂餘年住劫逢家難免罪生還亦 國恩一樣鐘

聲前後聽孤臣回首淚潸潸

夏五出京熱風黃塵無計可避漁洋有五月江深草閣寒鏡
湖五月涼五月賣松風人閒本無價三題各賦兩詩聊以釋
悶

賦得五月江深草閣寒

柳陰如幄草如茵蜷曲團焦江水濱不是榴花紅照眼令人
猶認過殘春

荻瘦蘆肥綠瀾漫漁蓑雨溼不曾乾紅塵道上人如織誰省
江南特地寒

賦得鏡湖五月涼

滿眼嵇山翡翠堆山陰道上漫徘徊鏡湖湖水明如鏡未許
城中熱客來

賀監歸來隱鏡湖閑身不識汗如珠可能月給千壺酒秩比
蓮花博士無

賦得五月賣松風人閒本無價

孟婆許我行方便亦恐仙家議價難只索東坡萬錢直書生
眼孔太寒酸

松風四面閣三層真逸丹成白日昇縱有黃金高北斗可能
注籍卽飛騰

答樊山用原韵

重到京華又一年春人已過海棠顛徜徉歲月憑吾輩彈壓

山川仗世賢夜月唳鵑悲故國

國蜀中大亂樊山原籍秋風

鳴鹿憶賓筵盛衰轉轂頻頻見證果仍歸非想天

相依蹤迹徧南東回首前塵涕淚中角逐名場虞叟白飄零

花圃泣殘紅

荃孫到京花事已過約詩鐘亦未赴

世閒文士均圖霸往日交游

盡作翁貞下起元符隱願幾時陽氣滿黃宮

棄失餘生氣力微登臨敢望謝元暉時危但覺謀生拙老去

方知託業非秋蟀春鷗容易度酒龍詩虎惜分飛白頭二老

同飄泊咫尺家山不得歸

樊增祥

丁卯於今五十年同年當世幾華顛玉堂故事尊前輩滄

海橫流仗後賢老健再臨龍尾道徘徊重赴鹿鳴筵

更五年君

重逢鄉
舉矣

雨翁心迹如漚鳥臨水觀魚且信天

琴鳥三年歇浦東亂離中又別離中江南玉樹歌猶豔
北金仙淚尙紅黨旤劇於河北賊詩名虛負渭南翁邇來
春旱傷禾黍更不如前過故宮

星象江東動少微金臺下馬駐斜暉橋鵲所至無南北遼
鶴何心忮是非商嶺紫芝待唐秉小山叢桂隱蘇飛白頭
未了青鐙事又帶前朝史稿歸

賦得暮齒仍求食

烽火倉皇日江湖老病身人推垂暮齒天靳賦閒人恐蹈溝
中瘠難期席上珍白頭空歎息終媿義熙民

題小謨觴館文集

霜裘雪鏡度桑乾意氣飛揚萬目看其羨文詞儕庾信誰知
科第困方干少時慷慨千金擲暮齒淒涼一鉢難幸得著書
盡傳播靈山證果有餘歡先生晚年喪妻無子子然一身終日誦經陸祁生贈詩有在家原似
客有髮亦如僧之句
文上之極可憐者

黃秋盦藏唐搨武梁祠畫象冊子今歸李一山屬題

武氏祠象今嘉祥圖畫人物同靈光

帝上孝子義姑節女與靈光殿所述同

洗

刷風沙視真跡石室初始秋盦黃流傳舊搨十有四昔人奉
之推自唐井田制衣又假母清晰真過洪鄱陽朱馬呂查同
贊歎秋盦得自江雪僵貞石古搨先後出覃谿聞之喜欲狂
任城李氏君至戚幸有嬌女爲收藏迄今閱歲百有卅秋盦得圖在丙午一山零落不識天一方李氏有孫知好古珍異書畫

如琳瑯忽聞此圖有蹤跡忘餐廢寢心彷徨百方籌畫倖無
失如淵得珠涓得璜秋盒有靈默呵護至誠感格神所相惜
哉四幅帝王象天遣六丁先取將八幅雖存亦焦尾點畫幸
無毫髮傷前人留題更完好但少淮海兵馬章昔人修治富
春卷宜興吳氏藏大疑富春山卷亦經火燬潢匠願付何彬裝何彬爲賈燕鼎秋壑裝冊
居然返磨室和璧無意歸趙甌歷盡金石千百軸燭天寶氣
常輝煌訪碑得碑圖不一秋盒何幸傳瓣香此冊從此長得
所任城虹月宵騰芒

秋聲

澎湃奔騰震四陲西南醞釀有誰知廣行肅殺天胡醉一變
炎涼世莫支夜半歐陽空太息座中宋玉有餘悲開門莫漫

添惆悵仍是風清月白時

題畫龍

東鱗西爪總尋常霖雨蒼生願未償今日直教螻蟻困不須
高臥託南陽

讀史雜言

杜鵑嘯血蜀山幼生子仍留百鳥巢愛護尙能如舊否君臣
禮數未應拋

魏武子孫今作庶高才猶是慕陳王求田問舍皆經濟鞍馬
難爲髀肉償

高臥商山茹紫芝煙雲供養古鬚眉預人家國緣何事枉被
啓瞽眾口嗤

金人十二鑄咸陽秦政銷兵國自強
勇決我推周顯德捨身濟世救錢荒

竊國無能且竊鉤聯翩喪姚庾公舟
西湖一片成叢豕畢竟行人拜岳侯

盜跖鋪肝秦岱西尙云蒿目救災黎
惡兄柳下夷齊黨合并章縫踐作泥

七十三老人作

五十年前二十三宋人諧語我深諳
喚同一枕黃梁夢雙喜

臨門在劍南

五十年前四月初三日完姻人皆以爲雙喜

花甲周來又十三豈徒濟世自懷慙
古今注未追崔豹書義疏難究費魑

平開七秩已過三海角偷生太不堪豈獨窮愁先著志更防
貴備有餘談

古稀已屆又加三老健原殊老學庵有酒能賒難痛飲

放翁七十

三詩有酒

難賒之語清歌何況去何處

時梅倫已行

有感

天公無意輯羣黎毒霧妖風咫尺迷篝火有心扶勝廣塵寰
無地著夷齊豕蛇薦食誰能遏鵠蚌相持亦自攜幾處稱王
幾稱帝令人追憶漢征西

豪富休誇石季倫料應轉瞬便成塵可知破斧慙周德其奈
鸞弓等越人培植枉多門內棘譟張難犯腹中鱗從前樂善
皆虛譽應悔持籌太苦辛

誰說還書是一癡
荊州不借計安施
蒲津發憤刊新板
東里傷心賣伏雌
豪奪巧偷真乏味
鑿楹局篋亦何爲
無須罰誓邀潛采會見家弦戶誦時

輓劉語石

除夕銷寒笑語溫
今春翦紙爲招魂
案頭尙有新詩卷
襟上猶留舊酒痕
月旦定評何日確

翰怡選近詩生存人不錄君詩可策入矣

風餘吟

社幾人存

乙未舉風餘詞社

叢殘筆墨均收拾
幸有侯芭哭寢門

昔年海上訪汪倫
邂逅逢君意最親
世上漸無同志友
冥中

偏用讀書人

吳山城隍召之歸位

時因悲憤非關命
室有圖書不掇貧

消息故鄉纔訪實
座中諸老共沾巾

昨粟香書來言之

小石督部招飲未去以鹽韻長歌見眎因作咸字全韵詩以

答之

雲陰四市團簷影吟窗昏黑拋書函沈黝四壁生梅臧打門
奴子投華幘新詩盈尺珍瑤城上言雅集少長咸會中九老
語誦詰嘉節方丈調酸鹹大哉羊豕纖蛤蜊酒痕重疊風前
衫襖香十里饒老饒屏山言酒極佳有客來自蘇靈巖花光山色襟
袖銜屢話游迹摩檀櫬白梅碧岫兼綠杉畫藁如逢冷起晶
大石磊落名鐫刻人座振筆風驚颿角藝羣賢法今巖有時
拔地攀躋暑有時順水推雲帆有時語燕聲呢喃有時脫兔
矜狡僂憶昔樊園立史監長篇鉅製鏖槍撓鯢鵬變化熊虎
巖近來詞客拋長鏡零珠碎玉聯字嵌勝會口學金人緘鯢
生舐筆慚鼓儻寸心搖曳同風縻自擬逃塾私蔽巖樓攀花

近高巉巉沿門竹樹何欂櫨游魚吹沫鳥啄鵲陶潛高隱信
不凡閉戶敲詩如避讒句奇語重不可芟無心屬和任意欹
深愧僻澀眞如獬高詠懷賢發至誠

江陰志局呈同人

浙西道院最清幽方志於今十二修衰老敢肩新著作扶持
還仗舊交游蟲沙劫火悲前度指去年事雲漢詩篇負隱憂現患旱

我到江城時癸丑難忘釣弋故林邱

烏龍潭過深柳書堂

詩狂兼酒俠何處覓斯人桑海今朝恨鶯花舊日春十年交
誼篤一語性情眞故友傷零落城南訪老陳謂雨生

有子傳家學安貧自讀書新詩馳滬濱游迹憶匡廬潭水仍

清泚楊花漸發舒門庭無恙在腹痛淚盈裾

售書同好媵之以詩卽和題元詩選韻

棄書題句我先知樊榭龍泓各和詩自昔香閨留韵事至今
藝苑有餘悲還祇聚訟垂千古佞宋閒情又一癡枉自銘心
誇絕品不堪回首憶當時

拋書往往畏人知我獨慙顏且詠詩好友分襟還小坐宮娥
揮淚亦同悲煙雲過眼方爲達局鑰關心最是癡斧季懷慙
堯圃恨何如一笑卽吟時

擬玉溪生有感二律

海內原無主冲人敢自尊虞賓方斂抑趙肉荷矜憐倏忽風
塵起渾如夢嚙然鉤陳臨左輔天策握中權雲雨相翻覆裳

衣太倒顛東都摧柱石北闕集戈鋌機括憑徐穉縱橫屬李
全桐宮終不返流涕舊山川

造意由壬丙無成類耿

紀金禕

蛟龍方失勢豺虎更生心

袞羣才合觥觥大節臨駢誅寬獨柳雅望失中林不解扶持
苦惟聞責備深赤燦方肆怒黃屋遂消沈擢髮應難數羞顏
恐不禁彼蒼無可問畢世效聾瘖

再題唐搨武祠畫卷

畫工衛改字嚴祺昔日覃谿尙未知

枕經堂題跋攷爲衛改畫嚴祺伯曾書前人所

未字字珠璣廿餘段江羅小影未差池

冊前有翁題詞云余爲此冊作細楷前後

已二十餘段字字皆羅兩峰江秋史小影耳翁詩云滿懷此冊十五秋羅江日談揚州

淡墨書名到石門堂欲講習有誰論於今地老天荒候應與

朱查一例存

呂氏藏書印
名講習堂

玲瓏山館百緡強入百空驚晉北張

月齋詩注索
價入百金

今日轉輸

平等值天教才士護縑緗

任城山色接嘉祥石室多年恐毀傷保古承先新事業莫教

樵牧放牛羊

石室殘石有一段入東洋有一段歸陶齋一山
有俠氣界之此寶不啻以保護責之諒能修理

完先
志也

甘遜招飲卽用新字原韻

朝市萬變耳目新友朋氣誼如飲醇豺虎當道奪人食遂令
我輩同憂貧吳君襟懷最磊落閉門謝客怡心神袁君淹通
尤嗜墨非人磨墨磨人傳君嗜書勤者獲省齋堯圃斯卜
鄰董君園林更幽寂奇礪磊落環草茵共敦古歡避俗趣珠

聯璧合真前因收藏賞鑑兼攷證笑談一室生陽春人海自
葆啟期樂西風不汙元規塵鰕生屏入殊不倫冒雨且墊林

宗巾

是夕遇雨

贈傅沅叔卽原前韻

脩期好古歲月新摘辭賈茂兼董醇家學淵源聚書冊圖書
四壁殊不貧冷攤僻巷搜求徧愛書能得書精神非惟能聚
亦能校戴錢盧顧畏後人有時假借許同志春明坊下求卜
鄰戎瀘回首不可問落花難分溷與茵周穆沙蟲真大劫脩
羅刀戟參前因君獨坐擁謨觴館百城南面登如春閉門挑
鐙校訛字不殊埽葉兼撲塵世間學統絕能續一任當世嘲
頭巾

次吳甘遜韻

最多感慨是重陽

辛亥重陽
後子南行

羞對黃花罷舉觴佳節朗吟追

杜牧高風何處訪嚴光搜尋良藥同珍冊絕好安心認睡鄉

莫向京華談舊事回頭五十一星霜

丁卯十二月
初入部門

題鄭愈藏書記時戒飲

紅友無端竟絕交可憐冷落讀書巢幸逢同志爲排遣遠寄
新編戒轉鈔高價百朋原匪易後生三變敢輕嘲琅環福地
雙龍守那許流傳到草茅

伯喈新獲枕中秘竹垞仍傳誓後書枉向藝林誇獨得未妨
同志賞新儲風前漏語防鸚鵡食後能仙聽蠹魚玉匣蘭亭
猶出土陳編世守又何如

寄顧玉溪

丙子掄才日惟君最少年首科甄俊乂同志盡騰騫武略韜
兼握樞庭任最專迄今四十載亦復歎華顛

棄官如破甑吾自返吾廬北學長爲主南華豈僻書忌才誠
骯髒負氣亦迂疏造化安排巧何心計毀譽

亂後重相見滄桑一刹那鶴歸語華表蟻夢醒懷柯杞國憂
天涯王郎斫地歌獨醒觀世變消息近如何

題梧門司成小西涯圖

追逐前賢畏後賢西涯風景尙依然詩龕足與蘇齋並此是
開天全盛年

我亦新游淨業湖秋心如對兩峰圖蕭蕭楊柳菰蒲裏中有

詩人舊宅無

藝風堂文漫存卷一

藝風堂文漫存卷二

江陰繆荃孫

乙丁藁

碑傳序

清故侍郎銜翰林院侍讀學士孫先生墓碑

先生諱鏘鳴字韶甫號渠田浙江瑞安人祖

父希曾邑

諸生先生甫弱冠卽中乙未鄉舉與歸安錢崙仙司業鄞童徽研侍郎同榜目爲三少年辛丑進士選庶吉士授編修丁未分校禮闈已酉典試廣西留督學任滿乞假省親咸豐癸丑奉命會辦本籍團練捐輸事宜遞遷侍講侍讀左右庶子侍講學士同治壬戌轉侍讀學士以團練事畢入都復命供職癸亥總裁武會試是年以言本籍事休致光緒乙未

重宴鹿鳴。賜三品卿銜。庚子以辛丑例得重宴恩榮。賜
侍郎銜。是年因兩宮西幸。終日涕泣。病遂劇。十二月十三
日終於里門。年八十有四。葬於■■■■縣之■■■■山。先生科第
早達。而仕宦始終翰苑。在籍又將十年。年未五十而遽罷。故
其所以不朽者。不在立功。而在立德立言。初官編修。閤然與
一二務實學者互勉躬行。切求民瘼。期將有所設施補救。宋
時辭鄭陳葉諸大師。以爲性理牖於空談。經濟發於實事。貫
而通之。舉而措之。世所推爲永嘉之學者。先生尋往哲之墜
緒。質當代之通儒。以史學爲己任。而充之於事功。卓乎不可
及已。其主試也。堅卻守上官例。贈其督學也。并卻所至守土
官例。宴會於道光庚戌。應詔上疏。痛陳督撫之粉飾。守令之

貪汙軍律之放縱。士習之空疏。風俗之日非。民生之日困。請
獎節操。崇經術。起敢諫之廢臣。搜通儒之遺著。推轉移之本。
極責難之恭。又嚴劾軍機大臣穆彰阿爲秦檜嚴嵩。直聲震
天下。時廣西吏治積壞。羣盜橫行。按臨各府所受詞訟極多。
均移咨巡撫。且馳手書數千言爲民請命。巡撫鄭祖琛不怒。
亦不省。先生太息曰。大亂其將作乎。俄而洪秀全等倡變。禍
及各省矣。其會辦團練捐輸也。於團練則不失寓兵於農之
本意。於捐輸則持百姓足君孰與不足之要言。故鄉里氣甚
固。民甚德也。咸豐辛酉。平陽亂。民焚掠。先生力爲良民籌保
衛。亂民恨。遂攻潘埭。焚先生廬。并大索之。幸得脫難。而家產
罄盡。其罷官也。以劾周開錫。開錫者湘人。攝溫處分巡。治釐

捐鹽細及毛髮。民不堪命。彈章下巡撫。而巡撫素嫌先生。盡反其言。并以阻籌餉。誤軍務劾之。遂奉休致之旨。其教人也。因質施術。不强一途。四十年間。所掌書院。曰姑蘇之正誼。曰金陵之鍾山惜陰。曰滬濱之龍門求志。先生仰承黃萬。旁及顏李。不襲理學之陳言。不蹈訓詁之勦說。至其爲教。并及西書。而種痘纏足之積習。偏喻閭閻。風俗爲之小變。仍是永嘉之學派。小用則小效也。先生家貧。而沈文肅李文忠皆丁未會房所得士。從不通干求之函。而自食館穀。尤人所難。自著有讀書隨筆若干卷。詩文若干卷。呂氏春秋高注補正。東甌大事記。周浮沚陳止齋年譜等。題曰止庵遺書。配葉夫人。繼配林夫人。男詒鈞。優貢生。詒績。拔貢生。詒沅。詒澤。詒湛。詒

揆詒械。皆諸生。德鴻幼。兄弟三人。兄衣言。道光庚戌翰林。官至太僕寺卿。曾刻永嘉叢書。弟嘉言。諸生。猶子詒讓。同治丁卯舉人。著有周禮正義。墨子閒詁等書。荃孫與詒讓。丁卯同譜。誼屬年家子。敢略次事略而爲之銘。銘曰。

經義治事。安定良規。治事鑑史。俾識安危。永嘉學術。百世所師。先生繼起。惜不遇時。道光初政。新安主持。挫折鋒銳。庇蔭痿痹。寒蟬仗馬。平步軒墀。睥睨才士。言高位卑。一疏不合。罷斥隨之。小惠鄉里。名論經帷。海日一樓。望若峨嵋。先生往矣。爲世道悲。

顧輔卿同年墓志銘

君諱家相。字輔卿。浙江山陰人。祖廷綸。博通經史。學者稱爲

鄭香先生父

陝西潼關廳同知。君年少時極聰穎。論史

談經。爲王公履謙。袁文誠公所激賞。光緒乙亥丙子聯捷進士。卽用知縣。發分江西。己卯攝東鄉縣篆。年才二十有七。折獄片言。無異老吏。循例補萍鄉縣。萍故巖邑。僻處邊陲。邑東大安里。地尤險要。壬辰秋土匪萬人聚爲巢穴。君募勇辦團。城防始固。匪眾撲城。與古字營統帶楊邀擊於邑南。大破之。擒匪首鄧海山解省伏誅。當道欲窮治黨與。株連某某諸族。君具牘力爭。保全者數千人。然竟以此忤當道。撤省。乙未萍鄉大祲。饑民待振數十萬人。巡撫德馨以賄敗。繼者飭君同任。凡貸民籽種。散放官振義振平糶等銀約十餘萬兩。閭閻元氣賴以甦息。萍素產煤。陽湖盛宮保宣懷用西法機器開

礦並築山萍達醴陵鐵路。羣情疑沮。君苦心籌度。於購地諸事。給價從優。廬墓所關。曲爲繞避。尤以保全水利。不令吏胥經手。舉極鉅至賾之工程。閭閻樂利。無一怨咨。漢治萍公司之成。實以萍礦爲樞紐。杜鴈保薦。以知府發河南補用。補彰德府。民情悅服。一如萍鄉。彰德豫劇省要郡。冠蓋絡繹。至京漢路告成。稽察巡防。百方肆應。廓爾喀貢使向來馳騁騷擾。先與理藩部商令其改乘京漢路車。爲河南北沿驛各縣。節省糜費萬金以外。復護送至洛陽。陽爲懷柔。陰實監察。君嘗曰。吾戶位數載。惟此舉差可對河南北官民耳。辛亥春日。開缺。遂率眷屬西赴秦中。藉守先塋爲避地之計。寓中略有園亭花木。君曰。此吾之息壤也。因人成事。聊以自娛。適名之因

園而署其亭曰息亭。嘯歌之暇。視諸孫輩讀書。顧而樂之。未幾武昌變作。秦亦繼亂。癸丑東出潼關。北遊燕薊。目擊時事。尤增感觸。恩恩南下。遨遊於西子湖畔。適續修浙江通志。因任釐稅金石各門。丁巳十一月十六日卒。年六十五歲。君性喜研究絕學。於天算音韻諸學。皆足以發闡精微。然爲吏治所掩。世罕知者。成績越中金石記。兩浙金石知新錄等書。荃孫丙子同榜。光緒甲辰晤於金陵。迭觀撰著。契結尤深。近年浙滬交通。年年相見。君今沒矣。同榜無幾。又弱一个。悲哉。配羅夫人。先君卒。子三。迪光。燮光。適光。皆能傳君之學。君可稍慰於九原矣。銘曰。

貫著浙東。身居關中。哲昆孟晉。師範毛公。少擅文詞。長諳吏

治江石中州。賢聲一致。經義治事。溫故知新。循良萬口。安危一身。因園結構。息亭安隱。賦尋遂初。書成孤憤。洎經桑海。迺返聖湖。輿圖是訂。金石足娛。未臻古稀。旋歌虞殯。赤蚪下版。黃楊阨間。天蒼蒼兮塵埃。日閹閹兮泉臺。嗟墓門兮永闕。歎斯人之不復來。

重慶鎮總兵章公鼎臣別傳

章公高元。字鼎臣。安徽合肥人。先世爲壽春鎮標武弁。父兄歿於寇。公永弱冠。自募一軍。張白徽幟。以報父兄之仇。隸銘軍麾下。屢戰屢捷。聲威突振。甲申中法之役。公從劉壯肅公渡臺灣。適基隆爲法兵襲據。公聞之。投戈躍起。袒臂一呼。得死士數百。乘夜往攻法兵。臨發。號於眾曰。吾必滅此敵而後

朝食。卽率所部死士。蹈入敵壘。短兵肉薄。鋒厲無前。法兵當
者死傷山積。餘眾晷水逃遁。法艦見不可乘。亦卽引去。基隆
遂復。旋簡澎湖副總兵官。奉令闢番界。輦路藍縷。頗奏膚功。
後簡登萊青鎮總兵。值甲午中東戰起。前軍屢敗。自朝鮮牙
山平壤駁駁退守奉境。敵兵且大窺入。公奉命渡遼。扼守益
平。與日本乃木希典全軍相遇。公所將爲偏師。少於乃木所
部五六倍。以能得上心。交綏之頃。頗獲勝利。乃木窺公所將
無多。陰用包圍之法。公與所部環起應敵。曾無退志。大戰五
六日。日夜不得少休。臥雪不寒。撫創不血。彈罄糧竭。復以短
兵相接。所部十死七八。乃始突圍而出。是時宋慶擁重兵坐
視不救。故公底於敗。而平日厚養之精銳盡於此役矣。是役

也。雖敗猶榮。日本人盛稱之。後駐守膠州。丁酉秋。兗州土匪
戕德國二教士。德使方向總理衙門索償。遽於冬間有德艦
三艘徑趨膠州海面。晨興公方在操場簡練。德兵忽登岸。其
主將先齎文來。略言此事已在總署交涉。與貴軍無干。請相
約兩軍皆不侵犯。公以職守所在。不之許。顧其時火藥彈子
悉罄。蓋李秉衡時爲魯撫。秋季應領火藥子彈。必遲至冬盡
始發。無論冬季已。公所部勤於操演。故子藥早空。且兗案及
德圖膠之謀皆早發露。而事前京省未有文牘通知。故公當
時覺德兵之突如其來。藐不知其用意所在。乃急通電詢問。
且請發藥彈備戰。而電綫爲德兵割斷。遣卒走百里外。分電
北洋山東請命。北洋大臣王文韶覆電。力禁開戰。慈禧太后

知公猛將。恐失公。特旨調離膠州百里。從此膠澳遂爲德所佔踞矣。公一腔熱血。屢請一戰。卒未由達。振躍叱咤。無可發舒。兩耳由是失聰。浩然有歸志矣。時岑春煊督蜀。方事勦匪。起公爲重慶鎮總兵。川東一路倚爲長城。聲威所在。絕無亂萌。未幾告歸。歸日。抵漢口。資斧卽竭。貸於旅舍。然後成行。蓋公生平絕不愛錢。所得官俸。皆以養戰士。不可億計。有餘則在所轄地方。修治河渠道路。故治軍四五十年。他人往往擁資百萬。而公竟一錢莫名。廉潔寡慾。尤有古名將風。嗣是息影金陵。蟄居一室。卒年七十一。子二人。

論曰。銘軍駐江陰時。公三營駐江北岸沙洲。沙人種桃成林。彭剛直公巡江至沙洲。睹桃林。語居人曰。兵勇在近。桃實甚

繁得無損失乎。民對曰。章大人令嚴。部下不敢作違法事。雖一桃不值一文。然不私取也。彭公異之。傳見面獎之。卽此一端。可見公之大概矣。公長荃孫一歲。豪於飲。丁丑在江陰。曾與對壘。各二三十巨觥。而公愈溫克。泊主講鍾山。公從山東還。再飲不及半。彼此意興均消索。而時事亦日非矣。嗚呼。晉封恭人瞿母莊太夫人家傳

乙卯十二月。瞿表姪世琥奉其母莊恭人行略。踵門求作家傳。荃孫幼年失恃。常在舅家。爲姪氏輩太夫人所鍾愛。莊恭人尤顧惜之。飲食寒煖。無不照拂。家事亦知之早悉。何敢以不文辭。按略。莊恭人江蘇陽湖人。父士全。道光庚子舉人。直隸大名縣知縣。恭人秉性純竺。夙嫻德教。年十七歸表兄瞿

貞甫先生。先是外曾王父自蜀東還。卜居金陵。大舅氏申之。先生贅于京師董氏。卒年二十六。時貞甫兄二歲。次賡甫兄甫數月。姪氏常留母家。自京返居常州郡城。咸豐癸丑。恭人來歸。亦依董氏。時金陵已陷。董太夫人耑健僕冒險入城。探知外王父殉難。外王母馮太夫人出險走溧水一帶。至甲寅始得迎回。時已遷居江陰之西貫村。丙辰世泉生。貞甫兄遂赴蜀。賡甫兄亦赴汴。恭人侍奉兩代孀親。茹苦含辛。孝養備至。縫紉井臼。一身兼之。庚申金陵大營潰。常州陷。恭人奉重堂走江北。赴淮安。覆舟于高郵。兩太夫人爲器物所壓。不能出聲。恭人竭力扶持出水。致右腕脫節。治久始瘳。而世泉溺斃。因衛兩太夫人而不能兼顧。然心盡焉傷之。自淮再移汴。

梁仍依董氏。五舅氏晉之先生迎馬太夫人入蜀。貞甫兄襲雲騎尉保鹽大使候選。恭人亦歸甯。又遭覆車之厄。左足受重傷。遂留大名官舍。嗣後馬太夫人歿于蜀。董太夫人歿于汴。均以道遠不克奔赴。恭人以生不能親奉養。死不能視含歛。終身以爲恨。貞甫兄選雲南白鹽非大使。留辦軍務未赴任。捻逆平定。再保以知縣過班。丙子分發江西。迎恭人挈四子一女赴南昌。得釐差一次。賦閑四年。恭人瘡挂中饋。業已辛苦備嘗。不意貞甫兄又猝歿于壬午之春。身後蕭條。幾無以歛。恭人痛不欲生。而幼稚滿前。奉死視生。所處殆非人境。時廢甫兄署鄂鹽道。卽迎恭人到署。年餘恭人以官舍紛華。進修易情。遂回常州。賃屋居住。次第爲世琥兄弟授室。命世

琥入都從師。以諸生應京兆試。屢試不售。因以知縣分發浙江。癸卯署桐鄉縣事。擬迎養。恭人曰。爾父困于宦途。偃蹇以逝。不願足履官解。惟望爾等居官勿失初志。余心卽慰耳。再署山陰長興。世琥復返常州省親。恭人謂之曰。毋以我不肖就養爲疚心。有爾弟世璋夫婦侍奉。孫兒女林立。並不寂寞。汝但盡心民事。弗以我爲念。國變後。常郡當_○滬要衝。世琥心終不安。乃遷居杭。先於光緒丙午年。世琥循例請封。誥封恭人。恭人于丁酉得中風疾。丁未再中。遂成偏廢。蓋少年受傷。血氣旣衰。一發而不可復治。臥牀褥者十餘年。世琥率其婦子事奉不懈。恭人得以少安。乙卯二月。恭人七十晉九初度。姍黨畢集。登堂奉觴。恭人顧而樂之。蓋自世琥服官至。

今日始團聚也。九月初二日。以微疾卒。葬于武進縣。祖瑩。子世泉。幼殤。世琥。知縣事。世璜。早卒。世琨。湖南候補知縣。世璋。孫九人。曾孫一人。

舊史氏曰。恭人性情之慈善。才識之明敏。在親黨中罕覩。生平處境備極艱苦。迨至子嗣成名。可以安處奉養。而末疾嬰身。無以自適。亦可慨矣。常愛臨池。亦工吟詠。善言嫩行。余固所傾聞而熟見者也。憶童稚之追陪。悵德言之俱渺。自恭人歿。舅氏遂無同輩行人。恰乎有餘悲已。

黃將軍傳

黃軍門標。南海蜑家人。少伉爽有大志。常謂丈夫不識一丁字。當乘萬斛船。爲國家宣力海上。安能終老蠶風蜑雨中。與

漁兄弟爲伍耶。遂投水師營。充捕盜兵。火色鳶肩。騰上必速。由干把游升參遊。纔六七年耳。曾於零丁洋面斬劇盜三十名。縛其渠魁。由是黃虎之名大震。上自高雷。下自南澳。船艚所至。羣盜潛蹤。聞其出洋捕盜時。盤頭跣足。與士卒同甘苦。相朝汎之長落。以躡其蹤。乘風勢之上下。以扼其吭。口講指畫。操縱自如。所獲匪艇資財。盡散於眾。由是士卒益用命。所向有功。旋蒙 睿皇帝特簡擢任碣石鎮總兵。訓練水師。嚴杜接濟。每月親歷各海口。以獲盜之有無。課兵弁之勤惰。政令肅然。東海倚爲長城。不能頃刻離。朝命圖其像以進。誠異數也。軍門刻以持已。寬以接眾。謙約持重。卓有古名將風。後因積勞身故。朝野無不惋惜。至今粵東人述軍門政績者。

兵民猶感泣不置云。一代異人。可備他日史牋之采。

路先生別傳

君諱澤農。字吾徵。一字安卿。先世潞之長子人。明洪武中有諱真者。徙居曲周。是爲曲周路之始祖。父振飛。天啟乙丑進士。仕至巡撫鳳陽都察院右僉都御史。甲申寇亂京師。復南窺中丞開府淮上。防禦卻賊。君甫垂髫。遂贊畫幕府機宜。如老成人。會擒得僞將。縛之竿。令兵民叢射之。君三發三中。觀者籍籍。路公子神勇不絕口。居亡何。中丞丁母憂。會道梗。寄其家於蘇州之洞庭山中。時聞中立君。於中丞有舊恩。招之甚迫。中丞開關海隅。君從中道忽相失。有強帥擁重兵者。留之。欲字以女。日置酒。屬參軍從事款曲道意。君不爲動。至晉

以兵。於是君按劍仰天太息曰。嗟乎。人生不得行胸懷。有伏劍死耳。某廣平血性男子。父方奔播。自有家室。不遑恤。而乃闌入茂陵女家。如司馬相如之爲乎。帥聞。意少解。遂留書記室。謝絕之。乘閒微服南去。已而遇中丞公於廣州之海上。逆旅人曰。孝感也。方是時。閩廣已內附。中丞積憂憤。祈死成疾。疾甚益憤。湯藥不入口。君夜焚香禱北辰。斂以身代。長跪奉藥。藥進。中丞稍稍嘗之。然竟不起。遂卒。君一慟。嘔血數升。時年十七耳。含殮竟扶櫬行。且行且哭。瀕於毀。先是伯兄某侍母王夫人洞庭僑居。計聞奔喪。兄弟遇於路。相抱哭踊。哀感路人。櫬至洞庭山厝焉。蓋君之生。而遭時坎壈若此。伯兄留殯洞庭。貧不能歸里。歲一南行省視。久之患瘵疾。扶掖乃行。

欲往省伯兄迎以歸。家人難之。泣曰。恐歲月不我待也。竟力疾行。旣迎歸。爲置宅一區。井臼器用悉具。割膏腴田三百畝以養。仲兄某早歿。遺孤元度十二歲。元石六歲。拊教之。皆成人。有王國翰者。從中丞行。病歿。倉卒中殯殮成禮。久之爲返櫬於其家。卜景陽者。負白金未償。疾亟以爲言。則取券面焚之。卜沒後。更周恤其妻子。客蘇時。與處士顧甯人友善。偶有緩急。假顧金。絕無一人知之者。及聞甯人逝。寄償其家。嗣子來。留之肄業。踰二載。厚裝遣之。由斯以觀。亦庶幾獨行君子矣。所著有宜軒詩一卷。草堂雜著數卷。琴譜一卷。子元升。康熙壬戌進士。官檢討。

明繆恭傳

繆恭字思敬。浙江太平人。通春秋爲縣學生。萬姓統譜天順中嘗

從學錄張粹游。與謝昭爲同門友。昭因石亨得官。走其門者

如市。恭貽書謂張曰。石且旦夕人者。禍將及昭。先生雖門弟

子。方遠之不暇。而顧親之乎。未幾卒如其言。弘治初詔求直

言。恭走京師。以布衣上書。所請六事。一曰保神器。二曰崇正

學。三曰紹絕屬。四曰懷舊勳。五曰廣言路。六曰革冗員。罪惟錄

首尾歷歷數千言。指斥忌諱。皆人所不敢道者。其紹絕屬者。

擇宗室賢者封之。以嗣懿文太子。千頃堂書目世世祀之。通政使

見之大驚。拘留兵馬司劾恭非所宜言。敬皇帝不之罪也。敕

有司遣歸。常絕食杜門不出。自稱小茅山餓夫。與同邑趙白

雲爲方外交。

罪惟錄

有茅山穢臺。

千頃堂書目

論曰。讓王父子事雖歷朝議及。皆不果至。(引)光中禮始全。恭布衣。處何時。有此大言哉。嗟嗟。太子不祀。何有餓夫。罪惟孫按萬姓統譜。罪惟錄。千頃堂書目。南渡錄。均載其事。籍貫以浙江太平爲是。非南直隸之太平也。天順中至。(必)治不過二十許年。卽其人無疑。

盛宮保奏議序

自來國家之盛。一二豪傑之士。雲龍風虎。鐘鼎河山。豈不臣主俱榮哉。及其衰也。亦有豪傑之士。充其抱負。足以救敝而扶衰。而掣肘者有人。坐視者有人。下石者有人。必使其才不能展布一二。國家雖墮落而不惜。轉加之以敗壞之惡名。不特斯人之不幸。亦國家之不幸也。歷觀史冊。於盛世則如彼。

於末世則如此矣。武進盛杏蓀宮保尙書公。身席華膺。顧視不凡。事無鉅細。當機立斷。初爲湘陰左文襄公所識拔。而合肥李文忠公深知其才。凡大事無不引之參預。而公仰答知遇。獻可替否。始終如一。我清自咸豐髮捻擾亂之後。元氣大傷。各國通商實逼處此。國家日漸弱。民生日漸貧。有心人遂議參各國之政。改中國之習。能鼎新而革故。庶轉弱而爲強。朝廷事事引文忠公爲腹心。文忠公卽引公爲臂指。輪船電報鐵路銀行一身任之。勉爲其難。拳禍突起。兩宮西幸。東南諸省維持大局。賴公彌縫轉輸。得以復辟。功愈偉而責愈重。遂爲不悅己者所擠。投閒數年。再起爲郵傳部侍郎。晉尙書。改國務大臣。而以鐵路一端。尤爲全國之關鍵。從

前書生空論。難以實行。重言通國籌款造路之策。以赴事機。而欲正築室道謀之非。斥爾輩我界之誤。治漁利敗事之罪。因給事中石長信之疏。決計收爲國有。而倡亂者借端鼓衆。傾覆國家。遂受重謗。鐫職去國。國事亦一敗而不振矣。易代以後。仍祖公之舊規。以冀統一。然後知昔之穰穰者。亦明知事非國有不辦。特借此爲兵端。而公之心。乃大白於天下。公妙於言語。工於筆札。無不周之慮。無不達之情。此奏議二十卷。遇一事。必推求其所自來。而窮極其所已至。盱衡中外。商榷古今。侃侃而談。無漏無誤。有先事能料其流弊。有當事而表其成功。新政諸大端。大半寓於此中。惜不逢盛世。使有才之人。轉不如無才者之安坐而致富貴。則天爲之也。荃孫風

有年誼。曾爲輯皇朝經世文續編。并刊行先哲遺書。每見必長談。一日酒酣。謂荃孫曰。國家幹路。應以京師至廣東爲南北之大綱。汴梁至蘭州爲東西之大綱。而以全力付之。不宜零星散舉。至津浦須改浦信。仍歸南北幹路。何能岐出。自與蘆漢爲敵乎。其識見皆提挈綱領。惜當國者之不能用耳。讀奏議意并及此言。卽以爲斯編序。歲在柔兆執徐立冬前一日。江陰繆荃孫序於海上腐居之聯珠樓。

重刻金石苑序

代

東武劉燕庭方伯。海岱高門。收藏甲于海內。由蔭得戶部郎中。出知福建汀州府。晉延榆綏兵備道。調四川龍縣道。簡四川按察使。再遷浙江布政使。所著金石之書。取薛氏款識宣

和博古景伯隸圖六一題跋爲法而集其大成。鉤摹其形。箋釋其文。爲自來金石所未有。統名之曰金石苑。今所傳於世者。曰長安獲古編二冊。則西安所得鐘鼎也。曰三巴舊古志五冊。則四川所得之金石也。曰蒼玉洞題名一冊。則汀州郭外之石刻也。曰龍門造象記二冊。則洛陽伊闕造象也。曰海東金石苑八卷。則朝鮮之金石也。餘未成書。方伯身後。子孫不知愛惜。散如煙雲矣。今長安獲古編版存。版肆無釋文。無攷證。是未完之書。後人有据方伯此書。刪不必釋文。不必攷證之論。不知三巴舊古志海東金石苑攷證見存。未嘗輕視攷證。龍門造象雙鉤本在版肆一見。不知爲何人所得。海東金石苑八卷。鮑子年止鈔跋語。張松坪僅刻前四卷。後全書

爲一名流所藏。想借之補足松坪之後四卷。而銅蔽不肯出。並不以示人。近亦星散。不知歸無何有之鄉。此同光朝名流習氣。言之猶有餘恨。至三巴舊古志。蒼玉洞題名。爲方伯最完善之書。版片旣燬。印本日稀。今覓得最足之本。爲重刊印行。原書無號數。傳本往往不足。今編次之以冊計。藉以供諸天下讀書人之賞玩。余自謂庶免曠園深仇古人之誚矣。夫歲在丙辰三月上巳。

晉書校文序

昔人問何緩叟讀經讀史之法。緩叟以諧語答之曰。君不見門生之請座主乎。先請日期。地方庖人。惟命是聽。屆期先集衣冠拱候。入座肅靜。言語檢點。禮畢恭送登輿。其謹嚴如此。

此讀經法也。又不見座主之答門生乎。地方庖人惟意所擇。門人先集。主緩緩而至。談笑任意。或有事輒先行。其放縱如此。此讀史法也。荃孫素聞此言。頗不以爲然。卽曰。此明人之讀史法耳。國朝卽不然。如嘉定錢氏、王氏、仁和盧氏、梁氏。於字句之異同。事實之乖謬。考訂詳實。必使毫髮無遺。而後登諸簡牘。何敢一毫放縱。而謂與讀經有別哉。今觀晉書校文而愈信吾言之有微矣。夫晉書紀傳編年共十八家。唐貞觀中。敕房喬等薈萃各家。重爲編定。書非一手。譌訛不免。而大半以臧榮緒書爲主。國朝錢氏、王氏、盧氏、王氏、洪氏、勞氏。讀史考異。摘之盈卷。至周氏雲輯爲專書。然全書罅隙。有應指而未指出者。有所糾而非其事者。余友丁君秉衡以研

經餘暇。擬援裴松之例爲之注。稿凡數易。友人謂先錄校語。遂先出五卷。以活字板印行。荃孫早得讀之。字句之異同。以各本參校之。事實之乖謬。以本書互證之。再引他書折衷之。有當補者。如牽弘梁柳之應立傳。有當刪者。如祖納好博弈。見納傳。又見王隱傳。杜預作盟會圖春秋長麻。卽釋例中篇名。不應別出。謝艾在張駿時並未爲將。韓壽至賈后死早沒多年。劉毅是劉準之訛。不云有二。周處無章浦之爵。乃是其孫。張軌之河西。憑祖德而立國。杜嵩作春秋。是王子而非任。可謂精核矣。秉衡受知長沙師。肄業南菁有年。而荃孫更欲推廣其意。現朱刻有半葉十行十九字本。在豐潤張氏。有半葉十四行行二十五字本。在金陵書樓。而校定其文字。再采

四庫考證。錢氏王氏洪氏勞氏周氏均標某氏曰。而辨其小訛。再取文集筆記之偶及者。而補其遺佚。自校出者。則以某謹案以別之。學者得此書。而各家之考證均在。是長沙師讀書之例。庶後學不必旁求也。秉衡以爲然否。荃孫有北齊書校證。其於此篇如驂之靳。均不肯以羸心讀史。蹈明人之陋習也。歲在強圉大淵獻荷月。七十四老人江陰繆荃孫序。

明史例案序

歲在甲寅。開館修清史。聘趙次珊年前輩爲總裁。次珊轉聘荃孫爲總纂。又聘吳興劉君翰怡爲名譽纂修。荃孫將赴都。先采黃黎洲顧亭林朱竹垞徐健庵明史辦法議論爲一冊。藉爲觀摩。一日翰怡出明史例案相質。則與荃孫意見相同。

而收藏較富。搜采較多。視荃孫所鈔者過半不止。甚矣其博而勤也。夫史二體六家。均以班孟堅紀傳表志爲正格。自漢至明皆因之。而門類則視其時之所重。如明史之閹黨土司。前史所未有。而不妨獨創。道學前史所有。而可以裁諸家之議論。有相合者。有相反者。各就其言而推其理。自可增識見而定其是非。徐健庵之例。王橫雲頗有依違。王橫雲之例。張文和亦顯有出入。無一定之例。有一定之理。無非借古以鑑今。遂得由今而返古。是編一出。諸秉筆者可以得師矣。荃孫舊史官也。昔嘗研究史學。古人如劉知幾鄭漁仲之書。時相瀏覽。今人如趙雲松錢辛楣王西莊章實齋之著述。亦各探其旨趣。去年任史事以來。袁清容求書之牘。蘇滋溪危太樸

論文之書。無不懸之座右。奉爲先師。雖才謝三長。而循循然。不失矩度。不逞意氣。不徇偏私。此則竊自許者。第明史館開。留翰林盧琦等十六人。鴻博翰林彭孫遹等五十人。隨時保入。姜宸英等又若干人。其文集有得見者。有不得見者。儻續得而有論史之文。再當俟之續編矣。

孫佩南校經堂文集序

荃孫昔年供職京師。曾於意園座中晤榮城孫佩南先生。詢知爲丁卯同年。見其持躬端謹。出言爾雅。頗愛其人。城區內外未能常晤。戊子己丑。荃孫在江南。傳聞有合肥孫大令者。治獄精。不避權貴。亢立聲聞天下。問其人。則佩南先生也。時先生早以修墓回籍矣。不特愛之。而且敬之。迨辛卯東撫。

延荃孫主講泮南樂源。時先生主講尙志。始得朝夕相聚。握手談藝。并爲籌畫旅況。無微不至。則知先生以文人兼循吏。而勤撰著。重友朋。固性情中人也。尙志堂在城外。宋李易安故宅。前有柳絮泉。後有金縷泉。清流活活。曲折成之字。水際細草蒙茸。方數十武。高阜造悠然亭。可望千佛山。荃孫最愛之。月夜嘗過先生。煮茗清談。素稔先生師武昌張廉卿。治桐城古文。荃孫亦尊桐城爲國朝正宗。先生曰。世之誚桐城以爲空腔。此學聲調之弊。祇須運事實於文字之中。可免此誚。今集內大臣名人傳志。實能身踐此言。又議同修通志。先生主章魯派。荃孫主洪孫派。先生曰。汝師法鄉人耳。荃孫答曰。志以事實爲主。以文行之。略避記帳之誚。如實齋之志。首

增徵實一門。仍不離乎事實。通甫則前志源流。古跡藝文。一概埽除。文字雖高于武功朝邑。已蹈劉知幾改史爲文之譏矣。先生亦首肯。今集中與友人書。必載來書。亦此意也。文集未經手定。然友人能得先生之意。絕無空腔文字在內。此桐城派之高者。遺稿山劉翰怡刊行。操觚荃孫。命爲之序。荃孫讀終卷。聲容笑貌。宛如當日。今年三月到沛南。曾訪金泉舊舍。泉聲如故。柳影依然。空存仰止之思。無復絃歌之雅。愴然久之。因序舊迹以冠斯編。先生之文。自有不朽者在。不藉鄙人之言矣。歲在柔兆執徐立冬前一日。江陰繆荃孫序於上海寓居之聯珠樓。

四懷寄廬類彙序

子友無錫孫叔孟徵君。由明經官內閣中書。供職十餘年。才雋學裕。爲閣長所倚重。戊子己丑聯捷入詞林。散館以知縣用。選浙江新昌縣知縣。到省。權會稽太平臨海三劇邑。以禮去官。游升觀察。徵入京師禮學館。庚戌年卒。荃孫於光緒初年官京師。與君始晤見。君事理明決。議論精當。樂與訂交。及君官浙江。荃孫亦同里。主江甯講席。遂相疏闊。今君之子藩圻抱君所爲文九十八篇。分爲七類。受而讀之。觀其文辭簡質。無所摹仿。若未嘗有意爲文者。然釋經攷禮。仲古通今。不涉迂拘。記事立論。窮源盡委。不立閒架。信其筆之所至。而理無不足。事無不具。先賢有曰。言之無文。行之不遠。又曰。氣盛則言之長短。與聲之高下皆宜。是古人之文。非今人之文也。

昔年見君四西齋決事四卷。以爲士人治有用之學。將以澤及斯民。惟牧令爲較易。君之決事也。兩造隱情。歷歷如繪。雖極纏繞之事。寥寥數百言。而文之簡潔。理之密達。不但折服姦滑。實足以感動善良。惟其文也。卽自序一篇。其本領已可概見。惲子居決事不可得。近人中固與樊雲門董覺軒之書判並傳無疑。薛圻編次君文。乃用姚惜抱李申耆選文之例。亦可見家學淵源。流澤及遠。荃孫不足言文。而舊交中所欽佩者。惟君爲最。戊戌年君在會稽任。本約山陰之游。時因米貴。碾穀平糶多事之秋。荃孫在湖上。句留半月。未能渡江踐約。集中一書卽是時也。今逝者已矣。讀其文字。仍然事理明決。議論精當。不異與君劇談時也。故不辭而爲之序。

鈍庵詩集序

嗚呼。此陽湖吳君景周之遺詩也。景周爲吾姑母之孫。年少力學。焦萃而卒。卒又無子。遺詩只一卷。族姪書屏爲鈔撮之。錄以示予。詩筆清真。略少色澤。所處又不順。遂多志微嚙殺之音。殆亦不自知其然。吾姑母歸於吳。爲祖母所鍾愛。生表兄二人。育於吾家。迨兩表兄授室。始自立門戶。越二年。卽遭粵匪之亂。予同避於淮安。惟兩表兄是依。同治二年。予奉母之湖南。二表兄謬生送之漢口。嗚咽而別。遂不復見。至予甲戌歸里。方喜君文字雋永。可望上第。以慰先人。奈數奇不偶。又如此。嗚呼。悲已。二表兄之詩。清潤婉約。惜遭亂後不復作。未知其家尙有留遺者否。旣讀君詩。而有餘悲也。歲在旃蒙。

赤奮若中秋之月繆荃孫序。

梅孺人彰節錄序

子程子曰。餓死事小。失節事大。言其理也。曹子建詩。誰云捐軀易。殺身良獨難。言其情也。天地開靈。靈蠢蠢。其樂生之情則同。故當危難之時。如雷如霆。倬訇震懼。士大夫往往失其所守。非志氣常靜者。不能當前而不懼。聖清御宇二百餘年。詩書之教漸漬人心。雖鄉曲之間。婦人女子。咸知大義。如梅孺人之死難。佼佼錚錚。亦可以諷世矣。當粵逆潰大營。陷常州。席卷東南四十餘縣。焚燒殺掠。慘無人理。死者數百萬。人。然如梅孺人從容不迫。言之卽踐之。死志素定於中。非倉卒遇害者可比。由其姆教久嫻。神明不亂。投身清流。致命遂

志。深合程子之意。而亦子建之所爲難也。雖然。孺人有女有
壻。能傳其事於五十年之後。徧徵名流詩文。俾屢見於各家
文集。時愈久而名愈彰。以視荒江老屋。捐軀殉節。姓名不彰。
草木同腐。孺人猶屬不幸中之幸事。近來三綱淪斃。踰閑蕩
檢。名爲倡明女學。實則破壞家規。借異域之行爲。師桂寇之
往迹。幾不知世間有節義事。試讀此錄。或生其媿心乎。荃孫
忝同鄉里。偷生有媿。以書屏之請。不辭而爲之序。乙卯中秋。
積學齋藏書志序

南陵徐積餘觀察。德行純竺。問學淹雅。收藏富有。冠冕皖南。
所刻有積學齋鄮齋兩叢書。又刻閨秀詞百家。仿宋元刻曰。
隨庵叢書。前後兩集。風行海內。儒者宗之。今編書目。高有尺

許謂余曰。余之蓄書。初自弱冠。今年五十。無地無時。見卽收獲。自媿力薄。止有此數。分類編纂。僅僅成編。子其爲我敘之。余與積餘戊子秋閒晤於琉璃廠書肆。談及經籍目錄。如瓶瀉水。余心佩焉。因以訂交。迄今卅年。何敢以不文辭。夫目錄之學。始於向歆。以私家著錄。屹立於天壤者。以昭德晁氏與安古陳氏爲最。國朝以來。錢遵王敏求記爲人所重。然鈔刻不分。宋元無別。往往空論。猶沿明人習氣。若也是園書目。汲古滄葦。僅存一名。更無論已。積餘此目。其書必列某本。舊新之優劣。鈔刻之異同。宋元本行數字數。高廣若干。白口黑口。魚尾旁耳。展卷具在。若指諸掌。其開聚書之門徑也。備載各家之序跋。原委繁然。復略敘校讐考證訓詁簿錄彙萃之

所得。各發解題。兼及收藏家圖書。其標讀書之脈絡也。世之欲藏書讀書者。循是而求。覽一書而精神形式無不具在。不勝於敏求記倍徙乎。積餘爲書日時。浼余三子僧保助之讐校。余得以盡窺全豹。而知其非夸也。而所收國初及乾嘉時之善本尤多。以時近不入目。荃孫得國朝人文集千種。以比積餘所藏猶小巫也。昔阮宮保耳順之年。龔定庵爲年譜。第一序卽以稱祝。今積餘年方五十。余亦爲書目第一序。稱祝如之。他日年愈尊。搜羅愈廣。自編二集。再爲序之。書此以當息壤。歲在彊圉大淵獻長至日。江陰繆荃孫序。

休甯汪氏譜序

古者敬宗收族。見於禮經。宗法不行。而譜牒之風遂盛行於

六代。隋經籍志以譜系名篇。收入者五十部。唐宋以來。夷夏無別。紳民不分。遷徙流離。得見唐譜者甚少矣。歙州汪氏以越國公起義受封。聚族居之。遂名汪村。歷宋迨明。名人輩出。今江浙之汪。問其前代。皆出越國公。國朝汪鈍翁先生汪姓緣起考云。魯成公之後。食采於汪。後有名錡者。以童子死齊難。爲聖人所褒。而辟傳聞汪罔氏之說。至汪地見於秦。而不見於魯。書缺有閒矣。吾友汪莘如以其家成化舊譜一冊出示。搜羅既博。雕印俱工。歎爲罕見。又起而言曰。吾族世居橫干上鴈口。咸豐庚申。郡城旣陷於粵逆。一門死義。僅世父學俊。學庠。經商於外得存。本生父恆春。府君方幼。賴母姨攜出。並明譜一冊。學庠公轉徙江陰。娶虞門曹氏。就後梅鎮狄

橋家馬。戊午春。江陰汪氏續修宗譜。余因出家藏舊帙。與江陰汪譜核對。同爲越國公後裔。譜牒旣合。情亦可通。請立江陰後梅鎮狄橋支修入。將舊譜爲基。支祖當推九世祖正紀公爲始。羣情洽焉。昔人有言曰。譜牒之廢也。廢於貧且賤者什之三。而廢於富且貴者什之七。富者或恥其家之寒陋。則扳援大族而強附之。貴者或傲焉忘其先世之遺澤。而過慮族人之貧者。覬覦其錙銖。則惟恐遠之不速也。夫富者旣強附人之宗。而貴者又思急遠其宗。於是譜牒雖存而實亡矣。今吾族與江陰族根本旣同。而無富貴貧賤之別。故合譜最宜。詩有之。豈無他人不如我。同姓以越國公爲始祖者。大宗之義也。以正紀公爲一世祖者。繼別爲宗之義也。故序以明

其繇來焉。歲在著雍敦牂江陰繆荃孫序。

稷堂舊話序

吾族聚居中港鎮之北。去鎮一里。距江二里。距邑十八里。村落三四百家。自明嘉靖居此。而山背江小溪環之。造雙橋以渡人。村有里門。余家居村西第一家。隔岸古木參差。微露山影。槐龍一株。根長溪南。過溪而踞。當門雙木承之。黛色參天。幹大四圍。數百年物也。東則蓉浦公名下長房所居。大門三開十八扇。均以竹絲飾之。門前青石作場。再東則小園。爲五世祖心範公養病之所。久無人居。屋宇傾頽。柱石摧敗。花草叢雜。竹木縱橫。燕巢空梁。鼠踞壞砌。石大小而斜矗。池淺闊而無波。古稷堂一額尙存。鎮江簞重光書也。再東則父

謙九叔父居之。再東則宗祠矣。祠中樟柏松杉。蒼翠如幄。有
鴛巢其巔。古者以爲文明之象焉。門前最曠。每當麥天晨潤。
時雨初晴。新綠差差。溪聲活活。又或秋高落木。夕陽在門。遠
雁驚寒。歸雅如雨。秦望瞬柯。諸山作種種金碧色。畫意詩情。
時時在目。荃孫生長於斯。自發蒙至應試。未他徙。出見長者。
無不示之以禮法。幼者亦順受之。歲時閒一至鎮。必有父兄
帥之。一游卽歸家塾。林立婦女亦操作不懈。夜閒書聲與機
聲互相酬答。文課分盟。字社競爽。而老輩猶以爲出人遜於
乾嘉時。咸豐庚申。陡遭粵逆之變。荃孫奉母出走。棄家尋父。
長達鄉邑。永作旅人。迄今甲子一周。房屋殘毀。樹木斬伐。筆
墨荒廢。化爲吐霧吞雲。樾鋤倚闌。大半呼盧喝雉。長者不能

正帥。幼者不能仰承。居雞豚。形同麋鹿。目睽睽而直視。口
啓啓而妄訾。耕讀明訓。何期廢讀爲先。搢紳之家。無復拖紳
之望。歎桑海之重逢。嗟江河之莫挽。嗚呼傷已。猶子書屏茂
才。專錄先人事迹。搜羅極博。藉作觀摩。拔尤君玉萬柳溪邊
舊話例。名之曰稷堂傳話。示不忘本也。近時子賓二叔。晉初
四弟。均七十以上人。身歷前境。試問之。有一字矯飾否。卽以
爲此書序。

醒醉石序

漢藝文志。九流之外。別立小說一家。其原出於稗官。就街談
巷語之新。爲人情風俗之考。燭理則正變雜陳。立論則莊諧
互見。隨意勸懲。百端鼓舞。使人向善悔過。而生於不自知。其

力量轉甚於九流。今唐以前書止燕丹子存。至唐而岐小說傳奇爲二類。或嚮壁虛造。或影射時政。唐人以爲行卷。以其可以見筆力。可以見胸襟。而所撰遂盛行於世。昔黃梨洲檢鈕氏世學樓目。見小說平話數百種。錢遵王也是園書目有詩話十數種。詩話二字。初以爲評話。而日本流傳平話均作詩話。因悟各小說無不從詩而起。詩在前。話在後。謂之詩話。誰謂不然。俞理初蘆城平話跋亦云。永樂大典收平話極多。此醒醉石十五卷。署名東魯百狂生補輯。其中李微化虎事。見唐人李微傳。又有云屠赤水作。傳者又以孕婦爲二命。上諭所駁。孕不作一命。是崇禎年事。此蓋崇禎年時作。大凡小說之作。可以見當時之制度焉。可以覘風氣之純薄焉。可以見物價之低昂焉。可以見人心之詭譎焉。於此演說果報。

決斷是非。挽幾希之仁心。斷無聊之妄念。場前巷底。婦孺皆知。不較九流爲有益乎。況又筆墨之簡潔。言語之靈活。又出於尋常小說者。吾友今爲重刻。將以行世。庶不負班氏志小說之苦心矣。歲在強圉大淵獻盈月之朔。江東老蟬序。

常慊慊齋文集序

自來宏才碩學。必生於詩禮之家。錯節盤根。愈足顯才智之士。是以許國繼起。武功之聲望愈隆。劉晏理財。關輔之轉輸不匱。皋牢萬物。捭闔九能。今見之竹石朱君矣。君沛國之英。當湖之秀。道學夙推清獻。文藻孰過江村。鍾靈美哉。於斯爲盛。君之先德。淮揚觀察。撫綏同於召父。盡瘁比之武侯。士民頌其德焉。史策著其勳焉。蕉堂漕帥。吉金文字考古逾辭尙

功。天庾餘脍。運漕如韓鎮海。則君之伯祖也。建卿國博。詰通
蒼雅。學者目爲通人。詩詠白蘇。騷壇推爲鉅手。則君之世父
也。金張七葉。貂蟬盈堂。王謝一家。烏衣名巷。佩印垂組。長虞
有治譜之傳。擁蓋飛輿。荀伯是貴門之首。此君之家世也。君
秉承家學。筮仕江南。負八窗四達之才。處六緊十雄之地。以
爲經姦者國之紀。租庸者民之天。紀綱立而財用足。不必弓
張。井里富而藩育形。何須箕斂。大則鹽鐵總推。夫陳恕。小則
竹木亦表陶公。至於治獄以情。爲政尙猛。銀手如斷。通李
悝之法經。金心在中。習君房之令典。總釐務者三十年。攝泉
篆者十餘次。旣頻登夫刺牘。遂特簡夫淮揚。以牛斗之名區。
作箕裘之佳話。此君之遇際也。雖然世共知君之服官。亦知

君之求學乎。在昔趨庭。卽旣聞夫子頤志楊石卿之讜論。迨乎捧檄。又請益於高碧澗劉泖生之至交。好古敏求。力學不倦。遂乃吐文萬牒。毛穎生華。淬鋒十年。十將出匣。不事摘辭飾句。而意思深長。何須博引繁稱。而事理通達。若夫傷離感逝。子山思舊之銘。考古證今。陳思辨通之論。卽云文采亦足名家。此君之學術也。君性至孝。先德貽致身圖。徧求當代名人題詠。以寄哀思。逮事偏親。尤極奉養。治獄平恕。雋母爲之加餐。戲綵斑斕。老萊依然孺慕。迺官舍不樂乎吳郡。而板輿過返乎浙中。白雲在上。梁公望遠之心。落葉去枝。士衡思親之賦。上書當道乞歸里閭。悽入肝脾。言從肺腑。固與李天生之疏。袁隨園之啟。鼎足而三。他如刻新安之家集。訂義莊之

條規尊祖卽以敬宗。仁民然後愛物。此君之德行也。荃孫以
孔李之通家。兼羊求之談友。猶憶小住金閨。爲炊玉饌。蘭肴
山積。椒酒淵流。羹和鹽梅。漿調芍藥。沈南皮之李。燕飲彌歡。
飛西海之鱗。盛筵難再。商摧古學。感慨新猷。此境此情。宛然
心目。今則宿草風偃。流涕黃公之壚。西鄰日斜。嗚咽山陽之
笛。然未臻期頤之壽。而幸免桑海之悲。公子象甫收拾遺著。
並合焦堂漕帥詩文刻之。後賢繼起。君亦何憾於九原。寶墨
猶存。集自足傳乎千古。歲在旃蒙單闕午月。江陰繆荃孫序。

李一山詩序

自來喬木世臣之家。必鍾蘭玉縣。圃閨風之境。多產琅玕。是
以優龍劣虎。瑯琊之門大昌。集義測筆。臨沂之澤不墜。源之

長者流自遠。根之厚者葉必華。觀李君一山之詩。而益可證
矣。濟南李氏。山左鉅族。先生又錢唐黃小松司馬之壻
也。喜冰清而玉潤。歎曙後之星孤。濟南弱女。口傳父書。陳留
才媛。手寫遺集。懷茲墨寶。保守弗替。元孫一山。燕芸香而辟
蠹。然柿葉而驅蟬。時已閱夫百年。家遞藏夫四世。乃以秋盒
遺詩付印。與小蓬萊閣集並傳焉。一山鵬辰玉照。慧質金相。
壺簾迭唱。圭塘款乃之編。棣萼清吟。扶風聯珠之集。貢舉場
廢。科學堂開。字遂改而蟬行。音更雜乎缺舌。樂水樂山之悟。
渡海情移。問詩問禮之心。求野志切。時歷三禩。名高一旦。海
東勝迹。櫻花世界。豔陽三月。霏英萬樹。壺觴之俊接席。絃管
之響流天。紅雲團蓋。恍登赤城之峰。頽雪敲簾。如入眾香之

國。加以桃葉迎來。柳枝偕往。遙峰兩點。鬪此修眉。明月二分。炤來並影。莫不羨其豔福。目爲勝流。習藝旣成。聯袂偕返。守鄉郡而抒素抱。管太嶽而作主人。又復廣搜書籍。泐志縹緗。萬籤錦贖。皮宛委之名山。百軸油拳。入瑯嬛之福地。濟北讀書之志。東萊題跋之錄。無不守茲舊學。仰企鄉賢。至其爲詩也。剗鏽心神。疏瀹靈府。流響擊鉢。捷不亞於枚舉。佳句入囊。才已嬌乎長吉。更有進者。賀黃裳之載酒。吳修齡之圍鑪。乃詩家之微言。絕淫哇之雜出。一山春華之年。秋實之學。摘辭則兩漢。游藝則三唐。非惟秀絕山左。行將獨步海內。不受他人之稱譽。奚畏俗士之譏評。故不必自表其所能。亦何至自謙爲積習哉。荃孫學慙三篋。才謝九能。閒縱如逐浪之鷗。人

望比識途之馬。讀是詩也。獎其所已能。勉其所未至。斯文爾雅。不媿孔李之通家。世澤綿長。毋背高曾之規矩。歲在旃蒙。單闕江陰。繆荃孫序。

李審言儷體文集序

興化李審言明經。首識之崩禮卿座中。荀陸覲面。不作常談。蘇李知心。託諸詩句。居鄰坊曲。驅蟬蠹而劬書。地隔關河。附鱗鴻而論學。羅濟修志。聘萬里爲同羣。平恆講經。舉梁祚爲教授。緣深香火。契結芝蘭。已十數年於茲矣。荃孫自遭國變。竄迹海隅。心旌風搖。芳訊雨絕。不張羅而謝客。非種菜而閉門。適劉慙石參議聘君授讀。迺自射陽閒關而來。相逢天末。各訴流離。照影燈前。咸悲老大。范張密契。離羣已隔夫三年。

嵇呂相思。命駕不辭。夫千里杜鵑聲。苦寄華年逝水之悲。蝴蝶

夢寒抱地。老天荒之恨。賞音知己。早歸臥夫青山。

謂益吾師

設

醴舊游。半消沈於黃壤。

謝子受蒯禮卿諸人

雖銜杯揮塵。仍似曩時。而

擊筑吹簫。徒增隱恨已。日者君以駢文付諸削氏。授簡荃孫。命爲弁言。昔刊魏生叢錄。宿諾未償。何敢再辭。以滋罪戾。君博覽羣書。尤通蕭選。熟精逾夫詩聖。貫串過乎書簾。天孫餘錦。夢中乞自景陽。雪堂義樽。佳品貽諸和仲。固已輝增冊府。名重士林。縱復錦囊投溷。命同長古之窮。論語代薪。遇等陳奇之薄。然而廣搜近作。默憶陳言。傳不在多。古莫能及。五光十色。繪畫之采愈新。千辟萬灌。千莫之鋒誰遏。嗟乎。世道日薄。文教日衰。裸壤而誚龍文。聾俗而譏鳳翽。玉臺新詠。近俗

體而獨傳。金箱壁言。賦高才而不遇。君獨不然。我用我法。立意必深。無土龍之誚。隸事必切。無疥駝之嫌。出語必響。無鳴蠅之矜。抒藻必新。無腐鼠之詆。比青儷白。卿雲增黼黻之華。刻羽引宮。天籟過笙簧之韻。昭代此體。名家尙多。以君之才。庶可爲殿。世有解人。當不河漢斯言也。歲在旃蒙單閼午月。江陰繆荃孫序。

藝風堂文漫存卷二

藝風堂文漫存卷三

江陰繆荃孫

乙丁纂

記書雜文

天一閣始末記

自明中葉以來。海內藏書家。莫不以四明天一閣爲巨擘。黃梨洲表彰之。全謝山爲之記。阮文達公爲之編書目。學士文人心目中。均有一天一閣矣。初范堯卿司馬素好購書。與豐道生善。先在萬卷樓鈔書。且求道生作藏書記。值道生得心疾。樓上之書爲門生輩竊去不少。又遭火患。以其幸存之餘。歸於范氏司馬。又稍從弇州互鈔以增益之。遂雄視浙東焉。閣之初建也。鑿一池於其下。環植竹木。然尙未署名。及搜碑

版忽得吳道士龍虎山天一池石刻。元揭文安公所書。而有記於其陰。大喜。以爲適與是閣鑿池之意相合。因卽移以名閣。司馬二子。方析產時。以爲書不可分。乃別出萬金。欲書者受書。否則受金。其次子欣然受金而去。今金已盡。而書尙存。其優劣爲何如。此閣構於月湖之西。宅之東牆圃周迴。林木蔭翳。閣前略有池。石與閣閣相遠。按東齋勝語言其閣四面皆水。故藏書紀事詩有煙波四面閣玲瓏之語。其實閣之外有月臺。臺寬闊靜闊。不使下卽小池。月牙形。略有竹樹。並非四面皆水。持煙火者入其中。其能久一也。司馬歿後。封閉甚嚴。繼乃子孫相約爲例。凡閣廚鎖鑰。分房掌之。禁以書下閣梯。非各房子孫齊至不開鎖。子孫無故開門入閣者。罰不與祭三次。私領親友入閣及擅開廚者。罰不與祭一年。擅將書借出者。罰

不與祭三年。因而典鬻者。遂不與祭。其例嚴密如此。所以能
久二也。黃梨洲後。萬季野徵君。馮南軒處士繼往。崑山徐健
庵司寇聞而來鈔之。海甯陳廣陵詹事纂賦彙。亦嘗求之閣
中。全謝山爲小玲瓏館。馬氏亦往鈔之。迨四庫館開。范氏
進呈書六百三十八部。爲藏書家之冠。詔建七閣。專人往
浙繪閣圖。仿其式以造。亦至顯榮矣。乾隆癸丑。阮文達公督
浙學。數至閣下。命范氏後人分廚編定數目碑目刊行。道光
庚子。英人破甯波。登閣周視。僅取一統志及輿地書數種而
去。咸豐辛酉。粵匪之亂。閣旣殘毀。書亦星散。范氏後人四川
知縣邦綏避地山中。得訊大驚。卽閉關至江北岸搜訪。聞書
爲洋人傳教者所得。或賣諸奉化唐畧造紙者之家。急借貲

贖回寇退。又偕宗老多方購求。書始稍稍復歸其有散在他邑不聽贖取者。則賴郡守任邱邊公葆誠移文提贖。還藏閣中。

後甯波太守江甯宗湘文延慈谿何明經松重編書目。未

就去任。光緒己丑甯紹台道無錫薛觀察福成復屬歸安錢

念劬明經編成四卷。己丑刊行。體例勝於前編。惜書止存十

分之二。光緒三十四年內兄夏閨枝守甯波。余欲登閣觀書。

閨枝於八月間與范氏訂約。至次年始得復。司馬後人一百有二家須均允

乃得登。定期三月十八日。余於十三日自江甯赴之。十五日

到鄞。十八日到閣。范氏派二庠生衣冠迎太守。一字渭生茶

畢登閣。約不攜星火。閣甚庳隘。然樸素堅固。明制宛然。閣上

寶書樓。明嘉靖時題。閣下長聯云。承梅澗柳汀以後。清節衣

冠世澤永。四明司馬。比南雷東礪之奇。圖書泉石高樓仰。百
尺元龍。阮文達撰。又有天一閣書藏。亦文達筆。梅叔跋云。天
一閣藏原有之書。另闢一藏。專收後來之書云云。惜范氏子
孫不能體文達之意也。廚用散木。兩面開門。界而爲五。每廚
門標每類。例須范氏子孫檢閱。觀者不能自抽。余攜現在書
目細閱。應抽閱者付之。范氏子開廚。但見書帙亂疊。水溼破
爛。零篇散葉。鼠齧蟲穿。迥非阮文達公所云。定香亭筆談。余兩登此閣。地甚卑溼。而列置書乾燥無蟲蝕。大可異。范氏子見書而不能檢。余告之。乃抽出再
檢。再閱。范氏子挽余自抽。蓋目不知書者。余笑應曰。肯破例
耶。相與一笑。列廚分類。每類止數十本。然皆嘉靖前書。刻本
無方體字。鈔本藍格縣紙。令人不忍釋手。囑鈔宋刑統。正德

江陰志而出。聊慰生平素願。然所見殊不逮所聞矣。閨枝歸謂余曰。再閱百年。遺書盡入蠹腹。天一閣其泯滅乎。閨枝赴湖州木任。只鈔得刑統。而江陰志未來。癸丑。余避難僑滬。忽聞閣書大批出售。予友石銘得宋刻書經注疏。歐陽集六十卷本。又見明刻明鈔書五六百本。及明登科錄百十本。意其子孫居然肯賣。後知滬上奸商浼賊往偷。迨知覺已去大半。鳴官究治。止定獲到二賊罪名。書仍不能還閣。近日有司之新律也。閣書止存三分。又去其二。并不能待入之蠹腹。近日浙西陸氏誦朱樓。丁氏八千卷樓。姚氏咫進齋。朱氏結一廬。均已四散。并天一閣亦不能保存。可謂文運之厄矣。

天一閣書目。焦氏經籍志云。四明范氏書目二卷。范欽撰。

此一目也。范友仲引黃太沖登樓。太沖取其流通未廣者。鈔爲書目。冀以暇日分別鈔錄。凡坊間易得者。時人之集。三式之書。皆不在列。友仲允之。而有志未逮。所鈔書目。轉爲好事流傳。徐健庵使其門生謄寫去者。不知凡幾。友仲之子左垣。乃并前所未列者。重定一日。求太沖爲記。此一日也。韓城王文端公視浙學。鄞屬呈一書目。計書五千有零。不分門類。不加詮次。絕少祕冊。見頤綵堂文集。此一目也。阮文達公視浙學。命范氏後人編之。成目錄十卷。嘉慶十三年升巡撫。復來甯波。屬甯紹台道陳觀察廷杰刻之。阮爲作序。卽今通行書目。有文選樓木記者。惟以類編次。類中毫無次序。且有重複。祕本亦未標出。與阮序不相應。

此一日也。宗太守辭觀察亂後重編遺書。先立六例。編次得宜。斟酌盡善。前目所未著者補之。本書所善在何處亦著之。自是最善之本。蓋潦盡潭清。又再歷寒暑。三易草槁而後成之。此一日也。自今以後。書亡目存。亦與遂初堂葉竹堂徒增後人之感慨矣。

琉璃廠書肆後記

益都李南澗大令書肆記成於乾隆己丑時。四庫館開。文士雲集。四方書籍聚於輦下。爲國朝極盛之時。余同治丁卯始上公車。誑廠李氏所舉數十家。久已不存。至光緒丙子通籍。供職京師。十九年甲午與掌院徐中堂不合。投劾出都。己亥購方柳橋書。留一月未銷假。宣統庚戌復

應圖書館監督之徵。留京一年。而國變矣。四十餘年。暇輒與書估爲緣。綜計前後。爲琉璃廠書肆後記。

廠東門外路北一鋪。曰文光樓石氏。丙子年頗有舊書。余專搜其單本。得百餘冊。皆不經見之書也。價亦極廉。入門路南文寶堂曹氏。路北寶文齋主人徐氏蒼厓。年六十餘。目錄之學甚熟。猶及見徐星伯、苗仙麓、張碩舟、何子貞、子愚諸先生。時說軼事。藏舊志書最多。六世祖定海縣志江陰蔡志、陳志均購於是肆。韓心源其徒也。路南有善成堂饒氏。大文堂劉氏。皆江西人。再西二酉堂聚星堂。皆舊記之書肆。聚星不久卽收。二酉或云卽前明之老二酉。或云非是。襲其名耳。均未可知。然皆無舊書。再西則寶華堂修文堂。均張姓。均能鑒別。

良楷。再西則翰文齋主人韓心源。受徐蒼厓之傳。先得益都李南澗藏書。再得內城李勤伯藏書。琳琅滿目。自擺攤至開鋪。自小鋪拓廣廈。不過數年。已與至大之書鋪鼎立。余之朱元本。大半韓爲搜得。卽宋會要亦得之此肆。不幸早世。其子子源繼起。亦有能名。再西爲正文齋譚氏。翰文之徒。庚子亂後最有名。藏不全宋本數十種。種留一帙不售。云將留之以教生徒。有心哉。不幸早歿。其徒劉能繼起。旋亦化去。路北有寶名齋主人李衷山。山西人。才具開展。結交權貴。爲御史李璠所糾。發配天津。漢陽葉氏藏書歸之。裝潢最佳。

穆宗重裝天祿琳琅書。由內務府發該肆。舊面護葉。予檢得不少。饒有古香。又西而南沙土圍口有書業公所。書賈租屋

鱗集櫛比。前有勤有堂楊氏維舟。頗識舊書。爲予購書極多。再西路北則書業堂崔氏。山西人。門面極小。明刻宰輔編年錄程史司馬元興志原石搨本得於此肆。再西則肄雅堂肆主丁子固。得崇兩舫之書。先爲湖南方柳橋收購舊籍。柳橋歿。又捆載其書來京售之。善裝潢。與寶名同裝天祿琳琅者。欲張甚。後因官事受責。意氣熾矣。再西爲廠橋。橋之西路。南則萃文堂常氏。文琳堂馬氏。益文堂魏氏。昔年常走河南。子得其舊鈔書畫史會要元板禮記集說均極精。再西西山堂李氏。會經堂劉氏。文貴堂魏氏。再西則寶森堂主人李雨亭。與徐蒼厓在廠肆爲前輩。曾得姚文僖公王文簡公韓小亭李芝齡各家之書。所謂宋槧元槧。見而卽識。蜀板閩板。到眼

不欺。是陶五柳錢聽默一流。嘗一日手國策與予閱。曰此宋板否。余愛其古雅。而微嫌紙不舊。渠笑曰。此所謂捺印。士禮居本也。黃刻每葉有鐫工名字。捺去之。未印入。以惑人。通志堂經典釋文三禮圖。亦有如此者。裝潢索善價。以備配禮送大老。慎弗爲所惑也。路北有舊書李時。有零星善本。有文華堂。曾得彭文勤公之書。再西路南有寶珍齋吳氏。寶經堂魏氏。同雅堂喬氏。同好堂閻氏。皆有舊書。再西則廠西門書肆盡矣。其中有搢紳鋪。刻板鐫碑鋪。骨董鋪。法帖鋪。裝潢書畫鋪。南紙鋪。三里長街。他鋪甚少。亦爲日下之盛事。城內隆福寺街。昔年有三槐堂王氏。同立堂喬氏。曾得介休楊氏書。聚珍堂先名。天繪閣劉氏。寶書堂■氏。至廟會書攤慈仁寺久

已無之。後護國寺、隆福寺東西兩廟會。雖無古書。尙有小攤。今則并攤俱無。廠東門火神廟。正月三日起至十六日廟會。從前四大家一寶森堂。一同立堂。一三槐堂。一善成堂。後各家均敗。止有零星小攤。無復牙籤錦贖。留人尋玩矣。舊友日來廠者。朱子清、孫銓伯、黃再同、沈子培、子封、徐梧生、若盛伯希、王廉生。閒或一至。來則高車駟馬。未及門而已知。至潘翁諸老。則尚候廠友之自送。罕見閱肆。伯希辭官以後。探得打磨廠興隆店外來書賈貨車萃焉。五更開市。各書陳列於地。論堆估值。廠友悉趨之。伯希時時襍被往宿。遂得宋本七十卷之禮記注疏、杜詩黃鶴注、舊鈔儒學警悟。余因伯希而往。亦得舊鈔武溪集、類編、長安志。同日子培得馬天祿造象。

原石搨本。後余又得宋本范文正集。元本柳道傳集。正統本蘇平仲集。價廉於廠肆。近無此事。店亦無矣。

附錄

余辛亥出都。遡跡海上。憶昔太平盛世。士大夫之樂趣。有與世人異者。因作琉璃廠書肆後記。爲李南澗大令之繼。甲寅秋日。重作京華之行。時時閱廠舊肆。存者寥寥晨星。有沒世者。有閉歇者。有易主者。而繼起者亦甚眾。則後記已可與李記同作宜南掌故矣。因全錄書鋪名目。以志今昔之感。廠東門外路北有文光樓石氏舊鋪。入門路南有宏遠堂趙氏。主人名聘卿。得正文齋譚氏殘餘。據爲奇貨。再西有修文堂黃氏。曾有宋本徐節孝集三十卷。絕精。傳

是樓舊藏也。又文寶堂曹氏舊鋪。路北有晉華書局孔氏。爲譚正文之親串。亦時時有譚氏書售出。再西有文益書局張氏。路南有有益堂丁氏。榮祿堂丁氏。松筠閣劉氏。槐蔭山房馬氏。二酉齋傅氏舊鋪。寶華堂張氏。亦舊鋪。文盛堂劉氏。翰文齋韓氏。韓子源書甚多。兼售字畫。再西則孔羣社張氏。文友堂魏氏書最多。余之明板二妙集五卷本。說文篆韻補。均于此肆得之。肆雅堂丁氏舊鋪。再西有直隸書局。曾有朱本范忠宣集二十卷。元本淳南遺老集四十五卷。廠橋以東之書肆盡于此矣。越橋而西。路南有文琳堂馬氏。萃文齋常氏。均舊鋪。又有宏道堂程氏。來薰閣陳氏。路北有維古山房崔氏。路南有善成堂孫氏。曾經堂

劉氏。均舊肆。文雅堂郭氏。保古齋殷氏。袁抱存之北宋本
北山錄得于此肆。再西有同古堂張氏。本爲墨盒鋪。兼售
舊書。得曲阜孔氏。濰縣郭氏。兩家之書。舊槧精鈔。燦然盈
架。袁抱存之眞宋本白文八經得於此。路北有修本堂岳
氏。路南有會文堂劉氏。九經堂劉氏。鴻寶閣崔氏。再西路
北有文英閣丁氏。路南有鑑古堂郭氏。余之陳拾遺集得
於此。又有述古堂于氏。路北有玉生堂胡氏。路南有文煥
堂趙氏。路北有敬業堂丁氏。橋西之肆。至此而止。再西出
廠西門。同好堂閻氏舊肆仍在焉。石印本鉛字本天然墨
觸目皆是。世風之變。日趨日下。不知所止矣。

張石銘造金剛經塔記

自佛法入中國以來。造象構塔。大都爲親祈福。以延壽而化災。孝子之用心。百方經營。所以安吾親而已。吳興張君石銘之母氏桂太夫人。桂琴甫先生之長女。幼承庭訓。言動必於禮法。及歸張哲甫封翁。處境豐腴。而崇儉戒奢。數十年如一。日。石銘幼孤。以母兼父。毓成偉材。恆以拯溺救貧爲急務。居恆茹素。潔治一室。手牟尼。危坐其中。誦金剛經。寒暑無閒。年臻七十。不令稱觴。以筵資助育嬰堂經費。又於南潯鎮之造眾安界河二橋。以濟行人。爲善不求報。天亦報之以福壽康甯焉。石銘爰于家之適園。相度基址。建長生塼塔一座。而以唐揭柳誠懸書金剛經鉤摹勒石。藉申孺祝。用博慈歡。昔大雄氏所說大般若經六百卷。凡四處一十六會。此金剛經

實當第二處第九會第五百七十七卷。姚秦鳩摩羅什始用華言譯出。而梁昭明太子復分爲三十二章。潘次耕云。金剛一經絕相離名透宗該教。灼然爲經中之王。文人學士固宜竭筆墨之能。莊嚴供養。柳誠懸書此經。備盡楷則。爲米海嶽所賞。賈似道得搨本亦藏以自豪。宣和書譜有唐張欽元釋曇林。宋王荊公。蘇東坡。黃魯直。元趙松雪皆書之。今得燉煌石室唐搨本翻以入石。仗佛力之庇蔭。欣慈算之縣延。留法海之鉅觀。作藝林之墨寶。豈不偉哉。歲在強圉大淵獻小陽月江陰繆荃孫記。

與張石銘劉翰怡書

承以刻書下問。謹分別以對。凡刻叢書。亦須定一宗旨。采書

須全。刪節者不錄。須雅。平常者不錄。習見之書。或得後定本校補本。亦可刻。又宜以類相從。如經學朱派。只朱元鄉先輩罕見者可刻。明及國朝不宜刻。漢派在兩經解外均可刻。未成者不刻。一經類。周易單疏。尙書單疏。本朝刻儀禮。陸爾雅刻二種。餘無刻者。一史類。朝野雜記。東都事略。校記兩種。朱子同登錄。文謝同年錄。元元統題名錄。洪武題名錄。建文題名錄。此是一類。年譜是一類。唐宣室志。精孫鑑下閑談分類夷堅志。宋洪夷堅續志。金元好問。湖海新聞夷堅志。元無名。是一類。已發一年餘。刊刻書先校底本。是最要事。然有佳本方可校。不宜空校臆改。校又須舊刻舊鈔方可據。依如司空表聖集。明單刻本未見。只可以席氏爲主。以唐音統籤輔校之。

如全唐文、全唐詩、全唐詩選，不必攙校。凡官本書空白填足。胡虜均改他字。萬不可據。定州王氏畿輔叢書劉賓客集，據全唐文改字。此書便不足重。四庫聚珍本均有此弊。不如舊刻舊鈔者在此。卽不全，有一卷校一卷，有二卷校二卷，所以舊有不全書亦可收。又可鈔配成全璧也。

辦書

一、先設一總匯所。同人約定幾日一茶敘，商酌要事。

一、刻字須覓向來能任事之殷實鋪戶，多雇寫手，分寫校定，分致刻匠。

一、滬上刻手不多。二君同舉盛業，必不敷用。常州先哲遺書，（甯）鄂分辦。丁氏武陵掌故，杭甬同刊。今宜分送湖北、江甯、

蘇州三處。以便速成。

一、校對須添數位。粵東書局分校。以葉計。每葉二分。一次百葉。不過二元。校不速不送。校不精亦不送。有事之人可以帶閱。比延定按月授修。較爲活動。須總匯處有人收入。送敝處一核。再送他位複校。

校需六次。兩人初校覆校。改錯改完。總校辦畫一。揭籤發刻。刻成校亦同之。改好印清樣。

一、先請二君將所藏欲刻之書檢出多種。分至佳。其次兩單。至佳者先刻。其次在可刻可不刻之間。後有佳者卽換去。珂鄉先輩之著述。如張秋水、施北研、溫鐵華、沈子惇之著作。廣布爲是。於宋元鄉輩文集。尤宜搜求。雖有刻本。刻亦

不妨。

一、守山閣刻書。在文瀾閣鈔校。見張嘯山日記。此時江南圖書館書最多。荃孫按目搜求。有應刻者。託人鈔寫。一、書有數本。須擇至精者。每書必序原委異同。多者撰校勘記。

與周湘舲書

昨示石翁欲辦金石志。在續德甫萃編。甚盛舉也。自來歐趙開山。只有目錄。洪氏隸釋始載全文。中州關中。仍尋歐趙之例。德甫錄全文。加攷據。前人所記。同人所考。始集大成。自周至金。成書百六十卷。爲談金石者一大家。原書二百卷。書未刻成。德甫沒遂截去元四十卷。而後出之。碑至多。欲續之者數家。孫淵如嚴鐵荃孫見客彙。

橋首續之。止成平津館金石萃編二十四卷稿本。存留荃孫處兩年。缺一冊未收。後歸沈仲復。葉紉蘭擬續之。見顧澗賞思適齋集。瞿木夫續之。成古泉山館金石文字一百二十卷。未刻稿本已散。陸劭聞續之。止成四十卷刊行。內有目無文者太多方彥聞續之。止成四卷。陸星農太夫子續之。成一百二十卷。業已成書。荃孫通體讀兩過。並手鈔其目未刊。今清本在江西巡警道署失去。稿本在家。孫曾未必能刊。陸存齋所輯荃孫更不足道從前亦思續之。後揣才力難繼。中止。所收搨本萬餘種。編目錄十八卷。後收者又及二卷。蓋亦千種。石翁續萃編須以二百卷爲限。荃孫之所藏及所得書。幸未散失。及今爲之事易功倍。然此事非書目可比。釋文校字必得明白。而年輕者三

四人助理。方能編成草稿。至於修飾考據。逐漸成之。金石釋文最難。即各書所采亦須核對一遍。校字形。形須照碑。不畫行。碑小者數寸。大者數丈。伏地而視。升桌而書。非老年人所宜。又寫官兩人。校對一人。荃孫只可指揮一切。總其成耳。德甫萃編。延仁和朱朗齋。嘉興張石匏。嘉定錢同人。共爲之也。必需一二間閒房。爲攤開釋文。又廿二省通志。須備羅列兩旁。一面查較便。再山左金石志。畢秋帆阮文達同編。寰宇訪碑錄。孫淵如邢雨民同編。可否許荃孫與石翁聯銜。則從前未成各稿。一并彙入。夙志能償。分外踴躍。荃孫所得各書。另單呈閱。均藏篋中。搜羅多年。爲此一舉。至於潤筆。自不計較。統望與石翁籌之。亦須書目竣後。再行舛稿。

與顧鼎梅變光書

鼎梅道兄。前在文藝雜誌得讀手筆。先已傾倒。以爲新學橫流之際。海內尙有同志。步歐趙之後塵者乎。昨承郵示河朔訪古四則。尤爲心佩。內金石目與隨筆。至精至善。第一則似可編入隨筆。第三則現未搜得者。可俟日後。昔人謂之待訪。至舊書誤收誤攷。宜另立訂誤一目。未知尊意以爲何如。荃孫自廿一歲有志金石之學。身自搜訪。手自搃搨。所歷之境。見焚風金石目自序。亦時見諸語石。常訪襄城之石門玉盆山。深月黑夜不能歸。蜷宿岩下。與丐爲伍。明日出險。與友朋言。無不大笑。爾時不以爲苦。反以爲樂。迨處境稍裕。必攜搨工自隨。否則繙書開目。令工往搨。在京師得李雲從。在金陵

得聶明山。雲從以往揭好大王碑出名。明山亦在安徽得石牛洞。浮山、齊山諸石刻。語石推爲北李南聶。皆荃孫所蓄之工人也。現無其人。荃孫亦無此豪興矣。昔年同志如潘文勤、師梁杭雪、盛伯希、葉鞠常、門人王文敏。今只存一鞠常。新得一從游者吳印臣。然均不能如閣下身歷奇境。目驗全碑之詳備也。在蜀曾有訪碑十二圖並記。是時精神湛足。遠望造象碑形。可斷爲何代物。十能得其八九。今年逾七十。只可讀閣下書。權當卧游。亦屬大幸矣。

復顧鼎梅

鼎梅世仁兄閣下。奉讀環雲。藉知世好。丙子年姪得詞林者不乏人。如閣下之閎通淹雅。著作等身。真不易得也。昔在西

安得見孟晉。齊集柯遜老又示以毛君著作。家學師承。鼎原有自。勇猛精進。當成文學一大家。拭目望之。金石日出。聞之欣慰。結習難忘。老猶如此。前所云云。不過爲元迺賢志所囿。訂誤統編。尊論極是。孟縣等六志止無武陟。按圖不如目驗之。堦昔年編目。止據原箴。未能詳悉。誤處太多。與兩訪碑錄同。訂不勝訂。惟不收磚瓦。題名造象。彙聚於最初刻之下。似略勝之。印本已完。現在甯寓。糾工續印。成書卽寄。先呈敝集十三冊。石印碑志十七種。不改尺寸。似勝宜都。另一分轉呈范觀察。回杭務望過舍下一談。炯齋在此。又廬江劉慧之藏搨本極多。均可接洽。荃孫所得劉燕亭搨本居多。劉慧之得孫淵如搨本又舊於劉矣。海內金石除貴州外。安徽江西獨

少。荃孫在江甯。因有不爲齋隨筆。搨到潛山題名。因瞿木夫年譜。搨到太平府金石。因齊山巖洞志。搨到貴池金石。江西只得通天巖題名。今見大著隨筆。江西亦復不少。可見搜訪之不力。著述者不留意耳。江蘇志惜未成。甯鎮兩府亦搜訪數十種。甫到常州。而革命起。遂無復重理者。可歎可歎。致洛陽令曾辛盒。

辛盒仁兄。家鄉咫尺。未晤盛顏。頃顧鼎梅世兄函知。閣下政事餘閑。篤嗜古學。抱金石之學。處金石之窟。搜羅保護。不遺餘力。下風引領。曷禁神馳。荃孫年少時。亦復沈迷於此。蹤迹具金石目自敘中。南華北李。皆昔年所招致者。今華李均逝。家人田福亦復奄忽。荃孫志氣頹唐。只能購致。不敢云搜訪。

矣。近今地不愛寶。所出愈多。黃畢二公所著已成。椎輪姚楊兩編更無足論。閣下能重撰否。珂鄉風雅之藪。崑里瞿氏之書墨緣。邵氏之畫閣下之金石。可鼎足矣。金石目一部。乞晒存。近又得二千餘種。續日尙未成也。

再致辛盦

昨奉環書。並承贈吹萬樓石墨多種。名品精拓。虛谷小松。不得擅美於前矣。旣感謝。亦豔羨。各石均歸篋篋。免致流入外洋。將來攜以南歸。駕靈巖五志之上。新通志立僑石一門。專爲此也。存古閣古物。亦仗地方官保存。士紳有可談者否。中州士多朴陋。可慮。魏闕是曹魏。蘇氏何人。有考據否。蘇闕與趙闕競爽二元。亦與元演元颺作耦。大覺寺額。慕之多年。韓

志見過其夫人志。想近年出土也。君表兄京師熟人。常昭金石。亦曾賜讀。南中得一唐碑。已屬不易。珂鄉三幢。敝處止一開元幢。建炎紹興建軍兩牒一朱志。皆荃孫搜得者。昔人著錄宋元八九種耳。弟在京亦得兩唐記拓本。尋出卽寄政。郎晦之事蹟考

注陸宣公奏議。經進東坡文集事略。俱宋郎煜撰。阮文達公進呈奏議云。郎氏事蹟無所考。文集事略見張金吾藏書志。按郎煜字晦之。杭之鹽官人。早學於張氏九成。後學於于氏恕。以儒學知名。嘗編橫浦語錄十二卷。其閒論語奧義。讀者疑焉。蓋橫浦自有論語解。亦何假此發明奧義。人以問晦之。晦之曰。此非公之文也。語錄亦有附會者。工部侍郎郎簡致

仕名德赫然。人問晦之曰。杭無他郎。當與侍郎同一譜。晦之曰。我家白屋。豈可妄攀華貴。識者韙之。淳熙十四年。特奏名得官。奏進注三蘇文及陸宣公奏議。未及任而卒。今署銜迪功郎紹興府嵊縣主簿。卽其所終之官。而剡錄無姓名。蓋得官而未任者。阮文達公撰提要。不知其事蹟。故檢臨安志清波雜志別志記之。書名注陸宣公奏議。與注東坡先生詩同例。郎進書表末云紹興二年。而表中稱至尊壽皇聖帝。乃在光宗受禪之後。紹興當作紹熙。表文有發揮於元祐。淳熙之盛。則紹興信訛矣。初見半葉九行。行十八字本。歸安姚彥侍藏。又見半葉十二行本。歸安陸存齋藏。並有明翻刻本。文集事略。李滄葦書目止得二十八卷。後歸張月霄。後吳興張石

銘得一本。自卷一至四十不全同。而又非月霄本。沔陽田復侯在日本得島田舊藏六十卷。完善無缺。復侯在鄂交陶子麟影刻。革命驟起。分寫分校諸友各自亂竄。書遂遺失不全。眞天壤閒恨事。

國史儒林文苑兩傳始末

乾隆三十年九月十五日。

敕修

國史

上諭內有曰。且

如儒林亦史傳之所必及。果其經明行修。雖韋布不遺。又豈可拘於品位。使近日如顧棟高輩。終於淹沒無聞耶。諸臣其悉心參考。按次編纂。以備一代信史。至嘉慶庚午。阮文達公由浙撫降編修。充國史館總纂。荆儒林文苑兩傳。總裁以官書無證尼之。文達答以私家傳志本書敘例卽其證也。而

以全謝山文內集句成篇爲法。總裁允之。奏明開辦。阮引

高宗上諭以顧棟高冠首。成儒林傳四十四篇。附傳五十餘

人。未及進呈。壬申八月。署漕運總督。將彙本交館。文苑傳未

撰。後顧南雅純爲提調。始進呈。當在嘉慶末年。按嘉慶十七年。簡雲南學

政年同京據彙立傳。改顧炎武傳居首。總裁戴文端公進呈

時。出毛奇齡於文苑。去沈國模。談泰桂馥。錢澄之。方中通。朱

鶴齡。臧庸。閻循觀。汪紱。金榜。王鳴盛。丁杰。任大椿。孔廣森。張

惠言。孔興燮等十七人。文達不以爲然。而載被刪諸人入彙

經堂文續集。各人均載表字。各書均注出處。跋言官書不入

私集。不取之彙。不妨收之。合肥學舍札記。雲臺先生左遷編修。充國史總纂。爲張皋文惠言

作傳入儒林。後出撫江西。有某尙書者。以皋文所著書顯倍

朱注。去之一時士論大爲不平。爭欲借皋文弟宛鄰琦徧詣

諸史官爭之宛鄰不肯曰先兄宜入儒林與否將來自有定論若如此求人卽與奔競何異非先兄意也道光甲辰方俊蔡宗茂爲提調另行刪并去表字出處復收朱鶴齡閻循觀汪紱三人卽坊間所刻四傳是也光緒庚辰總裁欲續修兩傳廖穀似壽豐爲提調特派李苾園端榮汪柳門鳴鑾陳伯潛寶琛惲次遠彥彬四人主修後穀似外簡諸公均出差荃孫甫到館蒙總裁寶文靖公奏與譚叔裕宗浚合辦四傳儒林文苑孝友隱逸乙酉叔裕外簡荃孫獨任其事首尾四年以講學者爲上卷注經者爲下卷以嚴衍爲明人去之薛鳳祚諸人人疇人傳各督撫奏請者有可入有不可入者分別注於下總裁允進呈時夾片更正後徐中堂爲總裁交紀大奎入儒林傳荃孫分辨紀氏之易是參同契類爲道家之易非

經學家之易。徐相國不學。不能分別是非。忌者又從而擠之。遂至積不相能。而荃孫亦奉諱回籍。瀕行四傳彙均成交館。徐中堂不辦進呈。初彙留篋中。本欲刊入私集。費重而止。光緒癸卯王文勒公爲總裁。惲孟祿統嘉余子厚堃爲提調。又據荃孫舊彙重辦。添入路德劉沅蔡壽祺諸人。雜糅更不可言狀。今史館仍交理董。卽取舊彙增刪。志在明一代學術之源流。而無所偏倚於其間也。

常州先哲遺書正續集緣起

光緒壬辰荃孫供職詞垣時。同鄉屠敬三刻常州駢體。風行一時。汪子淵自天津來云。盛公欲刻常州文存。以敵駢體。時伯溫杞懷寶箴寶梁集議。均以爲與其選文。何如刻書。遂有

常州先哲遺書之舉。屺懷子淵函達盛公。公來函自任刻資。令荃孫任搜輯並校勘。時荃孫乞假赴鄂選匠徵書。先搜舊篋無者借之友人。寫之浙中。文淵閣。至丁酉成書四十種。六十四冊而止。此初編也。後十年丁未。盛公爲海豐吳侍郎仲懌慫恿再刻。仍延荃孫搜輯校訂。僣分爲三集。其九十五種。不意辛亥九月革命變起。盛公竄身東瀛。荃孫亦走避滬濱。友人工匠風流星散。王子。盛公自東瀛致函就已刻者收束。只成此數。其訂一百有四冊。乙卯冬日始行印行。嘗聞之曹倦圃云。古人竭一生心力辛苦成書。大不易事。渺渺千百歲。崎嶇兵攘劫奪久之。僅而獲免。可稱至幸。如遇賞音者繡梓通行。前人之書獲傳。已之名不亦附之以傳哉。然欲傳古

人之書。當自鄉先輩始。夫前輩著述。府州縣志連篇累牘。語其實在。百不一存。求幸存者爲之刊播。尤當擇足本精本。校勘不苟。至若近人著述。泰斗其瞻。流風餘韻未盡漸滅。蛛絲馬跡搜獲遺編。見知聞知。八求四當。既傳其書。卽傳其人。萃前輩之精神。爲後人之模範。使文學之鄉。處處能傳其先哲。豈不大快。亦有過於珍弄。銅篋鑿楹。人有求者。堅稱無有。甯飽於蟲鼠。或投諸水火。不使流傳。倦圃所謂非與前人有深仇宿怨。不至於此。何其語之沈痛哉。然辛亥之難。所發各書。有全失者。有缺失一二冊者。約三四種。有校勘已就者。有寫未及半者。約五六種。變出意外。保護無從。方知前人珍弄。不令人窺。不得謂之失策。如明蔣一葵之堯山堂外紀。夏樹芳

之消暘集。國朝趙懷玉之亦有生齋集。卷帙既重。後嗣亦頗不展。恐難再付剞劂。是亦作者之不幸。舊目尙存。爰記緣起。今盛公老病。予亦衰頽。然同鄉諸君好古而有力者。尙不乏人。庶而續之。尤拭目而望焉。

常州先哲遺書第一集

梁至元

經類

詩傳旁通十五卷

元梁益

江陰

文淵閣傳鈔本

三續千文注一卷

宋葛剛正

江陰

海源閣影宋刻

史類

吳中水利書一卷

宋單鏐

宜興

守山閣本

遂初堂書目一卷

宋尤袤

無錫

說郭本

子類

五行大義五卷

隋蕭吉

武進

佚存叢書本

宜齋野乘一卷

宋吳枋

江陰

舊鈔本

梁谿漫志十卷

宋費衮

無錫

影宋鈔本

萬柳溪邊舊話一卷

宋尤杞

無錫

舊鈔本

對牀夜語一卷

宋范晞文

靖江

舊鈔本

集類

昭明太子集五卷

梁蕭統

武進

影宋鈔本

文選注考異一卷

宋尤袤

無錫

影宋鈔本

蕭茂挺文集一卷

唐蕭穎士

武進

舊鈔本

文恭集四十卷

宋胡宿

武進

聚珍板擺印大典本

春卿遺藁一卷

宋蔣堂

宜興

天啟刊本

摘文堂集十五卷

宋慕容彥逢
大典本

宜興

文淵閣傳鈔

毘陵集十六卷

宋張守

武進

聚珍板擺印大典本

鴻慶居士集四十二卷補遺二十卷

宋孫覿

武進
借書園校鈔影宋

本

內簡尺牘編注十卷

李祖堯注
乾隆刻本

蔡煥補注

無錫

丹陽集二十四卷

宋葛勝仲
典本

江陰

文淵閣傳鈔大

梁谿遺集二卷

宋尤袤

無錫

道光刻本

歸愚集十卷

宋葛立方
本

江陰

丹鉛精舍校鈔影宋

附信齋詞一卷

宋葛邲

名家詞本

定齋集二十卷

宋蔡戣

武進

文淵閣傳鈔大典本

牆東類藁二十卷

元陸文圭

江陰

世德堂校刻大

清閤閣集十二卷

元倪瓚

無錫

城書室刻本

龜巢集二十卷

元謝應芳

武進

鈔足本

韻語陽秋二十卷

宋葛立方

江陰

正德刻本

共二十七種

明

第二集

經類

象像管見五卷

明錢一本

武進

萬歸刻本

史類

皇朝名臣琬琰集二十二卷後集二十卷續集八卷

明

徐紘

武進

嘉靖刻本

恩卹諸公志略一本 明孫慎行 武進 海甸野史本

長安客話八卷 明蔣一葵 武進 明刻本

荆溪外紀二十四卷 明沈津 宜興 嘉靖刻本

天山年譜一卷 明鄭鄭 武進 崇禎刻本

得月樓書目一卷 明李如一 江陰 士禮居鈔本

子類

景仰撮書一卷 明王達 無錫 影鈔本

困思鈔三卷 明孫慎行 武進 傳鈔本

韻石齋筆談二卷 明姜紹書 武進 活字本

陽羨茗壺系一卷 明周高起 江陰 粟香室本

茶苑二十卷 明黃履道 武進 精鈔本

未刻

戒庵漫筆八卷

明李嗣

江陰

藏說小萃本

堯山堂外紀一百卷

明蔣堯臣

武進

明刻本

未刻

延州筆記四卷

明唐觀

江陰

藏說小萃本

未刻

灼薪劇談二卷

明朱承爵

江陰

嘉靖刻本

未刻

公餘目錄一卷

明湯沐

江陰

藏說小萃本

未刻

宦游紀聞一卷

明張誼

江陰

同上

未刻

暖姝山筆三卷

明徐充

江陰

同上

未刻

集類

容春堂前集二十卷後集十四卷續集十八卷別集九

卷

明邵質

無錫

慎獨齋刻本

未刻

方山文錄二十二卷

明薛應旂

武進

嘉靖鈔本

吳文肅公摘彙四卷

明吳儼

宜興

鈔文淵閣本

荆川集十八卷

明唐順之

武進

康熙刻本

水南集十卷

明張袞

江陰

嘉靖刻本

賜餘堂集十四卷

明吳中行

武進

萬曆刻本

小辨齋偶存八卷

明顧允成

無錫

萬曆刻本

雙溪集八卷

明杭淮

宜興

傳鈔文淵閣本

未刻

消渴集二十二卷

明夏樹芳

江陰

彙本

未刻

從野堂集八卷

明繆昌期

江陰

崇禎刻本

落落齋集十卷

明李應昇

江陰

崇禎刻本

金忠潔公文集二卷

明金鉉

武進

傳鈔本

辟堆山先生前集鈔一卷

明薛宗

武進

輩學齋校鈔本

存餘堂詩話一本

明朱承爵

江陰

藏說小萃本

共三十三種

第三集

國朝

經類

左傳集解三十卷

孫星衍

陽湖

彙本

未刻

毛詩口箋十卷

秦松齡

無錫

康熙刻本

說文諧聲譜二十卷

張惠言

武進

彙本

未刻

史類

三朝野記十卷

李遜之

江陰

舊鈔足本

東林列傳二十四卷

陳鼎

江陰

康熙刻本

未刻

留溪外傳十八卷

陳鼎

江陰

康熙刻本

雜詒五卷

楊名三

江陰

舊鈔本

求是齋金石錄八卷

丁紹基

武進

彙本

子類

陳定生遺書三卷

陳貞惠

宜興

康熙刻本

暨陽答問四卷

蔣彤

武進

活字本

衆硯瑣談三卷

湯大奎

武進

亦有生齋刻本

午風堂叢談四卷

鄒一桂

無錫

嘉慶刻本

飲淥軒隨筆二卷

伍宇澄

武進

伍氏叢書本

初月樓論書隨筆

吳仲倫

宜興

別下齋刻本

學古文緒論

吳仲倫

教經堂談藪六卷

徐書受

武進

嘉慶刻本

集類

學文堂集二十二卷

陳玉璣

宜興

康熙刻本

青門集三十卷

邵長蘅

武進

增編本

正誼堂集二十三卷

董以誥

武進

康熙刻本

微泉閣集二十卷

董文驥

武進

康熙刻本

清芬樓文集二卷

任啟運

宜興

乾隆刻本

亦有生齋文集五十卷續集八卷

趙懷玉

武進

道

重編孫淵如文集二十卷

岑孫

棠本

拜經文集二卷

臧庸

武進

刻本

丹稜堂文集四卷

蔣彤

武進

活字本

止庵遺集四卷

周濟

荆溪

鈔本

宛鄰文六卷 張琦 宜興 宛鄰叢書刻本

端虛勉一居集二卷 張成孫 武進 輩學齋刻本

齊物論齋集六卷 董上錫 武進 道光刻本 未刻

賴古堂文集八卷 湯□□ 武進 宛鄰叢書本 未刻

吳山子文鈔 卷 吳育 武進 未刻

文翼三卷 吳鉉 武進 未刻

共三十二種

藝風堂文漫存卷三

藝風堂文漫存卷四

江陰繆荃孫

乙丁槧

跋

春秋經傳集解跋

春秋經傳集解三十卷。每半葉八行。行十六字。小字二十六。高七寸九分。廣四寸四分。白口雙邊。口上曰秋幾。在上魚尾之下。葉數上有一。每卷後有經傳若干字。注若干字。總若干字三行。按春秋經傳集解。宋本最多。而朱樓臧宋大字本。行合。小字數不合。相臺本行合。字數亦不合。餘皆十行本。首有春秋總要。爲他書所無。字方若碑。墨黑如漆。尤爲朱本之至佳者。有乾學朱文小方印。徐健庵白文小方印。

宋板元印宋書跋

宋書一百卷。次行題沈約新撰。小題在上。大題在下。每葉十八行。每行十七字。高七寸二分。廣六寸二分。白口單邊。版心有字數及刻工姓名。紹興眉山刻七史之一。有元補。無明補。宋刻方整。元刻流麗。紙墨俱古。卷三十四三十三葉有至元十年杭州不彌刊。不卽錢字。前人未舉出。有元禮部官書長印。季滄葦印。卽季氏書目所著錄者。爲明文淵閣舊物。陸存齋所見卽此書。詆爲僧父者。卽蔣香笙太守。由蔣入費。今歸吳興嘉業堂劉氏矣。頃借出詳校。方知是元代印本。缺紀卷六至十。志卷四。傳卷三十五至六十。共缺三分之一。以嘉靖補版配。亦係補版時印本。脫落尙少。字畫清朗。與後印不同。

存齋以爲無一修板者。未覩全書也。陸考穆云是鄭穆。又云當有穆序。惟晁公武不能辨爲穆校。恐紹興重刻時序已缺矣。陸說爲確。至云約書例稱魏爲虜。列傳弟六張暢傳多稱魏上。與南史例同。而文不同。鄭穆疑非約書。愚謂暢傳多與魏臣李孝伯問答之辭。非史臣之辭。故言必稱魏主。史從實書。不能改而稱虜。未必非約原書。穆說非是。按此書稱高祖。而此篇趙倫之王仲德兩傳每稱武帝。暢傳大書魏主拓拔。燕南征。非問答之辭。恐非約書。鄭穆之言未可謂非。七史無宋印。所見止傅沅叔藏南齊書。與此同。亦有禮部官書印。所出同也。今以紀傳志互校。及晉書、南齊書、通鑑、定沈氏之誤。又取南監本、汲古本、殿本考證錢氏考異、定校刻之誤。朱本

是者固多。誤者亦復不少。南監汲古源出此本。殿本據北監本。與南監不同。校竟又得合州張石卿森楷校勘記六卷。苦心績學之士。刺取獨見者增入。獨所據書少。頗多辭費耳。

按少帝紀各本俱無贊。辛楣先生遂疑非約本書。此本缺弟四葉。然弟五葉存則創業之君。自天所啟。守文之主。其難矣哉。十六字的是少帝紀贊語。前人均未見過。

唐書藝文志跋

唐書藝文志四卷。宋十行十九字本。從南宋閩中魏氏刻唐書抽出。高六寸五分。廣四寸三分。黑綫口單邊。無大小字及刻工姓名。而字畫之勁。紙墨之精。並無補葉。在宋本中亦屬甲等。宋諱相則玄殷序貞禎徵謹慎胤昂楷敬惇敦作字不

成。是理宗時刻本。廬陵改舊唐書經籍爲藝文。經部增一百十七家。三千三百六十卷。史部增三百五十八家。一萬二千三百二十七卷。子部增五百一家。五千六百一十五卷。集部增四百八家。五千八百二十五卷。然編次雜糅。不如舊書。自漢藝文志原本七略。最有條理。次隋經籍。已不能如漢書之整齊。次舊唐經籍。亦有可觀。廬陵搜羅尙廣。編次甚亂。後人無所適從。不能爲廬陵諱。且有舛錯。如易類何安講疏。疑是何安。周易正義。國子祭酒孔穎達。顏師古等奉詔撰。詔當作敕。僞史類蕭方等三十國春秋。無等字。母止儉記。母當作毋。碁母筵列女傳。碁母當作毋。法家類高頻等隋律。頻當作頴。毋腹古今書錄四十卷。毋當作毋。開元後格十卷。吏部侍郎

兼侍中朱琛。琛當作璟。醫類楊氏產乳集驗方三卷。注揚歸厚。揚當作楊。鄭汪藥方一卷。汪當作注。總集類顏峻婦人集。峻當作竣。又有重複。如小學類蔡邕今字石經論語二卷。一類兩見。正史類李喜漢書辨惑三十卷。舊志作李善。一類兩見。偽史類劉昫燉煌實錄十卷。又見雜傳記類。雜史類虞溥江表傳五卷。又見雜傳記類。故事類葛洪西京雜記二卷。又見地理類。雜傳記類。圈稱陳留風俗傳三卷。又見地理類。唐臨冥搜記二卷。又見小說類。此本亦略有訛字。序給上谷墨三百三十六丸。丸誤九。兔千五百皮。兔誤免。春秋類高貴鄉公。鄉公誤卿。小學類小注二百四十卷。百誤千。起居注類泰始起居注。泰誤秦。職官類六典注。余欽。欽誤敘。傳記類三輔

決錄摯虞注。摯誤塾。張景宗注冀州南宮人。宮誤官。姓氏類
大唐皇室新譜。大誤太。諸子類正書袁準撰。袁誤表。道家類
楊銜之洛陽伽藍記。楊誤陽。慧休雜心玄章鈔疏注瀛州人。
瀛誤贏。小說類趙自勤定命論道書定命錄。注作自勸。殿本
均作自勤。醫家類喻義繁療癰疽要訣。疽誤疽。殿本作疽。江
承宗注鳳翔節度要籍。籍誤藉。別集庾肩吾。肩誤肩。寶叔向
集。注溧水令。溧誤漂。道家類總一百三十四家。一百七十四
部。下接管子不提行。法家類十五家十五部。一百六十六部。
下接鄧析不提行。然佳處勝於南北監本。汲古本者甚多。讀
者當自知之。

三國志補注跋

三國志補注六卷。國朝杭世駿撰。四庫著錄。先生子賓仁舉鴻詞所業經進講義、經史質疑、史記考證、晉書補傳贊、諸史然疑、石經考異、榕城詩話、合刻爲道古堂外集。印行甚少。購覓頗難。坊間所行外集七種。遺去鴻詞所業經進講義、經史質疑、史記考證及補注。加以兩漢蒙拾、文選課虛、續方言三種。今鴻詞所業經進講義散見文集。史證附刻。武英殿本史記各卷之後。質疑刊入鮑氏叢書。惟此注少單行之本。爰付削氏。仍附諸史然疑一卷。以符四庫著錄之舊。並恭載提要於卷首。然就提要摘出之條略爲核對。如王凌謝亭侯一條。在武帝紀注。金陵本已改陵樹。而非文紀。孔晏又一條。金陵本無晏字。陳泰一條。金陵本改州泰。在三少

帝紀。而非明紀。當云武紀之王凌謝亭侯一條。明紀之年三十六。三少帝紀之孔晏又一條。陳泰一條。爲是。華歆傳嚴包交通。考證改嚴字文通。張遼傳大呼是名。汲古本作自名。崔_磅傳陳煒。此三條並無補注。或賓仁刊時有脫逸與。又引魏氏春秋魏略等書。早已亡佚。所引不出類聚御覽等書。注中不注出處。若親見是書者。亦是一病。故拈出以貽世之讀乙部書者。

唐史論斷跋

唐史論斷三卷。宋孫甫之翰編。之翰陽翟人。宋史有傳。前有序。謂唐舊書煩冗遺略。多失體法。用編年之體次序君臣之事。自康定元年修是書。至嘉祐元年勒成唐紀七十五卷。勸

戒之切而意遠者。著論以明焉。論九十二首。觀者毋忽。不止唐之危安。當爲世鑒矣。唐紀不傳。僅存此論。蘇東坡與李方叔云。論褚遂良不譖劉洎。太子瑛之廢。由張說。張巡之敗。緣房琯。李光弼不當圖史思明。宣宗有小善。而無人君大略。皆舊史所不及。今讀其書。中宗廢居均州。當紀稱中宗事迹。太后。開綱目之先聲。公言廢武氏以斥叛逆。景雲年譏不踰年而改元。李鄴辭平章事。恥因宦者而進。不能駕馭。李德裕以致不能保全。識均高于通鑑。溫公之跋。亦深推之。紹興二十七年。南劍州州學教張敦頤。刊于南劍州。端平乙未。東陽郡丞黃準。刊于東陽。此本從東陽本影寫。論前摘書事甚詳。卽之翰唐紀之文。頗與唐書相出入。學津、粵雅、珠塵。均刊論九

十二首。不載書事。則此書爲最完。又黃準跋云見蜀本書錄解題亦云刻板劍州。按張敦頤跋後有校勘官左奉議郎充南劍州州學教張敦頤詳定官左朝奉郎通判南劍州主管學事王筠。左朝散郎添差通判南劍州軍州主管學事王以詠。右朝奉郎知南劍州軍州主管學事許興古。是福建之南劍州。非四川之劍州。何得謂之蜀板。又攷張敦頤字養正。婺源人。紹興八年進士。由南劍州教授歷官知舒衡二州。著有六朝事蹟編類。收入四庫全書。養正一生未嘗至蜀。黃氏陳氏何其不考之甚。殊不可解。此本卷上末有嘉靖癸卯十一月二十日借毛武卿家大字朱刻本校正一行。前有毛晉私印白文。子晉朱文。希世之珍。兩朱文方印。後有西河季子

之印朱文。汲古閣藏朱文兩方印。

諸葛武侯傳跋

諸葛武侯傳一卷。宋張栻撰。宋刊本。每半葉十行。行十七字。高六寸六分。廣五寸三分。白口。板心武侯傳三字。字畫精勁。裝潢古雅。蒐圃跋謂侍講初雕本。信然。此傳不載南軒文集。其闡發武侯生平。攷證極確。述前後出師表。與今所傳字句。間有異同。其後跋云。徵目文獻。不敢存疑。則其所見必有舊本足據矣。傳中玄貞匡恤缺筆。而殷敬勗桓邁不避。避諱亦不盡一。前人圖書有京兆劉氏世家朱文。紹興旌忠哀節之家朱文。分書碑式。南坡朱文鼎式。此三方皆宋元人印。郁印頤培白文。誦芬朱文。兩連珠印。停雲朱文圓印。文印徵明白。

文。徵仲朱文。兩連珠印。文彭印。朱白文。小方印。三橋居士朱文。方印。宋本朱文。腰圓印。三十五峰園主人朱文。方印。汪印。文琛白文。方印。民部尙書郎朱文。汪印。士鍾朱文。兩方印。疊經名家收藏。真天壤間祕笈也。

注王荆文公詩殘宋本跋

注王荆文公詩目錄三卷。一、二、三、十五、十六、十七、十八、廿三、廿四、廿五、廿六、廿七、廿八、廿九、四十、四十五、四十六、四十七、共十七卷。得全書三分之一。宋刊本。每半葉七行。每行十五字。大小字同。高六寸五分。廣四寸四分。白口。板心署詩一。魚尾上字數。魚尾下刻工姓名。據魏鶴山序。雁湖之門人李士美刻。是書在嘉定七年。則雁湖尙在。雁湖歿於嘉定十五年又據嚴悔庵文

集。見第五十卷嘉定甲申胡衍跋。知是撫州。補注在每卷末。又有庚寅增注。在每卷後另葉。修版亦有庚寅換三字。甲申嘉定十七年。雁湖已歿。庚寅則紹定之二年矣。卷後補注有與庚寅補注犯複者。乾隆華山馬氏得元刻。海鹽張宗松爲重開行世。失去魏文靖序。并三十卷五十卷之末葉。因宋史藝文志失載。海內以爲奇書。近涉園後人購得元刻五十卷末葉尙在。欣喜之至。今與此本相校。方知宋元刻之不同。凡解詩意者均在。引書注釋詩者或留或不留。如整篇文字卽均無有。並有元有而宋無者。是元本另一本。非從宋本刪節矣。昔嚴氏得卅四、卅五、卅六、卅七、卅八、卅九、五十、其七卷。又得廿七、廿八、卅五、卅六、卅五、卅七、其六卷。何夢華又索二卷。

去合十一卷。爲全書五之一。內舊寫本三卷。卷端晉府書畫之印。後有敬德堂圖書。與此若合符節。是一部拆零。目錄三卷。更爲元本所無。況元本有劉須溪評點。張注亦刪去。翁覃谿、盧抱經、張芑堂所見所藏。卽此十七卷。嚴氏之十三卷。今不知在何所。

戴剡源集跋

元奉化戴帥初先生剡源集。明朱景濂爲司業時定爲二十八卷。刻於洪武辛亥。嘉靖中周儀求此本不可得。偶得全集之目。而搜求重輯。至隆慶壬申勒成三十卷。萬曆辛巳後裔戴洵刻之。道光庚子郁氏重刻三十卷。并輯札記一卷。刻於宜稼堂。荃孫又得佚文十二篇。刻入讀書記聞。亦有逸詩而

求之未得。今春重刻。士禮居題跋。王君息塵語我。洪幼琴藏鈔本一帙。後有蕘圃跋兩則。荃孫披題跋目。無有幼琴已旋金陵。走取歸逸文。亦止十二篇。與予刻同。而逸詩七卷可喜之至。惟訛字空白。無本對校。原書系何夢華鈔藏。而勞季言校過者。遂尚鈔詩一本留之。而識其原本。婁季言舉易見字。意易之。荃孫亦舉數字。俟再得佳本校之。

魏鶴山大全集跋

魏鶴山大全集一百九卷。宋魏了翁撰。宋刻本。每半葉十一行。行二十一字。高七寸三分。廣五寸五分。白口單邊。首行重校。鶴山先生大全文集卷幾。或云卷之幾。或止數目。無卷之字。板口詩牋表奏議狀劄督府奏陳等各類。作詩幾牋奏幾。

補刻作大全集幾。葉數每卷自爲起訖。只周禮折衷一百四
五兩卷通計。缺十八、十九、三十五、三十六、三十七、三十八、四
十三、四十四、四十五、四十六、五十、五十一、五十二、五十三、七
十五、七十六、七十七、一百零七、一百零八、共十九卷。爲海內
孤本。黃堯圃所藏。錢辛楣所跋。卽此本也。有淳祐己酉吳淵
序。吳潛後序。開慶改元游侶序。明嘉靖三年無錫安國活字
印本。次行署錫山安國重刊一行。後有安國跋。知無錫縣暢
華後序。又有嘉靖三十年邳州高翀本。卷一有邳州知州吳
鳳。郡後學王葵校正。學正李一陽訓導周南編次四行。四
庫據高本著錄。而外間所流傳者止有安國本。安國本卽出
於此本。如卷一缺首葉。游古白鶴山和群祕書絨聞鴉韻和

虞永興剛簡滄江鶴再誕難三題。安本卽從二葉雅州胥罔起。所脫十九卷并目亦不存。後印入全書。想又從他本補足。此書二十八、二十九并卷。七十二卷魏府君純甫墓志銘不完。九十卷策問十二葉。系一百二卷之脫葉。原本亦有空格。有印本模糊字爲後人誤改。安本卽從其誤。是安本出於此本之的證。至一百另八卷止六題。今書安忠定行狀後跋。李夢庚韶卿上梁綸漕使書。在安本六十五。何友諒墓志銘在八十七。只張令君煥道夫墓銘一文。已未唱第後謝恩詩。已未擬進聞喜宴賜進士詩。二詩而已。宵作霄。儻作黨。遷作迂。餘作余。萬作万。維作惟。均別體。同治甲戌吳勤惠公督蜀。出傳鈔安本命刊。因訛誤太多。止錄其清朗者。刊文鈔四十卷。

嗣聞宋本歸吾友孫問青。欲校未得。今由劉君翰怡借到。與王息塵兄對校。而志其緣起。癸丑五月十一日。

鶴山集舊有姑蘇溫溪兩刻。皆百卷。此本搜輯逸篇。並周禮折衷。師友雅言。併刻之。故有大全集之名。渠陽集得之教授張輦。周禮折衷得之提幹何璟。校此刻者清幕朱景行。漢嘉楊起寅。及璟三人。見後跋。

易林注再跋

宣統辛亥。荃孫在學部圖書館。見宋本易林注半部。爲卷三卷四、卷七、卷八、卷九、卷十、卷十三、卷十四、其八卷。校訛脫字。句於仁和吳甘遜寫本上而跋之。是時同事徐梧生言。渠曾藏一十六卷鈔本。庚子之亂失去。殊爲可惜。歲在丁巳。忽見

之友人蔣孟蘋所。毛鈔精絕。亟取甘遜鈔本於京師補校之。首有易林序。後署漢焦小黃周易變卦筮敘。次靈越五雲谿王俞序。後聖唐會昌景寅歲周正五日敘。次焦林直日一篇。皆今本所無。王序見經義攷。卷一乾之泰。宜出驅馳。通利大道。利黃作理。之否。戴日精光。驂駕六龍。戴黃作載。精黃作晶。之蹇。騎狔逐羊。不見所望。徑涉虎穴。亡羊失羔。下有一云亡。羝失羊。黃脫六字之解。闇昧冥語。轉相註誤。轉相黃作相傳之中孚。徵詣王庭。拜治水土。拜黃作并。之既濟。飢餓枯槁。莫人震憐。震黃作莫。坤之泰。雷行相逐。無有攸息。戰于平陸。爲夷所覆。又云敝筭在梁。逸不榮漁父。苦連空。乾黃脫。又云十八字之无妄。延頸遠望。昧爲目疾。頸黃作頭。之坎。齊

東郭盧。嫁我洛都。齊東黃作東齊。我黃作於之咸。芳澤肥壤。
農人豐敵。芳黃作膏之遞。轉禍爲福。負危復立。負黃作傾之。
晉。樹挈累累。締結難解。嫫母衙嫁。媒不得坐。自爲身祠。挈黃
作潔。下有衙當作衙。黃作衙。無此四字之妬。孤獨特處。莫與
爲旅。身日勞苦。使布五穀。陰陽順序。又云伯虎伸熊。德又四
布。黃脫又云以下十字。屯之訟。泥滓汙辱。棄捐溝瀆。爲眾笑
哭。然不顯錄。滓黃作津。爲眾黃作所共。然黃作終。之小畜。搖
心失望。不見所歡。搖黃作淫。之豫。重茵厚席。循臯探藿。雖躓
不懼。反復其宅。猿墮高木。不踐手足。還歸其室。保我金玉。黃
脫猿墮以下十六字。之明夷。蠱室蜂戶。螫我手足。不可進取。
爲身害速。一云蠱螫我足。蜂螫我手。黃脫一字以下十字。之

益水載舟船。無根以浮。往來濟濟。心勞且憂。舟船黃作船舟。
濟濟黃作溶溶。蒙之坤。天之所有。禍不過家。一云左輔右弼。
金玉滿堂。常盈不亡。富如敖倉。黃無一云二字之无妄。織錦
未成。緯畫無名。錦黃作金之旅。重驛關牢。求解已憂。重驛黃
作譚重之中孚。草凋被霜。花葉不長。非時爲落。家受其殃。草
黃作早。落黃作災。卷二需之剝。東郭棠姜。崔氏破亡。棠黃作
堂之大畜。龍降庭堅。爲陶叔後。虯黃作龍之恆。蜩蠓生子。深
目墨醜。蠓黃作螺。訟之比。水流趨下。欲至東海。求我所有。買
魴與鯉。足關路止。黃脫下四字之謙。蟠木折枝。與母別離。蟠
黃作播之遯。疾貧望幸。使伯行販。關牢擇言。多得大牂。一云
疾貧望幸。賈販市井。黃脫一云十字之鼎。虎聚摩牙。以待豚

猶。往必傷亡。宜利止居。一云虎厲其牙。以待犬猪。往必傷殘。
摧敗無餘。利以止居。黃脫一云以下二十二字。師之謙。穿胸
狗。邦僵離旁美下。有一本作旁春。黃脫一本五字。比之坤屯。
爻辭互易。屯殊類異路。心不相慕。牝牛牡羯。獨無室家。一本
末句心不相下。黃無一本八字。卷五隨之乾。鼻目易處。不知
香鼻。君迷於事。失於其居。一云失其寵位。黃脫失於其居一
云六字。之夬。青蛉如雲。城邑閉門。黃閉作閑。卷六賁之訟。羊
驚狼虎。悚耳羣聚。下有一云從風羣聚。黃脫一云六字。之復。
三年生狗。以戌爲母。下有一作三馬生駒。黃無一作六字。復
之歸妹。東行破車。遠反失家。天命訖終。無所禱凶。黃失作室。
之節。簪短帶長。幽思窮苦。瘠蠡小瘦。以病疾降。黃短作跌。蠡

作貌。卷十一損之妬。重門擊柝。陵昧武守。雖驚不懼。一云重門擊柝。介士守護。終有他道。雖驚不懼。黃以一云爲文辭。無重門至一云十四字之歸妹。牧羊逐兔。使魚捕鼠。任非其人。廢日無功。一云卒歲无功。不免辛苦。捕鼠。黃作相捕。脫廢日無功一云六字。益之屯。伯虎仲熊。德義淵聞。使敷五教。陰陽順序。行溢多悔。利無所得。黃無後八字之蒙。飲酒醉酣。跳起爭鬪。手足紛拏。伯傷仲僵。東家治喪。一云伯仲俱損。因以治喪。黃脫一云以下十字。卷十二萃之晉。安坐玉堂。聽樂行觴。飲福萬歲。日受無疆。一云安坐北堂。終夕舉觴。福祿卒歲。日受無疆。黃脫一云以下十八字之井。鳩杖扶老。衣食百口。增添壽考。凶惡不起。一云鳩杖扶身。富及其鄰。子孫壽考。慶弔。

不親。黃無一云以下十八字。之革。霧露雪霜。日暗不明。陰孽
爲疾。年穀大傷。一云不見日月。霧臨霜雪。年穀不登。餽糧日
絕。黃無一云以下十八字。之渙。祚加明德。與我周國。公劉文
母。福流子孫。一云祚周福魯。黃無一云以下六字。困之未濟。
舉事不成。自取凶咎。黃本小字。井之需。大夫行父。无地不涉。
爲吾相土。莫如韓樂。可以居止。長安富有。一云游行諸國。莫
若居韓。相土旣沃。可以長安。黃脫一云以下十八字。之師。側
弁醉客。重舌作凶。披髮夜行。迷亂相誤。亡失居止。一云醉客
酩酊。披髮夜行。迷亂失所。安識第邑。黃脫一云以下十八字。
之豫。同氣異門。各別東西。南與凶遇。北傷其孫。一云同氣異
門。一東一西。兄弟受禍。子孫必凶。黃脫一云以下十八字。之

隨。蜺見不祥。禍起我鄉。行人畏亡。使命不通。一云行人畏懼。邑客逃藏。黃脫一云以下十字。之賁。神鳥五色。鳳凰爲主。集於五谷。使君得所。一云國有禎祥。鳳凰來集。時稱太平。以後齊急。黃脫一云以下十八字。之剝。媒妁先明。雖期不得。齊女長子。亂其紀綱。一云齊女長子。失其紀綱。雖有先媒。必竟不來。黃脫一云以下十八字。之无妄。少康興起。誅澆復祖。微滅復明。大禹享祀。一云微滅卻光。享祀大禹。黃無一云以下十字。之離。高飛不視。貪叨所在。臭腐爲患。自害躬身。一作竊位貪榮。內汙外清。時時暫過。日日禍生。黃刻一作以下皆小字。卷十五節之大過。鳥飛无羽。雞鬬折距。徒自長嗟。誰肯爲侶。一云不順其德。自爲凶咎。黃脫一云以下十字。卷十六中孚。

之需。折若蔽口。父族相逐。失族亡民。不見衛國。黃刻第二句作不見稚叔。第四句作遠去家室。小過之剝。車頓馬疲。黃頓作傾。既濟之節。應門內萌。黃萌作崩。毛鈔極佳。蓋卽徐藏本。輾轉流至江南者。昔見其半。已云大幸。何幸竟校其全耶。

罪惟錄跋

海鹽查東山曾著明書百二十卷。後改左升字非人。書亦改名罪惟錄。爲全謝山吳兔牀所未見。乙卯五月。忽有人攜全部來求售。訂百冊。紀志傳三類。崇禎曰毅宗烈皇帝紀。弘光曰安宗簡皇帝紀。次以魯監國。唐王。桂王。均書曰附志。一天文。二五行。三冠服。四藝文。專錄敕撰書及賜碑五輿圖。六禮。七樂。八土田。九貢賦。十屯田。十一河渠。十二班爵。十三陵志。十四科舉。

十五直閣。十六銓部。十七典牧。十八茶法。十九錦衣。二十學
校。二十一職官。二十二外戚。缺二十三將帥。二十四鹽法。二
十五麻數。二十六封爵。二十七屬夷。據年譜有志三十此所
志宗藩志經筵志錢法志九邊志傳一皇祖無者楊志漕志兵志刑
志北有譜無者銓部志外戚志傳一皇祖徐壽
輝等二皇后傳。
三太子傳。四諸王列傳。五翼運王國列傳。徐壽
輝等六逸運外臣
傳。蔡伯
顏等七啟運諸臣傳。功
臣八抗運諸臣傳。靖
難九理學諸臣傳。
十經濟諸臣傳。十一荒節諸臣傳。三楊諸臣皆建文
朝臣降承樂者十二致
命諸臣傳。十三諫議諸臣傳。十四諷諭諸臣傳。十五清介諸
臣傳。十六乘時諸臣傳。十七循謹諸臣傳。十八文史諸臣傳。
十九武略諸臣傳。二十播匿諸臣傳。二十一隱逸傳。二十二
俠烈傳。二十三獨行傳。二十四庸誤諸臣傳。二十五方外。二

十六藝術。

二十七回誤。

兩傳三人張沈論之曰悔高

二十八

閏懿。

分子

二十九官寺。

明天淵李徵臣論之曰傲

三十

二西蕃。

三十三

蠻苗。

三十四勝國列傳。

三十五外國。

分三十

五類。

另有列朝帝紀逸篇。

列朝逸傳。

均紀傳刪餘也。

東山卒

於康熙十四年。故於鄭氏未睹其終。東山身預莊氏史禍。復

能自著此書。可謂有心人哉。戴名世止以書中書弘光隆武

永祿年號遂罹殺身之禍。此書爲弘光作紀。大書安宗簡皇

帝。又附魯唐桂三王於紀後。論其罪當過於戴名世。而雍乾

書禁嚴時。亦未投諸水火。發現於二百年之後。可謂大幸。每

篇改錯均屬親筆。或自寫半葉。論大半自書。首序及志序亦

自書。然於

本朝未入關前。稱之曰東師。入關以後稱之曰

北師。未加以胡虜之名。亦無醜詆。想亦懲於莊氏之禍與。然列傳分門別類。蹈馬令南唐書之失。又喜說乩夢談徵應。惟恐不奇。覺有倣詭之氣。似非史氏之正宗也。以齊黃屬庸誤是已。以張綵與楊一清並論。且有譽辭。阮大鍼亦不入奸王。實所不解。至以東林爲有心傾新建。而慧不敵新建。致改理學爲門戶。論云。以吾爲君子。以吾等爲君子。必以扶奉吾等爲君子。而外此皆小人云云。則亦是亦不是已。

拜經樓藏書題跋記云。萬季野先生所撰史彙。方望溪侍郎以爲四百六十卷。諸志未成。全謝山庶常以爲五百卷。今此僅列傳二百六十七卷。雖似未全。蓋華亭開雕時亦尚有刪併也。周松靄大令云。此卽查東山之罪惟錄。故有

朱康流張待軒傳及海昌俞子久事。然余未見罪惟錄不敢懸斷。識之以俟知者。海昌備志卽引此記。然則周松靄吳兔牀錢警石管芷湘均未見此書者。

燭火錄跋

燭火錄三十二卷。附錄一卷。吾邑李天根撰。天根字大木。居鵝湖之浣香園。著有雲墟小槩一卷。紫金環。白頭花燭。顛倒鴛鴦三傳奇。其父介軒先生。松有介軒詩草。夕陽村詩草。浣香詞。母辭素儀。項有綠窗小草。絳雪詞。一門風雅。高尚不仕。此書專紀弘光隆武紹武永曆魯監國五王事蹟。附臺灣鄭氏。用編年體。排日編纂。并冠例表於首。體例秩然。論略極爲公平。文亦暢達。惟以引用書目在前。而出處有注有不注。未

知原撰如此耶。抑系鈔胥脫去耶。內有傳聞失實得失參半者。亦有兩說並列。未能折衷者。然出於下邑儒生。亦足見其見聞之廣。編纂之勤矣。內李遜之撰李忠毅年譜。洪士銘撰洪承疇行狀。均不可見之書也。邑志其人其書均未載入。大抵流傳不廣。今得見全書。亦云大幸。

慎子跋

慎子一卷。周慎到撰。到一名滑釐。趙人。墨翟弟子。善用兵。與同門三百人持墨器守宋城禦楚寇。齊宣王喜文學之士。與孟子、騶衍、淳于髡、田駢接。子環淵之徒皆賜列侯。爲上大夫。仕於楚。爲楚襄王傅。到用子良昭常景鯉策。東地復完。之魯。與孟子論用兵于齊。旣而知其道之不行也。迺與其徒許犯

環淵田繫之徒。退老于邯鄲之上。著書四十二篇。據漢書史記作十二
論隋書唐志均十卷。子鈔慎子一卷。崇文總目二卷三十七
篇。書錄解題則稱麻沙刻本五篇。愈傳愈少。四庫據明人
刻本只有五篇。嚴鐵橋據羣書治要有七篇。已多於明本。守
山閣刻之。又輯零句四十二條附於後。亦以爲搜羅略備矣。
今得明慎雲臺懋賞本。刻於萬曆戊寅。分內外二篇。內篇三
十六條。外篇五十三條。嚴輯零句有二十一條在內。雄深雅
健。是法家言。與環淵許犯田繫問答語。楚襄王孟子趙王齊
王問答語。均收之。至於字句與他子書相似。則古書舊例。不
足爲怪。惟無篇目耳。嚴鐵橋張嘯山均未見此本。亦可謂驚
人祕笈矣。

遜庵先生文錄跋

武進惲仲昇先生名日初。號遜庵。又號黍庵。崇禎癸酉副榜。與蘇州楊廷樞、錢禧等共結文社。負盛名。遊京師。謁山陰劉念臺總憲。執贄列門下。念臺告以慎獨。由是體驗一切。先生有用世才。邊事亟。應詔上守禦十三策。不報。浩然歸。兩京繼陷。避地閩廣。遁爲僧名明曇。王師過閩。復起義師圖恢復。兵敗。身僅免。一子死。二子虜。乃散眾歸里。杜門著書。論學重知仁。以格物爲先。而防檢精密。大旨不離慎獨。卒年七十八。著見則堂語錄。完顏氏梓之不遺堂。詩文集無傳本。族裔輯得五十六篇。編爲文錄。梓之家塾。嗚呼。先生當末造。目擊滄桑。發爲文辭。慷慨激烈。有不期然而然者。然國雖亡。身雖隱。猶

得與二三遺民守證人之舊則。抱念臺之遺書。國亡而道不亡。以視今舉三綱五常而棄之。以效法外人。其痛哭又當何如也。壬子四月江陰後學繆荃孫跋。

大學正蒙跋

武進惲皋聞先生名鶴生。康熙戊子舉人。金壇學教諭。少師常熟錢湘靈。工詩古文詞。後晤謝野臣於秦中。道及博野顏氏爲學大旨。心善之。其後蠡令浦君聘過蠡。訪顏先生則已歿矣。因交李氏恕谷。得徧觀顏先生遺書。自稱私淑弟子。因盡棄其學而學焉。力任豐道。其言省躬改過修德習藝之功甚密。日以顏李之學告南方學人。晚歸常州。爲一鄉祭酒。故家子弟多從之游。其後常州問學之盛爲天下首。溯其端緒。

蓋自皋聞云。威縣劉調贊糾同志立習齋學舍於博野。顏曰道傳祠。而以皋聞象配之西堂。東堂則恕谷也。大學一篇出於戴記。宋儒意爲移易增補。焉能盡如人意。先生各還其舊而疏通之。歷舉前人復之古本而證明之。鄭君好改字。前儒夙有異議。況更易之甚乎。是編一出。足當論定。壬子四月江陰後學繆荃孫跋。

夢溪筆談跋

代

夢溪筆談二十六卷。宋沈括存中撰。存中錢塘人。嘉祐八年進士。熙寧中官至翰林學士龍圖閣待制。坐議城永樂事。謫均州團練副使。後復光祿寺少卿。分司南京。卜居潤州以終。夢溪卽其晚歲所居地也。事蹟附載宋史沈遘傳中。是書分

十七門。曰故事。曰辨證。曰樂律。曰象數。曰人事。曰官政。曰權智。曰藝文。曰書畫。曰技藝。曰器用。曰神奇。曰異事。曰謬誤。曰譏諷。曰雜志。曰藥議。共二十六卷。首有存中自序連二目錄。後有乾道二年湯修年跋。宋刻本。每半葉十二行。行十八字。高六寸六分。廣四寸八分。黑口單邊。口上署筆談幾。每條首行頂格。次行低二格。語涉宋帝皆空格而不避宋諱。爲彭文勤公藏本。卷末有文勤公手書四行。定爲宋本。知聖道齋跋云。此書的係宋本。避諱字皆合。上有朱書。乃近人校琴川毛氏刻本所注。墨書自署別號曰海岳。考閩福清人郭造卿。字建初。號海岳。爲戚繼光上客。著述極博。父萬程。戶部主事。母盧氏。所載^①治九年舉葬父母見冰花。事極合。其人從事幕

府。徧遊九邊。故與定襄侯郭登相識。評者尙三百年以上。古香可挹也。陸存齋收入書目者。與此行款同。亦以不避宋諱爲疑。孫淵如則以爲元本。儀顧堂題跋另收半葉十一行。而宋諱則謹避。然決是精本。高出馬毛諸刻萬萬矣。歲在旃蒙單闕跋。

湘山野錄跋

宋本湘山野錄二卷。元人補鈔一卷。續錄一卷。又補鈔首闕二葉。土禮居所藏。手跋之。今歸江甯宗子岱。烏程張君石銘影摹刊之。爲此書第一佳帙。津逮學津兩本不足道矣。每半葉九行。行十九字。至二十一字不等。高六寸。廣三寸五分。白口單邊。刻本止上中兩卷。上卷少首葉。中卷少末葉。餘俱元

人鈔補。中卷補葉後有至正十九年六月十九日覽記一行。刻本首行重雕改正。湘山野錄卷幾。題吳僧文瑩。鈔本同。續錄止作續湘山野錄。不作大字。次行題吳僧文瑩如晦編刻本。仁宗以前御諱有闕筆。餘不闕。黃蕘圃以爲北宋本。鈔本卷下殿中丞程東美條。時陳下注英宗廟諱。續錄李和文公下注犯御名。按和文名遵勗。勗爲神宗嫌名。知亦從北宋本出。刻本中縫作山上山中。鈔本三卷仍作山下。續忽作山四。不作山續。疑所據本與晁氏志所言四卷合。署款吳僧。又與通考所引合。其書成於熙寧。多北宋雜事。以作於荊州之金鑾寺。故以湘山爲名。毛氏津逮。張氏學津均刻之。而張若雲跋云。毛本缺誤實甚。邵版仙從黃蕘圃鈔得宋槧補闕。蓋卽

此本經明樊士寬黃子羽本朝席玉照遞藏今以張本校之。張本尚有誤字。卷上眞宗初詔种隱君至闕條。隱巾韋布。不作隱君。卷中崔公誼條。河北地振振未已。多一振字。亦不作震。續錄眷待耆德條。必有祓桃之臨。不作祓祧。景德初。匈奴扣關。不作寇。鄭工部文寶銘條。篋中畜雷朴一琴。不作畜琴。朴一琴。姚嗣宗條。可惜作窮鱗。不作窮麟。康定中條。今還袞繡告老於家。不作袞紉。柳仲塗條。豈不偉歟。不作韙歟。上卷缺二行。各本同。旁注之字。張本均直下。是宋本鈔本之善也。而此本之訛字。卷上張尙書詠條。絲絲和雨繫偏舟。張本偏作扁。乖崖公條。希夷以詩遣之。遣當作遺。兩處後梁兩入蜀。梁當作果。六快活詩條。建當作述。宋鄭公庠條。而無刻畫。

之名。書當作書。僞吳故國條。皆肆業於其家。肆當作肄。咸平
中翰林條。得自羊野。羊當作莘。卷中真宗居藩邸條。命侍講
邢昂。昂當作曷。安鴻漸條。以拍拭乾。拍當作帕。潘佑事江南
條。謫向人閒卅六。當作三十六。否則七言少一字矣。劉孝叔
吏部公條。已怙於進。撰進當作退。范文正公一條。世祖功臣
卅六。當作三十六。與上文同。餘杭能萬卷條。信矯詩不誣。矯
當作嶠。江南鍾輻條。妻妾云亡數月。妾當作樊。卷下寇萊公
條。無宅起樓臺。宅當作地。丁晉公條。赤洪厓打赤洪厓。前赤
字當作白。真宗國恤條。而事頗安帖。頗當作更。僧錄贊。雷條。
此燐火也。燐當作燐。蘇子美條。自改爲猶子。詬之曰。當作自
改爲猶字。向子美詬之曰。都尉李文和公條。蕭國大長主乘

悅之日。乘字當作垂。肅國召公入。肅字當作蕭。張晦之條。陳
康肅堯咨當連上文。卷四本朝眷待耆德條。入中書預參訣。
訣當作決。慎無及姻戚。無當作毋。嘉祐中條。開封方鞠劾。鞠
當作鞫。晏殊相年七歲。命所乘賜馬。鸛轡送還。下當有旅邸
二字。仁廟初條。傳實受遺。實當作賁。意擊崖當作竟竄崖州。
此宋本鈔本之訛也。至卷四太宗作九絃琴條。宮絃加二十
絲號爲大武。宮絃減二十絲號爲小武。兩宮絃無分別。諸本
皆同。疑有誤字。黃跋以卷中時晏元獻爲翰林學士行脫十
八字。系裝潢穿綫過進。遂減此一行。今倒摺向內作蝴蝶裝。
覽之醒目。乃黃氏所改。今仍舊裝也。樊士寬印上有絃歌里
氏一印。仍是海虞人。黃子羽名翼。嘉定人。席玉炤名鑑。常熟

人。此書見百宋一廬賦。

九月景宋刻元鈔本既成。又得何義門校本。手跋曰。康熙甲午心友於汲古毛氏買得宋槧對校本補鈔一葉。又得錢遵王述古堂舊鈔本。細寫兩本異同。自家寄入京師。因阿凍酌定之。十二月十八日鐙下焯記。所校與此本均合。卷一丁晉公貶崖州條。體風流於謝傅。惟詠蒼苔。眉上校語。謝傅當作謝朓。此用蒼苔依砌上也。卷三夏英公鎮襄陽條。詔中有致仕高年各賜束帛。時胡大監旦薨廢在襄。英公依詔旨。選精縑十匹贈之。胡得縑以手捫之。笑曰。寄語舍人。何寡聞至此。奉還五匹。請檢韓詩外傳及服虔賈逵諸儒所解束帛。彙彙賁於園之義。自可見證。校語容齋云。韓詩外傳及周易正

義皆無其語。文瑩多妄誕。不足取信。按春秋公羊傳。乘馬束帛。注云。束帛。謂玄三纁二。玄三法天。纁二法地。若文瑩以此爲證。猶之可也。中國長公主爲尼條。惟陳文僖公彭年詩尙有記者。云。盡出花鈿散玉津。雲鬟初翦向殘春。因驚風燭難留世。遂作池蓮不染身。貝葉乍翻疑軸錦。梵聲纔學誤梁塵。從茲豔質歸空後。湘浦應無解佩人。校語此唐陽郇伯妓人出家詩也。能改齋漫錄云。唐顧陶大中丙子編唐詩類選中載之。若公主入道。何敢用解佩事也。錄出藉見前輩點勘書籍。曲暢旁通。不盡在本書中討生活。可爲學者讀書矩範。

藝風堂文漫存卷五

江陰繆荃孫

乙丁彙

跋 祭文

東觀餘論跋

東觀餘論二卷。宋黃伯思撰。伯思字長睿。有文集一百卷。見李忠定撰墓志。南渡後失傳。唯存餘論。此宋紹興丁卯其子訥刊於建安漕司本。每半葉十行。前半卷行廿字。後半卷十八字。目錄半葉九行。行十八字。高八寸四分。廣四寸八分。白口單邊。上魚尾東觀二字。下魚尾下葉數刻工人名。長卷目錄在外一百四十五葉。目十三葉。五葉以下缺。計百四十六葉。內越七十三一號。文不實一百四十五葉。爲無錫華氏故

物有眞賞華夏二印可據亦見眞賞齋賦中後歸虞山絳雲
燼後頓毀其半牧翁影寫補全手自校之延令宋版書目其
一不著卷數者卽此本也世間流傳止有汲古本爲嘉定閒
攻媿樓氏復以川本參校已在後六十餘年此雖閒有訛字
自是第一刻迺出樓刻之上虞山以墨筆校刪仍照樓本校
定今舉其善於毛本者

法帖刊誤卷上

按上下卷一行黃伯思官銜毛本俱脫

左朝奉郎行祕書省祕書郎黃伯思撰

第一帝王書 稱其爲篤學爲字毛本脫 自非通古那甚
至爾毛本脫自字

第四梁陳唐人書

褚河南一條連上毛本分

第五雜帖 宋脩一條連上。毛本分。

法帖刊誤卷上

法帖刊誤卷下

左朝奉郎行祕書省祕書郎黃伯思撰

第六王會稽書上 諸酸感至比加。毛本脫諸字。足下尙停數日及失得失年長足下小大佳也。毛本作得失承平未佳足下大小佳也。

第八王會稽書下 干嘔淡悶。毛本作淡悶干嘔。

第九大令書上 異苑一條宋本無。元度一條連上。

法帖刊誤卷下

王玠跋許翰跋連下

米元章跋祕閣續法帖。毛脫續字。謝安陸雲之輩。毛脫之字。

第六 宰相無恙時。毛本作宰相安和。

第九 玄度時何哉。毛本作時往來。

先君學士提行

記與劉無言論書。前空一行。其中於帝更而八分書一

碑。毛中作終無有字。奏朝散微雨。毛脫散字。

記石經與今文不同。譬諸宮牆。毛本牆作牆。

銅戈辨。咸陽空三格。無以鑄兵。遂以鑄三鍾。毛脫兵遂以鑄四字。

鵲雀賦辨。此近世人語。毛本無世字。

古器辨 長保二親宋本作小字

論飛白法 亦壯之非古也毛脫亦壯之三字

論書八篇 而闕古人之□ 今不問正一字毛作正草。

許掾書毛脫許字。了自善思毛脫善字。

論書六條 不堪正羞澀。毛作不堪位置舉止羞澀。比來

□□陽。毛空一字。疑襄字。或作淮陽。後有跋云。逸少破羌帖

亦作淮陽。當考。

商山觚圖觚說 勿曰相爲用。按芻古笏字。毛本誤分爲二。

小注自與至用。川本去此七字。姑存以俟知者。

周方鼎說 單子方鼎下。毛本有則謂之從彝王伯方鼎九字。

周髀周洗說 主上空三格。

以下影宋本

跋逸少破羌帖後 世務嬰懷。毛本嬰作經。

跋崇甫所書真誥冊後 符又不工。毛本工作巧。

跋世說第三卷後 迎奉 三聖御容。毛不空。

跋蜀道圖後模本 此之畫也。毛本無之也二字。

跋祕閣第三弓濃帖後 弓。毛本均作卷。 因彙次御府圖。

毛本作祕閣。

跋黃庭經後 渡江飄淪。毛作始濟浙江遇風飄淪。

跋織錦回文圖後 于五行多類。毛本多下有弗字。

後當有紹興丁卯黃訥跋。今失去。

北堂書鈔跋

唐虞永興撰北堂書鈔。猶在隋時。故隋志著錄作一百七十四卷。唐志作一百七十三卷。中興書目及宋志並百六十卷。與今本同。晁氏讀書志云。一百七十三卷。與唐志合。又云。家本百二十卷。則自相牴牾矣。又云。八十部八百一類。今本起帝王部。帝王類總載。迄地部石類。凡十九部八百五十二類。非殘闕卽併省。已非永興之舊。自修文殿御覽失傳後。以此書爲最古。王伯厚云。二館舊缺書鈔。惟趙安仁家有之。眞宗命內侍取之。手詔褒美。是北宋已極難得。至明萬曆間。常熟陳禹謨始以鈔本傳刻。臆改臆刪。臆補。並以他書易之者。指不勝屈。前人所謂刻書而書亡者。此也。大約所據本顛倒錯。

落。既不能校讐。又不能闕疑。致此滌草。宋商邱刻施注蘇詩為邵青門臆改臆補

亦是原闕非真喪心病狂也。嘉慶中嚴鐵橋客治城山館。淵如先

生屬以校刻。江西糧道胡念農稷助以貲二百金。鐵橋竭八

九月之力。校定卷百三十二起百六十止。而荃孫所得嚴刻。

止卷一百三十九起一百四十二止。又卷一百四十九起一

百五十五止。其十一卷。短十八卷。抑止刻此數耶。或此印本

未全耶。然求之三四十年。亦未見有二本也。一百三十九卷

車總篇後有嚴手跋三行云。嘉慶二十年十一月初六日校

此卷起。至十七日校訖。每日黎明即起。至二鼓或三鼓就睡。

窮十二日之力。始得清本一卷。嗚呼難矣。烏程嚴可均記。其

難校亦可想見。鐵橋所云五本。堯圃一。淵如一。月霄一。小米

一鐵橋自留一。今蕘圖本歸畧里瞿氏。淵如本歸祥符周氏。餘三本不知何往。惟淵如所藏謂有雲章閣及紉佩齋收藏印。是元陶九成寫本。是王伯申錢既勤洪筠軒王石華與鐵橋同校之本。是爲最佳。光緒初年。吾友姚彥侍李橋農假得瞿氏本。悉心校讐。行款雅飭。惜印百卷而彥侍病歿。橋農亦供職離蘇矣。後粵東據陶本校出刊行。較之陳本自相天壤。然訛字閒或有之。又未得見鐵橋刻本。吳興張君石銘購得孫藏副本。縣紙明鈔。首有淵如先生長跋。取粵本相校。孫本有而粵本無者亦有數十條。此佳本在五本之外者。爰取姚印本一百卷。嚴刻本十一卷。又舊鈔校大唐類要本數卷。不足從孫本鈔足之。訂爲一帙。亦可云百衲本書鈔矣。

幽怪錄續錄跋

乙二卷五

唐牛僧孺撰(玄)怪錄一卷。四十四事。李復言撰續錄四卷。二十三事。四庫入之存目。荃孫收得明初松溪書林陳應翔本。則幽怪錄分四卷。續一卷。迥然不同。按衢本晁氏讀書志陳氏書錄解題俱載牛僧孺(玄)怪錄十卷。今稱幽怪錄。殆避宋諱。朱國禎湧幢小品指爲楊用修所改。然周密癸辛雜識已稱幽怪錄。湧幢之說殊不足據。岑里瞿氏收得臨安太廟尹家書鋪刊行本續錄四卷。亦二十三事。胡心耘先得影鈔本印入琳瑯祕室叢書。跋云以廣記核之。於各題注明卷數。又得宋本所無者二十事。爲補遺二卷。跋又云。只辛公平寶玉妻、梁革三條廣記無之。證其非出於廣記。荃孫復檢廣記

賈玉妻在三百四十三。梁革在二百十九。只辛公平一事無著。至拾遺上杜子春、張老、裴證三事。拾遺下柳歸舜、劉法師、韋氏子、尼好寂、刁俊朝五事。陳應翔本均作牛錄。不云續錄。況劉法師未有昭應尉薛公幹爲僧孺叔父言也。足爲牛錄之證。胡本失此一句。只李紳琴台子、唐儉、馬震四事。或者續錄所遺。又於宋人姬侍類偶得龜奴侍坐一條。爲胡氏所未見者。

陶隱居先生集跋

梁陶弘景撰。隱居事蹟見梁書南史。據集中尋山志云。先生去世後。久無人編錄文集。至陳武帝禎明二年。敕令侍中尙書令江總始撰文集。先生以梁大同二年解駕。至是五十二

載矣。文章頗多散落云。攷隋經籍志梁隱居先生陶弘景集三十卷。又內集十五卷。至唐藝文志僅載陶弘景集三十卷。內集已佚矣。晁陳皆未著錄。後人從明道藏本錄出。卷首載昭臺弟子傅霄編集。大洞弟子陳桷校勘。從各種類書輯出。短帙殘篇百不存一。前有江總序。尙存其舊。文內有跋云。禮部侍郎王公欽臣哀其遺文三十二篇以爲一卷。南豐曾恂復得寒夜愁胡篇二詩於古樂府集中。雖沈鎮軍均聖論於弘明集中。因考其製作先後爲之次。以類相從。并殘文附於後。攷傅霄字子昂。晉陵人。博古明經。善書。尤精隸古。由儒入道。隸居常州天慶觀。高宗召主太乙宮祠。乞還茅山。賜號明真通微先生。領山門都道正住持。玉晨觀建雷平院。往來山

中四十年。搜訪真祕。拯救窮乞利益甚深。重編隱居集。修茅山舊記。著作惜多無傳。紹興二十九年己卯正月立春日化。見茅山志。陳桷亦宋道士。後跋署紹興癸亥。汲古閣刻入道藏。亦二卷本。荃孫得舊鈔二卷。前文後附錄。然細繹之。首標云貞白先生陶隱居文集上。次卷載傳一篇。注有惜闕首葉。不知標題。傳末有內傳。卷中後附邵陵碑銘昭明序。後標云貞白先生陶隱居傳記。卷下并有陳桷後序。似是宋編大洞原書。汲古無內傳。指海止文集分二卷。均非原書。又借葉石君本校字。又補續高僧傳內一文。似較完美。

詩話總龜跋

詩話總龜前集五十卷。後集五十卷。宋阮閱撰。閱字閱休。白

號散翁。舒城人。嘗爲郴州守。著有郴江百詠。散翁因古今詩

話附以諸家小說。分門增輯。前集分四十七門。

提要作四十五門

所

集書一百種。後集六十四門。

提要作六十一門

所采亦一百種。摭拾

舊文。多資攷證。北宋諸名家詩集佚事。搜采無遺。先名詩總

後改此名。明宗室月窗道人刊本止九十八卷。前集中缺寄

贈中下兩卷。卽每卷各有脫逸共數十條。月窗爲明太祖六

世孫珙。楚郡弟子員。前有山東海陽副使郴陽李易序。又嘉

靖甲辰江西饒州府同知海鹽張嘉秀序。及珙後跋。提行空

格。原出自宋。又得一明鈔本。前五十卷。門類與月窗本同。後

五十卷。多御宴一門。少徵法節候詠物三門。月窗本缺者全

行補足。惟引及輟耕錄。

刻本無

決是後人羈入。門類之顛倒。編

次之互異。亦互有得失。再考漁隱叢話序云。閱所編詩總類。頗爲詳備。獨元祐諸公詩話不載焉。遂謂此書成於宣和癸卯。是時禁元祐文字。因而未采。提要亦仍其語。細讀一過。內采二蘇黃秦詩話。卷卷有之。并錄玉局遺文。東坡詩話。並采百斛明珠。亦東坡手筆。豈元任未見之耶。館臣亦未見之耶。又云。閱書惟采摭舊文。無所考正。此則多附辨證之語。尤足以資參訂。然此書有辨證者。多與叢話同。又元任序云。詩總所載皆不錄。是元任撰書在散翁之後。何以兩書相同者甚多。並直標苕溪漁隱云云。又似互相採摭。殊不可解。疑此集殘缺。後人取漁隱叢話補之。卽月窗本不足據。鈔本亦如此。不知天壤間尙有善本。以決吾疑否也。

陵陽集跋

宋韓駒子蒼撰。子蒼蜀仙井監人。政和中召試。賜進士出身。累除中書舍人。權直學士院。南渡初知江州。事蹟具宋史文苑傳。子蒼蚤以詩鳴。蘇黃門一見。比之儲光羲。暨與徐東湖遊。遂受知于山谷。晚年或寘之江西詩派中。乃曰。我自學古人耳。提要言其不願寄王氏門下。亦猶陳師道之辦香。南豐不忘所自。非必其宗行之迥別也。今所傳止四卷。得三四鈔本。字句頗有不同。放翁所刻臨川石本。久已不傳。究未知誰爲定本也。

朱長文樂圃餘藁跋

樂圃藁百卷。燬於建炎之亂。其從孫思哀集於煨燼之餘。編

成古律詩百六十有三。記五、序六、啟七、墓志五、世譜題跋祭文、賦、書、銘各一類。爲卷十。以銘、墓志、史傳、書題表奏附於卷末。蘇州壬辰中秋二十二世孫岳壽刊本。後有補遺二卷。徐君梧生以借書園舊鈔本假我。校核訂誤甚多。多紹熙甲寅孟冬姪孫思一序。無琴史序。有華嚴經讚序。又無補遺。是此本岳壽未見也。因互補足。以成完書。

僑吳集跋

僑吳集十二卷。元鄭元祐撰。元祐字明德。至正丁酉除平江路儒學教授。移疾去。後七年復擢浙江儒學提舉。卒於官。家本遂昌。其父希遠徙錢塘。元祐又流寓平江四十年。其集遂以僑吳名。集本明德所自訂。弘治丙辰張習刻。跋云。元祐有

遂昌山人集。與僑吳集通錄之。得詩文之精純者。併爲十二卷。仍名僑吳集。是集爲習所重編。非明德自訂之舊。而遂昌山人集。今亦不傳。中缺兩葉。蕘圃從鈔本補足。有蕘圃跋。顧千里跋。明德與夷白均負盛名。而詩文似遜於夷白。鮑渌飲有佚文一冊。尙是渌飲手彙。今附於後。

夷白集跋

元陳基撰。基字敬初。臨海人。至正中以薦授經筵檢討。明興召修元史。而仍放還。見明史文苑傳。詩十一卷。文二十四卷。外集詩文各一卷。大抵皆元代所作。一鈔本出自元刻。提行空格悉依之。一弘治八年張習刊十二卷本。習跋自云未見原編。今兩本合校。刊本有而鈔本無者。詩九十六篇。文二十

三篇。字句更多改易。今鈔錄一冊附後。提要據朱存理跋云。拾遺卽存理於海虞本錄出。內有陳基傳謝徽詩。此本無之。轉錄刊本尤義所撰傳一篇。不知與存理所見本異同否。

唐揭武梁祠畫象跋

錢塘黃小松司馬小蓬萊閣金石文字八種。均摹宋揭漢碑。獨至武梁祠畫象十四幅。推爲唐揭。蓋因隸續隸圖缺失之處。此本獨存。必在洪氏所見之前。朱竹垞稱爲墨光可鑑。元氣渾淪。驗爲唐本不虛也。明中葉藏武進唐氏。今存唐印鶴微一印。後歸海甯馬氏道古樓。竹垞查田跋之。呂無黨諸人觀款。又歸邗上馬氏玲瓏山館。佩兮雪礪跋之。後歸小蓬萊閣。覃谿跋之。遂摹以傳。後又有何媛叟、張石舟、何蓮舫諸跋。

歲在丙辰歸於沛甯李一山。不知何年爲火所燬。首三幅伏戲祝誦神農已佚。黃帝帝顓頊帝倍三幅止存一角。尙存整幅八紙。竹垞諸人題字大半完好。一山之高祖母卽小松先生女也。曾印行秋盦遺藁。淵源有自。慨慕手澤。輾轉訪求。夜以繼日。幸遂所願。并付良工裝潢。重徵題詠。雖屬不完之太璞。猶留囊下之焦桐。固以慰一山好古之盛心。亦小松先生所默祐也。荃孫前見漢石經於漢陽萬梅巖。所見成湯靈臺魏元丕朱龜譙敏四碑於溠陽端忠敏。所見王稚子雙闕於同郡費昶懷所。今又見此寶物。自詫暮年眼福。出昶瞻先生之上。所未見者范式碑耳。與小蓬萊閣有緣哉。丙辰五月朔。江陰繆荃孫跋於京邸。

夏禹長於地理脈泉知陰隨時設防退爲

下缺

案新搨本

有肉刑二字陰與刑韵

曾子質孝曰通神明貫感神祇有靈乘乃後世凱式

下缺

案翁釋第四句爲著靈來方第六句□□無綱無是樨
字當從翁說明方綱是韵

閔子騫與後母居愛有偏移子騫衣寒御□事

今按石

本後作假當從漢書注御車失樨御下無缺字失樨二
字甚明樨與移同韵

宋搨邨閣頌跋

邨閣頌原刻重刻宋刻明刻。歟訟紛如。當以諸城王春林石
門碑釋爲禡。以諸君子均見打本。而王君親至碑下故也。此

碑原刻在白崖。有缺蝕而無椎鑿。宋田克仁重刻在靈巖上。有克仁紹定五年自紀。明申如墳就田碑磨治重刻。原石至今尙存。打碑人多愛搨申刻。以其較明析也。此宋搨本與李道士藏石門頌紙墨均同。大約同時所搨。前半較多四十二字。後半則同。沈釋甚細。止全育子遺之子。不應釋作勿耳。或有洪所未見之字。因隸釋則轉輒傳摹。或有遺漏。未能以之斷搨本之在洪前也。

劉熊碑陰跋

昔年曾見舊搨劉熊碑。一翦標。一整幅。翦標費西蠶所藏。整幅劉鐵雲所藏。先後歸伺齋。曾跋其後。據王建張祐兩詩定爲蔡中郎書。今原碑尙在延津學宮。爲會稽顧君鼎梅訪得。

止碑陰尙存五十四字。以隸釋證之。昭合。豈非瓌窳。碑側宋人題記。亦見隸釋。跋云。元祐中蘇邁書。胡戢之語。謂此與劉寬碑同。建詩爲不誣。建詩云。蒼苔滿字土埋龜。風雨消磨絕妙辭。不向舊圖經中見。無人知是蔡邕碑。洪氏舉此詩爲證。考張祐亦有題酸棗驛前碑詩。云。蒼苔古澀字雕疏。誰道中郎筆力餘。長愛當時遇王粲。每來碑下不關書。唐中葉人詩如此。似可作證。洪氏止知其一二耳。王評見慈恩寺題名。眉陽蘇字下存之兩筆。緣督釋爲道。不知隸釋明著蘇邁。是又字不但督緣未緝隸釋。蓋係與鼎梅作跋。知以隸釋證題名。未及此跋。均可謂失之目睫。又攷阮閱詩話。總龜舉蘇邁嘗作酸棗尉。有詩云。葉隨流水歸何處。牛載寒鴉過別村。句亦可

喜。邁曾爲酸棗尉。碑側此題。更無疑義。昔覃谿止見巴子藉雙鉤本。從皇帝之玄起。荃孫得見全幅。從君諱熊起。又見碑陰五十餘字。是福勝於覃谿矣。第七行眞字。卽尹眞之眞。隸釋以季甯一排互倒。

漢扶風丞李寓通閣記跋

漢李寓表在褒城石門摩崖。楊孟文頌之下。嘉慶甲戌諸城王春林大令森文訪得之。錄著於石門碑醇。此碑亦係紀述修路之事故。有萬民懽喜行人蒙福之語。大臺疑係閣道地名。李君以永壽元年始解大臺政。由其興此。殆言修路之功。行人得以去險就夷。故萬民懽喜也。後敘歷官所至。詞甚簡古。漢書百官公卿表。右扶風治內史右地。與左馮翊京兆尹

爲三輔。皆有兩丞。右扶風二千石。丞六百石。後漢百官志中興都雒陽。河南郡爲尹。以三輔陵廟所在。不改其號。但減其秩。又少府屬有尚符璽郎中四人。書作璽。石刻作璽。與張納功德敘璽書封都亭侯同。郡國志武陽屬犍爲郡。書作犍。石刻作犍。與楊君石門頌馮緄碑並同。胸忍屬巴郡。成固屬漢中郡。宜禾都尉屬敦煌郡。廣至縣治昆侖障。西域傳明帝永平十六年征匈奴。取伊吾盧地。置宜禾都尉以屯田。遂通西域。此記刻於桓帝永壽之後。置宜禾都尉已八十餘年。碑云換漢中成固令。漢書薛宣傳。升賞與薛恭換縣。師古曰。時令條有材不稱職者得改之。案卽今所謂對調。取其地相宜也。荃孫同治甲戌親訪石門。出褒城東門。循褒水南行。山石

壁峭劣不容趾。約十里始至石門。大如三閒屋。可通車馬。南壁石門頌。頌下卽是碑。右爲楊淮表紀。北壁後石門銘空處。悉宋人題名。門之西爲郇君開道碑。下卽宋晏袤釋文。再東得宋晏袤李苞開道題名釋文。旁有斷石。導者云。此卽李苞潘宗伯題字石下截。上截墮入襄水。不可縱跡。門外又得李苞題字二行。字約寸許。爲前人未著錄。吳清卿前輩始拓之。江有大石枕水。刻袞雪二字。分書無款。字勢似宋人筆。崖上亦摹此二字。款爲魏武帝書。則後人翻刻也。江口有石如日。刻石盆二字。盆內外皆宋人題名。盡聚之得四十餘段。再回縣寓。已日昃矣。

齊樂陵王百年及妃斛律氏雙志跋

按齊書皇建元年庚辰十一月立世子百年爲太子。時年五歲。河清三年甲申六月殺樂陵王百年。止九歲耳。死時自知不免。留塊與其妃斛律氏。妃把塊哀號不食。月餘亦卒。塊猶在手。拳不可開。其父光自擘之乃開。是妃死在樂陵王之後。志言死於樂陵王前一年。不合一也。河清二年樂陵王止八歲。妃死。傳言十四歲。志言十五歲。如二年十五。則三年年十六矣。不合二也。王志言葬在三月。通鑑言六月。白虹貫日。殺百年以厭之。月亦不合三也。後主時掘地得小屍。內參竊言百年太子也。使當年葬於鄴城西北刊石下泉。何人不知不合四也。近來作僞甚多。此卽僞品。

宋搆郎官石柱題名記跋

此宋搨郎官石柱題名記。西安原刻。紙墨精緻。古香襲人。眞海內孤本也。覃谿跋中不甚滿意。另石印都南濠所藏一本。則覃谿三跋六詩。並作校勘。意中以彼本爲眞矣。而轉有僞帖一說。橫梗於中。又懾於王元美董香光之疊相寶重。不敢決以爲僞。吾友湘舲據此搨爲陝本。舉屈集臣爲證。爲覃谿下一轉語。荃孫細閱兩本。一陝本。一蘇州重刻本。雖刻有前後。而宋搨則眞而非僞也。此本之善。湘舲已標出。而唐宋人官署題名。無不自書。此本後之二十一人名。大小行楷隸不一。皆本人手書。皆開元廿九年刻也。後此面爲人磨去重刻。今僅存光破二字。古碑如此者亦多。蘇州刻則專重張長史之書法而已。不列他人也。願請熟於碑版例者共證之。亦題

四詩於後。

一碑吳郡一關中。米芾駢羅寶墨同。瘦勁遺蹤追褚薛。淙詩龔頌本同工。

守溪二美氣縱橫。震懾覃谿少定評。不特鐫碑人在陝。況兼二十一題名。

紀聞自古說中吳。何意人將僞本呼。大好涪溪元結頌。資江南北兩鉤摹。魯公中興頌資江兩本皆唐人摹刻現存殘字轉出涪溪本之上

附會常譏賞鑒家。漫將書法辨金沙。若從輿地兼官制。若輩何從置齒牙。彭文敬公云從來賞鑑家多不學卽文董亦不免然使一一考核精塙焉得有如許

真蹟流傳如此兩本明白曉暢何必作疑辭以混後生之耳目乎

姑孰帖殘本跋

姑孰帖止潛研堂金石跋尾著錄。云今存太平府學者。惟卷第三第八第九數石而已。第三爲東坡先生書。洪容齋所刻。其跋云。東坡先生所書詩文十篇。邁得之刻於當塗郡齋。今合計詩偈表詞止六篇。則已失其四矣。第八第九皆放翁書。而第八卷首題云。放翁先生帖三。第九卷首題云。放翁先生帖四。可知放翁之帖散佚更多。卽其存者亦多不全。竟未審何人所刻。又有一石乃蘇子美書。淳熙戊戌知州楊倓刻。前半亦闕。不知其卷第也。瞿木夫過此。尙見是石。荃孫於戊戌專人往搨。太平學碑石帖已不存。殆燬於洪楊之亂矣。今此搨蘇子美書楊倓跋。如錢所見。坡公止四篇。又失其二。放翁書止存帖四。又失去帖三。零落更甚。前另一帖與鳳墅帖標

題不合。然亦舊搨。零珠碎璧。均可寶矣。

覃谿日記。姑孰帖是十卷。蘇子美在乙。東坡在戊。放翁已庚辛壬。

宋李伯時五百羅漢圖跋

宋李伯時五百羅漢圖長卷。絹本。天人縹緲。龍象蹠蹋。洋洋鉅觀。雖細如一髮。亦勁如鐵畫。自非宋人不能。題跋自元虞伯生至國朝澹歸大師。亦流傳有序。下款曰龍眠山人李伯時。小印伯時二字朱文。第三子僧保侍側曰。前人云宋人用筆各自成家。故往往不署款。又有有印無款。有款無印之說。況伯時以不署款著名。此何以有款有印。並有別號歟。予舉周草窗志雅堂雜鈔示之。盧鴻志伯時畫。龍眠山中人。

李伯時書。與此相同。相傳舊說。不可不知。不可過泥。凡事如斯。必須活看。句齋蜀川圖斷。以爲南宋人作。因崇慶府景蘇樓。爲南宋之確證耳。至於此卷。無瑕可擊。陸存齋十國朝貢圖。筆力輒弱。望而知其非宋人矣。

萬上邊西谿漁隱圖跋

萬輞川西谿漁隱圖。爲曾賓谷作。翁覃谿隸首。極精勁。並三詩。桂未谷跋。賓谷自爲記。題跋自袁倉山而下得三十六人。牛腰大軸。足爲鉅觀。宣統己酉三月游西谿。時春水方生。一望瀾漫。短蘆簇簇。嫩綠如鍼。交蘆庵。秋雪庵。間皆八九月最勝處。今觀此卷。迴憶前游滬杭。一日而近深秋在邇。奉約息。尸諸君往游勝地。荃孫可作導師矣。卷中佳什最多。尤喜誦

蘭雪五律。云屋後青楓樹。門前碧玉流。漁聲涼入夢。山骨瘦於秋。待月招漁弟。看雲卧醉侯。君心同浩蕩。三十六閒鷗。苦愛溪西住。蹉跎又幾年。卻來騎鶴地。同話釣魚船。泛宅花成海。披蓑雪滿天。詩盟期不負。遲我野梅邊。注余欲卜居西溪。迄今未果。而題黃小松秋影庵圖末章云。頻年再喚總宜船。行過西溪一輒然。一版秋心應補畫。夕陽紅到亂鴉邊。不禁益爲神往。

祭夏彥保文

嗚呼。夏君胡遽云亡。僅睽違夫旬日。迺迴隔乎幽明。縱年齡之已高。亦病體之未康。聞凶問而驚惋。拭老淚之淋浪。況結契如金石。同役志於縹緲。歎隻輪而單翼。臂推車而失航。遽

左執乎殤中。孰下招於巫陽。嗚呼。夏君胡遽云亡。溯先德之音容。列輩學之門牆。溯心傳之遠耀。覩藻采之高翔。廣趨庭之異聞。學詩禮分鏗鏘。推經笥之五鹿。開祕籥之九羊。璠璣耀夫晶采。干莫拭夫鋒鏑。負渥洼之異質。未騰蹕於天閭。屈杞梓於良材。莫甄采乎棟梁。書十上而不見收。終結齋於中腸。洎八州之都督。招籌筆於衡湘。移舟車於嶺嶠。入火維之南方。綠陰桃柳之樹。紅噙荔子之香。弔古朝漢之臺。尋詩抗風之廊。時幕府之聲名。曰餓虎與貪狼。君介然而獨立。乃潔身而永臧。得如願而不顧。酌貪泉兮何妨。君有君之嗜好。惟我知之獨詳。錯刀贈兮美人。寶墨製兮君房。香沈水兮真臘。崑上下兮端阬。羅几席之珍玩。迺窮困之如常。逮辛亥之三

載。爰遄返於江鄉。門未改乎衡茅。世已閱夫滄桑。遭疾疾之
纏綿。幸未中夫膏肓。今春三之閏月。因志事而就商。雖高談
之如昨。尙偃臥乎匡牀。手羣書而不釋。疊枕上而縱橫。時匡
子所不逮。迺頒布於四方。囑采訪之漸齊。再相見於秋涼。孰
握別而歸來。忽計書之在旁。嗟百身之莫贖。歎一念之難償。
慟虞淵兮不返。惜瑤草之徒芳。君手書夫卷軸。積珍祕於巾
箱。迺一紙之不留。勅六丁兮取將。況似續之莫承。歎矜寡而
徬徨。窘斯人兮至此。窺天道之渺茫。嗚呼哀哉。風蕭蕭兮永
日。露慘慘兮爲霜。年應龍蛇之讖。星沈牛斗之芒。子山思舊
之感。士衡歎逝之傷。庶昔哀於蕙帳。冀重泉兮椒漿。嗚呼哀
哉。尙饗。

藝風堂文漫存卷五

